

اصول فقه در سلسلری

مباحثندن

اراده، قضا و قدر



مجلس اعیان اعضای کرامندن و دارالفنون عثمانی حقوق مدرسه سی مدرس محترمی

سید بک



مشارالیه حضرتلرینک مساعدۀ مخصوصه لریله ۱۳۳۸ سنه سی
دوقتوره صنفی طلبه سی طرفندن طبع ابتدی برلشدوه



در سعادت

قدر، مطبعه سی

۱۳۳۸



اسلامده اراده

رسالتهناه افندمن شریعت اسلامییه بی تدریجی بر صورتده بکرمی اوچ سنهده وضع و تأسیس بیورمشلردر . واحکام شرعییه بی وضع ایدرکن اوپله فتهانک بیانی کی بونک ارکانی درتدر ، شونک شرائطی آلتیدر . یاخود بو عقدک شرائطالعقادی شونلردر ، شرائطصحقیده بونلردر صورتنده ونظری برطرزده وضع ایتمه مشلردر . بامعکس بوتون احکام شرعییه بی عملی برطرز وشکلده وضع و تأسیس ایتمشلردر ، اکثریسی امر ونهی صورتنده بیان بیوردیلر . واکثربا امردن وجوبی ویاندب وایاحمی؟ نهیدنده حرمت ویا کراهتمی قصدایتدیکفی بیان ایتموب بوجهتی اصحابک فهمنه ترك ایتمشلردی .

نماز قیلمق ، آبدست آلمق وحج ایتمک کی افعال وحرکاته واشکاله تعلق ایدن جهتلریده فعلاً تعیین وتبیین ایدرلر و « بن ناسل یاپورسم سزده اوپله یاپیکز . » دیه اخطار وتنبیه ایدرلردی . اصحاب کرام حضراتیده تعلیمات سنییه توفیق حرکته رسالتهناه افندمن ناسل یاپارلرسه اونلرده اوپله یاپارلردی . بالآخره فقهای اسلام ، احکام شرعییه بی برر برر استنباط ایله علم صورتنده تدوین ایتمشلر وبناء علیه برجنسدن اولان احکامی کتابلره ، کتابلری بابلره وبابلری فصللره تفریق ایله مشلر واسمنهده « علم فقه » تسمیه ایتمشلردر .

رسالتهناه افندمن ، احکام شرعیه فرعییه بی بوجه مشروح عملی بر صورتده وضع و تأسیس بیوردقلری کی اعتقادیاته متعلق مسائلیده نظری برطرزده تعمیق ایتموب هرکسک آکلایه جنی بر صورتده بیان بیورمشدر . اولوقت عرب ملتی امی ایدی . ایچلرنده یازمق او قومق بیلن پک نادر ایدی . بویله امی بر

ملته (۱۳۰۰) سنه اول اعتقادیانه متعلق احکامك بوتون غوامض منطقیه سی تشریح و تحلیل ایدرهك بیان ایتك شبهه سز اونلرك سویه علم وادرا کته موافق دوشمز ایدی .

بونك ایچوندرکه زمان ایلر بلدکجه وعالم اسلام توسع ایتدکجه احکام فقهیه یی تمیق ایدن فقها ظهور ایتدیکی کبی اعتقادیاتی ده قاریشدیرانلر ووقت سعادتده موضوع بحث اولمایان مسائلی اورتیه چیقارانلر ظهور ایتدی .

ایشته بوندن طولایی کرک مسائل فقهیه ده وکرک اعتقادیانه بین العلما اختلاف افکار حاصل اولمش و بالنتیجه فقهیه مختلف مذهبیلر حصوله کلدیکی کبی مسائل اعتقادیانه دخی بر چوق فرقلر ظهور اینمشدر . حتی رسالتنامه اقدمن حضرتلری بر معجزه اولق اوزره بونی خبر ویرمشدر . (هرامت متعدد فرقلره آیرلشدر . اتمده ۷۳ فرقیه آریله جقدر . و بردانه سی فرقه ناجیه در) دیمشدر . اوقرقه ناجیه کیمدر سؤالنه (بنم واصحابك بولند یغمز طریقہ سلوک ابدنلردر) بیورمشلردر .

(بتمش اوج) کثرتدن کنایه در . و عریده (۷۳) کثرته دلیلدر . فقط بعض ساده دلان بر طاقم تصدیقلر ، تقسیملر یا بهرق اعتقاد فرقلربی (۷۳) فرقیه چیقارمغه چالشمشلردر . بونلرك باشلوجهلری اهل سنتله برابر (یدی) فرقه درکه فرقه ناجیه اولان اهل سنته مقابل آتی دانه فرقه واردر .

۱ — جبریه

۲ — معتزله

۳ — مشبهه

۴ — مرجئه

۵ — خارجیه

۶ — شیعه

فرقه سی در . بونلرده بر ترتیب یوقدر . و بونلر مهربری آیری آیری شعبه لره آیریلشلردر .

مثلاً شیعه فرقه‌سی متعدد شعبه‌له آیرلمشدر . مثلاً ؛ ایرانده (امامیه) ،
 یمن‌ده (زیدیه) ، سوریه‌ده ، جبل لبنانک ، شامک بعض جهتلرنده (اسماعیلیه)
 یاخود (باطنیه) فرقه‌لری کبی که هندستانده بر قسمی موجوددر . دیگر اقسامی
 بوکون حیات‌ده یوق کبی در . شیعی فرقه‌سی علمی اولمقدن زیاده سیاسی بر
 فرقه‌در . خلافت غوغاسندن حصوله کلمشدر . امام علی کرم الله الوجهه
 طرفدارانی درلر .

شیعی دیمک بر کیمسه‌نک اتباعی دیمکدر . بونلر امام علی اتباعندن اولمق
 اعتباریله شیعی دیمشدر . صفین محاربه‌سندن صکره [۱] ظهور ایتدیلر . او
 محاربه اتناسنده هم شیعی لر ، هم ده خارجیلر ظهور ایتدی . و بو ایکی فرقه
 بر برینک ضدکاهلی در . شیعی لر امام علی‌یه فرط محبت کوستره رک اوندن واولادندن
 باشقه خلیفه یوقدر دبدیلر و حق بر قسمی حضرت علی بی الوهیت مرتبه‌سنه
 حقیق-اریرلر . نتکیم اولوقت عبدالله بن سبا نامنده بر ذات (انت الاله حقا)
 یعنی « حقا که سن الله‌سک » دیدی و حضرت علی اون در حال نفی ایتدی .
 خارجیه ، شیعه‌نک ضدی اوله رق امام علی بی تکفیر ایدرلر . ایشه او
 مشهور جل و صفین و نهروان محاربانی بو ایکی فرقه بی تولید ایتدی .

معلومدر که « صفین » محاربه‌سنده حضرت امام علی ایله معاویه ، آرالرنده کی
 نزاعک حل و فصلی ایچون (حکم) اصوله مراجعت ایتشلردی . خارجیلر
 بواسوله مخالفت ایده رک (الحکم لله) دبدیلر و هم معاویه بی و هم ده امام علی بی
 تکفیره قدر کیتدیلر . حضرت امام علی ، خارجیلرک اشبو (الحکم لله) سوزینه
 جواباً (کلمه حق ارید بها الباطل - بوطوغری برسوزدر که اونکله باطل مراد
 اولونیور) دیمشدر . و امام علی نک بوجوابی آندن سوکره ضرب مثل اولمشدر .
 عینی زمانده حضرت علی یه فرط محبت کوس-ترلمسندن ده شیعه‌لک ظهور
 ایدیور . دها سوکره تفصیلاتی تاریخ اسلامده کورمش اوله جفکز وجهله

[۱] حضرت عثمانک شهادتندن سوکره واقع اختلافات نتیجاسنده معاویه و حضرت
 علی طرفدارانک حرب ایتدکاری موقع در .

شیعیان کرده کندی آرالرنده اویوشه مامشله و هر بری علی نك بر اوغانی خلیفه یامق ایسته مشدر. شیعی فرقهلری آراسنده اهل سنته قارشلی کوستریلان عداوتدن فضله بر عداوت وضدیت واردر .

زیدی لر : فقهده بزم کبی در . مذهب حنفی بی قبول ایتمشله در . یالکیز اعتقادده معتزله درلر .

امامی لر ؛ فروعهده کندی کندیلرینه مجتهددرلر . اعتقادده معتزله درلر . معتزله ؛ اك علمی بر فرقهدر . کندیلرینی اهل سنتدن تمیز ایدن اراده وقدر مسائلی کبی بعض مسائلدر . عینی زمانده معتزله عمل ایماندن جزؤدر دیرلر . اهل سنته کوره ایمان قلبه طأند بر کیفیتدر ، عمله تعلق ایتمز .

عمل ایسه فعله تعلق ایدر . اونك ایچون علمیه عامل اولمیانه کافر دینمز . معتزله یه کوره عمل ایماندن بر جزؤدر . عملده نقصان ایمانده نقصاندر . بناء علیه نقصان عمل مؤمنی ایماندن چیقارر واساساً دیندن مقصد عملدر . اگر عملدن طولانی بر شیشی دینمزسه ، دینك مقصدی حصوله کزدیورلر وبوصورتله ایمانله کفر آره سنده بر منزله نك وجودینه قائل اولویورلرده مرکب کیچمه نه مؤمندر ، نه ده کافر در . ایکسی اورتسی بر شیدر دیورلر .

اهل سنت ایسه اونلرك علمیه عمل ایتمکدن طولانی مؤاخذه ایدیلر جملرینی ، فقط ایمانك قلبه طأند بر شیشی اولدیغی سـویلیورلر . ایسته معتزله نك وصف بمنزله نك بر سببی بودر .

وبرده معتزله ، قدری انکار ایدرلر . انسانلر اراده مطلقه یله مریددر . قول کندی فعلنك خالق در دیرلر . بونلرك دها باشقه اختلافلی مسائلی وارسه ده بونلری ایضاحه لزوم کور میورم .

بوکا مقابل بونك ضدی اولان (جبری) مذهبی واردر . اونلرجه انسانده اراده یوقدر . انسانلرك حرکتی اضطراری در . انسانلر افعالنده مجبور درلر دیرلر . هر شیشی قدره حمل ایدرلر .

مرحیبه ایسه امید وار اولانلردر . یعنی جناب حقك مغفرت الهیه سـنه

استناد ایدہ رک گناہلری عفو اولنہ جفته قائل اولانلردر . کناہدن طولای
انسان عذاب ایله معذب اولمازوبناء علیہ کناہ مؤمنہ عذابی موجب اولماز دیرلر .
مشبهه ؛ بکزه تجبی یعنی اللہی جسمہ بکزه درلر . صفات الہیہ بی تجسیم ایدرلر .
اهل سنت ایسه شمدی یه قدر بوصایدیغمز فرقلرک هپسنه مفايردر . اهل
سنته مقابل فرقلرک هیئت مجموعہ سنه (اهل بدعت) اطلاق اولنور . بوصورتله
بالجمله فرق اسلامیه اهل سنت ، اهل بدعت ناملریله ایکی یه آیریلرلر .

اهل بدعتی کچن درسده سویله مشدک . شمدی ده اهل سنتی ایضاح ایدہ لم :
اهل سنت دیمک رسالتپناه افندیمرک و کبار اصحاب کزینک سالک بولندقلری
طریقت و مسلكه سالک اولان انسانلرک هیئت مجموعہ سیدر و اهل سنت اولاً
متقدمین ، متأخرین ناملریله ایکی یه آیریلور . عصر سعادندن اعتباراً (۳۰۰)
تاریخ هجریسنه قدر کلن علماء اهل سنته متقدمین اطلاق اولنور و سلف دینور .
آندن سوکره کلن علماء اهل سنته ده متأخرین نامی ویریلور . بومتقدمین ایله
متأخرین اهل سنت آره سنده اعتقاد اعتباریله فرقلر یوقدر . یالکیز قرآن کریمک
متشابهاتی تأویل خصوصنده بر فرق واردرکه اوده (سلف) یعنی (متقدمین)
اهل سنت متشابهات قرآنیہ بی تأویل ایتزلرو اولنلرک معناریله ده اشتغال ایتزلر .
فقط بالآخره بین العلماء بر جوق مناقشاتی موجب اولدیغندن طولای متأخرین
اهل سنت قرآن کریمک متشابهات آیتلری ده تأویل جهتی التزام ایتشلردر
و آکلایشلرینه کوره تأویل ایتشلردر .

متأخرین اهل سنته کلنجه : بونلر (اشعریه) ، (ماتریدیہ) ناملریله ایکی
فرقیه آیریلورلر . اشعریه (امام ابو الحسن الاشعری) حضرت تلمینه تابع اولان ،
آنک افکار اعتقادیہ سنی قبول ایدن علمانک هیئت مجموعہ سنه ؛ ماتریدیہ ده
(امام ابو منصور ماتریدی) حضرت تلمینک اتباعنه اطلاق اولنور .

ہوایکی ذات محترم ، متأخرین اهل سنتک ایکی بویوک امامی ، شیخی
ورئیسیدر . اهل سنت اعتقادی اهل بدعتہ قارشى مدافعه ایتشلردر .
امام ابو الحسن الاشعری حضرتلری اصحاب کرام دن وفقہای اصحابدن

(ابوموسیٰ الاشعری) حضرت ثلثینک اولادندند. تاریخ وفاتی مضبوط دکلسته ده (۳۲۰ - ۳۳۰) سنه هجریه لری آره سنده وفاتی محقق در. کنیدیسی بدایه معزله مذهبه سالك ایکن بالآخره رجوع ایده رك اهل سنت مذهبی قبول ایتمش و آرتق اهل سنت اعتقاداتی مدافعه خصوصنده متعدد کتاب تألیف ایتمش و آخر عمرینه قدر او یولده نشر علومده بولمشدور. ایشته کنیدیسنه منسوب ذاتلرده ده (اشعریه) دینور. حتی جمع یابارق (اشعریه) دخی دینور. شافعی، مالکی، حنبلی مذهب لری سالك علمائک بر قسم کلیسی اشعریه درلر. امام غزالی و استادی امام الحرمین، تفسیر کبیر صاحبی فخرالدین رازی کبی بر جوق علما اشیو مذهبه سالكدرلر.

ابو منصور ماتریدی به کلنجه: بو ذات محترم تور کدر. سمرقندله بخارا آره سنده (ماترید) دینلن بر قصبه اها لیسندند. کنیدیسی اوراده یقشمش و اوراده کسب کمال ایتمش اهل سنتک و بالخاصه امام اعظم ابو حنیفه حضرت ثلثینک افکار اعتقادی لری هر کسه قارش یو یوک بر اقتدارله مدافعه و آتی تروج ایتمش و او یولده نشر علومده بولمش یك قیمتی بر ذاتدر. (تأویلات قرآنیه) نامیله غایت فیاض بر کتابی وارد. ناقص اولارق استانبول کتبخانه لرنده بولنور. تاریخ وفاتی (۳۳۳) سنه هجریه سی در. نه قدر مذهب حنفی سالكی علما و ارسه جمله سی ماتری دی درلر. اونک ایچون ماتریدی حنفی دیمکدر. فقهده حنفی، علم کلامده ماتریدی دینلن ذوات عینی اشخاصدن عبارتدر. بوا یکی امامک تاریخلری مؤخر اولدینی حالده کنیدیلرندن اول کان فقه های حنفیه، کذاک مالکیه، شافیه و حنبلیه بویله ماتریدی، اشعری دنیلمسنتک سبی بوا یکی ذات تابع اولدقلری اماملرک افکار اعتقادی سنی تشریح و تفصیل و تحلیل ایتمش اولمالرندن طولانی کنیدیلرندن سوکره کان ذواته ماتری دی، اشعری دنیله شدور.

[۸ - ۹] مثله اعتقادیده بوا یکی فرقه آراسنده فرق وارد. فقط بونلر برنجی درجه مسائل اعتقادی دن دکادر. اونک ایچون یکدیگر لری اهل سنتدن غدايدرلر و بربرلرینه قارش ابراز خصوصت ایتمزلر. شو قدر

واركه اشعيرلر دهـا بر آڝ متعصب اولديغىندن بهض اشعري كـتابلرنده ماتريدى فكـرينى معتزله فكـرى كـي كـوـستـيرلر كه طوغـرى دكلدر . يالكـنز (اراده) ، (قدر) مسئـلهلرنده ماتريـدلر ايله معتزله آراسنده مقارنت واردور . ديكر نقطـهـلرده آرالرنده كلى فرق واردور .

ازجمله معتزله عمل ايمان دن جزؤدور . ديرلر وعبادات ده قصور ايدنلري مؤمن عد ايتزلر . حالبوكه ماتريـدلر ديكر اهل سـفـتـله برابر عكسنى ادعايدرلر . وبونلري يالكـنز فاسق عدايدرلر وحقـلرنده كى مجازات اخرويهـنك موقت اولديغى سويلرلر . معتزله ايسه مجازات ابديهـنى قبول ايدرلر و جناب حقه عدالت مطلقه اسناد ايدمـرك عفو قبول ايتزلر . يعنى فاسقك عفوئى جائز دكلدر ، ديرلر .

بووبوكى برچوق مسئلهلرده ماتريـدلرله معتزلهلر آرهـسـنده بوـيولـده فرقلر واردور . يالكـنز قضا وقدرده برله شيرلر . طيبى كرك اشعري سـلـكـنه سـاـاك بوـيوك عـامـا . كرك ماتريدى نامى آلتـنـده كى اعظم فقها هر برى برر مجتهد اولديغى جهنله آرالرنده بعضى فرعى مسائل اعتقاديهـده اوافق تفك فرقلر واردور . لكـن نظر دفته آلهـنـه حق درجهـده دكلدر . بو فرقهـلرى عنوان اعتباريله مجملـاً اوكرندك . فقه اعتباريلهـده اراده وقدر حقتـده كى تلقيلرندن بحث ايدمـجـكـز . بوكا بودرسده لزوم واردور . چونكه اصول فقه بر فلسفه حقوق درسى اولمق اعتباريله بو بحث ايله علاقه دارد و چونكه انسانلرده اراده يوقدر دير ايسهـك حقوقك معنائى قالمـاز . يوق انسانلرده اراده واردور . افعال انسانيهـده شعورى بر حركت ، بر اراده واردور دير ايسهـك اولوقت حق وعدالتك منشائى تدقيق ايدمـبـيلـورـز .

اراده و قدر

اراده مسئلهـنى نظر اعتباره آلتجه شرقده يعنى عالم اسلامده درت فكر وبوفكرلرك اطرافنده طولانمش درت فرقه كويررز :

مثلاً برنجیسی : جبر مطلق

ایکنجیسی : جبر متوسط

اوچنجیسی : تفویض مطلق

دردنجیسی : تفویض متوسطدر .

جبر مطلق فکرینه قائل اولان علمانک هیئت مجموعه سنه جبریہ نامی ویریلیر .
بونلر اراده بشری کلیاً انکار ایدیورلر . انسانلر جمادات کی حرکت ایدرلر .
حرکتلرنده شعور واراده یوقدر دیورلر . بناءً علیه انسانلر افعالنده مضطردر ؛
مختار دکدر ، دیورلر .

یوفکر ؛ بر کره ضرورت عقلیه وبداهته منافی بر فکر اولدینی جهتله شایان
قبول دکدر . فضله اولاری بو فکره کوره بوتون تکالیف شرعیه ، عبث
وباطل اولوق ایجاب ایدر . بونلرک سندلری قران کریمده کی بعض آیتلردر ،
وبونلرک ظاهری تفسیرلیر . مثلاً : (جناب حق سزی ، وایشلریکزی خاق
ایتمشدر) ، (جناب حق هر شینک خالق در) ، (هرشی من طرف الله در)
کی بر طاقم آیتلر وار بونلره استناد ایله اراده بشری کلیاً انکار ایدرلر . یوکون
یوفره نک افرادی یوقدر . امام اعظم زماننده واردی . صوکره لری منقرض اولمشدر .
یالکیز اشعریلرک تلقیسی بو فکره قریب اولدینی جهتله اونلر چوقدر .
اشعریلر بر کره انسانلرده اراده بی قبول ایدیورلر . بونی قبول ایله بالطبع
جبریہ دن آریلورلر . فقط لفظ اعتباریله در . حالبوکه معنایه انفاذ نظر ایدر ایسه ک
کوردورزکه نتیجه ده اشعریلر جبریہ ایله برله شیورلر . بونلر قدرت واراده بشری
قبول ایله برابر تأثیرینی انکار ایدیورلر .

دیورلرکه قدرت واستطاعت دیزیلن شی انسانده فعل ایله برابر حاصل اولور .
فعلدن اول انسانده قدرت یوقدر . انسانده جناب حق طرفندن قدرت خاق
اولونور اولونماز فعلده حاصل اولور ، وانسان اوقدرتله او فعلی یاپار . فقط
یوقدرتک فعلده هیچ تأثیری یوقدر . قدرت ده ، فعلده جناب حق طرفندن
مخلوقدر . انسانک نه قدرته نه فعلده هیچ تأثیری یوقدر . یالکیز انسانک

« کسب » ی واردور ، ایشته او قدر .. ایشته بو کسب ایله انسان کاسب و جناب حق خالق قدر . خلاصه اشعریلره کوره بشرک قدرتی ده ، اراده سی ده ، افعالی ده جناب حق طرفندن مخلوق قدر . انسانک بونلرک هیچ برنده دخل و صنی بوقدر . انسانک یالکیز « کسب » ی واردور . ایشته بو کسب سیبیلله انسانلره مسئولیت و مؤاخذه توجه ایدر .

لکن ایچ ، تأمل ایدیلیرسه آکلاسیلیرکه شو مطالعه یه کوره « کسب » سوزی ، لفظ بی معنادن عبارتدر . چونکه بر کره انسانده قدرتک ، اراده نک تأثیرینی انکار ایتدکدن صکره « کسب » ک معنای قالماز . آنک ایچوندرکه اشعریلره « کسب » نه در ؟ دینلنجه مقنع جواب بولمقدن اظهار عجز ایدرلر . بونلر (کسب) ده قائل اولیه جقلردی . فقط قرآن کریم افعال بشریه بی انسانلره اسناد ایدیور و از جمله (لها ما کسبت و علیها ما اکتسبت) دیور و انسانلره کسبک وجودینی قبول ایله یور . آنکچون اشعریلره کسبک وجودینی قبولده مضطر قالمشلردر .

ماتریدیلر بوفکری قبول ایتمه مشلر و بوکا جبر متوسط دیمشلردر . چوتکه بوفکر اساس اعتباریله بشرده قدرت و اراده نک وجودینی قبول ایله طوغریدن طوغری به جبره قائل اولیور . لکن بونلرک تأثیرینی انکار ایتدیکی ایچون طولایبیلله جبره قائل اولمش اولیور . بوجهتله بوفکره (جبر متوسط) دینور . جبریه حقنده وارد اولان اعتراض ، اشعریلر حقنده واردور . یعنی بوجبر متوسط فکرینه کوره ده تکالیف شرعیه نک عبث و باطل اولماق لازم کلیر . بواعتراض ، قوتلیجه براعتراض اولایغندن بوکا ابوالحسن الاشعری جواب بوله مایور و جناب حق مالک مطلقدر . اوکا عبث اسناد اولنه ماز . ملک مطلقده ایستدیکی کبی تصرف ایدر . بویه براعتراض وارد اولماز دیور . بو ، قناعت بخش بر جواب اولمادیغندن دیگرلری ، از جمله فخرالدین رازی کبی بعضیلری اراده نک انسانلردن اولدیغنی قبول ایدر . فقط بونکله جبردن قورتولونماز ، نتیجه اعتباریله بوده جبره واریر . چونکه انسان اولایر شینی

دوشونور ، صوكره آرزو ايدر و آندن صوكره يابار . يعنى انسان بر شيك
اجراسنى اراده ايتمزدن اول آنك اجراسى ايچون بر اشتياق و آرزو حاصل
اولور كه اراده انساندن اولسه بيله اواشتياق و آرزو انساندن دكل ، جناب
حقندرز . سن برشى كورورسك ، بوسنده بر آرزو حصوله كتيرر و بو آرزو
يواش يواش كسب شدت ايدرك اراده يي توليد ايدر .

كذلك يمك يمك فلى اختيارى بر فعلدر . لكن يمك فعلنه مباشرتدن
واونى اراده دن اولكى آچلق كيفيتى اختيارى دكل ، جبرى واضطرار ايدر ،
من طرف الله در و يمك آرزو و اراده سنى و نهايت مجبوريتى حصوله كتيرن
اودر . ديمك كه اختيارى ظن اولونان يمك فلى ابتداء اختيارى ايسده ،
اتهاء اضطرار ايدر . بوتون افعالده بويله در . آنكه چون انسان فاعل مختار
صورتنده فاعل مضطردر . اختيارى كي ظن اولونان فعللر هب بر سبب تحننده
اضطرار ايدر ديورلر .

بومطالعات قسماً طوغرى ايسده قسماً ده طوغرى دكلدر . چونكه انسان
بوتون افعال و حرركاتى مطلقاً بر طاقم اسباب و دواعى آلتنده اجرا ايتمز . بعضاً ده
بلا سبب و يا خود اهميتىز بر سبدن طولايى حر كنده بولونور و برده اراده يي
توليد ايدن اسباب و دواعيك جمله سى غير قابل مقاومت دكلدر . اكثريسى قابل
مقاومتدر . انسان اراده سيله اواسباب و دواعيك مقتضاسنى ايفادن امتناع ايد بيلير .
آچاقتدن اوله درجه سنه كان بعض انسانلرك اولونجه يه قدر كندى اراده سيله
يمك بيمكدن امتناع ابتدئى بيله كورولمشدر .

معتزله يه كانه : معتزله جبريه نك تماماً ضديدر . بونلر صورت مطلقه ده
انسانلر كندى اراده لريله حر كت ايدر لر و بناء عليه انسان كندى افعالنك موجودى
وحتى خالقيدر ديرلر و افعال بشر يده اللهك خالق و اراده سنى انكار ايدرلر .
وحتى اعمال و حر كات بشر يه نك بر قسمى مراد الهى خلاقه اوله رق واقع
اولور ديرلر . خلاصه معتزله يه كوره اراده و افعال بشر يه جناب حق طرفندن
انسانلره صورت مطلقه ده تفويض اولونمشدر . آنكه چون انسان كندى اراده

و قمانده سربستی، نامه و حریت مطلقه به مالکدر . جبر به فکرینه (جبر محض)
دیندیکی کی معتزله نك بو فکرینه ده (تفویض مطلق) و یاساده جه (تفویض)
اطلاق اولنور .

ماتریدیلره کانهجه : بونلرده اشعریلر کی جبر به ایله معتزله آراسنه کیردرلر
واشعریلر کی (لاجر و لا تفویض و لکن امر بین امرین) یعنی « جبر به نك
دیدیکی کی جبرده یوقدر ، معتزله نك دیدیکی کی تفویض مطلقده یوقدر .
بلکه ایکیمی اوردیسی برشی وارد و دیرلر ، ماتریدیلرده انسان کاسب و جناب
حق خالقدر دیرلر و بونقطهده اشعریلر ایله تماماً برله شیرلر .

یالکز ماتریدیلر کسب دینلان شیئی که اراده جزئییه در . آنک جناب حق
طرفدن مخلوق اولدیغنه قائل اولمازلر . اراده جزئییه کسب ، قصد ، عزم ،
اختیار کله لر یله افاده ایدلک ایسته نیلان شی طوغریدن طوغری به انسان
طرفدن واقع اولور دییورلر . اگر بوده جناب حق طرفدن مخلوقدر دنیلورسه
اووقت انسانلرک اختیاری ده افعالی ده اضطراری اولمش اولور و تکالیف شرعیه
باطل اولمش اولور دییورلر و بز طوغریدن طوغری به کندی مشاهداتمزه
اضطراری حرکات بشریه ایله اختیاری حرکات بشریه آره سنده فرقلر اولدیغنی
کوریه ورز . مثلاً المزك کندی اختیاریمزه واقع اولان حرکتیه وعشه دن
متولد حرکتی آره سنده پك بیوک بر قرق بولوندیغنی صورت قطعه ده بیلیرز .
شبهه یوق که برنجیسی کندی قصد و اراده مزله حصوله کلپور ، ایکنجیسی ایسه
صرف مرضی برحالت عصبیه دن نشأت ایدیور .

کذلک بز حرکات اختیاریه مزده توقیف و ترکنه مقتدر اولدیغمز حرکات
ایله مقتدر اولدیغمز حرکات آراسنده کی فرقی ده بیایر و تقدیر ایده ورز . مثلاً
مستوی اراضیده کی حرکاتمزی ایسته دیکمز زمان توقیف ایده بیلیرز . حالبوکه
دیکنه مائل بر دره کنسارندن بری بزی آشاغی به ایتویرسنه دوشمه دن کندی
اختیار مزله آشاغی به قدر کمال سرعتله اینه رزده کندیمزی یاری بولده اینمکدن
منع ایده مه یز ، یعنی بواپیشی حرکتیمزی توقیف ایده مه یز ، چونکه بو حرکتیمزده

بر قوه جبریه نك تأثیری وارد در . خلاصه با بدها به بیلیرز که بزده ایکی نوع حرکت وارد در . بری نبضك ، قلبك جهاز تنفسیه نك حرکاتی کی حرکات اضطراریه ، دیکری کندی اراده مزله اولان حرکات اختیاریه ، بوندن ده بیلیرز که حرکات اختیاریه مزده اختیار و اراده بی انکار بداهتی انکار در .

ایشته بتون بوه بو کی احوال کو ستریور که بزده اویله اشعریلرک دیدکری کی بلا تأثیر قوری بر قدرت و اراده دکل ، بالعکس تأثیری اولان بر قدرت ، ترجیحیه مقتدر بر اراده وارد در . بز بو قدرت و اراده سایه سنده پایه بیله جکمز شیلری یامغه و بو کی شیلر ده یامغله یا مامقدن برینی دیکرینه ترجیحیه مقتدر اولوزز . اکر حقیقت اشعریلرک دیدکاری کی اولسه یدی یعنی قدرت و اراده مزك هیچ بر تأثیری بولونماسه یدی ذکر اولنان افعال و حرکاتمز آراسنده هیچ بر فرق بولونماق لازم کلیدی . زیرا تأثیردن خالی قدرت و اراده ایله حرکت ، روز کارك سواقله حرکت ایدن آغا چلرک ، یار اقلرک حرکتی کی حرکات اضطراریه دن بشقه برشی دکلدر که بطلانی ضرورت حس و بداهت عقل ایله نابتدر .

خلاصه ، مسئله اشعریلرک دیدکاری کی اولور ایسه انسان کندی قصد و اختیار ایله هیچ برشی یامیور ، هر نه یامیور سه رأساً ابتداءً و جبراً جناب حق طرفدن کنديسنده خلق ایدیلن و کنديسنك اصلا شعوری تعلق ایتمه بن بر قدرت مجرده ایله یامیور ذمك اولور . و بصورتده انسانی (سن نیچون بونی یایدك ، شونی یامدك) ديه مسئول و بر جوق احکام شرعیه ایله مکلف طومتق عبث اولور . مآریدیلر علیه شوبولده براعتراض در میان اولونمشدر : (اراده جزئییه مخلوق الهی) اولمایوبده صرف انسانك ضعیله واقع اولور ایسه ، انسان آنی خالق اولمق لازم کلیر . بو ایسه « هر شيتك خالق الله در » مفهومنده اولان « الله خالق كل شیء » آیت جلیله سنه منافیدر .

بوکا ایکی درلو جواب ویرلمشدر . برنجی جواب شـودر : (شبهه یوق که هر شيتك خالق جناب حقدر . لیکن اراده جریئه شیتی دکلدر . زیرا (شیء)

دیه امر موجوده دینیر ، لغت عربیسه ده شی موجود دیمکدر . اراده جزئییه
ایسه موجود دکدر . چونکه اراده جزئییه اراده کلیه نك بر فعله تعلقندن
عبارتدرکه وجود نفس الامریی اولقله برابر وجود خارجیسی یوقدر . بو
بوکی شیره ، مثلاً اوطور مق ، قالمق کی معنای مصدریله (حال) اطلاق
اولونور . بوکی احوال نه موجود ، نه ده معدومدرلر . یالکیز وجود نفس الامری
ایله موجود اولان حقایق نفس الامریه دندرلر . بومثللی حالله خلق تعلق ایتمز .
خلق وجود خارجی ایله موجود اولان امور خارجییه تعلق ایدر . بونک
ایچوندرکه اراده جزئییه خلقه محتاج دکدر .) بوجواب محقق شهر صدر -
الشریعه ، نك (توضیح) نده مذکوردر .

ایکنجی جوابده شودر : (اراده جزئییه ، انسانک کندی صنعی اولدینی
بدهت و ضرورت عقلیه ایله ثابت و متحقق اولدیغندن انکارینه مجال یوقدر .
بوجهتله (الله خالق کل شیء) کی خلق الهی نك بوتون اشیا به عام و شامل
اولدینی کوسترین نصوص شرعیه نك عموماتندن (اراده جزئییه) بی اخراج
وبناء علیه او عموماتی (اراده جزئییه) دن ماعدا اشیا واموره تخصیص ایتمک
ضروریدر .

وبرده ذکر اولونان نصوص شرعیه بوجه مروض تخصیص ایدلیوبده
عموم و شموللری اوزره ایضا ایدیه نك اولورلر ایسه ، بوتقدیرده انسانلرک
کندی فعل و حرکتلرنده مضطرب و مجبور اولملری لازم کلیر . بوندن ده علی العموم
امر ونهیک ، ثواب و عقابک ، مسئولیت و مؤاخذه نك ، مدح و ذمک خلاصه
بوتون تکالیف شرعیه نك عبث و باطل اولسی اقتضا ایدر . ایسته بوکا محل
براقامق ایچون سالف الذکر آیات قرآنییه وسائر عمومات شرعییه بی آفتاً بیان
ایتدیکمز وجهله تخصیص عقلی ایله تخصیص ایله نك ضروریدر .) بوجوابده
محقق کبیر (ابن همام) نك « مسایره » نامنده کی کتابنده محرردر .

آشاعیده بحث مخصوصنده ایضاح اولنه جنی اوزره عام اولان کلملر ، خاص
کلملرله تخصیص ایدیه چکی کی عقل ایله ده تخصیص اولنه جفندن بوراده (جناب

حق هر شيك خالق در) آيتسده جناب حقك كنديسي عقل ايله تخصيص اولونمشدر . يعنى جناب حق هر شيك خالقيدر اما كنديسنك خالق دكلدر . ذات الوهيتي بو آيتك شمولندن استثناء عقلي ايله مستنادر ، دينير . او حالده اراده جزئيه دخی بو آيتدن استثنای عقلي ايله مستنادر . چونكه قرآن نصل بر دليل شرعي ايسه عقلده بر دليل شرعيدر . حتى ادله شرعيه نك الكوتليسي عقليدر . بناء عليه عقل ايله نقل تعارض ايدرسه عقل ترجيح اولور . برهان عقلي مقتضاسنجه نقل تاويل اولور . بحثي بر آرزوها توضيح ايتك اقتضا ايديور . بر كره انسانلر حادثدر ، مخلوقدر . اجزاء بدنیه من نصل جناب حق طرفندن خلق ايدلش ايسه ملكات و اوصاف عقليه و ذاتيه مزده مخلوقدر . بناء عليه بزده كي اراده صفتي دخی مخلوقدر . فقط اراده جزئيه بودكلدر .

اراده ني ايكيه آيره جفت .

۱ - اراده كلييه ،

۲ - اراده جزئيه

اراده كلييه: اراده صاحبي بولنان على العموم حيواناتده موجود بر صفتدر . بو صفت جناب حق طرفندن خلق ايدلش بر صفتدر . مثلا دورديفز زمان هيچ بر فعلی اراده يوق . فقط بالقوه اراده موجوددر . ايسته بو اراده كلييهدر . و مخلوقتي متفق عليهدر . بتون قواي جسمانيه و روحانيه ناصل مخلوق ايسه بو قوه ارادهده اويله جه مخلوقدر . بو اراده كلييه نك معين بر فعله تعلق ايتمي . كفيتهده اراده جزئيه دينير كه اراده كلييه نك معين بر فعله صرف ايدلسي ديمكدر . بوراده (جزئي) ديمك ، معين و مشخص ديمكدر . كانك ضدی در . بوقسه بو كونكي عوامي مناسيله آز ديمك دكلدر .

(كلی) افراد كئيره به شامل و محمول اولان شيدر . (جزئي) معين و مشخص اولان شيدر . مثلا (انسان) كليدر . چونكه زيد ، بكر ، علي ، ولي كي افراد انسانيه به شامل و آبري آبري هر برينه محمولدر ، فقط افراد انسانيه نك هر بری بر جزئيدر ، ديكرينه شامل و محمول دكلدر . زيد ، بكر

کمی افراد انسانی که هر برینه انسان در دین بر او حمل صحیح اولور . فقط او افراد که برینی دیگر برینه حمل و اسناد ایتک صحیح اولماز . و بناءً علیه زید بکردر ، یا خود احمد قندی علی بکردر دینیز و بویله بر حمل صحیح اولماز . چونکه افراددن هر برینک کندیته کوره بر هویتی واردر ، دیگرینک هویتدن باشقادر .

اراده ده بویله در ، بتون افراد انسانی ده موجود بر صفت در . فقط بالقوه موجود در و جناب حق طرفندن انسانلره بخش ایدلمش بر قوتدر . و بویله بالقوه موجود اولدقجه اوکا اراده کلیه دینیز . نه زمان خارجه ظهور ایدر یعنی نه زمان معین بر فعله تعلق ایدر سه اولوقت بوکا (اراده جزئییه) اطلاق اولتور . چونکه معین بر فعله تعلق ایتکله کندیسی ده تعین و تشخیص ایتش اولور . ایشه اراده جزئییه دیمک بودیمکدر . بونی ایجه ضبط ایتک لازمدر . خلاصه (اراده جزئییه) دیمک ، علی الاطلاق قوه ارادیته ک ، تعبیر دیگرله اراده صفتنک معین برایشه صرف و استعمال ایدلمسی دیمکدر . بزم (قصد) ، (عزم) ، (اختیار) کله لر یله افاده ایتک ایستدیکمز معناده بودر ، یعنی اراده جزئییه در . آنکچون بو کله لر الفاظ مترادفه قیلندندرلر .

اراده صفتی ، ماتریدیلره کوره برایشک طرفیته یعنی یا بوب یا عاقل جهت لرینه صاحدر . بناءً علیه اراده صفتی برایشک یا بلمسی جهته ده ، یا بلماسی جهته ده علی سبیل البدل تعاق ایده بیلیر . اشعریلر بونی انکار ایدیورلر . یعنی برایشک هم یا بلمسی جهته ، هم ده یا بلماسی جهته تعلق ایتکله صالح اراده صفتنک وجودینی انکار ایدیورلر . دیورلر که برایشک فعلی جهته باشق ، ترکی جهته باشق اراده تعاق ایدر و بوحین فعلده جناب حق طرفندن خلق ایدلمکله واقع اولور . کورولور که اراده محشده ماتریدیلره اشعریلر آراسنده مهم بر فرق واردر . اشعریلر اراده کلیه بی و بالتیجه اونک معین بر فعله صرف و استعمالی کیفیتنی انکار ایدیورلر . و بوسورتله نتیجه ده (جبرییه) ایله برلشمش اولوبورلر . چونکه اشعریلر اراده جزئییه جناب حق طرفندن مخلوقدر ، انسانک اونده دخل و صنعی یوقدر ، دیورلر . ماتریدیلر ایسه « خایر ، اراده جزئییه مخلوق

دکدر. طوغریدن طوغری به انسانک صنعیه حاصل اولور. دیورلر. بونلرده نتیجهده معتزله ایله برلشمش اولوبورلر.

قدرتده ایکی به آریلیر :

۱ - قدرت کلیه

۲ - قدرت جزئییه

قدرت کلیه ، سلامت اسباب و آلات معناسنه درکه « ممکنست » ، « ممکن » دیمکدر . انسان بوقدرت کلیه ایله بر فعلک طرفیقه متمکن اولور .

قدرت جزئییه ، قدرت کلیه نك معین بر فعله تعلقی ، دها طوغریسی تعلقی ایدن بر فردی دیمکدر که فعل بونکله حاصل اولور . قدرت جزئییه ، قدرت حقیقیه در و علم اعتقاد علماسنك استطاعت دیدکری قدرتدر . بوقدرت جزئییه فعل ایله برابر وجود بولور ، آندن اول ویاسوکره موجود اولماز . اما سلامت اسباب و آلات معناسنه اولان قدرت فعلدن اول موجوددر . صحت تکلیفک شرطی اولان قدرت ، اشیو قدرت ومکنتدر . بو ممکنست موجود اولمازسه تکلیفده صحیح اولماز .

اراده کلیه ایله اراده جزئییهده بویلهدر . یعنی اراده کلیه فعلدن اول انسانده موجوددر . اراده جزئییه ایسه آنک تعلقندن حاصل اولور وفعل ایله برابر وجود بولور . یعنی موانعدن خالی اوله رق اراده کلیه بر فعله تعلقی ایدنجه عقبنده فعل من طرف الله حاصل اولور . وبناء علیه اوتعلقندن عبارت اولان اراده جزئییه ایله فعل بر زمانده وجود بولور . مثلاً انسان یورو مکی اراده ایدنجه یعنی کندیسنده موجود والله طرفندن مخلوق اولان اراده کلیه سی یورو مک فعلنه صرف و استعمال ایدنجه یورو مک فعلی باشلار ، آیاقلر حرکت کیر . ایشته ماتریدییه کوره انسانک کندیسی کی بتون قواسی ده ، اراده کلیه سی ده ، فعلی ده جناب حق طرفندن مخلوقدر . فقط یا لکیز برشی مخلوق دکدر که اوده اراده جزئییه سیدر ، اراده کایه نك افعاله صرفی کیفیتدر . ایشته بو ، اللهم مخلوقی دکدر ، انسانک کندی صنعیدر . مع هذا بوده جناب حقک مخلوقی اولان

قدرت و اراده کلیه صفتلرینه مستنددر ، یعنی جناب حقك اقدار و تمکینیه انسان طرفندن وجوده کتیریلیر . اکر بو معناه (اراده جزئییه) به جناب حقك مخلوقیدر دینیلیرسه ، بو طوغریدر . لکن بو باشقهدر . اشعریلرک دیدکلری کبی طوغریدن طوغری به رأساً و ابتداءً جناب حق طرفندن مخلوق اولوق ینه باشقهدر .

ایشته (اراده) بختنده ماتریدیلرک فکری بودر . اک طوغری فکرده بودر . وضعیت حقوقیه بی تمین و تصحیح ایده جک اولان فکرده بودر . چونکه وضعیت و مسئولیت حقوقیه بی تمین ایدن شی ، اراده نك حریتیدر . اراده حر و سربست اولیه جق اولورسه وظیفه و مسئولیت حقوقیه نك معناسی قالماز .

قدر

اسلامیت ده بر قضا قدر بحثی واردر . بو بحث دها اول انسانلر یارادلدینی کوندن اعتباراً باشلامش بو کونه قدر دوام ایده کلاشد . آوروپا فیلوسوفلرینک الآن ده مشغول اولدقلری مسئلهدر .

اوتهدنبری بزده بومسئله حقنده ایکی کله واردر : (قضا) و (قدر) . اونک ایچون ایکیسی بربرینه ربط ایله قضا و قدر دیرز .

اولاً بو ایکی کله نك معنالری آکلایهلم :

قضا : ابتدا بر شیشی قولاً و فعلاً فصل و قطع ایتمک و اونی تماملاماق معناسه وضع ایدلمشدر . بوندن آله رق (حکم) و (فصل خصومت) معناسنده و (ادا) ، (قضا) مسائلنده بر شیشک مثانی تأدیه ایتمک معنالرنده دخی استعمال اولنمشدر . انفاذ معناسنده قوللانیلور . اعلام ، تبلیغ معنالرنده دخی قوللانیلور . بونلرک بعضیلری مجازاً بعضیلری ده عرفاً استعمال اولتان معنالریدر . اصل معناسی بر شیشی فصل و قطع ایتمکدر .

قدر ؛ ایستر دالک فتحیله ، ایستر سکونیه تلفظ ایدیلسین هرایکیسی ده
قضا کلهسی کی متعدد معنایه قوالانیلمشدر. فقط اصل معنای (تقدیر) درکه
برشیک مقدار و کمیته تبیین و تثبیت ایتک دیمکدر. مقدار معناسنده مستعملدر.
معنای لغویلیری بو ، کلامی واصطلاحی معنایینه کلنجه :

قدر ، جناب حق طرفندن علی العموم اشیانک و بالجله کائناتک و حادثاتک
ازلده احوال و اوصافی اسباب و شرائطی ، زمان و مکانی ایله تعیین و تحدید
ایداسی دیمکدر . بو صورتله تقدیر و تعیین ایدیلان شیئه ده (قدر) اطلاق
اولنور . بو تقدیرده اسم مفعول معناسنه (مقدر) دیمک اولور . دانآ لسان
عربیده مصدرلر اسم مفعول مقامنده استعمال اولنورلر . او جهلدن اولوق
اوزره قدرده اسم مفعول معناسنده قوللانیلهرق مقدر معناسنه آلنیر .

قضا ایسه او شیک یعنی ازلده تقدیر اولنان شیک بر مقتضای تقدیر
لایزالده ساحه وجوده کلسی دیمکدر. بوایضاحدن آ کلاشیلورکه قدر مقدم،
قضا مؤخردر و هر قضا قدردر ، فقط هر قدر قضا دکدر . بوجهتله آرالرنده
عموم خاصی مطلق وارددر. قضا اخص ، قدر اعمدر .

ساحه وجودده تجلی ایدن شی هم قضا و هم قدردر . لکن هر قدر ساحه
وجوده کلمش اولسادینی جهتله قضا دکدر . یعنی تکیون ایدن، کسب حقیقت
ایدن برشان اولان هر حادثه قدردر . بونکله برابر عدمده قابوبده ساحه
وجوده جیقه میان ، تکیون ایتمین شیلرده قدردر . بر مثال ایله ایضاح ایده لم :

برانسان صیجاق حمامدن چیققدن صوکره چیرجیلاق ، عریان برحاله
حمامک باغچهسینه کیدوب یاریم ساعت اوراده دوراجق اولسه شهبهسز اوکیسه
خسته اولور . بو قدردر. چونکه اوزانک حمامده کسب رخاوت ایتمش اولان
وجودینی بالآخره شدت برودته عرض ایتمی خستهلق تولیدی ایچون برسبب
اولوق اوزره تقدیر ایدلمشدر . بو مقدردره اونک ایچوندرکه او آدم هر حاله
خسته اوله جق در . فقط عینی زمانده او ذات حمامک باغچهسینه جیقه قابوبده
صیجاق بریرده تحفظ ایدرسه خسته اولیه جنی کی بالعکس واقعه اسنحمامدن

طولانی نتیجه استفاده ایدر. بوده قدردر. بوده ازله تقدیر ایدلشدور. بو
 صورتله حرکت ایدن او ذات خسته اولیه جفندن بوخسته لق عدمده قلمشدر.
 ایشه اونك خسته اولماسی کیفیتی تقدیرده برقدر. کذاک برانسان شرائطی
 جامع، قوه انباتیهی حائر بر اراضی ده فن زراعته موافق بر صورتده اجرای
 زرعیات ایدر، تخم اکرسه اویردن محصول آلیز. اکرسه، معطل بر اقرسه
 برشی آلاز. آلمسی بر قدر اولدینی کی، آلامسی ده بر قدردر. کذاک اویرده
 بغدادی اکرسه بغدادی، آریه اکرسه آریه آلور. بوده بر قدردر.
 آریه آلمق ایچون بغدادی اکرسه آلامه سی ده بر قدردر.
 خلاصه :

قدر مسیباتی اسبابه ربط ایتک، مسیبات ایله اسباب آراسنده کی مناسبات
 وروابطی و آنلرک شرائطی تعیین ایتکدر. بناء علیه کائناتده و حادثانده هیچ
 برشی یوقدر که معین بر سبب تحتنده ظهور ایتش اولماسون. هر شیک و هر
 نتیجه نك مطلق بر سببی اولدینی کی اونك ده اسباب مختلفه سی واردور.
 بواسباب و بواسباب ایله مسیبات آره سنده کی روابط و مناسبات برر دستور
 الهی در. بونلره قران کریم سنت الهیه اطلاق ایدیور. از جمله استعین بالله
 (ولن تجد لسنة الله تبديلا...) آیت جلیله سنده سن؛ سنت الهیه ایچون
 هیچ بر تبدیل بولامازسک، دییور.

یعنی بو دستورلر تبدل ایتز. هر شی بودستورلرک نتایجیدر. ایشه کرک
 وجودجه قوتلر، ضعفنر، صحت و خسته لقلر و کرک فردی، سیاسی، اجتماعی،
 حادثات عینی حادثات طبیعی کی هب برر معین سببه تابع و مربوطدرلر. اونلرک
 تحقق حالنده مسیبلری ده تحقق ایدر و بو تحققه مقدر دینور و حادثاتک اسباب
 و شرائطی، اوصاف و احوالیه ازله کی تعیینته ده (تقدیر معناسنه) قدر دینیر.
 ایشه قدر بوندن عبارتدر. زمانزده بک زیاده تعمیم ایدن وزبازدر اولان
 (ملک مقدراتیه حاکم اولمیدر) و (فلان ملت کندی مقدراتیه حاکمدر)
 کی تمیزلر بونهنایه آلتیجه طوغریدن طوغری به بوتیمیرلرده شرعه مخالف بر

۱ جهت یوقدر . حقیقة فردلرده ، ملئلرده مقدراتی گندی تعیین ایدر . چونکه هر هانکی بر ذات ، هر هانکی برایشه سلوکنده او ایشك اسبابنه توسل ایدر سه خارجی بر مانع بولندیفی صورتده هر حالده او ایش و او مقصد وجوده کلیر چونکه اونك بو صورتله حصوله کلمی تقدیر الهی در اسبابنه توسل ایتزسه او ایش ، او مقصد حصوله کلز . بوده تقدیر الهی در . اوده بوده قدر در .
(و ان من شیء الا عندنا خزائنه و ما ننزله الا بقدر معلوم) آیت جلیله سنده بوسوید کلمه اشارت وارد .

اونك ایچون هیچ بر فرد کنیدیسی معذور کوستروب کنیدی تدبیر سزلکنی تقدیر حمل ایده من بوتون حقایق حادثاتی نظراعتباره آلارق اونلردن بومسئله حقدده بر فکر ، بر الهام آلاحق اولورساق (قدر) ك معناسی ، ایضاحات سالفه دن عبارت اولدیغنی آ کلارز . نصوص قرآنیده بونی مؤیددر .
بر آیت جلیله ده (نفسکزی کوره کوره تهلیکه به القا ایتمه ییکثر) دییور . چونکه اوتهلکه بر قدر در . قانون الهی در ، اونك مقتضاسی حصوله کله جکدر . ایشته قدری بومعناده اولدیغنی کبی بزه او کره تن خلفای راشدین دن حضرت عمر در . قران کریم ده ظاهراً متعارض آیتلر کورلدیکندن و حضرت پیغمبر ده بوکبی حقایق الحکمة توضیح بیورمد قلرندن بوکبی مسائل قبالی قالمشدر .
مثلا بر آیت ده : (هرشی اللهندن در) دنیلمشدر . بونی کورن بر ذات معناسی آ کلا یاه من . آ کلا سه ده قدرك بر قدر لازم و متحتم اولدیغنی آ کلا ره . حالبوکه او یله دکل . اوت هیچ شبهه سز هرشی اللهندن در . هرشیک اسبابی جناب حق طرفدن تعیین ایدلش و او صورتله حصوله کلمشدر . بو معناجه هرشی اللهندن در . فقط بونکله برابر بنم حرکتیم خصوصنده صرف ایتدیکم اراده بر قدر متحتم و لازم دکلدر .

چونکه ایچن درسده ده سوبلدیکم وجهله جناب حق بنی خلق ایتدیکی زمان بنده (قدرت) و (اراده) صفتلری ده خلق ایتمش و بنی بر ایش یا بوب یا باماق خصوصلرینه متمکن و مقتدر قلمشدر . ایشته بن بوتمکین و اقدار

سایه‌سندده او قدرت و اراده می‌دیلدیکم جهته صرف ایدهرم . یا بمق جهته صرف ایدہ بیلہ حکم کبی یا بمق جهته صرف ایدہ بیلیم . چونکہ جناب حق طرفندن بزلرہ بخش ایدیلن قدرت و اراده صفتلری، افعالك هرایکی جهته صرف اولونمغه صالحدر . هانکی جهته صرف اولنورسه شرائطی جامع اولدینی صورتده اوجهت حصوله کایرہ ایشته بوده قدر و قضا دره بوده بر قانون الهی مقتضاسیدر . ایشته (وبالقدر خیرہ و شرہ من الله تعالى) نك معناسی ده بودر .

(صحیح مسلم) ده موجود (لِكُلِّ دَاءٍ دَوَاءٌ فَإِذَا أُصِيبَ دَوَاءُ الدَّاءِ بَرَأَ بِإِذْنِ اللَّهِ فَرُجِلٌ = هر خسته لنگ بر دواسی واردر . اگر خسته لنگ دواسنه اصابت اولنورسه بأذن الله اکتساب برأ و عافیت ایلر .) و (صحیح بخاری) ده موجود (فَرَّ مِنَ الْمَجْذُومِ كَمَا تَفَرُّ مِنَ الْأَسَدِ = آرسلاندن نصل قاچارایسه ک و جذام علتہ مبتلا اولان کیمسه دنده اوله قاچ) و هم (صحیح بخاری) ده ، هم ده صحیح مسلم) ده موجود (لَا يُورِدُ دُخْرَضَ عَلَى مُصَحَّرٍ = خسته دوه صاحبی دوه لرینی صاغلام و سالم دوه لرینک یانه کوتورمه سین) کبی بر جوق احادیث شریفه ، بوباده کی ایضاحات عاجزانه می مؤیددر . صوك ایکی حدیث ، دین اسلامجده خسته لنگ ساری اولدینی صراحة بیان ایدیور . بو حدیثلر الک موثوق واک صحیح حدیثلر در .

(صحیح بخاری و مسلم) ده محرر اولدینی اوزره خلیفه ثانی حضرت (عمر فاروق) رضی الله عنه عهد خلافتلرنده (۱۸) اون سکرز سنه هجریه سندده برای تفیش « شام » عزیمت مقصدیله و معیت خلافت پناهیلری ارکانیله مدینه منوره دن چیقار . شام جوارنده (سرخ) دینیلن قریبه مواصلت ایدنجه ، شام والیسی و اوردو قوماندانی اکابر اصحاب کرامدن و « عشرة مبشره » دن مشهور (ابو عبیده بن الجراح) حضرتلری ، بعض اصرای عسکریه ایله برلکده حضرت عمرک استقباله کلیر و شامده (وبا - طاعون) اولدینی خبر ویرر .

بو خبر اوزرینه حضرت عمر ، مشاهیر فقهایی اصحابدن (عباده بن عباس)

حضرتلری واسطه سیله معیت عالیارنده بولونان اصحاب کرامی قسم، قسم حضور
خلافینا هیلرینه جالب و دعوت ایدرو شامه کیدوب کیتمه مک خصوصنده اونلرله
استشاره ده بولونور. بر قسمی متراً علی الله شامه عزیمت، دیگر قسمی شامده
وبا تهاکسی بولوندیغندن مدینه به عودت رأی وفکرنده بولونور. حضرت
عمر بر مدت کندی کندینه تأمل ایتدکن صوکره ایکنجی رأی ترجیح ایله
مدینه منوره به عودته قرار ویرر. و بوقراری ینه مشارالیه (عبدالله بن عباس)
واسطه سیله معتلری ارکانه تبایغ ایدر.

بونک اوزرینه سالف الذکر (ابوعبیده بن الجراح) حضرتلری، بوقراره
اعتراض ایله (یا امیر المؤمنین، اللهم قدرندن می فرار ایدیورسکنز؟) دیر.
خليفة کزین جناب عمر، جواباً (کاشکی یا اباعبیده، بوسوزی سندن باشقه سی
سویلسهیدی) دیدکن صوکره (أوت اللهم قدرندن ینه اللهم قدرینه فرار
ایدیورز. رأیک نه در؟ سویله بقالم، سنک دوه لرك اولسه ده، بر طرفی اوتلی،
دیگر طرفی جوراق و شوره زار بر دره به ایتش اولسه، شمدي سن اودوه لری
اوتلی جهته ده رعی ایدر وقارنلرینی طویورورسه ک جناب حقك قدريله وبالمکس
جوراق وقوری جهته ده رعی ایدر، آج براقرسه ک كذلك جناب حقك قدريله
رعی ایتش اولمازمیسک؟) دیر و بوجواب حکمانه لریله حضرت ابوعبیده بی
الزام ایلر.

حضرت عمر صوک جمله بی سویله دیکی صروده، مقدما بعض خصوصات
ذاتییه سی ایچون غیبوت ایتش اولان اعظم اصحابدن (عبدالرحمان بن عوف)
حضرتلری کلیر ومسئله به واقف اولونجه (نم بوبابده معلومات مخصوصه
واردر. رسول اکرم صلی الله علیه وسلم اقدمن حضرتلرندن ایشیتمشدم:
(بر یرده «وبا» اولدیغنی ایشیتدیکنز زمان اویره کیتمه ییکنز. و بر یرده سز
بولوندیغکنز حالد «وبا» ظهور ایدنجه ده اوندن فرار آ اویردن چیقما ییکنز.)
بیورمشلردی.) دیر.

حضرت عمر، بو حدیثی ایشیدنجه رأی واجتهادینک بو حدیثه، بو حکم

شارعه تماماً موافق دوشمش اولدیغندن دولایی جناب حقه حد و ثنا ایدر وکړک کندی قراری وکړک بوحدیثک حکمی وجه ایله مدینه منوره یه عودت ایلر... بوحدیث ، هم (بخاری شریف) ده وهم (صحیح مسلم) ده موجود وصحی ائمه حدیث عندنده متفق علیه اولدیغندن اک موثوق واک صحیح حدیث لر دندره ایشته (اراده بشر) و (قدر) مسئله لر نده ماتریدی فقه سنک باشده امام الاثمه امام اعظم ابوحنیفه حضرتلری اولدینی حالده علمای حنفیه نک فکر و تلقیسی بودر . اک معقول وحقایق اشیایه اک موافق اولان فکرده بودر . حقوق ومسئولیت نقطه نظر نندنده برحقوقبی ایچون بوفکری قبول ایتمک ضروریدر . چونکه « جبری » نک دیدیکی کبی (انسانلرده هیچ بر قدرت و اراده یوقدر) و یاخود « اشعریه » کبی (انسانلرده قدرت و اراده و اراده او قدرت و اراده نک هیچ بر تأثیری یوقدر . انسانلرک اراده سی ده ، افعالی ده طوغریدن طوغری یه رأساً وابتداءً جناب حق طرفندن مخلوقدر) دینله جک اولورایسه ؛ انسانلری بوتون حرکتلرنده معذور کوزوب باشی بوش کندی حالرینه ترک ایتمک ، هیچ بر قید ایله مقید قیلماق ، هیچ بر تکلیف ایله مکلف و هیچ بر فعل و حرکت نتیجه سنده مسئول طوتماق و بوتون قوانینی وبالخاصه قوانین جزائییه و حکومتلری ، محکمه لری و خلاصه بالجمله تقییدات و تحدیدات اجتماعی و سیاسی رفع و الغا و ابطال ایله مک لازم کایر که بونک نه درجه ده کولونج و باطل اولدینی بدیهی و مستفی بیاندر ... بر جمله ایله سوبایه یم : بومسئله لرده « جبری » و یا نتیجه اعتباریله آندن فرقی اولمایان « اشعریه » فکرینه ذاهب اولق ، بوکون محیرالعقول بدایع مدنیه و مخترعات قیه وجوده کتیرن انسانلری صوغولجاندن ده آسانی عد ایتمک دیمک اولور .

*

* *

قدر و اراده بحثنک عقیبنده آکا مربوط اولان (حسن و قبح) بحثی و حکمت تشریمییه موضوع بحث ایتمک ایجاب ایدر . فقط بونلری تدقیقه باشلار ایسه اصل بوسنه ظرفنده کورمه کز لازم و حتی الزم اولان مباحث

مهمی تدقیقه امکان بولق مشکل اولور. زیرا بو حسن و قبح بختی برایکی ،
 اوج درسه دکل ایکنجی شومسترده کی ساعات دروسی ده حصر ایتمش اولسه ق
 آنجق اکمال ایده بیلیرز. حالبوکه بو طریق التزام واختیاره وقت یوقدر .
 معالاف بو بختی ترک ایدیورز. آنجق اولجه نشر ایتدیکم اثرده بو بختلر
 واردرد. بونلر برکوزدن کچیریلورسه بر درجه یه قدر تلافی ماقات ایدلمش اولور.
 وقتکز مساعد اولورسه بونلر کده هر حالده نظر تدقیق و تتبع دن امرارینه
 چایشمالیسنگز. بو کون بزده اولدینی کی اوروپا عالم عرفانده دخی بو بخت
 مهم اهمیتلی بر صورتده تدقیق و مناقشه ایدلمکده در .



برنجی قیاسی

ادلهء اصلیه - ادلهء تالیه - اصول ترجیح

۱ - ادلهء اصلیه

ادله معلومدرکه امثله وزنندہ دلیلک جمی درکہ رہبر دیمکدر قولاغوز دیمکدر. دلیلی بودرسک ابتداسندہ تعریف ایتشدک. اوتعریفہ کورہ دلیل « کندیسنه نظر صحیحله نظر اولندقدہ بزى بر مطلوب خبریہ ایصال ایلیان شی در » فقط دلیل دیگر صورتلرلهہ تعریف اولنشددر .

الک مشهور تعریفی شودر : (کندیسنه علمدن یعنی کندیسنی بیلمکدن باشقه برشینى بیلمک لازم کلان شینہ دیرلر .) بو، علم کلا بچیلرک تعریفیدر. یعنی (سز برشینى بیلمکدن صوکرہ اونک ضمتندہ باشقه بر شینى بیلمکدر) بو تعریف ایله اولکی تعریف آراسندہ عموم و خصوص مطلق وارددر؛ اولکی اعم، ایکنجی اخصدر .

برنجی تعریفده «مطلوب خبریہ ایصال ایلیان شی در» دیمشدک. مطلوب خبریہ ایصال بعضاً عام تولید ایدر ؛ بمضاده ظن حصوله کتیرر. یعنی دیمک ایستورزکہ اولکی تعریف (علم و ظن حاصل ایدن دلیلہ شاملدر) بناءً علیہ برنجی تعریفہ کورہ ایستر علم حاصل اولسون ، ایسترسه ظن حصوله کلسون مساوی در . علی الاطلاق بر مطلوب خبریہ علم و یا ظن حاصل ایدن شینہ دلیل دینور . لکن ایکنجی تعریف بویله دکلدر .

دقت ایدرسه کز کورورسکزکہ ایکنجی تعریفہ کورہ دلیلدن مقصد برشی حقتندہ (علم حاصل ایدن دلیلدر) یوقسه ظن حاصل ایدن شینہ شامل دکلدر. شو حالده دلیلی حقیله آ کلا یه بیلمک ایچون اولاً علم نهدر ؟ ظن نه یه دیرلر ؟ یونلری بیلمک ، آرالزنده کی فرقی آ کلامق لازم کلیور . آنک ایچون بزده

دليلك تقسيماته كيرمگسزین اول امرده علم ايله ظنی و آره لرنده کی اسباب فرقی
واسباب علمی بیان ایتک مجبوریتده قالیورز .

شو حالده علم نه در ؟

بیانه حاجت یوقدر که علم کله سنی لسانمزه ترجمه ایدم جک اولور ایسه ک
(بیتمک کله سیله ترجمه ایدرز . (ظن) کله سنی ترجمه ایدم جک اولور ایسه ک
اوکا قارشی لسانمزه (صامق) کله سنی بولورز . مک کوزل بیلورسکیز که ،
بیلمک باشقه صامقینه باشقه در . آنک ایچون در که انسانی مخبرده و مخاطبانه در
بویاکی کله بی باشقه باشقه مقاملرده استعمال ایدرز .

ایجابنده بیلورز دیرز ؛ یرینه کوره صانیورم ، صاندم دیرز . ایشته بیلمک
علم دیمکدر ، صامق ظن ایتک دیمکدر .

فقط شو ایضاحات لغته نظر آدر ؛ منهای لغوی به کوره در . یعنی واضع
لغت بویله باشقه باشقه ایکی دانه کله وضع ایتمش ، هر لسانده اولسانی وضع
ایدن واضع بوفرقی کوزه تمشدر .

ارباب علوم دخی واضع لغتلك کوزه تمش اولدقلری بوفرقی نظر اعتباره
آلهرق بویاکی کله نك مفهوملری علمی بر صورتده تفریق ایتمشلردر .

بناءً علیه (علم نفس الامر مطبق و ثابت ، یعنی لایتنزل و لایتغیر اعتقاد
جازم دن عبارتدر) ، تعیردیکرله تصدیق دن عبارتدر . بومقامده اعتقاد و تصدیق
و حکم کله لری الفاظ مترادفه دندر . حکم ده ، حکم منطقی در ؛ شرعی دکل .
(ظن ، غیر جازم اولان اعتقاد و یا تصدیق دن عبارتدر) اکر بر تصدیق بر حکم
منطقی تعیردیکرله بر اعتقاد جازم اولمقله برابر ثابت اولمازسه ایلروده تغیر
و تنزلله معروض قاله بیله جک صورتده ایسه اوکا (تقلید) دینور . بالفرض بکا
بر عالم چیقارده جازم بر اعتقادله ثابت اولارق قبول ایتدیکم بر حکمی و بر تصدیقی
خایر بوبویله دکلدر دیهرك بونك عکسفی ایضاح ایدر و بی اقناع ایدرسه بنم معلوما تم
تنزلله اوغرار ، ایشته بوتنزلله اوغرایان شی تقلیددر . بوقسه عام هیچ بر زمان
تنزلله اوغراماز . ظنك نقیضنده (وهم) اطلاق اولور . فقط قلبده تصدیق

اولمایوبده برشی (شویله می در)، (بویله میدر) دبه تردد حاصل اولورسه اوکاده (شك) تسمیه اولنور .

شوجالده علم ؛ ديمك اوليور كه نفس الامر مطابق اولقله برابر هيچ بر زمان و هيچ بر صورتله زائل اوليه جق درجده قطعی اولان بيلكي به دينور . برحکم برشيك اولوب اولماديغه تعلق ايتمکه برابر یعنی برشی حقهده بویله در ، ويا دکلدر ديه حکم ايتمکه برابر آنک ضدی و عکسی دخی تجویز ايدیلورسه حکم ايدیلان جهته یعنی ترجیح اولنان جهته ظن دينور . تجویز اولنان عکسی جهتهده و هم دينور .

ديمك اوليور كه ظن ده عکسی تجویز دخی واردر . حالوکه علم ده عکسی تجویز یوقدر . ايسته علم ايله ظن آره سنده کی فرق ده بودر . علم ده معلومك ضدی تجویز اولماز . ظن ده مظنونك ضدی تجویز اولنور ، هيچ برجهته حکم ايدمه زسه ، یعنی متردد بولنورسه بوکا (شك) دیرلر . حکم قطعی یا دلیل یعنی علم افاده ایدن دلیل ويا تقلید ايله حاصل اولور .

اسباب علم

علمی تولید ایدن اسباب نه در ؟ یعنی انسانلرده علم دنيان کيفیتی حصوله کتيرن وسائل ادراك نه در ؟ - ادراك کله سی علم ايله ظنه شاملدر - کندی موجوديت بشریه مزه امان نظرله باقديغمز زمان کوربرز که انسانلرده اسباب علم و وسائل ادراك اوچ نوعدر ، اوچ شیدن عبارتدر :

۱ - حس (که بشی خارجی بری داخلی اولارق الی قوتدر . بونلری توحيد ايدر ايسهك حس حاصل اولور . بونلرک بشنه خواص خمسة ظاهریه ، آلتنجيسنه وجدان دیرلر)

۲ - عقل .

۳ - خبر و نقل در .

ایشته بزم اسباب علممز بواوچ شیدن عبارتدر . بواوچ شینک خارچنده
بزه علم ویره جک ، بزه بر شی اوکره ته جک ، معلومات ویره جک بر واسطه
برسبب یوقدر .

برنجیسنه حس دیدک . بو ، ایکی قسمه آریلور :

۱ — حس ظاهری .

۲ — حس باطنی در و (نفسی) در .

حس ظاهری ، خواص خمسہ ذیلان بش قوتدن عبارتدر :

۱ — باصره .

۲ — سامعه .

۳ — ذائقه .

۴ — شامه .

۵ — لامسه .

قوة باصره ایله مبصرات ، مرئیات ، قوة سامعه ایله مسموعات و اصوات ،
قوة ذائقه ایله اطعمه ، قوة شامه ایله روائح ، قوة لامسه ایله یاشلق قورولق ،
قاطیلق ، یوشاقلق کبی احوال ادراک اولنور . بونلردن برداتهسی ناقص بولونسه
بشرك معلوماتی ده اونسیبندنه ناقص اولور .

مثلا بر انسان والده سندن اعمی اولارق تولد ایتسه مبصراتی ، کوزله
کوریلن شیرلی بیله مز ، ادراک ایدمه مز . بیاض ، سیاه ، یشیل نه دیمک اوکا
بونلری آکلاقمق قابل اولاماز .

کذلک بر انسان صاغیر اولارق تولد ایتسه صدالر نه دیمکدر بیله مز .
صدانک کوزله لی ، چیرکینفی بیله مز . چونکه واسطه ادراک بولنماینجه ادراکی ده
نقصان اولور . دیگر حسلرده بویله در .

حس باطنی یه کلنجه : بو ، وجدان دیدیکمز قوتدر . آنک ایچوندرکه
حس باطنی ایله ادراک اولنان مدرکاته وجدانیات اطلاق اولنور .

آچاق ، طوقلق ، حدت ، غضب ، مرحمت ، شفقت ، عصیت ، تاثرات

قلیه کی خصوصیات هب حس باطنی اولان وجدان ایله ادراک اولنور .
اولکی بش نوع معلوماته یعنی خواص خمسة ظاهری ایله ادراک اولسان
معلوماته (محسوسات) ، حس باطنی ایله ادراک اولنان مدرکاته (وجدانیات)
اطلاق اولنور . بونقطه ده متکلمین ده برابر دور .

*
*
*

یوقاروده اسباب و وسائط علمی حس و عقل و خبردن عبارت اولمق اوزره
اوج قسمه تقریق ایتشدک . بونلردن حسی ایضاح ایتدک . شیمدی ده ایکنجیسی
اولان عقلی ، صوکرده خبری ایضاح ایدلم .

عقل ، نفس ناطقه انسانیه نك یعنی روحك بر قوت و براستعداد مخصوصی درلر .
انسان آنکله مقدماتی ترتیب و کلیاتی ادراک ایدر . حس ایله ادراک اولسان
شیلرک کافه سی جزئیاتدر . یعنی فرداً فردا متعین و مشخص اولان اعیان
و افراددر . هیچ بری دیگرینه صادق اولماز . مثلاً احمد ، محمددر و یا شوکوزلک ؛
بوکوزلکدر دینه عز و شوکوریلن و ایشیدیلن - خلاصه خواص خمسة ظاهره
ایله بیلنان - شیلردن هیچ بری دیگرینه شودر دییه حمل اولنه ماز . تکمیل
جزئیات خواص خمسة ایله و یا حس باطنی اولان وجدان ایله بیلنور .

عقل ایسه شوبیان ایتدیکم جزئیاتدن بر طاقم کلیات استنتاج ایدر . مثلاً :
افراد انسانیه بی برر برر تدقیق ایدرک آنلرک جمله سنك اشتراك ایتمش اولدینی
انسانیت وصفی استحصال ایدر . ایشته او وصفه کلی اولارق یعنی هر برینه
آیری آیری اطلاق ایدیلسی قابل اولارق (انسان) اطلاق ایدر .

افراد انسانیه دن استحصال ایتدیکی اوحقیقت خارجه ده موجود دکلدردر .
خارجه ده افراد انسانیه دن خارج و مستقل برانسان بوله مازسکیز . او یله
بوتون افراد انسانیه په شامل اولاجق هیولا کی بر انسان وارمی در ؟ طبیعی
یوقدر . انسان دنیلن حقیقت ؛ افراد انسانیه نك هر فردنده آیری آیری
موجوددر . ایشته بو و بوکی کلیات آنجق قوه عقلیه طرفندن ادراک اولنور .
عقلک ادراک ایلدیکی معلومات افراددن انتزاع اولنه رق ایکنجی درجه ده بیلنان

حقیقتلر اولدیفی ایچوندركه (معلومات نانوید) اطلاق اولنور .

نمو یعنی جسم نامی اولملاق کیفیتیه بویله در . بونده عقل افراد انسانیه
برر برر تدقیق ایدرك آنلرك بك كوچوك اولارق طوغوب تدریجی صورتده
بیومه سینه باقار وبونك بوتون افراد انسانیه ده موجود بر حقیقت اولدیفی
کورورده انسان جسم نامیدر دیر .

ایشته بوراده عقلك نشوونما کیفیتنی انسانه حمل ایتمی فردلردن چیقاریلش
بر کیفیت در . بوده یعنی جسم نامی ذیلان شی ده خارج ده موجود فردلردن
باشقه بر حقیقت دکلدر . بلکک علی العموم اجسامك فردلرنده موجود بر حقیقتدر .
دیك ایسترم که عقلك ادراك ایلدیکی کلیات حسك ادراك ایلدیکی جزئیات
ایله قائم در و آنلرده مندمجدر .

ایشته بو حقیقتیه بناء در که عقل کند ی باشنه بر قوه مدر که دکلدر . تعیر
دیگرله عقلك بوتون منابع ادراك و معلوماتی خواص خمسة ظاهره ایله وجدان
ذیلان قوه باطنه نك هیئت مجموعه سندن عبارتدر .

بوندن طوبی در که بر اعماء مادرزاد نه قدر زکی ونه قدر فطین اولورسه
اولسون اشکالی ، رنگلری بیله من . اوکانه صورتله صور اشکالی تفهیم ایدرك
اولورسه کز اولو کز قابل دکل او ، اونی تفریق ایدرك بیاض ، قرمز ، سیاه
نور . بیله من .

ولو که کندیسنده بردها درجه سنده ذکا موجود اولسون . چونکه صور
اشکالی و رنگلری بیله جک واسطه ادراك ، منبع معلومات کندیسنده مققوددر .
والده سندن صاغیر اوله رق طوغان بر شخص دخی کذلک صدالری ادراك
ایدرك من . نه قدر حایقیریلورسه ، حایقیریلسون و ماصل کندیسنه تفهیم ایدرك
ایسته نیلورسه ایسته نیلسون یته او اصواتی ادراك ایدرك من . ایشه عقلك طبیعی
معلوماتی کندیسنده منابع معلومات اولان و وسائط ادراك بولنان و آلتی قوتدن
او آلتی منبع دن التان معلوماتدر .

خبره کانهجه : معلومدر که خبر صدق و کذب احتمالی اولان سوزدن

عبارتند. خبر یعنی قائلان صر فظنله صدق و کذب احتمالی اولان سوز انانه علم افاده ایدم بیللمک ایچون صادق اولمسی لازمدر.

خبرك صادق اولمسی ایسه اوچ صورتله اولور :

۱ — متواتر درجه سنه بالغ اولمق (خبر متواتر)

۲ — نبوتی ثابت بر پیغمبرك خبری بولمق (خبر رسول)

۳ — برچوق قرائن و امارات مختلفهیه انضمام ایتیش بولمق (خبره مؤید) در.

بواوچ شیدك، خارجنده قالان خبر انانه قناعت قطعیه ویرمن. قائلی یعنی مخبری نه قدر اوصاف حمیده ایله متصف اولورسه اولسون قناعت بخش اولمازه.

قناعت بخش اوله بیللمک ایچون تواتر درجه سنه بالغ اولان اشخاص دخی

او خبری ویرسه اووقت علم و قناعت قطعیه افاده ایدم بیلور.

۱ — ظن ایدرم که تواترک تعریفی بیلورسکنز. محله نك بینات بخشنده

مذکوردر. خبر متواتر دیمك « کذب اوزرینه یعنی یلان سویلك خصوصنده

اتفاق ایتمه لرینی عقلك تجویز ایتیه چکی بر جم غفیرك یعنی جماعت کثیره نك

خبری در. « بو خبر متواترده شو تعریفلردن آکلاشلدینی اوزره مخبرلرک عددی

معین دکلدر.

نه دیدك؟ کذب اوزرینه اتفاقلرینی عقلك تجویز ایتیه چکی جماعت کثیره

دیدك. بوجماعت کثیرنك نه مقدارده بوانه جغنی زمین وزمانه کوره کندینه

قناعت ویره جلك شخصك یعنی مخبر الهك عقلی تعیین ایدر، شبهه یوق که مخبر

ایله مخبرلرک یالکنز کمیتنی دکل کیفیتنی ده نظر اعتبارده آلور.

ارباب ناموسدن، سچی صاحبی ذواتدن مرکب یوز کشیلک بر جماعتك

افاده سی (اوباش) طاقیدن بیک کشیلک جماعتك افاده سندن دها قوتلیدر. دها

زیاده قناعت بخش وجداندر. اوجهتله خبر متواتری بوصورتله تعریف ایدن

علما مخبرلرک عددینی مخاطبك عقلنه ترك ایتشلردر. یعنی دیکله یان ذاتك عقلی

تعیین ایدم چکدر.

نته کیم بزم بوکون کورمدیکمز مکّه مکرمه، مدینه منوره، آمریقا،

چین ، ژاپونیا و برچوق نمالك ، برچوق قطعات و بلدان بزرجه هب خبرمواتر
طریقیه مملو مدر ، بر خبر بوصورتله متواتر درجه سینه بالغ اولورسه اووقت علم
افاده ایدر . خبر متواتر ایله بیلمان بر شیشی بیلان ذات ، کوزیله کورن ذات
قدر بیلمش اولور .

گرچه « لیس الخبر کالیمان » دیرلر . یعنی خبر ، مشاهده درجه سنده قطعیت
افاده ایتزدیرلر . طوغری در . مع هذا علم دنیان قناعت مصلیه قلبی افاده ایدر .
باعتبار ایله بینلرنده برفرق یوقدر . شو قدر که مشاهده دها قوتلی علم افاده ایدر .

۲ - خبر رسول : خبر رسوله کلنجه بوده مخبرك معصومیتی یعنی یالاندن
متعالی بولمسی ، معرا اولمسی ، اعتباریله علم افاده ایدر . بترکه او خبر ، اوسوز
پیغمبریمز اقدیمز حضرتلرینك کندی لسان نبوت بیانندن ایشیدیلش و یاتواتر
منقول اولمش بولمسون . بوتقدیرده علم افاده ایدر . فقط پیغمبریمز اقدیمز
حضرتلرندن نقل اولنان سوز خبر متواتر درجه سنده اولماز ایسه علم افاده
افاده ایتیوب ظن افاده ایدر .

خبر تواتر درجه سینه بالغ اولمازسه اوکا (خبر واحد) دینور .^۱ مخبرلرک
عددی بش اون اولسه دخی یینه خبر واحد دینور .

بو ، بر اصطلاحدر . هر حالده مخبرك بر کشی اولمسی دیمک دکلدر . مخبر
ایستر بر کشی اولسون ایسترسه متعدد اشخاص اولسون تواتر درجه سینه بالغ
اولمازجه آکا « خبر واحد » اطلاق اولنور .

یا لکن علماء حنفیه نك اصطلاحنه کوره : ابتدا بر خبری پیغمبردن
طوغریدن طوغری به نقل ایدن مخبرلرک عددی بر قاج دانه اولوبده ، ایکنجی
درجه .^۲ او خبرلردن نقل ایدن ناقللرک مقداری حد تواتر بالغ اولورسه او خبره
(خبر مشهور) اطلاق اولنور .

بو خبر مشهور حقیقت حالده خبر واحد دیمکدر . مادامک ایلک ناقللر ،
ایلک راویلر ، حضرت پیغمبردن طوغریدن طوغری به ایشیدیلر ، محدود
بر قاج ذاتدیر . او حالده او خبر « خبر واحد » دیمک بورد . فقط ایکنجی درجه ده

او خبری نهل و روایت ایدن ذاتك تواتر درجه‌ستند. چوق اولماری خستیلله
 بونوع خبر واحد علی الغایه خبر واحدك فوقده، ظن غالب افاده ایده جگندن
 بونوع خبره بر اصطلاح مخصوص اولمق اوزره (خبر مشهور) اطلاق ایتشلردر.
 نته کیم بزده کندی آرامزده شایع اولان بعض روایتلره (مشهور) دپرز.
 شافعیلر بوکی خبر مشهوره (خبر مستفیض) دیرلر.

۳ - قرائن و امارات خارجییه انضمام ایدن خبر واحدده علم افاده ایدر. فقط
 بوراده علم افاده ایدن یالکزاو خبر واحدك کندییی دکلدر. بلکه اونکله برابر
 اوکا انضمام ایتش اولان قرائن و امارات سائره خارجییه نك هیئت مجموعه سیدر.
 مثلاً بر کیمسه بر کیمسه نك خانه سندن الی قاتلی، بیجاقلی اولارق بیوک بر
 تلاش ایله جیقوب قاچارکن کورولسه، بو حال آنک، خانه دروننده هر حالده
 بر کیمسه یی ویا بر حیوانی کسمش والنهده قان بولاشمش اولدیغنه دلالت ایدر.
 عینی زمانده خانه دروننده بولنان خده شجیده یارالانوب اولمش اولان افندیسی
 اوفرار ایدن ذاتك قتل ایتدیکنی خبر ویرسه بو خبرله اوداتك احوالی یکدیگرینه
 انضمام ایده رک هیئت مجموعه سی انسان ایچون بر علم افاده ایده بیلور. بناء علیه قاتل
 اوشخصدر دییه حکم اولنه بیلور.

ایشته انسانلر ایچون اسباب علم بونلردن عبارتدر. بونلردن باشقه اسباب
 علم یوقدر.

صوفیونك (الهام) نامنی ویردیکی حالات قلییه اسباب علمدن معدود
 دکلدر. علمای اهل سنت وفلاسفه الهامی اسباب علمدن عد ایتمز. یعنی ملهم
 اولان شخصه کوره بواسباب علمدن دکلدر. اشخاص سائره یه قارشى خبر واحد
 اولمق اعتباریله بر کره اسباب علمدن دکلدر. کندیسند و اقع اولان ذاتك
 کندیسنه قارشى ده اسباب علمدن معدود دکلدر. او الهام بونوع حال یقظهده
 رؤیا قیلندن برشیدر.

الهام ارباب تصوف اصطلاحجه: جانب مبدأ فیاضدن سنوح ایدن برسانحه
 قلییه دن عبارتدر. بزم محاوراتیمزده فرست دیدیکمتر استدلالك فوقده و اوتك

خارجنده یعنی حس قلبی نك دها فوقنده وملهم اولان شخصك كندی تفرسی خارجنده واقع اولان سنوحت قلبیه قیلندن اوله جق که بو، بر کره اشخاص سائره یه قارشى اسباب علمدن معدود دکلدر. چونکه محسوسات ومشهوداته مستنداولمادینی کبی اشخاص سائره یه قارشى ده خبر واحد اولمق اعتبار یلده بر خبر شخصیدن عبارتدر. هرايکی اعتبار ایلده اشخاص سائره یه قارشى اسباب علمدن دکلدر.

ملهم اولان ذاتك كندینه کلنجه: ایشته علماء اسلام بوراده اختلاف ایتمشلدر. «ارباب تصوف» بوالهامی صاحب الهام ایچون اسباب علمدن عد ایدرلر. لکن علماء، اهل سنت ومعتزله کبی فرق سائره اسلامییه صاحب الهام ایچون دخی اسباب علمدن عد ایتزلر. مه تافیزیق ساحه سینه داخلدر. احتمال که بر عارضه صحیه نتیجه سیدر.

ایشته یوقاریدن بری ویردیکمز ایضا حاتدن تبین ایتمشدر که اسباب علم (حس، عقل وخبر صادق اولمق اوزره) اوچ شیدن عبارتدر. خواص خمسة ظاهره ايله یعنی حسك بش خارجی قوتی ايله ادراك اولنان شیلره محسوسات، مشاهدات، مشهودات اطلاق اولنورسه ده حس باطنی اولان قوه وجدانییه ايله ادراك اولنن شیلره ده وجدانیات اطلاق اولنور.

وجدانیات اطلاق اولنور. خبرك تواتر قسمیه ادراك ایدیلان مسموعاته ده متواترات تسمیه ایدیلور. پیغمبرلر حضرتانك بیاناته ده (خبر رسول) اطلاق اولنور. شو حالده شمدی یه قدر سرد اولنان ایضا حاتدن مستبان اولور که دلیل ایکی قسمدر:

۱ -- دلیل عقلی

۲ -- دلیل نقلی

دلیل عقلی؛ تعمیری قوای حسیه ايله ادراك اولنان مشهودات و وجدانیاتیه مستند دلیللره اطلاق اولنه جنی کبی صرف قضایای عقلیه یه مستند اولان دلیللره ده اطلاق اولنور.

دلیل ، قطعیت و ظنیت اعتباریله ده ایکی قسمدر :

۱ — دلیل قطعی

۲ — دلیل ظنی

دلیل قطعی به (برهان) اطلاق اولنور . دلیل ظنی به ده (اماره) ، (قرینه) اطلاق اولنور .

برهان (مقدمات یقینیه دن ترکیب ایدن) دلیلدر . اونک مقدمه لری یقینی و قطعی اولدینی ایچون نتیجه سی ده قطعی اولور . چونکه بر مقدمه یقینیه و قطعییه شبهه سز کندیلری کبی بر نتیجه یقینیه و قطعییه تولید ایدر . آنک ایچوندرکه بشر ایچون اصل دلیل (برهان) در .

مقدمات یقینیه دن تشکل ایتدیکی جهتلر برهان ایله نتیجه سی آرد سننده ارتباط عقلی و حقیقی وارددر . حالبوکه دلیل ظنی دنیان اماره و یا قرینه اودر جهده زکادر . اماره و یا دلیل ظنی مقدمات یقینیه دن ترکیب ایتمز . بوتلخیصدن آکلا شلدینی اوزره دلیل ظنی نک مقدمه لری ظنیدر . ظن و تخمینیه مستنددر . شخصییه کوره ذکاره کوره دیکشور . حتی ظنیانده محیطک ، عنعنه لرنک کو چوکلکدن بری آلنان تلقیناتک ، یکی یکی کوره نکارک بک چوق تاثیر لری وارددر . حتی ظنیانده فطرنک ده تاثیر لری وارددر .

بر ذاته حدت ، شدت ، نفرتی اولان دیکر بر ذات اولکی ذات حقنده ، علمینده سویلنان سوزلرنک همان دپسنه اینانور . حالبوکه ینه اودات سودیکی بر ذات حقنده سویلنان اودرلو سوزلرنک هیچ برینه اینانق ایسته مز . چونکه حسب الفطره انسان نفرت ایتدیکی شیلردن اجتناب ، سودیکی و محبت ایلدیکی شیلره تمایل ایدر .

ظن دینلان شی ده قلبک انی و اثباتدن بر جهته میل ایتمسندن عبارتدر ، ظن بودر . ایشته بر نتیجه و یا حکم ، کندیسینه آرد لرند بر رابطه عقایه و حقیقیه بولنان مقدماته مستند اولورسه اوکا عام دینور . بز تعبیر اتمزده قناعت تامه دیرز . فقط بر نتیجه و یا حکم نوکبی مقدماته مستند اولمازسه اوکاده ظن دیرز .

ایشته بو اسبابه بناء در که هانکی علم و فن مقدمات یقینه مستند اولور ایسه او علم و فن قطعی در. بالعکس هانکی علم و فن مقدمات یقینه و آنلردن ترکب ایدن براهینه مستند اولماز ایسه او علم و فن ظنی در. او مقدمات یقینه دن هانکیسی دیگرندن دها قطعی اولدینی بختنه کلنجه :

دینلور که حس ایله عقلک اجتماع ابتدیی مقدمه لر دیگرلرندن یعنی یا الکز حس و یا خود یا الکز عقل ایله ادراک اولسان مقدماندن دها قوتلیدر ، دها قطعیدر. مثلاً: شو کوزلر یملزه کوردیکمز مشهودات حقنده کی معلومات قطعیدر. بداهته مستند اولدینی ایچون بو معلومات برر مقدمات یقینه در . بنم شو کرسیده اوطور و بده شو دقیقه در رس تقریر ایدیشم سزه یقیناً معلومدر . بونده هیچ شبهه کز یوقدر .

بتون انسانلر بر آرایه کلوبده عکسفی ادعا اینسه اینانمز سکنز . مع هذا بو مشهوداته او یله ظن اولندینی قدرده اعتماد جائز دکلددر . قوای حسیه نك پك جوق برلرده غلط و خطا ابتدیی بالتجربه معلومدر . انسان صو المنجروسنه ادخال ابتدیی باستثنای قیریق ، منکسر بر شکلده کوریر .

الحاصل ان قوتلی اولان سامعه من ، باصره من پك جوق برده عاجز قالور ، پك جوق برلرده خطا ایدیلور . ساده بونلردکل ، دیگرلری ده بویله در . هر برینك کندیلرینه کوره ، بدرجه سی واردر . اودرجه بی تجاوز ایده من . عقله کلنجه :

عقلده مدرکاتی محسوسات و مشهوداتندن آلمه یه جق اولورسه او آراتق ، بر جوق برلرده خطا و غلط ایدر . چونکه اولجه ده عرض ابتدیکم وجهله عقل دینلان می نفس انسانینک مدرکاتی ادراک ایچون براستعداد مخصوصندن باشقه برشی دکلددر . آنک ایچوندر که بر جوق سن ادرا که واصل اولنجه یه قدر قوای حسیه سیله ادراک ابتدیی شیلردن باشقه برشی بیله من . چونکه او عقل دیدیکمز خاصه ادراک جوجفك قوای جسمانیه سیله مبسوطاً متناسب اولاراق انکشاف ایدر . من بر آ زده کندی نظرلریکنزله بو ایشی تعمیق ایدرسه کنز

کوریسکیز که معقولات دینلان شیاریه پشه هودات و محسوسات اوزونده حاصل اولان مجرباندن باشقه برشی دکلدور . حتی آسانمیده ایضاح ایدم جکم قضایای بدیهه نك اس الاساسی بولسان (برشی هم واقع ، همده غیر واقع اولاماز) قضیه سی بیله تجربه مستددر .

ایشته بو حکمه مبنیدر که مجربات هر قضیه دن قطعی وقوتلیدر . چونکه مجربات ده هم حسك ادراکی ، همده عقلك ادراکی اجتماع ایتشدور . زیرا تجربه دینلان شی تکرر مشاهده دن باشقه برشی دکلدور . مشاهداتك تکرری ایسه حس ایله ادراك تکرری و برده عقلك تکرر ایدن او ادراکاتی مراقبه و محاکمه سی دیکلدور . ایشته بو کونکی بشون ترقیات مدنیه و کشفیات علمییه عموماً تجربه مستد اولدیغندن طولاییدر که عقلاره وله وحیرت ویره جک بردرجهیه کلدور . چونکه عقل بنفسه او کشفیات علمییه ادرا کدن عاجزدر . مثلاً: تجربه اولماسه ایدی عقل قوه الکتریقیه بی بیله مزدی . چونکه الکتریک دینلان قوت نه کوزله کوریلور ونهده مقدمه لر ترتیبیله بر دلیل عقلی حصوله کتیره رک آندن استخراج اولنه بیلور .

انسانلر ارباب کشفیات قوه الکتریقیه بی اثرینی مکرراً وینه خواص خمسة ظاهره واسطه سیله ادراک ایتشلردور . بلو ظلمك مصادماتندن حصوله کلان بارقینی - شمشکی - و بالتصادف جریان الکتریکی بی حامل اولان هوالرده ووشیعه نك الارنده ، وجودلرنده حاصل ایتدیکی اهتزازاتی و بعض جسملرک مصادماتندن تولدایدن شراره لری باصره سیله کوره رک قوه سامعه سیله ایشیده رک آنک هواده ثابت اجسامده موجود بر قدرت اولدیغنی ادراک ایتشلردور . و بونی بعدالادراک اجرا ایتدکلری بر جوق تحایلات و تدقیقات نتیجه سنده اثرلرنده اطراده اولدیغنی کورمشلر و او صورته او قوه الکتریقیه نك وجودینه ایمان ایتشلردور . اگر الکتریک آمپولارده یا تمامش اولسه بزا الکتریک و وجودینی بیلمه یز . وجودیمیزی بر جریان الکتریکی اهتزازه کتیرمنزه او قوتی ادراک ایتیمیز . عقل ایسه کندی باشنه بر شیئی ادراک ایدمیه جکندن بوکی خصوصاتك

ادراکنده تماماً اظهار عجز ایدر .

اونك ايجوندر كه خواس ظاهره منزله ادراك ايديله ميه جك درجه ده اوزاق اولان اجرام سماويه ده بزم كبي ويا سائر حيوانات كبي مخلوقاتك موجود اولوب اولماديغنى بيله ميز . بويله يرلرده آرتق عقل ايجون برحكم ويرمك كرك مثبت و كرك منفي شوييله در ، بويله در ديمك جائز اولماز . چونكه او حكم هيچ بر شيه مستند دكلدر [جهل مخض] در . اوكا ، او حكمه نه علم دينور ، نه ظن دينور ونه شك وشبهه دينور . بلكه لك قوبي جهل دينور . زيرا ديديكيم كبي صرف مجهولدر . مجهول صرف ، اوزرينه حكم ايسه بتون ارباب منطق وعقولك اتفاقيه باطلدر . مجهول صرف اوزرينه حكم آنجق جهله به مخصوصدر .

انسان برشي حقه ده مثبت ويا منفي برحكم ويرم بيلمك ايجون النده صاغلام بردليل بولنق لازم كلير . اودليل مقدمات يقينه دن تركب ايدم جك اولورسه قطعي اولور . بناء عليه علم قطعي افاده ايدر .

فقط اودليل ، مقدمات قطعيه دن تشكلى ايتمه جك اولورسه ظنى ديمك اولور . اوحالده آنجق ظن افاده ايدر ؛ معنای اصطلاحیست چي علم افاده ايتمز وبويله ظنيان دن تركب ايدن دليله ده كچن درسته سويلد بكم وجهله (اماره وقرنيه) اطلاق اولنور . مقدسات يقينه نك تعبير ديكرله قطعي ولايتغير اولان قضايای علميه نك نه دن عبارت اولديغنى اولجه بيان ايتمشدك . ايشته او قضيه لر ، او مقدمه لر اكر هيچ برشي ، هيچ بر دليل تدقيق ايتمك سزين يالكز مفهوم لر بنه نظر ايتمكله عقلاً ادراك اولنان قضيه لر ايسه اولنور ضروريات ، تعبير ديكرله بديهيات اطلاق اولنور .

يوقا كر او مقدمه لر قطعي ويقيني اولمقله برابر عقل آنلري ادراك ايدم بيلمك ايجون نظر وتدقيقه ، تأمل وتفكره محتاج اولورسه او كبي قضيه لر ده نظريات ويا مكتسبات اطلاق اولنور .

ضروريات ويا بديهيات اساس اعتباريله اوج نوع قضايان عبارتدر .

برنجيسي : مشهودات

ایکنجیسی : وجدانیات

اوجنجیسی : متواترات

مشهوداته، محسوسات و حسیات دخی اطلاق اولنور. فقط زمانمزدده حسیات تعبیری تمایلات مجردة قلییه (دلائلردن مجرد تمایلات قلییه) اطلاق ایدلمکده اولدینی جهتله محسوسات و مشهودات تعبیریه حسیات تعبیری یکدیگرنندن تفریق ایجاب ایدر.

یوقاریده یقیناتدن ترکیب ایدن دلیلله برهان تسمیه ایدلدیکی و بونک بهمه حال مقدمه لری کبی علم قطعی و یقین افاده ایده جگنی سویلشدم. بونک سببی ده یقیناتک قضایای ضرورییه مستند اولسی در. چونکه مقدمات یقینییه یا طوغریبدن طوغرییه ضروریاتدن عبارتدر و یاخود ضروریاته مستند قضایای ناسته در. آنک ایچوندرکه بر مقدمه یقینییه، کندیسی کبی بر نتیجه یقینییه افاده ایدر. فقط بر قضیه تعبیردیگرله بر مقدمه او یله ضروریاتدن عبارت اولماز. و یاخود ضروریاته مستند بولنمازسه او قضیه و او مقدمه یه مقدمه یقینییه دینمز. او، آرتق بر مقدمه ظنیه دن عبارتدر.

ضروریات دینیلن قضیه لر یا اصلا حس واسطه سی اولقسزین یالکز عقل ایله حکم و ادراک اولنان قضیه لر در (کل جز شدن بیوکدر)، (دائرة مربع دکدر) کبی. یاخود مشاهده و تجربه کبی بر واسطه حسییه ایله ادراک اولنان قضیه لر در. (آتش یا قیجیدر)، (قار بیاضدر) کبی. برنجی نوع قضیه لر عقلیات صرفه دن اولان بدیهیاتدن اولدقلری ایچون عقل اولنلرک حکم و تصدیق شده مشاهده و تجربه کبی بر واسطه حسییه محتاج اولماز. بلکه موضوع و محموللری تصور ایدر ایتمز بیلرلرنده کی نسبت حکمییه بی بالبداهه و جزماً تصدیق ایدر.

(بر شی هم وار، هم یوق اولماز)، (کل جز شدن بیوکدر)، (برشینه مساوی اولان مقدارلر یکدیگرنلرینه مساویدر)، (بر یرده ایکی صند و یا تقیض اجتماع ایده من) کبی بر طاقم بدیهیات عقلیه کرچه ابتداءینه مشهوداتدن استخراج واستنباط ایدلمش دیمک ایسه ده عقلک بو کبی قضیه لری ادراکی طوغریبدن

طوغری به قوه حسیه وساطتته محتاج اولمقسزین حصوله کلمکده اولدینی جهته
 بونللو قضیه لره قضایای عقلیه اطلاق اولنور. ذیرا برشیئک بریرده عین زمانده
 هم وار، هم ده یوق اوله جفتی قوه باصره، ادراک ایدمه من، ادراک ایدمه مدیکی
 کبی قوه شامه، قوه ذائقه ده آتی ادراک ایدمه من. بون ادراک ایدن آنجق عقلدر.
 عقلک بو کبی بیلکی نری، اساسلری اعتباریه خارجدن استخراج ایتمش
 اولسی اونلرک عقلی اولمایوب حسی اولمسی استلزام ایتمز.

تواتراته کلنجه: تواترات عام قطعی افاده ایتک ایچون بر شرط لازمدرکه
 اوده محسوساته مستند اولمسیدر.

محسوساته مستند اولمیان متواترات معتبر اولماز. مثلاً عددی حد تواتره
 بالغ اولان مخبار تواتراً خبر ویردکاری شیشی (بن کوردم، ویایشیتدم ویاخود
 طاندم، قوقلادم) کبی کندی حواسنه استناد ایتدیرملیدر. بویله اولمادینی
 تقدیرده یعنی خبر ویریلان شی محسوساته استناد ایتدیریلدیکی تقدیرده اوتواتر
 معتبر اولماز. وبنسأ علیه علم افاده ایتمز. آنک ایچوندركه بالجمله علما تواتر
 آنجق محسوساتده جاری اولور، معقولانده جاری اولماز دیرلر.


برانسان ایکی کره ایکی نك درت ایدمه جکفی کندی ادراکیله بیلیر وایله
 بیلک لازمدر. بویله بر مسئله عقلیه ده یوز بیک حتی بر میلیون کشی بریره
 کلوبده ایکی کره ایکی درت ایتمز، بلکه اون آتی ایدر، سن شمیدی به قدر
 یا ککش بلله مشک دیمش اولسه لر و بونلرده دنیا نك اک بیوک عالمی اولسه لر
 ینه اونلرک بوسوزلرینه عقل قطعاً النفات ایتمز. اسکی حکمی اولان ایکی کره
 ایکی درت ایدر قضیه سنده اصرار ایدر. چونکه بوقضایای عقلیه دندر.

بوکبی قضیه لرده حاکم اولان عقلدر. حسک بوکبی مسائلده دخلی یوقدر.
 حتی بویله بدینی و ضروری اولان قضایای عقلیه به هیچ بردایل معارض اولماز.
 مهرانکی بردایل بوکبی قضایایه معارض اولورسه معتبر اولماز. تأویل اولنور.
 آنک ایچوندركه کرك احادیث نبویه و کرکه آیات قرآنییه بوکبی قضایای
 عقلیه ظاهرأ معارض کورینه جک اولورسه واحادیث و آیات مناسب وجهله

تاویل اولنور :

بونک ایچوندرکه علماء اسلام (عقل ایله نقلی تعارض ایتدکده عقل اول نقل آنکله مؤلدر) دیرلر . کذلک (عقل ده بر حجت الهیه در ، کتاب وسنت ده بر حجت الهیه در . حجت الهیه لر آراسنده تعارض اولماز . هر نه قدر بر تعارض کورینورسه او ، ظاهراً بر تعارضدر ، یوقسه حقیقتده تعاض یوقدر) دیوب نقلی یعنی کتاب وسنتی قضایای قطعیة عقلیه کوره تاویل ایدرلر .

بورایه قدر ویردیکنز ، معلومات صرف منطق و فلسفه یه عائد اولوب درسمره بر مقدمه اولوق ارزره ذکر ایدلمشدر . بو بابده درمیان ایدیلجه جکدها بعض فائده لی و لزومی مطالعات فلسفیه وارسهده و قنک عدم مساعده سنه مبنی یوقدرله اکتفا ایدوب اصل درسمره تعلق ایدن مسائلی ایضاح ایتمک اقتضا ایدیور .



دلیل

دلیل ، عقلی و نقلی اولمق اوزره ایکی قسمه تفریق و تقسیم اولنور .
برنجیسنه دلیل عقلی ، ایکنجیسنه ده دلیل نقلی دینور . حتی انشای محاورانده
دلیل کلمه سی طی ایدیلرک عقل و نقل دینور .

دلیل عقلیدن مقصد ایستر محسوسات و مشهوداته مستند بوانسون ایستر
صرف قضایای عقلیه به مستند بوانسون و یا وجدانیاتدن عبارت اولسون علی -
الاطلاق باشقه سنک کلامی نقل و حکایه به متوقف اولمیان دلیل دینور .

دلیل نقلی ده ، باشقه سنک کلامی نقل و حکایه به مستند اولان دلیلدره . آنک
ایچوندرکه کړک محسوساتندن و کړک مقدمات عقلیه دن و کړکسه وجدانیاتندن
مراکب اولان دلیللره دلیل عقلی جمع صیغه سیله « ادله عقلیه » دینور .

ایستر متواتر اولسون ایستر خبر واحد اولسون ، ایستر بزم کبی برذاتک
سوزینه مستند اولسون علی الاطلاق باشقه سنک سوزینه مستند اولان
دلیللره ده دلیل نقلی ، جمع صیغه سیله ادله نقلیه دینور . ادله نقلیه و یا مفرد
تعبیریه دلیل نقلی ادله شرعیه و یا دلیل شرعی تعبیرلرندن اعمدر . ادله نقلیه
تعبیری ادله شرعیه به شامل اولدینی کبی ادله شرعیه دن ماعدا دیگر آخرک
کلامنه متعلق دلیل نقلیلره دخی شاملدر .

فقط بعضاً ادله نقلیه و یا دلیل نقلی تعبیرلری مطلق ذکر ایدلایکی حالده
دخی ادله شرعیه به حمل اولنور و او معنا مراد اولنور . بوایکی نوع تعبیر
آره بنده کی شوفرک بوصورتله بیلندکن صوکره ادله شرعیه بی ایضاح ایده لم :

ادله شرعیه

ادله شرعیه اصلی وتالی اولمق اوزره اول امرده ایکی قسمه تفریق اولنور.
اصل اولان ادله شرعیه درتدر :

- | | |
|----------|-----------|
| ۱ - کتاب | ۳ - اجماع |
| ۲ - سنت | ۴ - قیاس |

اصل ادله شرعیه بونلردر .

تالی اولان ادله شرعیه نك باشلیجه سی یدیدر که بودرت دلیلدن تفرع ایدر.
آنلردن رییسی ایله استنباط اولنان و یا هیئت مجموعه سندن استنباط اولنان و ایکنجی
درجه ده بولناندر .

۱ - استحسان

۲ - استصلاح و یا مصاحح مرسله

۳ - استصحاب

۴ - برائت اصلیه

۵ - عرف و تعامل

۶ - قول صحابی

۷ - شرائع سالفه

کبی که ایکنجی درجه ده اولان برطاقم اساسات شرعیه در .

بونلردن هربری اولجه درمیان اولنان دوت ادله شرعیه دن برویا ایکیسنه
راجع اولدینی ایچون بونلر اودرت دلیلدن متشعب و مأخوذ عد اولنورلر .
دلیل عقاید شریعت اسلامیه ده بر دلیل شرعیه در . شریعت اسلامیه دلیل
عقلیدن چکینمز . بونی کندیسنك اك اوز دلیلی اولارق قبول ایدر . بعض
ادیان بوندن اجتناب ایدر . اسلامیت ده عقل اك بویوک برهاند و جناب حَقَّ
انسانلره بخش ایتدیکی اك بویوک نعمتدر . آکا مینیدر که علمای اسلام ،
اصول فقه جیلر، بوتون فرق اسلامیه متحداً (عقیده کتاب و سنت کبی بر دلیل

شرعیدر ، اولر کبی بر حجت الهیه در . الهی حجتلر آره سنده ایسه تعارض اولماز) دیرلر . بنا برین عقلک تجویز ابتدیکنی شرع شریف منع ایتمز . بونک عکسیده بویله در . آنجق بعضاً عقل ایله نفلک تعارضی ظاهراً ظن اولنور . حقیقتده تعارض یوقدر . فهم خصوصنده ، تلقی یولنده بر تعارضدر ، آکلایشک یا کلاشیغیدر . ظاهراً تعارض کورونورسه بونلر مقتضای عقله کوره تألیف اولنور . از جمله قرآن عظیمده ادبیات عربیه اعتباریله بک جوق مجازلر ، تمثیللر واردر . بوندن ناشیدر که (قرآن کریم) حضرت محمد علیه السلام اقدیمزک معجزه سی عد وتلقی اولمشدر .

قرآن کریمده کندیسنی درجه اعجازده بر بلاغتی حاوی اولدیغنی بیله برمش و بر نظیری وجوده کتیریلورسه نبوتدن ، معجزه دن واز کچه جکنی اعلان ایتمشدر . بر جوق اوغراشلمسینه رغماً موفق اوله مدیلر و جضرب پیغمبره ، قرآنک الله کلامی اولدیغنه اعتقاد ایتمدکلری حالده بلغای صرب قرآنک فصاحت و بلاغته سجده ایدرلردی واسبابی سوال اولندقدده بو سجده من قرآنک بلاغته حیران و تقدیردن متولدر ، دیمشدر . قرآن کریمده استعاره و تمثیل بک جوقدر . بوندن ناشی انسان کلاملرک لغت و معنالرنی نظره آلیرده چیقان معانی بی مخالف شرع ظن ایدر . حالبوکه بونلر استعاره در . استعاراتده مختلف درجاتده در . بعضلری صرف مثال ایرادی صورتنده تمثیلاتدر . الحاصل بوده بر بحث مهمدر . تنه کیم اصول فقهده استعاره بختی بک مهم اولسی اعتباریله بونی آریجه کوره جکزه . خلاصه نصوص شرعیله قضایای عقلیه آره سنده بعضاً تعارض کوریلور . بو حقیقت دکلددر . وهله اولی ده کورهن ، او قویانک یا کلاشی آکلایشی در . تتبع و تحلیل ایدیلیرسه حقیقت ظاهر اولور و شو تعارضده قالماز . شو حالده اسلام اعتقادی ده بودر . عقل بر حجت الهیه اولسنه مبنی ظاهراً بر تعارض اولورسه و عقل ایله نقل تعارض ایدرسه عقل اول نقل مؤلددر . بو ، اسلام علم کلاسیکلرینک بر قضیه اساسیه سی در . رسالتناه اقدیمز (کن مع الحق حیث کان ...) بیورمشدر . غایت مهم اولان بو حدیث شریفده بیوریلور که حق نرهده ایسه آندن آریلما . آنک بولندیغنی

برده سن ده برابر اول ، سنی شبهه دوشورن شیلر حقننه کیندی عقلک ايله تمیز حقیقت ایت، دفع اشتباه ایت، زیرا جناب حقل سنک علیهنه اولان حجت الهیه سی سنده موجوددرکه او حجت اللهم سنک علیهنه استعمال ایده جکی بر حجت در .

یا لکنز بوبحث ده بومطالعه درمیان اولنور. عقل احکام شرعیه نک اعتقادات قسمنده تماماً حجت قاطعه در . اعتقاد جیلر هیچ قرآن دن بحث ایتزلر . بتون محاکات عقلیه دن بحث یوریدرلر . بوکا علم کلام دیرلر . بونک اخرته متعلق اقسامنده سمعیات دیرلر . بمض نصوص شرعیه نک ابهامنده عقل آکا یاردیم ایدر . او صورتله مهیمیتدن قورتیلور . شو تفصیلاتدن سوکره شمدی بونلری صره سیله برر برر ایضاح ایده لم .

کتاب

کتاب : بوکله لغه مکتوب معناسنه اسم مصدر در . بوکون بزم مکتوب اطلاق ایندیکمز نامه محرره اولاد عرب « کتاب » اطلاق ایدردی . مکتوب تعبیری سوکره دن و زده احداث ایدلمش بر تمییدر . بوبک ایچوندر که یعنی کتاب لفظی مکتوب معناسنه اولدینی ایچوندر که علی العموم مؤلف اته کتاب اطلاق اولنور .

فقه های اسلامی عر فنده ایسه کتاب تعبیری مجله احکام عدلیه نک ترتیبنده کوردیککنز وجهله ابواب و فصول مختلفه بی جامع بر بحث فقهی نک هیئت مجموعه سنه اطلاق اولنور .

کتاب الیبع ، کتاب الاجاره ، کتاب الحواله ، کتاب الکفالة ، کتاب الهیه ، کتاب الدعوی کبی ...

اصول یون عندنده ایسه کتاب تعبیری قرآن ايله مترادفدر . بناء علیه درسمزده مرنه وقت بو (کتاب) کله سنی اطلاق ایدر ایسه ک آندن قرآن معناسنی مراد

ایده جکزر . بو اعتبار ایله در که بتون پیغمبران عظام حضراتنه شرف نازل اولان کتب سماویه دخی (کتاب) اطلاق اولنور .

کتاب دیگر کتب سماویه دن تفریق ایدمک ایچون شوصورتله تفریق اولنور .
« کتاب حضرت محمد المصطفی صلی الله تعالی علیه وسلم افتدیمز اوزرینه منزل وتواتر منقول اولان انظم جلیدر . »

قرآن ده بودیمکدر . تعریفه دقت اولنورسه کوریلور که بو تعریفده ایکی قید احترازی وارد . بری (محمد علیه السلامه منزل اولمق) ایکنجیسی (متواتر منقول بولمق) قیدی در .

برنجی قید ایله عیسی ، موسی کبی دیگر پیغمبران عظام حضراتنه نازل اولان (انجیل) و (تورات) و (زبور) کبی کتب مقدسه سماویه خارج قالور . زیرا باشقه باشقه پیغمبرلر اوزرینه منزلدر .

ایکنجی قید ایله ده (بزم قرآن دیسه نقل ایدلدیکی حالد تواتر منقول اولمیان نظم لر خارج قالور . احتمالکه بوکی نظم لر حقیقه قرآندر . لکن بزم تواتر طریقله نقل ایدیلدیکی ایچون بزم حق مزده اونظم لک قرآن اولسنده علم حاصل اولماز . ابنای بشر ایچون علم حاصل اولمیان شیلره (شودر و یا خود بودر) دیسه حکم ایتمک ایسه معقول اولماز . بویله قرآن دیسه نقل ایدلدیکی حالد تواتر منقول اولمیان نظم لر اصولیون اصطلاحنده (شاذ) اطلاق اولنور . بوجدیسه دکلدر ، قرآن ده دکلدر . بنابرین علمای اسلام بونک اسمنه (شاذ) نامی ویرمشلردر . اوت ، فی الحقیقه بونلر وارد و پک آزدر . نته کیم حدیث وتفسیر کتابلرنده یازیلیدر .

بو شاذ ایکی قسمدر :

۱ — خبر مشهور

۲ — خبر واحددر

اولکی درس لرده بیان ایدلمش ایدی که حضرت محمد علیه السلام دن نقل وروایت اولنان شیئه — ایستر قرآن اولسون ، ایستر قرآن خارجنده اولسون —

خبر اطلاق اولنور و بوخبر ، متواتر ، مشهور و خبر واحد اولمق اوزره اوچ
قسمه تقسیم اولنور .

خبر متواتر ، رسالت پناه افندیزدن تواتراً نقل اولسان خبردرکه ابتدا
اونی نقل ایدن راولرک یعنی اصحاب کرامک عددی حد تواتره بالغدر .

خبر مشهور ؛ برنجی درجده اولان راولردرکه - بونلره قرن اول تسمیه
ایدیلور - حد تواتر بولنایوب قرن ثانی ده حد تواتر بولونورسه بوسورتله نقل
اولونان خبره خبر مشهور دینور . یعنی اصحاب کرامدن برقاچ ذات نقل ایستدیکی
حاله آنلردن صـ و کره کلن تابعیندن حد تواتره بالغ اولان بر جماعت کثیره
نقل ایتمش اولورسه اوخبره خبر مشهور دینور .

خبر واحد : آنلرده حد تواتر یولنیه جق اولورسه آرتق آندن صکره
ایستر حد تواتر بولنسون ایستر بولنسون اوکی خبرلرک کافه سنه خبر واحد
تعیر دیکرله خبر آحاد اطلاق اولنور . ایشته قرآن و یا کتاب برنجی قسمده
داخلدر . یعنی خبر تواتردر . بز بویه تواتراً منقول آیات جلیلهیه قرآن دیرزه .
فقط قرآن دیه نقل ایدلیدیکی حاله خبرک ایکنجی و یا اوچنجی قسمده
قالیرایسه یعنی خبر واحد و یا خبر مشهور درجه سی کچمنسه اوکا قرآن دیمه یز .
احتمالکه او حقیقتده قرآندر فقط بز اونی بیلمه یز .

علماء اصول اصل قرآن ایله بویه ایکنجی اوچنجی درجده قالان منقوللاری
بربرندن تفریق ایچون ایکنجی اوچنجی قسملره شاذ اطلاق ایتمشلردر .
شو حاله شاذلر قرآن حکمنی حائز دکاردر . مثلاً اولنر نمازده او قونماز
اوقونه جق اولورسه جائز اولماز . بیلورسه کزکه قرآن کریم آبدستسز طوتیلماز .
حالبوکه بوشاذلر آبدستسز طوتیله بیلر .

فقط عجبا اصولیون نقطه نظر نیجه شاذ اولانلر بر حکم شرعی افاده ایدرمی
ایتمزی ؟ بزم ایچون اصل تدقیق ایدیلدیکی لازم کلان جهت بودر . بو مسئله
بیوک مجتهدلر آره سنده مختلف فیه بر مسئلهدر .

مذهب مالکی مؤسسی امام مالک و مذهب شافعی مؤسسی امام شافعی کی
اصول فقه — ۴ —

بعض بیوک اماملر شاذ ایله عمل جائز اولماز دییورلر. بوباید. دلیل اولمق اوزره چونکه (شاذ نه حدیثدر. نه قرآندر. شو حالده آنکله عمل غیر جائزدر) دییورلر. فقه حنفی مؤسسی امام ابوحنیفه وایکی شا کرد ممتازی امام ابویوسف و امام محمد حضراتیده بالعکس شاذ ایله عملک جوازینه قائل بولئیورلر. دییورلرکه (چونکه شاذ یاقراآندر. ویا حدیثدر) بوایکیدن خالی دکادر. زیرا جناب شارع طرفندن ایراد بیورلمشدر. هرایکی صورتده آنکله عمل بالضرور جائزدر) اشبو ائمه حنفیه مخالفلرینه بوجهله جواب ویردکنصکره شاذ ایله نه درجهیه قدر عمل ایدیلوب ایدلیه جکفی تدقیق ایدیورلر. ویدیورلرکه: (اگر شاذ مشهور قسمندن ایسه آنکله قرآنک مطلقاً تقید کبی نص قرآن اوزرینه: قید، بر حکم زیاده ایلمک جائز اولور. حتی جائز اولور دکل واجب اولور) چونکه مادامکه مشهوردر. تواتر ایله منقول اولان آیات قرآنییه قریب بر درجهده دیمکدر. آنک ایچون (آنکله «زیاده علی النص» معناسنه یعنی نص قرآن ایله ثابت اولان بر معنایه دیگر معنا زیاده قیلیم معناسنه عمل لازم اولور.

یوق اگر شاذ خبر واحد قسمندن ایسه آنکله: بوجه مشروح (زیاده علی النص) معناسنه عمل جائز اولماز. زیرا خبر واحد علم افاده ایتمز. تواتراً منقول اولان قرآن ایسه علم افاده ایدمکچکندن خبر واحد آکا معارض اولاماز. کتاب یعنی قرآن کریم: بیسانه حاجت اولمادیفی اوزره قانون شریعتک متیدر. قریباً ایضاح ایدمکچکنز سنتده اومتک شریعدر. بناءً علیه شریعت اسلامیتهک برنجی درجهده اصل و اساسی (کتاب)، ایکنجی درجهده (سنت) در. دلائل سائر شرعیده هپ بوایکی اصل الاصولدن مأخوذ و مقتبسدر.

کتاب بالاده کی تعریفده بیان ایتدیکنز وجهله تواتراً منقول اولدیغندن طولایی قرناً بعد قرن عصر آبد عصر عموم افرادامت طرفندن تواتر عام ایله متواتر بولدیغندن طولایی آنک بتون هیئتیه حضرت شارعدن شرفصدوری قطعیدر؛ شبهه سزدر. بو خصوصده تردده اصلاً محل یوقدر.

لكن كتاب نهايت كلماتدن مركب كلامدن عبارت اولاديني ايچون بزرگه كوره آنك مقصود شارعده دلائی بعضاً صریحدر ، بعضاًده غیر صریحدر . بویله كلام شارعدن عبارت اولان بردلیل شرعی دلیل قطعی اوله بيلمك ايچون یعنی علم یقین افاده ایده بيلمك ايچون ایکی شرطك تحقیق لازمدر .

۱ - شارعدن نبوتی قطعی اولمق

۲ - حکم مقصوده دلائی صریح بولنمق

بناءً علیه بر آیت کریمه مقصود اولان حکم شرعی حتمیله دلیل قطعی اوله بيلمك ايچون حکمه دلائی صریح بولنمق ایجاب ایدر . صریح اولورسه او آیت کریمه به (نص) و او حکم مدلوله (حکم منصوص) اطلاق اولنور . ایشته مخاطبانمزدده (احکام منصوصه) دیمك بودیمکدر . بر آیت کریمه نك مقصوده دلائی نه وقتده صریح اولور و ناصل اولورسه غیر صریح اولور ؟

بوجهت آشاغیده مبحث مخصوصه سنده تفصیلاً ایضاح اولنه جقدر . بز بوراده یالکز بو قدریله اکتفا ایده جکزر . چونکه بوراده مقصدیمز دلائل شرعییه ماهیتلرینه نظراً برر برر تدقیق و ایضاح ایتمکدر . درسمزك الفاظنك معنایه دلالته دأر اولان مباحثی آندن صکره ایضاح ایده جکزر .

سنت

سنت، لغتده سیرت، طریقت، عادت معنالرینه کلیر . «سنت الیه» دینورکه عاده الله دیمكدر . استیعذ بالله [وَأَنْ تَجِدَ لِسُنَّةِ اللَّهِ تَبْدِيلًا] آیت جلیله سنده کی سنت الله دن مقصد و عادت الله در . او جهنله آیت مشارالیهانك معنایی (سن اللهك سنتی ایچون هیچ بر وجهله تبدیل بولامازسك و كوره هنرسك) دیمكدر .

سنت عباداتده نافله نمازی معناسنده استعمال اولنور . صلوات مفروضه دن

اول وصو کره قلنان نمازلر کبی . سنت ، کرک رسالتپناه افندیمرک و کرک اصحاب کرام حضراتنک سیرتلیرینه ده اطلاق اولنور . بومعنایه کوره (بوفعل سنتدر) دینورکه بین الاصحاب برطریقت مسلوکه دیمکدر .

درسمزده یعنی بوراده سنت تعیرندن مقصد بونلرک هیچ بری دکدر . بوراده سنت دن مقصد رسول نبی محترم صلی الله تعالی علیه وسلم افندیمر حضرتلرندن شرفصادر اولان (قول) ، (فعل) و (تقریر) دن عبارتدر .

قوله حدیث اطلاق اولنور . بو ، بر اصطلاح در . حد ذاتنده حدیث قول معناسنده . بو اعتبار ایله قول ایله حدیث کلاملری الفاظ مترادفه دندر . لیکن اصطلاح فقهایه و محدثینه نظراً قول اعم در علی الاطلاق سوز دیمکدر . هرکس سوزینه شاملدر .

(حدیث) تعیری ایسه رسالتپناه افندیمرک سوزینه مخصوصدر . بو معناده موضوع اولمشدر . فعلده رسالتپناه افندیمرک بالذات یابدینی ایشدر . تقریر کانهجه : بوندن مقصد باشقه بر کیمسه نك ایشلدیکنی حضرت پیغمبر کوروبده اختیار سکوت ایتمی در .

برشارعک ، احکام شرعیه بی تبلیغ ایله مأمور و مکلف اولان بر پیغمبرک باشقه بر ذاتک برایشی ایشلدیکنی کوروبده انی منع ایتیموب سکوت ایتمی او ایشک شرعاً جوارینه دلان ایده جکندن بوسکوت پیغمبری ده بر دلیل شرعیدر و او ایشک ایشتمه سنده خلق کندی حالنه براقسی و حرکتلرنده قرار قیلدیرمی دیمک اولدی بی ایچون بوسکوته تقریر اطلاق اولنور .

حدیث پیغمبری به « سنت قولیه » و فعل پیغمبری به « سنت فعلیه » و تقریر پیغمبری به (سنت تقریری) اطلاق اولنور .

درسمزک کچن سنه کی مباحثنده ایضاح ایتشدمکه احادیث نبویه آیات قرآنییه کبی اصحاب کرام طرفندن جمع و ضبط اولنمامشدی . حتی حضرت پیغمبر اصحاب کرامی حدیث یازمقدن منع ایدرلردی . کندیلرندن آنجیق قرآن کریمک یازلمسی امر ایدرلردی . آندن خارج اولان بیانات رسالتپناهیلرینک یازیللمسی تجویز

ایتمزلردی. آیات قرآنیہ ایله قاریشمه سون دییه قورقارلردی. چونکه صوکره قرآن تخریفه اوغرامش اولوردی.

قرآن اولماین بر طاقم افادات و بیاناتی دخی قرآنک ایچنده مندرج بولئوردی. ایشته بوکا محل قالماق اوزره کندیلری اصحاب کرامه قرآندن باشقه کندیلرندن ایشیتدکاری بر شیئی یازمه ملرنی توصیه ایدرلردی. اصحاب کزین بو توصیه پیغمبری به امثالاً ایشیتدکاری احادیث نبویه پی یازمازلردی. یالکز حافظه لرنده حفظ ایدرلردی. و باشقه سنه نقل و روایت ایتدکاری زمان از بره نقل ایدرلردی. بوسبيله درکه حدیثک بر قسمی و یک آ از بر قسمی حافظه دن حافظه یه تواتراً نقل اولمشدر. کذلک بر قسم قلبی ده مشهور اوله رق منقولار. اکثریت عظیمه سی ایسه هپ خبر واحد نوعندندر.

دیمک اولیورکه سنت قولیه نک و سنت فعلیه و تقریریه نک بر قسمی قطعی اثبوت در. معنای مقصوده دلالتلریده بعضاً صریح و بعضاًده غیر صریحدر. بونک ایچوندرکه حدیثلر ثبوت دلالت اعتباریله درت قسم در.

۱ - هم ثبوت همده دلالتی قطعی اولاندر. معنای صریح اولان متواتر حدیثلر کی بوکا قطعی الثبوت و قطعی الدلاله دینور.

۲ - ثبوتی قطعی اولدینی حالد دلالتی ظنی اولانیدر. تواتراً منقول اولدینی حالد معنای مقصوده دلالتی قطعی اولیان حدیثلر کی بو نوعه قطعی الثبوت و ظنی الدلاله دینور.

۳ - ثبوتی ظنی فقط دلالتی قطعی اولاندر. معنای یک صریح اولان خبر واحدلر کی بوکاده (ظنی الثبوت و قطعی الدلاله) دینور.

۴ - هم ثبوتی، همده معنای مقصوده دلالتی ظنی اولاندر. بوکاده ظنی الثبوت و ظنی الدلاله دینور. معنای مقصوده دلالتی واضح اولیان خبر واحدلر کی.

ایشته بو درت قسم احادیث نبویه دن برنجی قسم دلیل قطعی در دیگرلری یکدیگرینه نسبتاً درجه درجه دلیل ظنی در.

شاید بو قسملر آده سنده تعارض واقع اولاجق اولورسه برنجی توعدن اولان حدیث شریف ایکنجیسنه: ایکنجیسی ده اوچنجیسنه ؛ اوچنجیسی ده دردنجیسنه تقدیم و ترجیح اولنور .

حدیث ایله قیاسی بر مسئله ده تعارض ایله بیلورلر . یعنی بر مسئله حقنده آنک حکمتی مبین بر حدیث وارد اولدینی حالا . قیاسی او حدیثک حکمنه معارض اوله بیلور .

شو حالده بونلردن هر هانکیسی دیکرینه ترجیح اولنه بیلورمی ؟ حدیث می قیاسه ترجیح ایلمک ، یوقسه او حدیثی ترك ایله قیاس ایله می عمل ایلمک لازم کله جک ؟

بو مسئله یی حل ایچسون هم حدیثی ، مهمده قیاسی تدقیق ایتک ایجاب ایدر . اولجده بیان ایتشدم که حدیثلر اوچ نوعدر . متواتر ، مشهور ، خبر واحددر .

حدیث اگر متواتر ویا مشهور ایسه آرتق او حدیث ایله عمل لازمدر . ا کا معارض اولان قیاس لظر اعتباره آلتماز او متواتر ویا مشهور اولان حدیث قیاسه ترجیح اولنور .

اگر حدیث متواتر ایسه علم افاده ایدر . حدیث مشهور ایسه قناعت قلبیه حاصل ایدن بر دلیل علی العاده ظن افاده ایدن دیکر بر دلیلدن البته ده قوتلی در .

دلیل قوی ایله بر دلیل ضعیف تعارض ایتدیکی صورتده دلیل قویئک دلیل ضعیفه تقدیم و ترجیحی مقتضای منطقدر . آنک ایچون خبر متواتر ایله خبر مشهور قیاسه تقدیم و ترجیح اولنور . و آرتق او قیاس ایله عمل اولتماز . مع هذا بوراده حدیثلرک معنای مقصوده دلالتلری صریح اولسی لازمدر . صریح اولمایه جق اولورسه او وقت مبهم ویا خود معانی مختلفه به محتمل دیمک اولوب بو صورتله آنک متواتر ویا مشهور بولنسی عنم یقین ویا عام الطمانینت یعنی قناعت قلبیه افاده ایتمه سینه کافی کمر . تن حدیث یعنی الفاظ حدیث دخی

صریح و مفادینه دلائلری واضح اولماید که عام یقین و یا قساعت قلبیه افاده ایتیمش اولسونلر ، عکسی تقدیرده دلیل ظنی اولورلر . مدلولاری دائرة ظنی تجاوز ایدمهز .

حدیثا کر خبر واحدایسه خبر واحد دخی ، قیاس کی دلیل ظنی اولدیغندن هانکیسنگ دیکرینه ترجیح ایدله جکی مسئله سی جای تأملدر . آنک ایچوندر که علمای اصول بو مسئله ده اختلاف ایتشلردر . بو مسئله نی ایکی نقطه نظر دن تدقیق ایتک ایجاب ایدر . برنجیسی خبر واحدک اوصاف و شرائطی ، ایکنجیسی قیاسک اوصاف و شرائطیدر . بو ایکی جهت ملاحظه و یکدیگریله مقایسه ایدمده برنجی دیکرینه ترجیح خصوصنده استعمال طوغری اوله ماز .

شوالده اول امرده برنجی نقطه یی ، ثانیاً ایکنجی نقطه یی تدقیق ایدمه لم . حدیثک اوصاف و شرائطی نظراعتباره آلمق لازم کلنجه : اولاً راوینک احوال و شرائطی ، صوکرده اصل حدیثک احوالی نظر دقه آلمق ایجاب واقضاً ایدر .

خبر واحد ، بیلورسکنز که بر ویا ایکی ، اوچ ذاتک روایت ایلدیکی خبر دیمکدر . برویا برقاچ شخصک روایتی حسن تلقی ایتک یعنی یته بر اصل شرعی دیمک اولان قیاسه ترجیح ایدمده درجه ده قوتلی عد ایتک ایچون راوینک ، اوخبری روایت ایدن ذاتک اوچ وصف ایله متصف اولمسی لازم کلور و تهمت کذب دن معری بولنسی مقتضیدر .

شرائط راوی

شرائط راوی اوچدر و شونلردر :

- ۱ — عقل
- ۲ — عدالت
- ۳ — حسن ضبط

۱ — عقل : عقلدن مقصد عقل گاملدیر ، یعنی ، بالغ اولان شخصك سن بلوغه واصل اولان شخصك عقلیدر . بناءً علیه صبیك ، معتوهك و بونلره مماثل اشخاصك روایتلری قبول اولماز .

کرچه سن بلوغه واصل اولمایان صبی ممیز دخی کرک حضرت پیغمبردن طوغریدن طوغری به و کرکسه دیگر بر ذاندن ایشتمش اولدیغی دیگر بر حدیثی روایت ایتک صلاحیتنی حازدر . چونکه ممیزدر . لکن یلان سویلدیکی تقدیرده چوجق اولسی حسیله مسئولیت اخرویه دن بری بولندیغی نظراعتبارده آله رقی اختیار کذب ایتسی احتمالی موجوددر . ایشته بوا احتمال آنک دینده وحدیثده وقوعبولان روایتنی قبولدن بزی معذور قیلار . بو جهته اوکی عقل کامله صحابندن اولمایان ذواتک روایتلری شایان قبول کوریلهمه مشدر .

۲ — عدالت : عدالت کانهجه بوراده عدالتدن مقصد (سیرتده استقامت) درکه آنکله انسان مقتضای عقل و دینی هوا وهوسنه تقدیم وترجیح ایدر . و آنجق آنکله درکه مروت دینلان ار ککلك ، انسانلق یعنی سجهیه حصوله کلور . شو حالده بواوصاف ایله متصف اولمایان بر ذاتک روایتی دخی فقهای اصولیون عنندنه شایان قبول کوریلهمه مشدر .

بناءً علیه بر فاسق آدامک و حرکتی مروتی ، جدیت و سجهیه یی مغل اولان اشخاصک و هرکس نظرندمه مقدوح اولان صنایع خسیسه اربابک اوکی حرکات و احوالی رؤیتک صحتنده شبهه وترددی داعیدر .

احتمالک اوکی ذواتک روایتلری واقعیه مطابق اولق حسیله طوغریدر . فقط مخاطبه ، سامعه قناعت بخش دکادر . حدیث روایتی غایت مهمدر . چونکه بر حکم شرعی وضعی مییندر ، باشقه برسوز نقل ایتک بکزه من .

آنک ایچون بوخصوصده راویك حال و شائنی تماماً نظر اعتبارده آلمق لازم کلور . حتی ائمه حدیث بوباید یعنی راویلرک تراجم احوالی حقنده بکرمیشر ، اوتوزر جلدک جسم کتابلر تألیف ایتمشلردر . و بونی علم مخصوص اولق اوزره تدوین ایشلر اسمنده (علم نقد رجال) دیمشلردر .

شواهد (کبائری) ارتکاب ایدن ذوات ابله (صغائر) ده اصرار ایلان
 شخصک مجازفه کار یعنی دوشونمکسزین آغزندن بمینا سوزلر آتیویره ن لاف
 و کذاف اربابنک عزت نفسی (مروتی) جدیت و موثوقتی مغل اولان حرکات
 و صنایع اصحابنک روایتلری مقبول دکلدر . ایشته بونلردن برینک روایت
 ایندیکی حدیث نهه مستند قیاسه ترجیح اولونماز . فقط بعض علما بوراده
 مهم بر جهتی نظر دفته آملش و بوندن طولانی علی الاطلاق بر فاقک فسقنی
 روایتک قبوله مانع عدایتمه مشلدر .

بونلر نییورلر که بر انسان غایت طوغری سوزلو و هر وقت روایتی شایان
 قبوله تمیز یورده کلی اولمغله برابر فاق اولابیلور .
 ناسل که بونک عکسی ده جائزدر . یعنی بر آدام مصلی ، و ذاهد بر ذات
 اولمغله برابر بمضاده یالان سویله بییلور . آنک ایچون بو خصوصده نظر دفته
 آنه حق عدالت ، یالان ارتکابه مانع اولاجق استقامت ، سیرت و سجه در
 بو کیفیت هر هانکی بر ذات ده بولنورسه روایتی قبول اولنور . بولنمازسه رد
 اولنور . فقط بو فکره قائل اولانلر اقلیت ده مد ؛ جمهور علما بو کیفیتی کافی
 کورمیه وورلر . چونکه حدیث روایتده یالکز سجه صاحبی اولمق کافی
 دکلدر . هر حالده روایتی تهمت کذبدن عاری قیله حق اوصاف ابله متصف
 اولمق لازمدر . آنکچون جمهور علما اوصاف و شرائط سائر سابقه نکه ده
 وجودینی شرط ایدیورلر . حتی بعض بیوک عالملر کورلمشدر که کبائر دن متواحسن
 و صغائر دهده مصر بولنمادینی حالده ینه یالان یره حدیث وضع ایده رک روایت
 ایتمشدر . بو کون الده متداول اولان تفسیرلر ایچنده اک مکمللرندن معدود
 بولونان [تفسیر کشاف] و [تفسیر بیضاوی] ده هر سوره نهایتده روایت
 ایدیالان حدیثلر یالاندر .

بو تفسیر مؤلفلری او حدیثلرک یالان اولدقلرینی بیلدکلری حالده تفسیر
 لرینه یازمشلدر . مقصدلری خاقی ، او سورملری جوق او قوتمه ترغیبدر .
 بونی اک اول چیقاران امام ابو خفیه حضرتلرینک طلبه سندن [نوح ابن ابی

مریم [دنیلان بیوک بر فقیه در . بو ذاته [نه دن بویه یالان حدیث اویدر .
پیورسک] دیشلر [بتون طلبه علوم ابوحنفه نك فقهی او کرتمکله مشغول
کوردم . بونلر فقه او کره نه جکیز دییه قرآنی اونودیورلر . هیچ قرآن ایله
مشغول اولدقلری یوقدر . اونلری قرآن ایله مشغول ایتک ایچون حسبہ الله
او حدیثلری اویدوردیم] جوابی ویرمشدر .

دیمک اولیورکه بیوک طانیلان بعض علما بویه بعض مقاصده مبنی یالان
حدیث روایت ایتمشدر . اما شریعت اسلامیته نك ایچنده بر جوق خرافات
قاریشمه سنه سبب اولمشلردر .

۳ — حسن ضبط : بوندن مقصد راوی نك روایت ایتدیکی حدیثی هر
شیدن اول کمال دقت و اهمیتله ایشتمش اولسی یعنی حضرت پیغمبردن بر حدیث
شریف بیان ایدرکن آنی ایشیدوبده بشقه سنه افاده ایدمک اولان راوی
اول امرده حضرت پیغمبرک فم سعادترندن شرفصادر اولان الفاظ و کلمات
نبویه لرینی کمال دقت و اعتنا ایله حفظ ایتک، صوکره اونک او الفاظ و کلمات
کرک لغوی معانیفی و کرکسه معنای فقهیه لرینی تماماً آ کلامق و اوچنچی
درجه دده بو صورتله ضبط ایتدیکی حدیثی باشقه سنه روایت ایدنجه یه قدر
ضبط ایتدیکی کی حفظ ایدمک روایت ایلکدر .

ایشته بو ذکر اولان شرائطی جامع اولان راوی نك روایتی معتبر
وشایان قبولدر .

فقط خبر واحد اولان بویه بر حدیث ایله عمل ایتک ایچون یالکیز
راوی نك شرائط لازمه یی جامع اولسی کافی دکلدر .

اوندن باشقه نفس حدیثی ده نظر اعتباره آلمق و بناء علیه شمدی ایضاح
ایده جکمز ایکی نوعدن هانکیسنه داخل بولندیغنی بیامک و بر معارضی اولوب
اولمادیغنی آ کلامق لازمه دندر . شو حالده بوجهقی ایضاح ایتک اقتضا ایدیور .
اصولون یعنی علماء اصول، احادیث نبویه یی (مسند)، [مرسل] ناملریله
ایکی یه تقسیم ایدیورلر .

مسند دیمک، گنبدینه روایت ایدیلان ذات ایلله حضرت پیغمبر آرمسندده کی
راویلرک جله سنک برر برر اسملری ذکر ایدیلرک روایت ایدیلان حدیث،
روایت اولتان شیخه روایتی متصل اوله بیلان حدیثلر در . ایشه بو صورتله
روایت ایدیلان حدیثه طوغری دن طوغری به یعنی آراهه بر واسطه روایت
ساقط اولقمزین حضرت شاره اسناد اولندیغی ایچون مسند دینور که بوکا
متصل دخی دینور. راویلر صیره سیله وغنه سیله حضرت شاره اتصال ایدیور
دیمک در .

مرسل سلسله روایت آرمسندده انقطاع حاصل اولان یعنی راویلردن بر
ویا بر قاجی اثنای روایتده ذکر ایدیلرک اسقاط ایدیلان حدیث ر مثلا
رسالتناه افندیغی اصلا کورمه بن وارتحال نبوی دن سوکره دنیایه کلان
وتابعین دن بولتان بر طلمک [حضرت پیغمبر بیوردی که ... الخ] دییه رک
روایت ایتدیکی حدیث کبی که ایشه بوکا مرسل دینور . جمعی [مراسل]
کلور . ایستر تابعین دن بولونسون ایستره ده سوکره کی عصرلرده اطلاق
اولور . بو ، اصولیون اصطلاحی در.

حدیث جیلر ایسه مرسل دییه یالکز تابعین دن اولان ذانک گنبدینه سیله
حضرت پیغمبر آرمسندده کی واسطه روایتی اسقاط ایدیلرک روایت ایتدیکی
حدیثه دینور . بو صورتله تابعین دن سوکره کلان ذتلرک ارسال طریقله
روایت ایتدکاری - [حدیثلره] - مرسل دییه بوب منقطع اطلاق ایدیورلر .
آراهه کی راویلردن ایکی ویاده زیاده سی اسقاط اولنورسه اوکاده (منفصل)
دیورلر .

حدیث ، مسند اولور و شرائط لازمه سفیده جامع بولنورسه او حدیث
شبهه سز قبول اولور . فقط حدیث وجه شروح اوزره مسند و متصل اولمایوب
مرسل و منقطع اولورسه بو حدیثک شایان قبول اولوب اولمادیغده فقهای اسلام
اختلاف ایتدیلر در .

فقه ظاهری علماسی ایلله شافعی لر مرسل ایلله عمل ایتزلر و بناء علیه امام

شافعی حضرت نجه تعیین ایدیلان شرائطی جامع اولمیان بر حدیث مرسل فقههای شافعیه عندند واجب العمل ، صحیح العمل دکادر . امام شافعی حضرت تری یالکز اکابر فقههای تابعیندن مشهور (سعید ابن مسیب) ک ارسال ایلدیکی حدیث مرسلر ایله عمل ایتشدور .

چونکه (بن ، مشارالیه سعیدک روایت ایتدیکی حدیثلری برر بر تدقیق ایتدم . جمله سنی باشقه راویلرک روایتلریله حضرت پیغمبره متصل بولدم) دیمشدر .

مرسل قبول ایتیمان علما بو باده معذرت اولمق اوزره دییورلرکه : (بر حدیثک شایان قبول اولوب اولماق نقطه سنی تعیین راویلرک درجه موثوقیتی بحق بیلیمک ایچون ایسه او راوینک کیم اولدیفنی بیلیمک لازم کلور . بوده آنحق آنک سلسله روایت آره سنده ذکر ایدلمسیله اولور .)

بر ذات دیکرندن روایت ایتدیکی حدیثی آنک اسمنی ذکر ایتیمکسزین بر حدیث روایت ایدرسه او حدیث اودات ایچون مقبر و مقبول اوله بیلور . (فقط بزم ایچون او اسمی ذکر ایدلمیان راوی بیلنمدکجه مقبول اولاماز . زیرا او راوینک اوصاف لازمه یی جامع و تهمت کذبدن عاری بولندیفی بیلنه من . حدیثی بزه روایت ایدن ذاتک بوجهتی بیلیمسی ایسه کافی دکادر . چونکه بزه طامز ، متفکرذ .

آنک عادل ، موثوق الکلام ظن ایتدیکی بر ذاتی احتمالک بزاونک بعض اوصاف خفیه سنه مطلع اولمق حسیله اونک عادل اولمادیغنه قائل اولورز . اونک ایچون روایتدن اسقاط ایدیلان ذاتک کیم اولدیفنی بیلنمدکجه بویله مرسل اوله رق روایت ایدیلان حدیثلر ایله عمل ایتیز (دییورلر .

فقههای حنفیه ایله فقههای مالکیه و حنبلیه حدیث مرسلی ارسال ایدن یعنی مرسل اولارق روایت ایدن اصحاب و تابعیندن و یا خود اتباع تابعیندن بر ذات ایسه او حدیث مرسل ایله عمل ایدیورلر . یعنی او حدیث مرسلی قیاسه ترجیح ایدیورلر . فقط بو اوج قرتدن صوکره کان ذاتلرک ارسال ایتدکاری حدیث

مرسلره کانهجه : بونده اختلاف ایدیورلر . بعضی یلری عادل اولمق شرطیله ارسال ایدن ذات کیم اولورسه اولسون آنک مرسل ی قبول اولنور، بعضی یلریده قرن ثالثدن صوکره کلن ذاتلرک حدیث مرسللری قبول اولنماز دیورلر . بونلر فکرلرینی ترویجاً دیورلرکه : برانسان صحیحی کندنجه تحقیق ایتیمان بر حدیثی نقل ایدرکن آنک مسئولیت مادیه و معنویه سی راوینک عهد سینه تحمیل ایتمک ایسترده آنک ایچون راویلری برر برر ذکر ایدر و نتیجه ده (العهدۃ علی الراوی) دیر وینه او انسان صحیحی کندنجه متحقق اولان بر شیشی روایت ایدم چکی زمان کندی کورمش وایشیتمش کبی نقل ایدر. آراده کی واسطه روایتی ذکر ایتمز . عادت بشر بودر .

نته کیم بز حدیث روایتیله مشغول علمایی برر برر تدقیق و تتبع ایتدک . هپ بو عاده سالک اولدقلرینی کوردک . آنک ایچون مرسل اولارق روایت ایدیلان حدیثلرک صاعلام حدیثلردر . حتی اکابر فقهایی تابعیندن بعضلری بر ایکی کشیدن ایشیتدیکم حدیثلری ارسال ایتیب اسناد ایدرم، نه وقت بر چوق کیمسهلردن بر حدیث ایشیدیر ایسم آنجق او زمان او حدیثی ارسال ایدرک روایت ایدرم دیمشلردر .

بناءً علیه بزجه مرسل ، مُسْنَدُون اقوادر . (تعارضلری حالنده مرسل، مسنده ترجیح اولنور) دیورلر . بعضی یلریده از جمله فقهایی شافیه مرسل ایله عمل ایتیمورلر و (مادامکه مرسل منقطع در یعنی راویلردن بریسی ذکر ایدلمه مش اولمق حسیله حضرت شارعه اتصال تام ایله متصل دکادر و او راوینک عادل و موثوق الکلم اولدینی مجهولدر . آرتق او یله بر حدیثله عمل و احتیاج جائز دکادر) دیورلر .

شو حالده مسند اولان بر حدیث شرائطی جامع اولدینی سورتده آنکله عمل ایتمک متفق علیه در . مرسل اولان حدیث ایله عمل ایتمک ایسه علمای اسلام عندند، مختلف فیه در . فقط بو مقامده نظر دقه آنه جق بر نقطه واردرکه اوده موضوع بحث اولان مسئله نک مسائل اعتقادیدن اولوب اولماسی

کیفیتی در اگر مسئله مسائل اعتقادیه دن ایسه اولوقت خبر واحد اولان مسند حدیث ایله دخی احتجاج اولونه ماز. چونکه خبر واحد انحق ظن افاده ایتدیکندن مسائل قطعیة اعتقادیه یقین افاده ایتمز. مسائل اعتقادیه یقین افاده ایدن براهین عقلیه و یا خود نصوص متواتره قطعیه ایله احتجاج اولونور. بناءً علیه خبر واحد اولارق روایت ایدیلان مسند حدیثلر ایله یالکیز احکام شرعیه ده یعنی افعال و اعماله تعلق ایدن احکام شرعیه ده استدلال و احتجاج اولنه بیلور. لکن بویله خبر واحد اولارق روایت ایدیلان مسند بر حدیث ایله ونوکه احکام فرعیه ده اولسون عمل ایدم بیلیمک صحیح اولابیلمک ایچون یوقاریده ذکر اولنان شرائط کافی دکادر. او شرائط ایله برابر نقل اولونان حدیثک منضمونه متعلق بعض شرائطک موجود اولسی دخی لازمدر.

اولاً — او حدیث مسند آیات قرآنییه و یا احادیث متواتره ده معارض اولاملیدر. اگر خبر واحد اولان مسند بر حدیث نصوص قاطعه قرآنییه و نبوییه منافی اولورسه شبهه سنز آنکله عمل ایدملوب اونصوص قاطعه ایله عمل اولنور. حتی حضرت شارعک بوباید شومالده بر حدیثی مرویدر.

« بن ارتحال ایتدکدن صوکره کویا بنم طرفدن سویلنمش کبی بر جوق حدیثلر روایت ایدیلور. بویله بر حدیث ایله در حال عمل ایتمه ییکز اونی قرآنه عرض ایدیکز. اگر قرآنه موافق بولورسه کز قبول ایدیکز. قرآنه مخالف بولورسه کز رد ایدیکز »

احادیث متواتره دخی قرآن کبی احکام قطعیه یی مفید اولایغندن آنلره مخالف اولان خبر واحدله عمل ایدلمه سی کیفیتی دخی ذکر اولنان حدیثک حکمی داخلنده در.

ثانیاً — خبر واحد اولان مسند حدیث قضایای قطعیة عقلیه ده دخی منافی اولاملیدر. اگر روایت ایدیلان بر حدیث ولوکه (صحیح بخاری و مسلم) کبی اک معتبر حدیث کتایبده موجود اولسون اگر مقتضای عقله منافی اولورایسه او حدیث ایله یعنی مقتضای عقله منافی اولان او حدیث ایله اجتماع و استدلال

صحیح اولماز. یوقاریده بالئاسیه سویله مش ایدم که عقل دخی بر حجت شرعیه در. حجت شرعیله آره سنده ایسه ماینت بولنه ماز. آنک ایچوندرکه بر حدیث دلائل قطعیة عقلیه به منافی اولورسه اوحدیثی ممکن اولایلدیکی قدر مقتضای عقله موافق بر صورتده تأویل ایتمک لازم کلرر.

اگر آنک مقتضای عقله وقانون لسانه موافق بر صورتده تأویلی قابل اولاماز ایسه آرتق او حدیث ایله عمل اولتماز و او حدیثک حدیث اولمادیغنه حکم اولنور. چونکه حضرت شارع هیچ بر وقت دلائل قطعیة عقلیه به منافی بر سوز سویله من.

ثانیاً — اوحدیث مسندی روایت ایدن ایلك راوی فقهادن اولمق لازم در. اگر راوی اول حدیثک محتوی اولدینی معنائی فقهیه بی و منرایای شرعیه بی ادراک ایدرجک درجه ده فقیه ایسه آنک روایت ابتدیکی حدیث قیاسه ترجیح و تقدیم اولنور.

و آرتق مقتضای قیاس ترك اولنور. اوحدیثک مضمونی ایله عمل اولنور. لکن اوراوی فتاوتله مشهور بر ذات دکل ایسه مثلاً مشاهیر اصحابدن حضرت ابو هریره و انس بن مالک کی یالکیز روایت حدیثله مشهور اولوبده حد ذاته فقاهت ایله و نفوذ نظر فقهی ایله کسب اشتها ایتمه مش ایسه آنک روایت ابتدیکی حدیث قیاسه مخالف اولورسه آنکله عمل اولتماز قیاس ترجیح اولنور. بناء علیه مقتضای قیاس ایله عمل ایدیلور. شو قدرکه اگر او حدیث قیاس معارض دکل ایسه او وقت آنکله عمل اولنور.

بونک بی بی ده شودرکه حضرت رسالتیاه افندیغزدن شرفصادر اولان حدیثلرک راویلری اکثریت عظیمه اعتباریله روایت ایتدکلری حدیثلرک مفهوم و مألوفی نقل ایتمشدر.

حضرت پیغمبردن صادر اولان الفاظ حدیثی عیناً و حرفیاً نقل ایتمه مشلدر چونکه حافظه لرنده حفظ ایدمه مشلدر. بهضاری ده عیناً و حرفیاً نقل ایتمشدر ایسه ده پک آزدور. اکثریسی دیدیکم کی مآلاً نقل اولنمشدر.

برسوزی ، برلفطی بر اقوبده مأل نقل ایدن بر ذات هیچ شبهه سز کندی
آ کلایشنی نقل ایتمشدر . حالوکه شریعتیه تابع اولان امت اسلامییه او راوینک
آ کلایشیه حامل اولمق مجبوریتقنده دکلدرد .

احتمالک او راوی یا کلش آ کلامشدر . او حدیث الفاضلی ده بتمامها نقل
وروایت ایتلی که هرکس کندی آ کلادیغنه کوره او حدیثیه معنا ویره بیلسون .
خصوصیه فقیه اولمایان برراری مزایای فقیهیه واقف اولامیه جنی جهنله یا کلش
آ کلایمق احتمالی آنده یک چوقدر .

ایشته بوسبیه مبنی فقههای حنفیه بر حدیثی روایت ایدن راوینک هرشیدن
اول فقیه اولوب اولمادیغنی تدقیق ایدیورلر . اکر راوی فقههای اصحابدن
دکله آرتق باشقه شرط آرایورلر . اونک روایت ایتدیکی حدیثی قیاسه معارض
اولماق شرطیه قبول ایدیورلر .

قیاسه معارض اولورسه قبول ایدیورلر . فقط فقههای شافعییه ایله محدثلر
راوینک فقیه اولوب اولمامه سی جهتنی نظر دقنه آلمایورلر . او شرائطی جامع
اولان حدیثی ایستر فقیه روایت ایتسون ایستر غیر فقیه روایت ایتسون آنکله
عمل ایدیورلر و قیاسه ترجیح ایدیورلر .

ایشته خبر واحده قیاس تعارض ایتدیکی صورنده خبر واحدی قیاسه
ترجیح و تقدیم ایتک ایچون آنک کرك راوی به و کرك متن حدیثیه حائد اولان
شرائط لازمه سی تفصیلاً ایضاح اولندی .


بو شرائطی جامع اولان و مسند بولان بر حدیث قیاسه ترجیح اولنور .
بو نقطه ده علما مفقودر . یالکیز او حدیث مسند اولمایوب مرسل اولورسه
بو صورتله او مرسل حدیثی ، یوقسه قیاسیه ترجیح اولنه جنی کیفیتنده فقها
اختلاف ایتمشلردر . بو اختلافیه ده یوقاریده بیان ایتمشدک .

فقط بوراده نظر دقنه آله حق دیگر بر جهت دها واردر که اوده قیاسه
حائدر . یوقاریده دیمشدک که خبر واحد ایله قیاس تعارض ایتدیکی زمان
هانکیسک دیگرینه تقدیم ایدیه جکی مسئله سنده هم حدیثک شرائط لازمه سی

جامع و حائز اولوب اولمادینی همده قیاسک قوت و ضعفنی نظر اعتباره آلمق اقتضا ایدر دیشدک .

قیاس . — خبر واحدک شرائطنی تدقیق ایتدک . شمدی ده قیاسی تدقیق ایتدک ایجاب ایدر . زیرا هر قیاس عینی سویه و مقیاسده دکلدر بعض قیاس واردر که بک قوتلیدر . بعض قیاس واردر که بک ضعیفدر . بوجهتی بر درس صوکره مفصلاً ایضاح ایدم حکم . یالکیز شو قدر سوبلهیم که اگر قیاس جلی ، غیر ظاهر اولمق حسبیلله و یا او قیاسه معارض باشقه بر حال وجودی سبیلله بک ضعیف اولورسه اولوقت خبر واحد فقیه اولمیان بر راوی طرفندن روایت ایدلمش اولسه بیلهینه او قیاسی ضعیفه ترجیح اولمق اقتضا ایدر .


فقط خبر واحد دخی ضعیف اولان قیاس درجه سنده ضعیف بولورسه اول وقت دلائل سائر شرعییه و اساسات فقهیهیه مراجعت ایدرک حل مشکل ایدلمک لازم کلور .



فعل پیغمبری

فعل پیغمبرینک حکمی — فعل پیغمبری جواز افاده ایدر، وجوب افاده ایتمز . مکرکه امر پیغمبری به اقتران ایتمش اوله . بونده ده وجوب افاده ایدن امردر ، فعل دکلدر . مثلاً پیغمبریمز اقدیمز حضرتلرینک بقدای ساتون آلمسی پاره بولنمادیغدن برشی رهن اولارق ویرمسی . پیغمبر اقدیمزک بوایشی احکام شرعیه اعتباریله نهیه دلالت ایدر ؟ پیغمبر اقدیمزک بو فعلی او ایشک جائز اولدیغنی بیان وافاده ایدر . بوراده کی مثالزده رهن مسئله سی ، رهنک جائز اولدیغنی اثبات ایدر . فقط وجوبتی افاده ایتمز .

پیغمبر اقدیمزک باشقه افعالی دها وارکه صرف کندینه تعلق ایدرلر . اوکا خصائص نبویه دینور . اوافعالی یالکیز کندینه مخصوصدر . مثلاً کیجه اویقودن قالقوب تهجد نمازینی قیلمق کبی که بوکندیلری حقنده واجبدر ، اما اتمق حقنده واجب دکلدر ، سئندر ، مستحبدر . ینه برطاقم افعالیده واردر که بونلر علی العاده افعال نبویه دندر . مثلاً یمک یمک ، ایچمک ، سائر کبی اوطوره رق صوایچمک یورورکن اولاً صاغ آیاغنی آتمق ، اولاً صاغ آیاغنه قوندوره کیمک ، صاغ الیله ایش کورمک کبی بعض آدابیه توافق ایدر حرکاتی واردر . پیغمبر اقدیمز صاچنی اورتهدن اکی به آبریورمش ، بیاض صاریق صارارمش یشیل هیچ کیمزمش . بونلر هب افعال پیغمبریدر و هیچ بری وجوب افاده ایتمز .



اجماع

اجماع لغتده عزم و اتفاق معانیه کثیر . اصطلاحده اتفاق دیمکدر . فقط هرکسك اتفاقی دکل ، بلکه صاحب فقاہت اولان یعنی اجتہاد اقتدارینه مالک و بر عصرده اولان فقہای اسلامك اتفاقدن عبارتدر . فقط بو اتفاق بر حکم شرعی فرعی حقتده اولمایددر .

اگر فتہاء اسلام احکام فرعیہ حقتده دکل ، احکام فرعیہ خارجنده باشقه بر مسئلهده اتفاق ایتمش اولورلرسه او اتفاق ادله شرعیہدن معدود اولماز . معلومدر که احکام شرعیہ ؛ احکام اعتقادیہ و احکام عملیہ نامیلہ ایکی قسمه آیریلور .

احکام اعتقادیہده دلیل ، براہین عقلیہ و نصوص متواتره شرعیہدر . بر مسئله اعتقادیہده برهان عقلی قائم اولماز و یا صریح و قطعی بر نص متواتر موجود بولمازسه او مسئلهده علمانك اتفاقی مرحالده ولو ظنی اولسون بر دلیل عقلی به و بر نص شرعی به مستند اولمی لازم کاور .

بویله بر مسئله اعتقادیہده علمانك اجماعی شو فائده پی تأمین ایدر که اوده او مسئلهنك ظن دن جیقوب قطعیتہ منقلب اولمی در . فقط بر مسئله اعتقادیہ اساساً بر دلیل قطعی ایله ثابت ایسه او مسئلهده اجماعك فائده سی یوقدر و اصل دلیل او دلیل قطعیدر . یوقسه اجماع دکلدر .

لکن بر مسئله دینیہ ، بر مسئله اعتقادیہ اولمایوبده صرف افعال و حرکاته تعلق ایدن بر مسئله شرعیہ فرعیہ اولورسه (که بو مسئلهلره مسائل شرعیہ و احکام شرعیہ اطلاق اولور) علمانك اجماعی آرتق او مسئلهده باشقه بر دلیلک موجود اولوب اولمادیفی آراشدیرمغه محل بر اقرار .

سادامکه او مسئله شرعیه ده اجماع منعقددر . آرتق او مسئله شرعیه
اجتهادی بر مسئله اولمقدن چیقمشدر . وکسب قطعیت ایله مشدر . مع هذا
فقها اجماعك ادله قطعية شرعية دن اولوب اولمادینی حقنده اختلاف ایتمشلردر .
بر قسم علما اجماعك دایل شرعی اولدینی قبول ایتیورلر .

مذهب ظامری فقهای ده یالکیز اصحاب کرامك اجماعی بر دلیل شرعی
اولمق اوزره قبول ایدیورلر آندن سوکره کلان علماء اسلامك اتفاق واجماعی
ادله شرعية دن عدا یتیورلر . بعضیلری ده ماهیتی اعتباریله اجماع ادله شرعية دن
معدود ایسه ده آنك نفس الامرده انتمادی قابل اوله ماز . یعنی بر مسئله ده
اجماع حصولی ممکن دکادر دییورلر .

چونکه اصحاب زماننده بیله امت اسلامیة ك علما قسمی اطراف واکنافه
طاغیلمش ایدیلر . بر مسئله شرعية ك اطراف واکنافده مختلف یرلرده ،
قصبه لرده ، کویلرده بولنان بتون فقهایك اطلاعنه عرض ایدلمسی و آنلر
طرفندن او مسئله حقنده بر رأی وفکر در میان ایدیللمسی عقلاً ممکن ایسه ده
عادتاً محالدر .

بوندن باشقه اجماع اساس اعتباریله منعقد اولدینی فرض ایدلمش اولسه ده ،
ینه اكا واقف اولمق متعذردر .

زیرا اجماع منعقددر دیه بیلمك ایچون بر شـخصك صورت مخصوصه ده
قالقوب بتون ممالك و بلادی و او ممالك و بلدان ایچنده بولنان علما خانه لرینی
برر برر طولاشمسی و او مسئله حقنده هر برینك رأی وفکرینی آیری
آیری اوکرنسی ایجاب ایدرکه ممکن دکادر .

خصوصیله آنلرک مطالعه سی تأییداً ذیله بیلورکه اولوقت نه شـمندوفر
وار ایدی ونه ده بخار ایله ایشایان واپورلر ونه ده طیاره و بالونلر ، تللی ، تلسز
تلفراف و تلفون کی مخبرات و مواصلاته آلت انحاذ ایدیلجهك وسائط سائر .
آنك ایچون بتون ممالك اسلامیة ده بولنان علماء اسلامك جمله سنك
مطالعہ سی طویلایوب اتفاق ایدوب ایتدک لرینی آکلامق کیفیتی جداً غیر
قابل وعادتاً مستحیلدر دییورلر .

حتى اونك ايجوندرکه انئه اربعه . شهوره دن صاحب مذهب امام احمد بن حنبل حضرتلری (بر فقیه بر مسئله ده اجماع منعقد اولایغنی ادعا ایدرسه یالان سویلش اولور) دییور .

فقط ضروریات دینیہ دینلن احکام دینیہ قرناً بعد قرن (بابادن اولاده) ساف دن خلفه انتقال ایتک صورتیله تواتر واجماع عام ایله متواتر ومتفق علیه اولدقلرندن ایشته او ضروریات دینیہ ده اجماع موجود اولدیغنده شبهه یوقدر . زیرا نصوص متواتره قاطعه وارددر فقط ضروریات دینیہ دینلن مسائل نصوص قاطعه متواتره ایله ثابت اولدقلرندن او مسئله لرده جاهل ، عالم ، فقیه ، غیر فقیه ، حتی امی لر دخی مساویدر . مثلاً نمازک ، زکاتک فرضیتی ، شرابک حرمتی کبی . مثله لری بیلمک خصوصنده یعنی احکام شرعیه دن اولدیغنی بیلمک کیفیتنده هرکس مساویدر . بر جاهلک عالم دن فرقی یوقدر . مساویدر بو مسئله لرده هیچ بر عالم بر جاهل دن دها فضله عالم دکدر .

قیاس

قیاس لغتده مقایسه معناسنه درکه اولچمک دیمکدر . بر شیشی دیگر یله اولچمک دیمک اولور ؛ تسویه معناسنده ده استعمال اولنور . حتی اونک ايجوندرکه ایکی شیشک یکدیگرینه مساوی اولوب اولمادیغنی کوسترن آلتده (مقیاس) دینور ؛ آلت قیاس دیمکدر .

اصطلاحه کلتجه : اصولیون قیاسی مختلف صورتلرله تعریف ایتمشلرسده فهمه اک قریب اولان تعریف بودر :

« قیاس بر مسئله نک حکمنی او مسئله یه مماثل ومشابه اولان دیگر بر مسئله ده اظهار ایلدکدر . »

برنجی مسئله یه مقیس علیه ویا (اصل) دینور . ایکنجی مسئله یه ده مقیس ویا فرع دینور . بو ایکی مسئله نک آره سنده موجود اولان وجه مشابهت

ووجه مماثلته ده (علت و جامع) و (مناط حکم) تعبیر اولئور .
 شو افاده دن آ کلاشیلور که قیاسک رکنلری درتدر .

۱ - اصل

۲ - فرع

۳ - مناط حکم اولان علت

۴ - حکم

یعنی اصل اولان مسئله ده کی حکمدر . فرعه اظهار اولنان حکم ایسه
 برنجی حکمک مثیلدر و قیاسک ثمره سیدر .

ایشته بر مسئله نک حکم شرعیسنی قیاس طریقله استخراج ایده بیلیمک
 ایچون اول امرده نص ایله ثابت بر حکم شرعی بولمق لازم کلور .
 قیاسجی یعنی فقیه و مجتهد او یله بر مسئله حقنده نص ایله ثابت اولمش بر
 حکم شرعی کورد کدن صوکره او حکم شرعینک علت موجب سنک نه اولایغنی
 تدقیق ایدر و آنی بولور . او علت ایکیدن خالی دکلدر .

۱ - یا نص شرعیده صراحة مذکوردر . بو قبیل علتیه منصوصه
 اطلاق اولئور .

۲ - و یا خود او علت صراحة مذکور دکلدرده مجهولدر . آنی کندی
 آ کلاشیله استخراج و استنباط ایلشدر . بو مثلاً علتیه ده (علت مستنبطه)
 تعبیر اولئور .

بو جهتلری تدقیق ایتد کدن صوکره مجتهد او مسئله منه و صیه، منصوص
 و یا مستنبط اولان علتیه مشارک دیگر بر مسئله بولنوب بولنمادیغنی تدقیق ایلر .
 اکر ایکنجی مسئله برنجی مسئلهیه علت حکمده مشارک و مشابه ایسه اولوقت
 بوا یکی مسئله آره سنده بشقه نقطه نظر دن برفرق بولنوب بولنمادیغنی تدقیق ایلر .
 هیچ برفرق بولنمادیغنی صورتده بوا یکی مسئله بیننده مشترک اولان
 و آنلری حکم اصلی ده جمع ایدن علت حسیله ایکنجی مسئله یی برنجی مسئلهیه
 حکمده مساوی طوتار . و بناء علیه برنجی مسئله نک حکمی ایکنجی مسئله ده
 اظهار ایلر . و (ایشته بو مسئله فرعیه ده حکم شرعی بودر) دیر . ایشته

قياس بويله ياييلور . لکن بو ايکي مسئله ده علت مشترک اولمغه برابر ايکنجی مسئله ده برنجيسندن آيران برفارق وارسه اول وقت ايکنجی مسئله يی برنجی به قياس ايتمه يز . چونکه :

قياس ايديله جک اولورسه (قياس مع الفارق) اولور . بو ايسه عقلاً ، منطقاً تجویز اولماز مادام که آره لرنده فارق موجوددر . او حالده ايکنجی مسئله برنجيسنه تماماً مشابه دکل ديمکدر . علتده مشترک اولق حسييله يينلرنده مشابهت وارسه ده آرالرينی تفريق ايدن باشقه بر جهت بولونديغندن طولاييده مشابهت تامه يوق ديمکدر . ايکنجی مسئله برنجی نك فرعی ونظیری اوله بيلمک ايجون ايکنجيسنده حکم اصلی نك نبوتنه مانع بر فارق بولنماق لازم کلور . بولنه جق اولورسه ايکنجی مسئله کندينه مخصوص بر حکمه تابع ديمک اولور . برنجی مسئله به قياس اولنه ماز .

بعضاً ايکنجی مسئله برنجيسنه اوقدر بداهتله بکزرکه آرتق ايکيسي آره سنده علت آرامغه بيله لزوم قالماز . بويله يرلرده فقیهک نظر اعتباره آله جفی شی علت دکلدر . بلکه او ايکي مسئله نك آره سنده قیاسه مانع بر فارق بولونوب بولنماديغنی تدقیق ايلمکدر .

اگر اويله برفارق يوقسه بو صورتله علتی اصلاً نظر اعتباره آلمقسزین ايکنجيسنی برنجيسنه قياس ايدر . بوصورتله قیاسه (نفی فارق) اطلاق اولنور . مثلاً سن تمیزه واصل اولمايان بر ارکک چوجو غک بیبی صحیح اولماز . مسئله سنی کورن بر قیاسی در حال قیز چوجفک حقنده کی حکمکده بو حکم اولسی لازم کله جکسه انتقال ايدر . زیرا آره لرنده بربرینی حکمده تفريق ایده جک هیچ برفارق يوقدر .

ايکنجی برنجینک تماماً مشابهيدر . بوراده آرتق صغیرک ، بیغک جائز اولماسی نقصان عقلی در . کار و ضرری ادراک ایده جک درجه ده قوه عقليه به مالک اولامه مسيدر کی .

علت آرامغه محتاج اولماز . فقط مجنونی ده اوصغیر ارکک چوجو غه قیاس

ایده جک اولورسه اووقت ذکر اولنان عاتی نظر اعتباره آلنور و او علته
صغیر ایله مجنون و حتی معتوه مشترک اولدقلرندن ایشته بوعلت مشترک حسیله
صغیر حقنده کی حکم شرعی بی مجنون و معتوه حقنده اظهار ایلر. بناءً علیه مجنون
و معتوه ک بی بی دخی صحیح دکلدر دیر .

مناط حکم؛ دنیلان علت اکر نص ص شرعیده صراحةً مذکور دکلسه
فقیه او عاتی کندی آ کلایشنه کوره استنباط ایدر، دیمشدرک. ایشته بو استنباط
کیفیتنه (تخریج مناط) دینور که عاتی استخراج واستنباط ایتک دیمکدر. استنباط
اولنان علت فرعه موجود میدر، دکلدر؟ حقنده واقع اولان تدقیقهده
(تحقیق مناد) دینور .

بعضاً حکم شرعی بی موجب اولان علت نصوص شرعیه ایچنده دیکر متعدد
وصفله برابر ذکر ایدلمش اولور و او وصفلرک کافیه حکمده مؤثر دکلدر.
برقید وقوعی اوله رق ذکر ایدلمشدر . اصل حکمده عامل و مؤثر اولان علت
او وصفلردن یالکیز بردانه میدر . بر دانه دکلسه هانکیسیدر. قیاسچینک بونی
آرایوب بولسی لازمدر که قیاس شرعاً معتبر اوله بیله بیلسون. ایشته بو آراشد.
برمه یده (تنقیح مناط) اطلاق اولنور .

دیمک اولیور که بر ماده بی دیکر بر ماده به قیاس ایتک ایسته ین حقوقی بو
اوج شی یعنی (تخریج مناط)، (تنقیح مناط)، (تحقیق مناط) کیفیتلری کندیسنه
بر وظیفه ایدنسی لازم کلور. اکر مناط حکم مسئلهده مصرح ایسه شبهه سز
آرقق تخریج مناطه حاجت قالماز .

مسئله مذ کورده آنی اله آلور. ایکنجی درجهده بابا جفی شی او مناط حکم
یائنده حکم شرعی به دخلی اولیان باشق و وصفلر وار میدر، یوقیدر؟ اولری آراشدیر مق
وار ایسه او مناط حکمی، او وصفلردن تجرید ایله ملک آندن سوکره حکمی
بولق ایستدیکی مسئله فرعه ده او مناطک موجود اولوب اولمادیغنی تحقیق ایتکدر.
افادات ساقه مزدن قیاسک ماهیت شرعی سی تمامیه تعین ایتمشدر . ظن
ایدرم . شمدیده قیاسک شرائطی بیان ایدم .

بر قیاس فقهی معتبر اوله بیلیمک ایچون اول امرده اصل اولان مسئلهده
بر حکم شرعی ثابت اولمالی ؛

ثانیاً : او حکم شرعی بر علت شرعیه ایله معاول و معلل بولنملی در .
ثالثاً : او حکمک علتی علت قاصرله اولمایوب باشقه مسئلهلرده ساری
و متجاوز بر علت بولنمیدرکه بوکا (علت متعدیه) تعمیر اولنور .
اگر او حکم شرعی معلل دکلسه شهبه یز او مسئله شرعییه باشقه بر
مسئله قیاس اولنه ماز .

بنام علیه عباداتده عقوباتده کفارت کبی دیگر مقدرات شرعییه قیاس
جاری اولماز . چونکه بو کبی مسائلک بر قسمی ابتداء غیر معلول اولارق
وضع ایدلمش بر قسمی ده علل قاصرله مبتنی بولنمیشدر . ایشته (مواد جزائییه
قیاس جاری اولماز) قاعده سنک حکمتی بودر . یعنی احکام جزائییه سنک علتلی
علل قاصرله در ، دیگر احوال و افعاله تعدی و سرایت ایتمز . عبادات و کفایه
راندده بویله در .

رابعاً : فرع اوله حق بر مسئله نص ایله ثابت بولنمالی . زیرا بوتقدیرده
او مسئله قیاسه ایسترموافق اولسون ایسترمخالف اولسون کندی باشنه بر نص ایله
ثابت اولمش اولدیغندن آرتق اونی باشقه بر مسئلهیه قیاس ایتمک حاجت قالماز .
چونکه اونی باشقه بر مسئلهیه قیاس ایدمک اولور ایسه ک قیاسه یا موافق
بولنور و یا مخالف بولنور . قیاسه موافق بولور ایسه ک ذاتاً نص ایله ثابت
اولدینی جهته او قیاسه حاجت قالماز فقط مخالف بولور ایسه ک بوصورنده قیاسه
مخالفدر دیهرک ترک ایدمک اولسه ق ؛ حکم نصی ابطال ایتمش اولورزکه
قطعاً جائز دیکدر .

بو جهته بر مسئله سنک حکمی نص شارح ایله ثابت اولدقدن صوکره
آرتق او مسئلهین باشقه بر مسئلهیه قیاس ایتمک معنای قالماز . بوراده نظر
دقته آینه حق بر نقطه وارددرکه اوده نصک نص قطعی اولمسیدر . چونکه
او مسئله حقندم وارد اولان نص شارح قطعی اولمیبوده ظنی و خبر واحد

نوعیدن اولور ایسه اولوقت یوقاریده « سنت » بحثده تفصیل اولوندینی وجه ایله نص ایله قیاسدن هانکیسی دها قوتلی ایسه اونکله عمل اولونور . (او بحثه مراجعت اولونه) .

خامساً : مقیس علیه اولاجق اولان مسئله علی خلاف القیاس ثابت اولمش اولماملی در . اگر بر مسئله نك حکمی قیاسه مخالف اولارق استثناء ثابت اولمش ایسه آرتق او مسئله نك حکمی کندینه مخصوص ومنحصر قالور . او مسئله باشقه بر مسئله مقیس علیه اوله ماز . چونکه مستثنا دیمکدر . استثناء ایسه دائرة استثنائی تجاوز ایتمز .

مع هذا علی خلاف القیاس ثابت اولان مسئله باشلی باشنه بر اساس فقهی تشکیل ایدمک سورتمده بر علت شاملینی جامع ومستقل بر مسئله اساسیه ایسه اولوقت او مسئله نك بشقه مسئله لر مقیس علیه اولمش وبناء علیه اکا دیگر مسائلک قیاس ایدمش جائز اولور .

مثلاً فقههای حنفیه (عقد اجاره بی قیاسه مخالف اولارق ثابت اولدینی بیان ایدرلر ودرلر که قیاس اولان معدومک بیعی باطل اولمقدرد . بو براساس فقهی در)

منتهی بیع ایتک دیمک اولان اجاره ده معدومی بیع دیمکدر . چونکه منفعت عرضدر . بذاته موجود دکدر . بر آنده حاصل اولمقله برابر منعدم اولور . آنک ایچون عقد اجاره (معدومک بیعی باطل اولمش قضیه سنه منافی اولارق) ثابت اولمشدر . یعنی علی خلاف القیاس ثابت اولمشدر . بومطالعهیه کوره اجاره قیاسه مخالف اولمقله برابر احتیاج ناسه بناءً شرعاً تجویز اولونمشدر فقط قرآن کریمده اجاره حقنده وارد اولان نصوص یالکیز اجاره آدمی حقنده در . ارضی نك وسائر عقاراتک ایجار واستیجارینک جوازی حقنده نه قرأند . ونه ده احادیث نبویه ده بر صراحت یوقدر . بو جهتله علی العموم عقاراتک ایجار واستیجاری ، یوقاریکی مطالعهیه کوره علی خلاف القیاس ثابت اولارق « اجاره آدمی » یه قیاساً واحتیاج ناسه بناءً فقها طرفندن تجویز اولونمشدر .

ایشته اجاره مسئله سی باشلی باشنه بر مسئله اولدیغندن آرتق اونك بر نوعنك قیاسه مخالف اوله رق ثابت اولدیغندن بحث ایله انواع سائر سنك عدم جوازی جهته ذاهب اولمق طوغری اولماز . اجاره نك علت جوازی اولان احتیاج ناس قضیه سی عمومیدر ، هر نوع اجاره به شاملدر .

بورایه قدر واقع اولان ایضاحات ، قیاسك تعریفنه ، ارکان و شرائطنه دأر ایدی . قیاسك حکمنه کلمه : قیاسك حکمی شرائطی جامع اولدینی صورتده مقیس علیه اولان اصلك حکم شرعیسی آکا مقیس و نظیر اولان فرعه اظهار ایتکدر . بو اظهاره لسان اصولیونده (تعدیه) اطلاق اولو- نورکه اصلك حکمی فرعه تعدی و تجاوز ایتدیرمك دیمکدر .

بونندن ده آکلاشیلیرکه قیاس دلیل مظهردر ، دلیل مثبت دکلدر . یعنی قیاس باشلی باشنه بنفسه بر حکم شرعی بی اثباته کافی بر دلیل دکلدر . بلکه بر مسئله ده نص و یا اجماع ایله ثابت اولان بر حکمی او مسئله به تماماً نظیر و شبیه اولان دیگر بر مسئله ده اظهار ایدن بر دلیلدر . بیانه حاجت یوقدرکه اصل احکام شرعیه نصوص شرعیه ایله ثابت اولور . اجماعده نصوصه ملحق اولدیغندن اجماع ایله ده طوغریدن طوغری به ورأساً حکم شرعی ثابت اولور . آنك ایچون اوندر دلیل مثبتدرلر . حالبوکه قیاس ایله دکلدر . قیاس (رأی) دن عبارتدر و بناء علیه حکم شرعی بی مظهردر ، مثبت دکلدر . قیاس ایکی قسمه تقسیم اولونور .

۱ - قیاس جلی

۲ - قیاس خفی

بر قیاسك وجهی ظاهر اولور ایسه ، یعنی بر قیاسك علتی ظاهر و او علتك فرعه وجودی ذهنه متبادر بولونور ایسه ، او قیاسه قیاس جلی دینیر . بویله اولیوبده وجهی خفی اولور ایسه اوکاده قیاس خفی دینیر . فقههای خفیه عننده «قیاس» کلمه سی مطلق اوله رق ذکر ایدیلانجه اوندن قیاس جلی مراد اولونور . قیاس خفی به ده (استحسان) تعبیری اطلاق اولونور . شو-

قدر وار که استحصان، قیاس خفیدن اعمددر. چونکه هر قیاس خفی استحصاندر
 اما هر استحصان قیاس خفی دکلددر. بعض استحصاندر وارددر که اولدر قیاس
 نوعنده داخل دکلددر. آشاغیده آریجه بحث اولنه جقدر.



تذییه

بوراده بر نقطه یی قید وتنیه ایتمک واوندن غفلت ایتمه مک افتضایدیورکه
شودر : قیاس بچشنده (قیاس) دن مقصد ، نصوصک دلالتندن خارج قالان
وصرف رأی واجتهاد ایله آکلاشیلان قیاسدرکه مجتهدلرک آکلایشندر عبارتدر
بوکا لسان عرفده (رأی) اطلاق اولونور. و قیاس کله سی مطلق ذکر اولوندیغی
وقت بونوع قیاس مراد اولونور .

بعض علمانک (قیاس اولویت) تسمیه ایتدکلری بونوع قیاس واردر که
طوغریدن طوغری به نصک دلالتنده ، کلامک مفهومنده داخل وبلاتأمل ذهنه
متبادردر . مثلاً (والدینه اوف دیمه) معناسی مفید اولان (ولاتقل لهما ف)
آیت کریمه سی عین زمانده (والدینکی ضرب ایتمه ، سب و شتم ایتمه) معنایریده
مفیددر . مخاطب بونظم کریمی ایشیدیر ایشتمز در حال بونوعیتک مناط وعاتی
(اذا) اولدیغی آکلار ، و بوندن والدینی ضرب و شتم ایتمه مک ده ممنوع اولدیغنه
سرعتله انتقال ایدر . چونکه بیلیرکه ضرب و شتمده دها بیوک اذا واردر .
بناء علیه اونظم کریمی ایشیدن مخاطب در حال وبلاتأمل (والدینه اوف دیمک
ممنوع اولونجه اونلری ضرب و شتم ایتمه مک ده بطریق الاولی ممنوع اولور) دیر .
ایشته بو برقیاسدر . لیکن مخاطب بو قیاسی ذهنده او قدر سریع ، او قدر آنی
بر صورتده یاپارکه بونی کندیمی ده فرق ایدمیز . زیرا بو قیاس طوغریدن
طوغری به نصک مفهومنده داخلدر . وادنادن اعلایه انتقالدیر . بو ، (کیت
بونو فقرایه توزیع ایت ، فقط فلان فقیره ذره ویرمه) کلامنه بکزر . مخاطب
بو (فلان فقیره ذره ویرمه) سوزندن عینی زمانده (ذره دن فضله شی ده ویرمه)
معناسی ناسل آکلارسه ذکر اولونان آیت جلیله یی ایشیدن ذات ده ، بوندن
(والدینکه سب و شتم ، ضرب و توبیخ کبی اذایی موجب دیگر افعال وحرکاتده
دخی بولونما) معناسی او صورتله آکلار . ذهک برمعاندن دیکرینه انتقالی ،
بو یله ادنادن اعلایه اوله جنی کبی بعضاً اعلا دن ادنا یه ده اولور . وهرایکی صورتده

نفس کلام بوانتقاله اشارت و تنبیہی متضمن بولونور. آنکچون بوکبی یرلرده
 ذھنک بوانتقالی طوغریدن طوغری به لغتدن یعنی کلامک دلالت و فحواستدن
 مستفاد اولور. بوجهتله اصولیون بونی یعنی « بطریق الاولی شویله اولور، بوتک
 بویله اولسی اولی بالطریق قدر، دینیلن یرلرده کی (قیاس اولویت) ی قیاس
 اقسامندن عد ایتیمورلر و بناءً علیه (قیاس) تعبیری بوکا تشمیل ایتیمورلر . بوکا
 اصول حنفیهده (دلالت نص) و اصول شافعیهده (فحوای خطاب) تسمیه
 اولونیور .

بو جهتله بو نوع قیاسی اصل قیاسدن تفریق ایله بونی نصه ارجاع ایتک
 اقتضا ایدر . بوندن باشقه بر نوع قیاس دهاواردرکه اوده نصه راجعدر. بوده
 عاتی منصوص اولان و بونکله برابر حکمک فرعهده ثبوتی کیفیتک نزد شارعده
 مقصود اولدینی ظاهر بولونان قیاسدر .



قیاسك ادله شرعيه دن معدود اولمەسی حقهده اختلاف

شمدي سويلديكمز شوايكي نوع قیاسدن برنجیسنك یعنی نەسك مدلولنده داخل بولونان قیاس اولویتك دلیل شرعی اولمەسندن اختلاف یوقدر . بونده بتون علمای اسلام متفقدر . فقط علای نصوص شرعیه ایله منصوص و مصرح اولیوب رأی واجتهاد ایله مستنبط اولان و دمین سويلديكمز کبی عندالاطلاق (قیاس) تعیرندن مقصود بولونان قیاسك دلیل شرعی اولمەسندن فرق اسلامیه علمای اختلاف ایتمشلردر . مذاهب اربعه فقهایی داخل اولق اوزره جمهور فقهایی اسلامه کوره بو نوع قیاس دخی خبر واحد و امثالی نصوص ظنیه کبی ادله شرعیه دن معدوددر . فقط اهل سنتدن (ظاهریه) فقهایی ایله معتزله دن «نظام» ایله آنک فکرینه ذاهب اولان دیگر بر قسم علمای معتزله و شیعه دن (امامیه) فرقه سی غدنزه بویله رأی واجتهاددن عبارت اولان بونوع قیاس، احکام شرعیه استنباطنده احتیاجه صالح بر دلیل شرعی دکدر .

امام المتصوفین مشهور شیخ محی الدین بن عربی (قدس سره) حضرتلری ده، (فتوحات مکیه) نامیله معروف اولان کتاب کبیرینک اصول فقه مباحثی بک وجیز بر صورتده جامع بولونان سکان سکنزنجی فصلنده فقهایی ظاهریه مسلکینی التزام و ترجیح ایدیور ، و بناء علیه رأی واجتهاده مستند اولان قیاس ایله عمل ایتمه نك جوازینه قائل اولیور و (رأی ایله اللهم اطاعت و دیانت جائز اولماز . چونکه بو رأی مجرددن ونه کتابدن ، نه سنتدن نه ده اجماعدن بر حجه مستند اولمایان سوزدن عبارتدر . هر نه قدر بز قیاس ایله استدلالک صحته قائل دکسه کده ، علای معقول و جلی اولان و بونکله برابر شارعک مقصودی اولدیغنه دائر ظن غالب حصوله کان قیاسك حجت اولمەسنى قبول ایدنلری ده تخطئه ایتیمز . بزى قیاس ایله عملدن امتناعه سوق ایدن سبب شودر که

قیاس ایله عمل ایتمک و زیاده فی الحکم و در (یعنی اصل احکام شرعیہ بی تزیید ایتمکدر) حال بوکه بزم آکلادیغمزه کوره شارع امتندن تخفیفی مراد ایتمشددر. شارع اصحابه و بن سزی کندی حالکزه ترک ایتمکجه سزده بنی کندی حاله ترک ایتمک و دیردی. (اتر کونی ماتر کتتمکم... رواء البخاری و مسلم و غیرها) واحکام شرعیہ نزولندن خوفاً کندیسنه مسئلهلر سورولمه سنی کریمه کورور. لردی. ایشته بز شارعی بو حال اوزره کوردیکمز ایچون دینده قیاس ایله عملی منع ایتمک دییور...

علنی منصوص اولان قیاسه کلنجه : شوکانک (ارشاد الفحول) نده محرر اولدینی اوزره فقههای ظاهریه بونوع قیاسک دخی حجت شرعیه اولمه سنی قبول ایتمیورلر. طرفینک بوبابده کی دلائلی پک اوزون اولایغندن ذکرندن صرف نظر اولونمشدر.

- ۲ -

ادله تاليه

ادله شرعيه يني ايكي قسمة تفريق ايتمشدك. برنجي قسمة (ادله اصليه) ،
ايكنجى بهده (ادله تاليه) ديمشدك .

ادله اصليه ، كتاب ، سنت ، اجماع و قياسدن عبارتدى . ادله تاليه به كنجه
بوده كتاب وسنتدن استنتاج ايدلمش واحكام فقهيه به بر اساس انخاذا اولونمش
اولونمش اولان اساسات فقيهه در . بونلك برنجيسى استحساندر .

استحسان

استحسان ، لغت صريبه ده بر شيشي كوزل عد ايتك ديمكدرد . اصطلاحده
فقهابوكله يني برى اخصى ، ديكرى اعم اولمق اوزره ايكي معئاده استعمال ايديليورلر .
بوجهتله فقهابه كوره بوتعبيرك ايكي معنائى وارددر :

۱ - معنائى اخصى

۲ - معنائى اعم

معنائى اخصى ، قياس خفى ديمكدرد . بو معنايه كوره استحسان ، قياس
اقتسامندن اولور . نته كيم بوندن اولكى درسده ، قياس بمحشده سويله مشدك .
اوراده ديمشدك كه بر قياسك وجهى و علت موجبى ظاهر و ذهنه متبادر
اولورسه او قياسه قياس جلى ديبير . يوق اكر بر قياسك وجهى خفى اولوب
ذهنه متبادر اولماز واعمال فكره متوقف بولنورسه بونوع قياسه ده قياس خفى
اطلاق اولنور . ايسته بو قياس خفى به استحسان اطلاق ايديليور .

استحسانك معنائى اعمنه كلنجه : بو مختلف صورتهده تعريف اولنمشدر .

زمانمزده احتیاج عصره توفیقاً تنظیم قوانین خصوصنده اشبو (استحصان) لك
بك بيوك ياردى اوله جفندن بو باده فقهى عظام حضراتنك نقطه نظرى
كوسترمك مقصديله ذكر اولنان تعريفلك برقاچ دانه سنى بيان ايتمك ايسترم .
بعض مشايخ حفيه استحصانى ، قياسى ترك ايتمك و ناسه اوفق اولانى اخذ
واختيار ايلمكدر ديه تعريف ايتمشلردر . (ترك القياس والاخذ بما هو اوفق
للناس) بهضيلرى ده استحصان ، ناسك مبتلا اولدينى احواله متعلق احكامده
طلب سهولتدن عبارتدر ديمشلكر (معاملات ناسى فساده نسبتندن ايسه مهماممكن
صحته حمل ايتمك اولادر) قاعده فقهيه سى ، ايشته بو تعريفك قاعده شكلنه
افراغندن باشقه برشى دكلدر .

ائمة اصولدن شيخ شمس الائمة سرخسى حضرتلرى (مبسوط) نام كتاب
مشهورينك اونجى جلدينك (كتاب الاستحصان) عنوانلى مبحثده استحصانك
شودكر اولنان تعريفلرى و ديكر تعريفلرى بيان ايتدكدن صوكره « شول تعريفاتك
خلاصه مالى شوندن عبارتدر : استحصان (ترك العصر لليسر) يعنى قولايلىق
ايچون كوچلكى تركدر . دين اسلامده اصل اولانده بودر ، ديبور و تنوير
مدعى ضمتده (يرد الله بكم اليسر ولا يريد بكم العسر = الله حقكزده قولايلىق
مراد ايدر ، كوچلكى مراد ايتمز) آيت جليله سى ايله (خير دينكم اليسر)
و (يسرا ولا تعسرا قربا ولا تنفرا) حديث شريفلرى ايراد ايديبور . برنجى
حديثك معنا سى « دينكزك خير ليسى قولايلىقدردر ، ديمكدر . ايكنجى حديثى
رسالتپناه اقدمز ، اجله اصحاب كزينندن حضرت امام على - بر روايتده ابو
موسى الاشعرى - ايله معاذ بن جبل حضرتلرى مأموريت مخصوصه ايله يمنه
كوندردكلرى زمان آنلره خطاباً ايراديبور مشلردر . مأل منبى « خلقه قولايلىق
كوستريكنز . كوچلك كوسترميكنز . و آنلرى اسلاميته تقريب ايديكز ، تنفير
ايتيمكز » ديمكدر . فقط بزم لك معتبر كتب احاديثده كورديكمز برنجى حديث
(خير دينكم اليسر) صورتنده دركه مفهوم منبى « احكام دينيه كرك لك
خير ليسى لك قولاي اولانيدر ، ديمكدر .

(استحسان) ك شو ذكر اولئان تعريفلىرى فقهائى حنفىيە كوردە در .
 اصوليون حنفىيە بونى باشقە درلو تعريف ايدييورلر . مؤلفات اصولده استحسان ،
 قياس جلى به مقابل اولان دليلدر صورتده تعريف اولونيور . و بودليلده ياتر
 يعنى نص ، ياجماع ، ياضرورت و ياخود قياس خفيدر دينلپدر . ايسته بونلردن
 هر هانكىسى قياس ايله تعارض ايدرسه او ترجيح اولنور ، يعنى قياس ترك
 اولنورق آنكه عمل اولنور . تنوير مقام ايچون بونلك قياس ايله تعارضلرني
 برر مثال ايله ايضاح ايدلم :

نصه مثال

مجله ده كورمشكزدر كه معدومك بىي باطلدر . بوقاعده به كوره (سلم) ده
 باطل اولمق لازم كلور . چونكه سامده معدومى بيعدن باشقە برشى دكلدر .
 بونده قياس نظر اعتباره آله حق اولور ايسه (سام) ك ده بطلانسه قائل اولماضر
 لازم كلور . حالبوكه سام جائزدر ، باطل دكلدر . زيرا سام حقنده (من
 اسلم منكهم فليسلم فى كيل معلوم او بوزن معلوم) حديث شريفى وارد
 اولمشدر كه بوحديث معامله سلمك مشروع اولديغى كوسترييور . چونكه بو
 حديث ايله حضرت شارع بعض شرطلرله يعنى مقدار كيل ووزن معلوم اولمق
 شرطيله مساعدە ايدييور . ديمك اوليور كه سلم حقنده قياس ايله نص تعارض
 ايدييور . بويلا قياس ايله نص تعارض ايدر ايسه قياس ترك اولنور . نص ايله
 عمل اولنور . بوده يك منطقى برشى در . چونكه قياس اجتهاد ديمكدر . مورد
 نصده اجتهاده ايسه مساغ يوقدر .

اجارده بويلا در . اجارده برنوع معدومى بيع ديمكدر . بو اعتبار ايله
 اجارەك جائز اولماسى لازم كلور . حالبوكه اجارەك جوازي حقنده نصوص
 شرعيه وارد اولمشدر . آنك ايچون اجارەك مشروعيتته دائر وارد اولان
 نصوص شرعيه ايله عمل اولنوب قياس ترك اولنمشدر .

ضرورتہ مثال

مجله نك ماده مخصوصه سنده بيان اولتدینی اوزره متلاحق الورود اولان (كل، انكنار) كې محصولاتك طوبدن صائلماسی جائزدر. حالوكه بوكې محصولات برطرفدن حاصل اولوب واولنجه قوپاریلور دیگر طرفندن یته حصوله كلور. بوصورتله محصولات ایکی، اوج آی دوام ایدر، متلاحق الوروددرلر. صائیش اناسنده بر قسم محصولات موجود ایسه ده دیگر قسمی هنوز وجود بوله مشدر. بالآخره موجود اولاجقدر. او حالده هنوز موجود اولمائی صائمق معدومی بیع دیمکدر. معدومی بیع ایسه قیاساً جائز دکلدر. بوراده تجویز اولنسی ضرورته بناءدر. یعنی خلقك بوكې معاملاتہ احتیاجی وارددر. بونی تجویز ایتمهك معاملاتنی تضییق ایتمك دیمکدر. تسهیل ایتمك ایچون فقهای خفیه بویله (متلاحق الورود) اولان محه ولاتك موجودیتته تبعاً معدومك دخی بیعی استحسناناً تجویز ایتمشدر. بوراده قیاس ایله ناسك احتیاجی تعارض ایتمشدر. بناء علیه قیاس ترك ایدیلر ك ناسك احتیاجنه موافق جهت اختیار اولنمشدر. استحسانده ذاتاً بودیمکدر و تنه کم تعریف اولندی.

استضاعده بویلهدر. استضاعده معدومی بیع اولدینی ایچون قیاساً جائز اولماق لازم کلیرکن استحسناناً تجویز اولنمشدر. چونكه استضاع خلقك محاج اولدینی معاملاتنددر؛ خصوصیه زمانمزده مدینتك عادتا روحی مثابه سندهدر. آنی تجویز ایتمهك بر جوق ناسك حتی دوانلرك احتیاجنی نظر دفته آلاماق دیمك اولوركه شرعاً تجویز اولنه من، آنك ایچون (استضاع) بالاجماع تجویز اولونمش و قیاس ترك اولونمشدر. بو مقامده ضرورتله احتیاج تعبیرلری الفاظ مترادفه قیلنددر. ذاتاً ضرورت (احتیاج شدید) دیمکدر. بونلرك آره لرینی تفریق ایتمك بكدده قولای دکلدر. آنك ایچوندركه فقهای خفیه (حاجت عمومی اولسون، خصصرصی اولسون ضرورت منزله سته تنزیل اولنور.) دیمشدر. (ضرورتلر ممنوع اولان شیلری مباح قیلار) او حالده (احتیاجده ممنوع اولان شیلری مباح قیلار) دیمك اولور. بونك ایچوندركه بر مسئله نك

جواز وعدم جوازنده تاسك احتیاجیه قیاس تعارض ایده بلك اولور ایسه
تاسك احتیاجی نظر اعتباره آله رقی آکا موافق اولان جهت اختیار اولنور
و آکا معارض اولان قیاس ترك اولنور (مشقت تیسیری جلب ایدر) و (بر
ایش ضیق اولدقده . متسع اولور) کی قواعد کلیه فقهیه هپ بو اسامدن
استخراج اولنمشدر .

قیاس خفی به مثال

بایع ایله مشتری میبعك قبضندن اول ثمنك . مقدارنده اختلاف ابتدکاری
تقدیرده پینه لری بولنمادیفی صورتده آرملرنده (تخالف) جاری اولور . یعنی
هرابکیسنه یمین ابتدیریلور حالبوکه قاعده و قیاساً بوراده یمین یالکیز مشتری به
توجیه ایدلك لازم کلوردی چونکه بایع ثمن میبعك مقدارنده زیاده بی ادعا
ایدیور و مثلاً بن بو مالی ایکی بیک غروشه صاتمیش ایدم دیور ، مشتری ده
خیر بن او مالی بیک بش یوز غروشه آلمشدم دییه رك زیاده اولان بش یوز
غروشی انکار ایدیور . آنك ایچون بایع زیاده بی مدعی مشتری دخی او
زیاده بی منکر در . (پینه مدعی ایچون ، یمین منکر اوزرینه در .) قاعده
فقهیه سنه بناء بو مسئله ده یمین زیاده بی انکار ایدن مشتری به توجیه ایدلمسی
لازم کلور کن مجله نك تخالف بحثده بیان ایدلدیکی وجهله بایعه ده یمین ابتدیرلمسی
لازم کلور . ایشته بو تخالف یعنی هم بایعه ، هم مشتری به یمین تکلیفی استحصانیدر .
یعنی قیاس خفی به مستقدر وجه استحسان شودر : ظاهره نظراً بو مسئله ده
مشتری منکر ، بایع مدعی ایسه ده انفاذ نظر اولاندقده کوریلور که بایع بر
جهتدن مدعی اولمغله برابر دیگر جهتدن ده منکر در . زیرا شو مالی ایکی
بیک غروشه صاتمیشدم . دییه رك ثمن میبعك ایکی بیک غروش اولدینی ادعا
ایدن بایع عین زمانده ایکی بیک غروش کندیسنه و برلمدکجه میبعك مشتری به
تسلیم ایدلمسی وجوب و لزومی منکر در . بن بو مالی ایکی بیک غروشه
صاتمیش ایدم ، ثمنی تماماً آلمادقجه مییی مشتری به تسلیم ایتك اوزریمه واجب

اولماز . ديمك ايسته يور و بو تسليمك لزومى انكار ايدىيور ديمكدر . آنك
ايچون بايع لزوم تسليمى ، مشترى ده زياده نمى منكردر . اونك ايچون
مشرى به او جهندن يعنى ايكي بيك غروشه آلامديغه يمين و بريلور . بايعده
ميهك وجوب تسليمى منكردر . اكاده او نقطه نظر دن يمين و بريلور .

ايسته بايعه بو صورته يمين توجهى اصل يمينك منكره توجهى مقتضى
و موافق اولاجفته دائر اولان قاعده فقهيه به و بناء عليه قياسه مخالف دكلدر .
بلكه عيني قاعده و عيني قياسك مقتضاسيدر . شوقدر كه بوراده قياسك وجهى
خفى و ذهنه غير متبادر اولديغندن بو مسئله ده كي قياس ، قياس خفى در . اونك
ايچوندر كه بوكا استحسان ديمشدر .

يعنى بايعه يمين تكليفى استحساناً تجويز اولمشدر . قياس خفينك وجهى
خفى اولقله برابر حكيمى قياس جلبدن دها قوى اولديغندن بويله قياس خفى
ايله قياس جلى تعارض ايدرسه قياس خفى ترجيح اولنوب قياس جلى عملدن
اسقاط اولنور . ايسته استحسانك نه ديمك اولدينى مثالريله تماماً اكلاشلمشدر
صانيرم .

بو استحسان تعميرى تعبيرات خفيه دندر . يعنى فقهاى خفيه نك وضع ايتدكلرى
اصطلاحات جمله سندندر . بو تعميرى الاول احداث ايدن يعنى قياسه مقابل اولمق
اوزره استعمال ايدن امام اعظم ابو حنيفه حضرت قلريدر . فقط مشاراليه حضرت قلرى
استحسانى توضيح ايتديكم وجهله تعريف و مثالريله توضيح ايتدمش و يا خود
ايتمش ايسده امام شافعى كى مذهب خفى به سالك اولميان ديكر فقهاك توضيح حاشنه
مطلع اولماش اوله حق كه امام ابو حنيفه حضرت قلرينه بو استحسان مسئله سندن
طولايى اعتراض ايتمشلردر . حق امام شافعى حضرت قلرى امام اعظمه تعريضاً
(من استحسن فقد شرع) يعنى كيم استحسان ايله عمل ايدرسه شريعت وضع ايتمش ،
شارعك طاسلامش اولور ديمشدر . مشاراليهك بو درجه شديد بر اعتراضده
بولملىرى امام اعظم حضرت قلرينك مقصدلرينى اكلايه مامقندن ايلرو كلشدر .
اكر مسئله بي اطرافيله تدقيق ايدرك امام اعظمك مقصدىنى آكلامش

اولس لردی هیچ شبهه‌سز اویله بر اعتراضده بولمازلردی. چونکه عینی زمانده امام شافعی حضرت تلمیذی ده استحسان ایله عمل ایتمشلردر. لکن اسمنه استحسان دیمه مشدر. آراده کی فرق بوندن عبارتدر.

امام مالک حضرت تلمیذینه کلنجه: مشارالیه ده استحسان قاعده سیله عمل ایتمشدر. ویک چوق مسائل فتهیه‌ینی بو استحسان قاعده‌سنه بناءً تجویز ایتمشلردر. شوقدر وار که امام مالک حضرت تلمیذی بوکا استحسان دیمه مش (مصلحت مرسله) اطلاق ایلشدر. تعبیرلر هر نه قدر باشقه ایسه ده مقصدلر بردر. مصلحت مرسله ده استحساندن باشقه برشی دکلدرد. مصلحت مرسله دن مقصد بر مسئله حقنده شریعتده مصرح اولمایوب مصالح عمومی ناسه موافق اولان حکم دیمکدر. بومعناجه مصلحت قیاسی ترک ایله ناسه موافق اولان جهتی اختیار ایلکدن باشقه برشی دکلدرد. یوقاریده بیان ایتدیکمز وجهله فقهای حنفیه ده استحسانی بوسورتله تعریف ایتمشلردر. قیاسی ترک ایله ناسه موافق اولان جهتی اختیار ایلک دیمک مصالح عمومی ناسی نظر اعتباره آلوب اکاکوره بر حکم بیان ایلک دیمکدر که ایکسی ده برشیدن عبارتدر. یالکز اصولیون حنفیه نیک استحسانی قیاسه مقابل اولان دلیلدر دییه تعریف ایتملرینی نظر اعتباره آله حق اولور ایسه که اوزمان بومعنا اعتباریله استحسان ایله مصلحت مرسله آره‌سندده عموم و خصوص مطلق وار دیمک اولور که بوسورتله استحسان اعم، مصلحت مرسله اخص دیمک اولور. چونکه اومعناجه استحسان یوقاریده بیان اولدینی وجهله نص ایله ثابت اولان و قیاس خفی ایله ثابت اولان حکملر ده شاملدر. فقط مصلحت مرسله تعبیری شامل دکلدرد.

مصلحت تعبیری استحسانک بر قسمی اولان ضرورت و احتیاج ایله ثابت اولان حکملره منحصردر. لکن فقهای حنفیه استحسانی قیاسی ترک ایله ناسه موافق اولان جهتی اختیار و یا خود ناسک مبتلا اولدینی شیلر ده جلب بولنددر دییه تعریف ایتدکاری جهتله بومعنایه کوره استحسان ایله مصلحت آره‌سندده مساوات وارددر. هرایکیسی ده برشیدن عبارتدر دیمک اولور که فقهای حنفیه نیک

استحسان دید کلزینہ فقہای مالکیہ مصلحت مرسلہ اطلاق ایدیورلر . تعبیرلر
باشقہ ایسه ده مقصدلری برور .

آنک ایچوندرکه ایملک اول فقہای حنفیہ طرقدن استه مال ایدیلن . استحسانه
تعبیری، بالاخره فقہای مالکیہ و حنبلیہ طرقدن ده استعمال ایدلمش و بناء علیه
بو اساس فقہیده متأخرین مالکیہ و حنبلیہ ایله فقہای حنفیہ نك نقطه نظرلری
برلشمشدر . یالکیز تطبیقات اعتباریله آره لرنده بعض فرقلر واردور .



مصلحت

• مصلحت، مفاسدت مقابلدر . صلاح و خیره ، برايشك خيرلى اولمى سىنه باعث اولان كيفيت ديمكدر . بر حكمتك ثبوتسده خلق ايچون فائده قطعيه و منفعت عموميه تحققي معلوم اولور ايسه او حكمت ، مصلحت عامه ، ملاحظه و مقتضاسنه بناء مشروع اولور الخ ...

• حادثات حقوقيه ده اثبات احكام ايچون مصلحت الك بيوك اساس و دليلدر . قوانينك درجه مكمايى مصالح عموميه ناسه درجه موافقتيله متناسبدر بناء عليه بر قانون مصالح ناسه نه قدر جوق توافق ايدرسه اونسبتده مكمل ديمك اولور . بر قانونك نفوذ معنويسى ده بوندن عبارتدر . بويله نفوذ معنويدن محروم اولان قانونلر پايدار اولاماز . دائماً محكوم فسخ و الغادرلر . بر قانون پايدار اوله بيلمك ايچون قبول عامه يه مظهر اولمق لازم كلوركه بوده او قانونك نفوذ معنوى يى حائز اولمى ينى مصالح و احتياج ناسه موافق بولمى سىنه وابسته در .

مصلحتك شرطلى

• مصلحت ثبوت حكمه مدار اوله بيلمك ايچون اوج شرطك وجودى لازمدر .

۱ - قطعيت

۲ - عموميت

۳ - رجحاندر .

• برنجى شرطه نظراً بر حكمتك ثبوتى ايچون مصلحتك وجودى قطعى اولمايدر . احتماله مستند مصلحت مدار احتياج اولاماز .

ایکینجی شرطه نظرأده مصلحت عمومی اولمالیدر. خصوصی یعنی شخصی اولان مصلحت نظر اعتباره آلتماز بر حکمک نبوتسنده خلق ایچون فائده قطعی و منفعت عمومیه تحقیق معلوم اولور ایسه او حکم (مصلحت عامه) ملاحظه و مقتضاسنه بناء مشروع اولور. عکسی تقدیرده مشروع اولماز.

اوچنجی شرط: ایکی شیئی محتویدر.

۱ - مصلحتک خلوصی

۲ - مصلحتک رجحانیدر.

مصلحتک خلوصی دیمک مفسدتدن خالی اولمسی دیمکدر. مصلحتک رجحانندن مقصوده مفسدته راجح اولمسیدر. بناء علیه بر حکمده مصلحت ایله مفسدت تعارض ایتدکده مصلحت ترجیح اولنه بیلیمک ایچون مفسدتدن بیوک و عمومی اولمسی لازم کالور. بو صورتده مصلحتله عمل اولنور.

اما مفسدت مصلحتدن بیوک ویا اکا مساوی اولورسه اولوقت (دفع مفسد جلب منافعدن اولی در.) قاعده فقهیه سنه بناء دفع مفسدت ایچون مصلحت جهتی ترک اولنور. زیرا شرع شریفک منهایه اعتناسی مأموراته اعتناسندن زیاده در. الحاصل شروطی جامع اولان مصلحت استخراج احکام خصوصنده بر اساس قویمدر.

مصلحت ایله عمل مسئله سی بعضی علما مذهب مالکییه مخصوص بر قاعده اولمق اوزره کوسترینورلر سده طوغری دکادر. لدی التذقیق آ کلاشیله جنی اوزره بتون مذاهب مختلفه فقهیه اشبو مصلحت قاعده سیله عمل ایتشددر. یعنی مصلحت عامه قاعده سی مذاهب فقهیه تک جمله سنده معتبر اولان بر اساس فقهی در. مجله ده (شرعیه اوزرینه تصرف مصلحتیه منوطدر)، (ضرر عامی دفع ایچون ضرر خاص اختیار اولنور.) تعیر دیکرله (نفع عام ایچون ضرر خاص اختیار اولنور) کبی قواعد فقهیه اشبو مصلحت اساسه مستند و متفرع در. حنبلی علماسندن (نجم الدین ظوفی) نامنده بر مجتهد وارد در. (۷۰۰) سنه هجریه سی رجالتنددر بوکا بک زیاده حیرت ایدرم عالم عرفانک وسعتنده

تهدیدخواهم . جوراق بر یرده یتشمش ، مصر چوللارنده مظهر تکامل اولمشدر . لکن پک چوق نفوذ نظره مالکدر بو قدرت قریحه به حیرت ایتهمک الدن گلز . آورو یاده دولاشمش فیاض بر محیط واقلمده یتشمش اولسه یدی هر حالده نادر الامثال بر عالم اوله جفته ، عصرینک فریدی مرتبه سنی احراز ایدم جکنه شبهه ایدلمزدی . والحاصل جری اللسان بر مجتهد فاضلدر . بو ذات دیورکه : حضرت شارع (ضرر و مقابله بالضرر یوقدر) دیمشدر . بونی شرح ایدرکن دیورکه بو مصاحت نتیجه سیدر و بونک بر نتیجه علمییه و فقهیه سی اوله رق قبول ایدلمشدر و بو موضوعده یورو یور ، ایلرولور و بر نقطه به کایورکه مصاحت ابله قرآن تعارض ایدرسه مصاحت ترجیح اولنور . نقطه سنه واریور و بن بونی بو حکم وقراری ینه قرآندن استنباط ایتدم . و چونکه مصاحت مقصود شارعدر فصوص شرعیه مصاحت ناسی تأمین ایچوندر دیور . و شارعک مقصودی ده انسابلری بو نقطه به ارشاددر . زیرا عرفلر زمانه تبدل ایدر و بوتبدلانله حقوقک اشکالی ده تبدل ایدر . (۱۶۰۰) سنه مقدم وضع ایدلمش اولان بر قاعده بی شمدی تطبیق ایدم مزسک ، بونک قیود و جنبیری داخلنده ناسی طوئامازسک ؛ زمان و طبیعت بونلری قالدیرر و حال وزمانه عدم توافق و تطابقندن طولانی ده بونلر کندیلککندن قالدیرر دیور بونی تولید ایدن هپ مصاحتدر و بوهرشیثک احکامنی حتی فقهک احکامنی بیله دیکشدیرر . دیور . واقعا حنی فقهاسی واز جمله امام ابو یوسف حضرتلری بو فکری قسماً قبول ایدیورلر ، لکن بو نصوص قاطعه به مخالف اولماقله مشروطدر . نصوصه مخالف اولورسه قبول ایتزلر .

بو ذات ، شارعک مقصودی دینی ، عقلی ، جانی ، نفسی ، حقوقی محافظه در دیور . بو طریقده فقهک و حتی هرکسک بوهدنی تعقیب ایتمی لازمدر ، عکسی اولورسه شارعک مقصودی فوت ایدلمش اولور بنابرین شبهلی قیاسلرکی نظریاتله ترتیب احکام ایتک دکل صرف بو مقصودی تأمین بو هدفه وارمق ایچون مصاحتی الزام لازمدر . اجتهادنده بولنیور .

استصحاب

استصحاب، صحت و مصاحبتدن ماخوذدر.

لغته معنای بر یکمسه دیگرینی کندینسه همدم و مصاحب قیلق دیمکدر. اصطلاح فقهی ده معناسه کلنجه : استصحاب بر شینک بولندینی حال اوزره قالمی دیمکدر. یعنی زمان ماضی ده وجودی متحقق اولان بر شینک خلافتیه دلیل بولنمادقجه زمان حاله باقی اولمیه حکم ایتکدر. اصل استصحاب بوکا دیرلر. (ابقاء ما کان علی ما کان) برده استصحاب مقلوب واردر که فقههای حنفیه اکا تحکیم الحال دیرلر. یعنی اصل استصحاب عکسنه زمان حاله موجود اولان بر شینک زمان ماضی دهده وجودینه حکم ایتکدر. بر زمانه موجود اولان بر شینک دیگر بر زمانهده وجودینه حکم ایتک او شینی ایکنجه زمانه (مصاحب) قیلق دیمک اولدینی ایچون بوقاعدهیه استصحاب اطلاق اولنشددر.

اشبو استصحاب قاعدهیه بر حجت شرعیه میدر، دکلیدر ؟

فقهها بونده اختلاف ایتشلردر. مالکی، شافعی فقههای عندنده منفی اولسون مثبت اولسون هر حکمی اثباتیه استصحاب بر حجت شرعیهده. فقههای حنفیه عندنده ایسه استصحاب حجت دافعهدر. فقط حجت مثبتیه دکلدر. یعنی حنفیهیه کوره استصحاب باشقه سنک حقنی اثباتیه کافی بر حجت دکلدر. بونک ایچوندر که فقههای حنفیهیه کوره مفقود وارث ده اولاماز، موروث ده اولاماز قضیهیه بردستورددر. یعنی مفقودک اقرباسندن بریسی وفات ایتمش اولسه حنفییه کوره مفقود متوفایه وارث اولاماز. چونکه ارث کیفیتی بر حقک نبوتی مسئله سیدر. استصحاب ایسه حق اثباتیه صالح دکلدر. چونکه زمان اولده حیاتی متحقق اولان اول مفقودک بالاخره وفات ایتمش اولسی و همده متوفادن اول وفات ایتمش اولسی محتملدر. برشیده احتمالک وجودی اول شینک دلیل و حجت اولمسنه مانعدر. فقط استصحاب بر حق دفعه کافی بر حجت اولدینی

ایچون مفقودك وفاتی تحقق اتمدكجه ویاخود محکمه جه وفاته حکم اولوندقجه اول مفقود كندی حقه بر حیات عد اولسه رق اقرباسی اكا وارث اولاماز . بو مسئله ده استصحاب قاعده سی اقربانك مفقوده وارث اولمالری ادعای دفع ایدر . فقط مالکیلر ایله شافعیلر استصحابك علی الاطلاق بر دلیل معتبر اولمسه قائل اولدقلرندن آنلره کوره مفقود اقرباسندن وفات ایدن ذاته وارث اولور . الحاصل استصحاب قاعده سی فقهده و معاملات حقوقیه ده غایت مهم بر قاعده در . بر جوق احکام حقوقیه اشو استصحاب قاعده سنه مبتیدر .

(شك ایله یقین زائل اولماز) قاعده فقهیه سی ده استصحابك ماهیتنی کوستر بر قاعده در . چونکه بر زمانده یقیناً ثابت اولان برشی مؤخرأ حاصل اولان شك ایله بالمطبع زائل اولماز .

زائل اوله بیلیمك ایچون آنك خلافی یقیناً ثابت اولمالی ، هیچ اولمازه قویاً مظنون اولمالیدر . یقیناً ثابت اولان برشینك وجود وبقاینی تغیرایده جك بر مغیر بولندقجه اوشینك دیگر زمانده نبوتنه قائل اولق ضروریدر . بوده استصحاب قاعده سندن باشق برشی دکلدر . ایشته بویله بر یرده یعنی بر زمانده یقیناً ثابت اولوبده خلافتیه دلیل بولنمیان بر شیده استصحاب ایله عمل ایتك بین الفقها متفق علییه در . اما بر زمانده ثابت اولان برشینك عدمی مظنون اولماقله برابر محتمل بولور ایسه ایشته بویله یرلرده استصحاب ایله عمل ایتك بین الفقها مختلف فییه در .

بیان ایتدیکم وجهای فقیهای مالکیه وشافعیه عندنده اویله یرلرده دخی استصحاب ایله عمل جائز وحتی لازمدر . فقط فقیهای حنفیه به کوره ادعا اولنان برحق دفع ایچون استصحاب ایله عمل جائز اولورسه در برحق اثبات ایچون انکله عمل جائز اولماز . مثلاً (رائت ذمت اصلدر) قاعده سی استصحاب اساسنه متفرع بر قاعده در . بناء علیه بر کیسه دیگرندن برحق ادعا ایدوبده مدعی علیه اوحقی انکار ایله بو مسئله ده استصحاب قاعده سنه بناء مدعی علیه بر اثبات ذمتی اصلدر . یعنی مدعی علیه مدعی ایله کسب مناسبت ایتزدن اول مدعی به

قارشى ذمى طيعة و فطرة برى ايدى .

اوزمانده ثابت اولان شو براءت ذمت خلافه بر دليل بولمى ادينى جهته
وقت خصومته دخى ثابتدر دنيلهرك مدعى عليهك سوزى قبول اولنور .
وبناء عليه مدعى عليهك اشبو براءت ذمت ادعاسى - كه برحقى دفع ايجون
درميان اولمشدر . نظر اعتباره آيرز . وبوندن طولايى مدعى به اشبو استصحاب
قاعده سنى تغيير ايدم جك بر دليل اراثة ايله سنى يعنى كندى ادعاسى اثبات ايدم جك
برينه اقامه سنى درميان ايلرز .

اكر مدعى اقامه بنيه ايدرسه زمان ماضى ده تحقق ايتمش اولان براءت
ذمت كيفيتى بلا آخره تغيير ايدلمش و آرتق آنك بقاسنه خلل كمش و آنك
برينه آنك خلافى يعنى مشغوليت ذمت قائم اولمش ديرز .

بناء عليه مدعى عليهك مدعى نك طلب ايتديكى حق ايله التزام ايلرز . فقط
مدعى اقامه بنيه ايلديكى تقديرده مدعى عليهك سوزى قبول ايتمكه برابر قطعى
عد ايتمه يز . يالاز اولمق احتمالى ده دوشونورز . آنك ايجون بوراده براءت
ذمت اصلدر ديهرك مدعى نك دعواسى ابطال ايله مه يز . بالعكس مدعى به بر
حق تجايف ويررز . احتمال مدعى نك ادعاسى حقيقى و صحيح و طوعى در
مدعى عليه بالالتزام يالان سويله يور مادامكه مدعى نك بالبنيه دعواسى اثباتدن
عجزى تحقيق ايتمشدر او حاليده اونك دعواسى رد ايتك جهتنى التزام ايله مه يز .
مدعى عليه بر يمين تكليف ايلسنى درميان ايلرز . اكر مدعى عليه يمين
ايدرسه اول وقت قاعده استصحاب يمين ايله ده تأيد ايتمش ديمك اولديغندن
آرتق مدعى نك دعواسى رد ايدرز . مع هذا بورد ادعاى واقعى ابطال دكلدر .
بلنكه دعوايى استماع ايتمه مكدر .

چونكه بوصورتله استماع دعوا دن بر نتيجه حاصل اولمايه جنى دركادر .
وينه آنك ايجوندر كه مدعى بالاخره اقامه بينه ايدم جك اولورسه (بينه عادله ، يمين
فاجره دن اولى در) ديهرك مدعى عليه يمين ايتمش اولسه دخى مؤخرأ مدعينك
دعواسى بينه استماع ايدرز .

الحاصل استصحاب اثبات احكام خصوصاً فقه اسلام ده بر اساس در .
 حقیقردن ماعدا فقهای مذاهب عندنده علی الاطلاق بر حجت شرعی در . حقیقردن
 عندنده ایسه بر حجت دافعه در . بر ادعایی، در میان ایدیلان بر حقی دافعه صالح در .
 فقط حجت مثبت دکلدر . یعنی بر ادعایی و بر استحقاقی اثباته کافی دکلدر .

عرف ، عادت ، تعامل

اولجده بیان ایدلیدی وجهه استحسان ، استصلاح یعنی مصلحت مرسله
 ایله استدلال واستصحاب بر دلایل شرعی اولدینی کبی عرف وعادته لدی الحاجه
 کندیسه مراجعت اولئان بر دلایل شرعی در .
 بو مقامده الفاظ مترادفه قیلندن اولارق یکدیگرینک مقامده استعمال
 اولئان عرف وعادت وتعامل کلملری زبازددر . فقط بونلر آره سنده مفهوم
 لغویجه فرق اولدینی کبی اصطلاح تفهیمجه دخی فرق وارد در .
 عرف : (ع ، ر ، ف) حرفلندن تشکیل اولم سندن ده آ کلاشیلیر که
 (عرفان) و (معرفت) معنائی متضمندر واسم مفعول معناسنده یعنی (معروف)
 معناسنده مستعملدر . «عرفان و معرفت» کلملری ، (صباح) ده بیان اولوندیغه
 کوره بر شیشی حواس خمس ظاهره دن بریله بیلمک و یا خود (مفردات راغب) ده
 بیان ایدلیدیکنه کوره بر شیشی آنانی تفکر ایله ادراک ایله مک دیمکدر که
 ترکیبسی طانیق دیمکدر . (علم) کلمسی علی الاطلاق بیلمک معناسنه اولدینندن
 (معرفت) دن اعمدر . (علم) ک ضدی «جهل» و «معلوم» ک ضدی «مجهول» در .
 «عرفان و معرفت» کلملرینک ضدی ایسه (انکار) و (معروف) ک ضدی
 (منکر) در «عرف» ک ضدی ده نونک ضمی و کافک سکونیه (نکر) در که
 منکر دیمکدر . شوحالده ک رک (معروف) و ک رک (عرف) مرایکیدی ده فی الاصل
 (بین الناس طانمش اولان ، حسن تاقی اولئان ورد وانکار اولونمیان) معناسنه
 موضوعدر . بومعنا (عرف) ک معنای لغویسیدر . معنای اصطلاحیسی ده بوندن

باشقه برشی دکلدر. نته کیم انعال بشریه ده «حسن و قبح» ک یعنی اییلک و کوتولکک عقلی ، یعنی عقلاً قابل ادراک اولدیقنه قائل اولان فقههای حنفیه (صرفی) (عقلاً و یا شرعاً مستحسن اولان و عقول سلیمه اصحابی عندنده منکر اولمیان شیدر) دییه تعریف ایدیورلر .

ایشته «عرف» ک ماهیتی بوندن عبارتدر. بونی اییجه ضبط ایتلیدر. بعض مؤلفانده عرفک تعریفی حقنده شو ایضاحاته مابین اولهرق کوزولان سوزلر و تعریفلر (اشعریه) فکربنه کوره در ، اشعریلر طرفدن درمیان اولونمشدر. فقههای حنفیه فکری دکلدر .
(عادت). کلنجه :

عادت، اعتیاد و معاوده دن آلمشدر. (بین الناس معتاد اولان شی) دیمکدر. بو تعریفه کوره عادت براصر مستحسن حقنده تأسس ایده بیله چیکی کبی باطل بر شی حقنده ده تأسس ایده بیلیر. اونک ایچوندرکه (ای عادت)، (فنا عادت) دینیر. تعامل دخی عادت معناسه در . (بین الناس متعامل اولان شی) دیمکدر . ایشه شو تعریفنه نظراً عادت ایله تعامل آره سنده برفرق یوق کبی ایسنده عرف ایله مقایسه ایدلکلرند یینلرنده کی فرق ظاهر اولور. برکزه عرف باطل برشی حقنده تأسس ایدن عاده اطلاق اولماز. امور مستحسنده جاری اولان عادتله اطلاق اولنور. آنک ایچوندرکه قرآن کریمده (خذ العفو وأمر بالعرف وأعرض عن الجاهلین) آیت جلیله سی وارد اولمشدر . مأل منینی (عفوی اختیار ایت ، صرف ایله امر ایله جهلادن اعراض قیل) دیمکدر. یعنی قرآن حضرت پیغمبرمه عرف ایله امر ایتمسی امر ایدیور .

شارع ایسه باطل برشی ایله پیغمبرک امر ایتمسی شبهه سز تجویز ایتمز. بو آیتدن بک صریح آکلایشیلیورکه عرف ، عادات باطله یه اطلاق اولماز حالبوکه عادت و تعامل تعبیملری باطل اعتیادله ده اطلاق اولنور . آنک ایچوندرکه (عادت) ک اییسی و کوتوسی اولدینی و بناء علیه «ای عادت» ، فنا عادت دینلدیکی حلاله «ای صرف ، فنا عرف ، دینمز . چونکه «عرف» ک قناسی

اولماز. عرف دائما ايدير وعقول-ليمه اصحابي عندند مستحسن اولان شيدر. فقط بالآخره فتها عرف ايله عادت ييشندمكي بوفرقى يكده نظر دقه آلمه رق بو ايكي كلمه يي يكديكري مقامنده استعمال ايتشاردر .

مع هذا فقهاك بو استعماله كوره دخي عرف ايله عادت آره سنده باشقه بفرق وارددر. اوده عرفك اقواله وافعاله شامل اولمسي ، عادتك ايسه يالكز افعال منحصر بولمسيدير . شومالده عرف ايكي قسمه آيريلور .

۱ - عرف قولى

۲ - عرف عملى

عرف قولى: الفاظ لغويه يي معنای لغويه سندن آله رق باشقه بر معناده استعمال ايلك و آرتق بو او لفظك معناده استعمالی معروف بولمقدرد. مثلا بر كيمسه (بن فلان كيمسه نك خانه سنه اياغمي باصمام، باصار ايسام فلان مالم فلان جهته وقف اولسون) ديمش اولسه ، اول كيمسه حيوانه راكبا او خانه دروننه كيرديكي تقديرده وقف ايجون درميان ايديلان شرط تحقق ايتمش ديمك اولور . يعنى او كيمسه اياغمي او خانه به باصمش عد اولنور. چونكه بومقامده اياغمي باصار ايسام تعبيرى او خانه به كيرر ايسام معناسنده بين الناس عرف اولمشدر . بويله بر كله نك معنای لغويه يله معنای عرفيه يي باشقه باشقه اولديني صورتده معنای عرفيه به اعتبار اولنور . معنای لغويه يي به اعتبار اولتماز . چونكه آرتق او معنای لغويه به مجور اولمش و اونك يرينه باشقه بر معنا قائم اولمش ديمكدرد . الفاظك لغتندن مقصد ايسه مقصود قلمبي مخاطبه افهامدر . مادامكه او لفظ باشقه بر معناده عرف اولمشدر . آرتق اولفظك معناسى بومعنای عرفي ديمكدرد . (قنارى ياق ، صوباني ، ياق ، اولوق آقيور) كي تعبيرلرده بويله در .

اوشاق قنارى ياقه جق اولسه ضامن اولوب اقديسنك قنارى ياق ديمسندن بلاستفاده اقديسنك امريله ياقش اولديغى ادعا ايدمىز ؛ چونكه اقديسنك قنارى ياق ديمسي قنارك ايجنده كي مومى ياق ديمك اولديني بين الناس معروفدر . بوتعبيرك بومعناده استعمالی آرتق عرف اولمشدر ، معنای لغويه يي مقصود دكلدر .

اوشاغك بن بو معنای عرفی بی بیلیموردیم دیسی معتبر اولماز ، شارلانانغه
حمل اولنور .

عرف عملی ایسه ، بوتعبیردنده آ کلاشیله جنی اوزره عمله متعلق برشیثك
بین الناس معروف اولسی دیمکدر . استانبول، ازمیر کبی بعض بلاد اسلامیه ده
مسلمانلرک قویون آنی بیمه سی حادث ایتمه لری کبی . بناء علیه برکیمسه دیکرینه
مطلق اولارق (بکا براوقه ات آل) دیسه او آدم کچی آنی آلاماز، آلیرسه موکلی
حقنده نافذ اولماز . چونکه او ملکیتده یعنی استانبول، ازمیرده اهل اسلامک
دائما قیون آنی بیدکلری معروفدر . مطاق اوله رق ذکر ایدیلان ات تعبیریه
بویه معروف اولان شیلره حمل اولمق لازم کلور . چونکه عادتک دلاتیه
معنای حقیقی و لغوی ترک اولنور واولفظ ایله معنای عرفی مراد اولنور . آنک
ایچوندرکه فقه های اسلام (مطاق متعارفه حمل اولنور) و(عادتک دلاتیه معنای
حقیقی ترک اولنور) سوزلرینی برر قاعده فقیه اولارق تثبیت ایلشلردر .

ایشته عرف تعبیری بروجه مشروح عرف قولی و عرف عملی ده استعمال
اولنور و بناء علیه عرفک بوصورتله ایکی قسمی بولنش اولور . حالبوکه عادت
بویه دکلدر . یعنی عادت لفظک دلات ایتدیکی مدلول بویه ایکی قسم دکلدر .
عادت دییه یالکیز عرف عملی به دینور . عرف قولی به عادت اطلاق اولنماز .
دیمک اولیورکه عرف بواعتبار ایله عادتدن اعمدر . هر عادت عرفدر . فقط هر
عرف عادت دکلدر . عرف قولیلر کبی . بعض عرفلر وارددرکه انلره عرف
تعبیری اطلاق اولندیقی حاله عادت تعبیری اطلاق اولنماز . اولنورسه مجازاً
اطلاق ایدلمش اولور . تعامله کلنجه :

بوء عادتله بردر . یعنی عادت دنیلان شیلره تعامل ، تعامل دنیلان شیلره
عادت اطلاق اولنور . آنک ایچون بوایکی کله تعبیرات مترادفدن معدوددرلر .
نه قدر عرف عملیلر وارسه انلره عادت دنیلدیکی کبی تعامل دخی اطلاق اولنور .
بواوچ کله نك بوصورتله معنای اصطلاحیلری بیلندکدن سوکره شیمدی بونلرک
نه درجه به قدر بر دلیل شرعی اولوب اولما دقلرینی ده صرمه یله تدقیق ایدم:

بر آزال بر آیت جلیله دن بحث ایدلمشدی (حذالغفو وأمر بالعرف وأعرض
عن الجاهلین) بو آیت جلیله ده کوریلپور که قرآن کریم صرفه رعایت ایتیمکی امر
ایدیور. اولکی درسده ایضاح ایدلمشدی که عرف باشقه، عادت باشقه در.
عرف: عقلاً مستحسن اولان وعقول سلیمه اصحابی عننده منکر اولیان شی
معناسنه آله حق اولورسه او وقت عرف صورت مطلقه ده. معتبر اولور. فقط
عرفی عادت معناسنه آله حق اولور ایسه که او وقت عادت باطل اوزرینه ده. مؤسس
اوله بیله جکندن بو معناجه هر عرفک جائز اولیه جنی حکمی ظاهر اولور.
بو مطالعاتم اعتقادیاته وعباداته دخی شامل اولمق اوزره درمیان ایدیلان
بر مطالعة عمومی در. مثلاً:

بو کون بلاد اسلامیته که همان جمله سنده بر چوق خرافات عرف حکمی
احراز ایتمشدر. حالبو که بو عرفلر باطلدر. خسته اولان بر کیمسه که قبرلره،
تربلره کیده رک، قبرلرده، تربلرده مدفون اولان شخصلردن استعانه ایتیمی
کبی که شرعاً قطعاً جائز دکلددر. کذلک:

صیچرایه رق درلو، درلو اوضاع و حرکات ایله تکیه لرده ذکر اولنمی
کبی که بوده جائز دکلددر. بونلر هریرده عرف اولمش، عادت اولمش، هرکس
یا بمقدمه بولونمشدر. بونکله برابر صرف بر اثر جهالتدر.
آنک ایچوندر که کرک عرفک، کرک عادتک معتبر اولمی عقل سلیم عننده
مستحسن و شرعاً غیر مردود اولمنه وابسته در.
معاملاته کلنجه:

معاملات که بیع و شرا و ایجار و استیجار کبی خصوصاتدن عبارتدر. بو کبی
خصوصاتده تأسیس ایتمش اولان عرف و عادتلر شبهه منزه معتبر اولمق لازم کلور.
فقط بوراده بر مسئله واردر اوده نص ایله عرفک تعارضی حالده هانکی سیله
عمل ایدیله جکی کیفیتدر.

امام اعظم و امام محمد حضراتی نص ایله عرف تعارض ایتدکده نص ایله
عمل اولنور. عرفه اعتبار اولماز دیمشدر. فقط امام ابی یوسف حضرتلرنندن

منقول اولان بر روایتده مشارالیه بوباید. نصوص شرعییه ایکی قسمه تفریق ایدیورلر. بر قسم نصوص شرعیه عرفه مبتنی اولارق وارد اولدینی جهتله بومثالو نصوص شرعییه صورت مطلقهده رأساً وابتداءً اثبات احکام ایچون وارد اولان نصوص شرعیه دن تفریق ایدیورلر. بناءً علیه امام ابی یوسفه کوره نص شارع ایله عرف و عادت تعارض ایتدکارنده نظر اولنور. اگر نص شارع عرفه مبتنی اولارق وارد اولمش ایسه بوصورتده عرفه اعتبار اولنور. نصک عمومیتی عرف ایله تخصیص اولنور.

یوق؛ اگر نص شارع عرفه مبتنی اولمایوبده رأساً وابتداءً بر حکم شرعی بی وضع و تأسیس ایچون وارد اولمش ایسه اولوقت نصه اعتبار اولنور. یعنی نصک عمومیتی ایله عمل اولنور. عرفه اعتبار اولماز.

فی الحقیقه بر قسم نصوص شرعیه طوغریدن طوغری به رأساً بر حکم شرعی بی اثبات ایچون وارد اولمشلردر. مثلاً مسکرات استعمالی اوتهدن بری عربک عادتق ایکن قرآن کریم (بو عادتق ابطال ضمنتده شرب حمرک حرمتق تأسیس) ایشدر. از جمله بوباید شرفنازل اولان (انما الخمر والمیسر...) آیت جلیله سی بونی مؤیددر. بناءً علیه شراب ایچمکی منع ایتمشدر. حالبوکه زمانمزده هرنوع مسکرات استعمالی بین الناس عادت اولمشدر.

شمعی مسکرات استعمالی عادتدر دییه شراب ایچمک جائز اولورمی ؟ هیچ تردده محل یوقدر؛ که بویله یرلرده عرف و عادت اصلاً نظراعتبارده آلتماز. چونکه شرابک منعه دائر وارد اولان نص شرعی بر عرف و عادتک حکمتق تثبیت ایچون وارد اولماشدر. بالعکس موجود اولان عادتق ابطال ایچون وارد اولمشدر. مناکحات، مفارقات، وصایت، وراثت مسائلی کبی بر جوق احکام شرعیه حقیقه وارد اولان نصوص شرعیهده بویلهدر. یعنی بوسئله لریک احکامق تأسیس و تثبیت ایدن نصوص شرعیه طوغریدن طوغری به رأساً واصله احکام شرعیه تأسیس ایتمشلردر. بناءً علیه بوکبی رؤس مماثلده نصه اعتبار اولنور. او نصک خلاقه اولارق تأسیس ایدن عرف و عادتده اعتبار ارتلماز. اما بر نص شرعی

حين ورودنده موجود اولان عرف وعادتک حکمی تثبیت ایچون وارد اولمش و بناء علیه عرفه مبتنی بولمش اولور ایسه او وقت عرفه اعتبار اولنور ونص شرعی عام بر تعبیر ایله وارد اولمش ایسه عرف وعادت او نص عامک عمومیتنی تخصیص ایتش اولور . چونکه مادامکه او نص شرعی بر حکم عرفی بی تبیین ایچون وارد اولمشدر . او حالدله اصل اولان عرف دیمکدر و آرتق عرفک تبدیلیله او نصک حکمی ده تبدیل ایدر . بونک ایچوندرکه فقهها (ازمانک تبدیلیله احکام دخی تبدیل ایدر .) دیمشدر .

فقط دیدیکم کبی ازمانک تبدیلی ایله تبدیل ایدمک احکام عرفه مبتنی اولان احکامدر . یوقسه رأساً وابتداءً نصوص شرعیه ایله ثابت اولان احکام ازمانک تبدیلی ایله تغیر وتبدیل ایتمز . مجلهک قواعد کلیه بی شرحنده فقهانک نصوصنه یعنی تصریحاته مخالف اولان عرف وعادتلرک دخی معتبر اولیه جفی کوسترلمش ایسه ده بوطوغری دکادر . خطای فاحشه در . چونکه اقوال فقها اکر طوغریدن طوغرییه نصوص شرعیه ایله ثابت اولان احکامدن عبارت ایسه دیه جک یوقدر . فقط اوکا نص فقها دیتمز . نص شارع دینور .

اگر اقوال فقها قیاس واجتهاد ایله ثابت اولان احکامدن عبارت ایسه او وقت عرف وعادته اعتبار اولنور . اقوال فقها نظراً اعتباره آلتماز . چونکه بالمله فقهانک اتفاقیه ثابت اولان براساس فقهی درکه عرف ایله قیاس تعارض ایتدکده اعتبار عرف وعادته در . قیاسه دکادر . یعنی عرف وعادته عمل اولنور . قیاسک مقتضاسی ترک اولنور . زمانمزمده بشون دول متمدنه قانونلریسک اک زیاده اعتبار ایتدیکی شیئی ده اشبو عرف وعادت قضیه سی در . بر قانون عرف وعادته منافی اولورسه او قانونک حکمی پایدار اولاماز .

عرف وعادت دیمک قبول عامه دیمکدر . قانونلر ایسه قبول عامیه مظهر اولورلرسه پایدار اولاییلورلر قبول عامیه مظهر اوله بیان قانونلرک هیچ بر نفوذ معنویسی اولاماز . آنک ایچوندرکه حقوق مدنییه ده اک مهم اساس عرف وعادته در . یوقاریدن بری واقع اولان ایضا حاسندن آ کلا شیلدینی وجهله حقوق

اسلاميه دخی عرف و عادت ایچون مهم و بک واسع بر موقع آیرمشددر . بر چوق مسائل شرعیه نك حافی عرف و عادتہ بر اقمشددر . و حتی (عادت محکمدر) قضیه سی حقوق اسلامیه ده بک مهم و واسع بر اساس اولمشدر .
 بو نقطه نظر دن عرف و عادت تدقیق ایدیله جت اولورسه کوریلور که ایکیدن خالی دکلدر :

۱ — عرف عام

۲ — عرف خاص در .

عرف عام : بلاد و ممالک کثیره اهاالیسنه شامل اولان عرفدر .
 عرف خاص : بعض مملکتلره و یا بعض اصناف و جماعتلره مخصوص و منحصر اولان عرفدر .

عرف عام ایله حکم عام ثابت اولور . عرف خاص ایله ده حکم خاص ثابت اولور . بناء علیه بر بلده اهاالیسی آره سنده جاری اولان عرفلر و عادتلر آنجق او بلده اهاالیسی حقنده معتبر اولور . و حکم تعیین اولنور . لکن باشقه بلده اهاالیسی حقنده معتبر اولماز . بناء علیه هر قضا حاکی آنجق مدعی ایله مدعی علیه بولندقلری بلده نك و یا منسوب اولدقلری صنف و جماعتك عرف و عادتنی نظر دفته آلفه مجبوردر . باشقه بر بلده نك عرف و عادتیه مدعی بی و یا مدعی علیه الزام ایدمیز . ایدم جك اولورسه حکمی معتبر اولماز ، نقض اولنور . بعض فقها عرف خاص ایله عمل ایتمك جائز دکلدر دیمشلر سه ده مذهب حنفیه مختار اولان رایه کوره عرف خاص دخی عرف عام کی معتبردر . آنك ایچوندر که مجله نك ماده مخصوصه سنده (عادت محکم) در . دینیلدکن صکره کرک عام اولسون کرک خاص اولسون دینیلدک عرف و عادتك هرا یکی قسم نك ده معتبر اوله جفته اشارت اولنمشدر .

بر عرف معتبر اولمق ایچون هیچ شبهه یوق که آدن دها غالب و شایع و آکا منافی باشقه بر عرف اولما ملیدر . ذاتاً بویله مختلف بر عرف و عادت اولورسه حقیقت ده عرف و عادت تأسس ایتمه مش دیمک اولور . آنك ایچون مجله نك

ماده مخصوصه سنده عادتك معتبر اولمسی شرطنی بیان ضمننده (عادت آنجق مطرد و یا غالب اولدقده معتبر اولور) دییور . ایشته عرف و عادت حقنده سونیه جك سوزلر بونلردن عباریدر .

*
**

ادلته تالیه میاننده دها بنض دلیللار وارنده تطبیقاتده خصوصیه زما مزده اونلرك بك او قدر موقعی بولنادیغندن ذ کړندن صرف نظر ایدلمشدر . یالکز شوراسنی سویله ییم که فقه اسلامده بش قاعده واردر که بونلر اصل الاصولدر . اونلرده شونلردر :

- ۱ - برایشدن مقصد نه ایسه حکم اکا کورده در .
- ۲ - شك ایله یقین زائل اولماز .
- ۳ - عادت محکمدر .
- ۴ - مشقت تبسیری جلب ایدر .
- ۵ - ضرر ازاله اولنور .

ایشته حقوق اسلامیه نك مختلف ابواب و قصه ولنده محرر اولان مسائلك همان اکثریسی بو قاعده لر اوزرینه تأسس ایتمشدر . سائر قواعد کلیه فقهیه ده بونلردن استخراج ایدلمشدر . بونلرك بعضیلری استحسان قاعده لریدر . مثلاً : (مشقت تبسیری جلب ایدر) قاعده سی استحسان قاعده سیدر و بوبابده دیگر قاعده لرده بوکا مفرعدر .

ایشته مجله نك مقدمه سنده ذکر اولان قواعد کلیه نك اکثریسی بو بش قاعده اوزرینه متفرع و آنلردن مستخرجدر . مثلاً :

(برشیك بولندیفی حال اوزره قالمسی اصلدر) ، (برزمانده ثابت اولان شیك خلاقه دلیل اولمادقجه بقاسیله حکم اولنور) ، (برائت ذمت اصلدر) ، (قدیم قدمی اوزره ترك اولنور) قاعده لر (شك ایله یقین زائل اولماز) قاعده سندن استخراج ایدلمشدر .

دوشونیه جك اولورسه کیفیت استخراج کنیدیکنندن نظامی ایدر . مثلاً :

(برائت ذمت اصلدر) قاعده سنه امان نظر ایتدیکم زده کور پرزکه بوقاعده نك
معنا سو نتیجه اعتباریله شك ایله یقین زائل اولماز دیمکدر . چونکه برانسانك
دنیا به کلدیکی زمان هرکسه قارشى ذمتی برى اوله رق کلش اولدینی بالبداهه
محققدر . و بناءً علیه اوجوجفك ذمتك برائتی یقیناً ثابتدر . شیمدی برى
جیقبوده اوجوجفك سن بلوغه وصولدن سوکره کندیسندن بر مقدار پاره
استقراض ایتدیکفی ادعا ایدمك اونورسه اشبو ادعا اوجوجفك اولجه متحقق
اولان برائت ذمته منافی بر ادعا اولدیغندن قول مجرد ایله ثابت اولماز .

بوجهائله بودعواده سوز اوجوجفك اولور . مدعی نك سوزندن زیاده او
جوجفك سوزینه التفات اولنور . چونکه اونك سوزى بر قاعده اصلیه به
مستنددر . مدعی نك سوزى مطلقاً برینه ایله ثابت اولمق لازمکلور . چونکه
اولجه یقیناً ثابت اولان برائت ذمت شك ایله زائل اولماز . آتی ازاله ایدم بیلیمك
ایچون یقین افاده ایدم بیلیمك بر دلیل و برینه لازمدر . زیرا شك ایله یقین
زائل اولماز دینیلور . (برشیك بولوندینی حال اوزره قالمی اصلدر) و یا (قدیم
قدیمی اوزره ترك اولنور) قاعده لریله بونلره مماثل اولان قواعد سائره دخی
بویله در . یعنی بو کبی قاعده لرك نتیجه اعتباریله معنالی شك ایله یقین زائل
اولماز دیمك اولور .

(مشقت تیسییری جلب ایدر) قاعده سی ده اکا متفرع اولان قاعده لرله
مقایسه و تدقیق ایتدیکم زده کور پرزکه اوقاعده لرده مشقت تیسییری جلب ایدر .
معنایی متضمندرلر . مثلاً (برایش ضیق اولدندم متسع اولور) ، (ضرورتلر
ممنوع اولان شیلری مباح قیلار) ، (حاجت عمومی اولسون ، خصوصی
اولسون ضرورت منزله سنه تنزیل اولنور) قاعده لری هپ مشقت تیسییری جلب
ایدر معنالی متضمندرلر .

کذلک (ضرر عامی دفع ایچون ضرر خاص اختیار اولنور) ، (ایکی
فساد تعارض ایتدکده اخفی اختیار ایله اعظمك دفعی چاره سنه باقیلور) ،
(ضرر اشد ضرر اخف ایله ازاله اولنور) ، (اهون شرین اختیار اولنور)

قاعده لریله مال و معنا اعتباریله بونلره مماثل اولان قواعد سائره هپ (ضرر ازاله اولنور) معناسی احتوا ایتمکده درلر (ناسک استعمالی بر جتدر که آنکله عمل واجب اولور) ، (ازمانک تعیریه احکامک تغیری افکار اولو باماز) ، (بین التجار معروف اولان شیئی شرط قلمش کیدر) کی عرف و تعاملک معاملات ناسده معتبر اوله جغی افاده ایدن قاعده لرده هپ (عادت محکمدر) قاعده سنک برر فرعی و آنک معناسی متضمن درلر .

بولک ایچوندر که متحققین فقهی (بالعموم احکام فقهیه ذکر اولنان بش قاعده قاعدهیه مبتنی در) دیملر درر . واقعا بر جوق احکام فقهیه دیگر اساسلره مستند ایسه ده ناسک معاملات و مناسباته متعلق بولنان احکامک اکثریسی او بش اوزرینه مبتنی در . خلاصه ، حقوق اسلامیه ده اک زیاده نظر اعتباره آلنان اساسات حقوقیه ، عدل و حق ، احتیاج ناس ، عرف و طایف ، مصاحف عامه ، استصحاب اساسلریدر . فقهای حنفیه بو اساسلره مستند ولان مسائل و قواعد فقهیهیه (استحسان) اطلاق ایدرلر . فقهای مالکییه ده استصلاح یعنی ، (مصلحت مرسله) ایله عمله اطلاق ایدرلر فقط متأخرین مالکیه ایله خنیلریده خنیلر کی استحسان تعیرینی قولالانیورلر .

شافعیلره کلنجه : کرچه فقهای شافعیه استحسان و استصلاح تعیرلری استعمالده بونلره شدتله اعتراض ایدیورلر سده بو اعتراضلری صرف نظریدر . و نزاع لفظی قیلندندر . تطبیقاتده ایسه شافعیلر دخی خنیلر و مالکیلر کی بو اساسلری تماماً نظر اعتباره آملر و بک جوق مسائل فقهیهیه بو اساسلره تطبیق و تفریع ایلرلر درر . ایشته ادله بحثه دائر اولان مسائل بوراده ختام بولمشددر . شمیدی ده احکامه دائر اولان مباحثی تدقیق و مذاکره ایدلم . [۱]

[۱] ترتیب صره سیله . ادله فصلک ذیلی اداق وزره (اصول ترجیح) نامیه . آبروجه بر فصل آچی لازم کاورسده بو فصلک مباحثی اساساً ادلهیه عائد درلرلر آره سننده بیان ایدلمش اولدیغندن بوکا لزوم قالمشدر .

ایکچ قسین

احکام بیاننددر

بو قسم درت فصلی محتویدر .

۱ - حکم

۲ - حاکم (شارع)

۳ - محکوم به (مکلف به ، فعل مکلف)

۴ - محکوم علیه (مکلف ، شخص مکلف)

بو بحثلری ایضاحه کیرشمزدن اون ، مقدمه اوله رق فرق اسلامیه پی و وضعیت حقوقیه پی تعیین وتصحیح ایده جک اولان (اراده بشر) و (ضمانه) بختلری مجمل اولسون بیان ایتک ایجاب ایدیور . چونکه آشنایده کله جک مباحثه مختلف فرق اسلامیه نك نظریه لرندن ، عقیده لرندن بحث ایدیه جکندن بونلرک اسلاملی چوق کچه جکدر . آنکچون اول امرده بو اعتقادی فرقه لرک کیملر اولدقلری ، مسلك اعتقادیلرینک نهدن عبارت بولوندیغنی مختصراً اولسون بیامه کز لازمدر . و برده عقود وفسوخ اوزرینه ، یعنی بین الناس حقوقی مناسبات اوزرینه ترتب ایده جک اولان وضعیت حقوقیه ، انسانلرک (اراده) به مالک اولملرینه متوقفدر . ایکی کشی آراسنده اجرا ایدیلن بر عقد ، مثلاً عقد بیع معتبر وصحیح اولمق ایچون شبهه یوق که هر شیدن اول ، عاقبتینک اراده به مالک اولماسی ، یعنی او عقدی کندی اراده واختیارلریله اجرا ایتمش بولونملری لازمدر . بویله بر اراده بولونمیه او عقدک صحیح ومعتبر اولمیه جنی درکاردر . حال بویله ایکن (جبریه) کبی بعض فرق اسلامیه ، بشرده اراده نك وجودینی انکار ایدیور . دیگر فرقه لرده بو مسئله ده باشقه باشقه نظریه لر درمیان ایدیورلر . بو جهته احکام بحثلری برر برر ایضاحه مباشرتدن اول بونلری بیامک ضروریدر . آنکچون بز بوراده (مقدمه) قیلندن اولمق اوزره اول (فرق اسلامیه) پی ، ثانیاً (اراده و قدر) بختلری مختصراً بیان ایده جکدر .

مقدمه

فرق اسلامیه

شبهه یو قدر که عقل و ذعان صاحبی بر انسان ایچون اک بیوک کمال، حقایق و اشیایه کسب و قوف ایتمک و هر شیدن اولده مبدأ و معادتی یعنی نره دن کلوب نره یه کیتمکده اولدیغنی ، و حقیقت الوهیتی بقدر الایمان بیلمکدن عبارتدر . بوکا وصول ایسه اولسه اولسه آنجیق ایکی طریقک بریله ممکن اوله بیلیر . بری نظر و استدلال طریقیدر . دیگر ی تصوف طریقیدر . برنجی طریقده مقصده وصول ایچون حقایق اشیایی تدقیقات و تفکراته ، آثار و مؤثرانی بالتبع استدالات عقلیه استناد اولونور . ایکنجی طریقده ایسه یالکز ریاضت و تربیه روحه و مجاهده نفس و معنویاته اعتنا اولونور .

نظر و استدلال طریقته سالاک اولانلر ، یا عقل ایله نقلی (دین) جمع و تلفیق ایدرک بر دین و شریعتیه اتباع ایدرلر و یا خود هیچ بر دینه تابع اولمیه رق یالکز عقلی رهبر انخاذا ایلرلر . برنجیلره متکلمین و اونلرک بو بایده تدوین ایتدکلری علمده (علم کلام) تسمیه اولونور . ایکنجیلره (حکماء مشائون) اطلاق ایدیلیر .

ریاضت و مجاهده نفس طریقته سلوک ایدنلرده ، یا کذلک اصول ریاضت و مجاهدهده بر شریعتیه توفیق حرکات ایدرلر و یا خود ایتمزلر . برنجیلره (صوفیه) و (متصوفه) دینیر . ایکنجیلرده (حکماء اشراقیون) نامی ویریلیر . بو ایکنجیلر طریق ریاضت و مجاهدهده مجرد کندیلرینک وضع ایتدکلری اصوله استناد و بو صورتله استحصال ایلدکلری حقایق کشفیه و اشرافیه به اعتماد ایلرلر . اسکی یونان حکما سندن مشهور (افلاطون) بونلردندر .

دين اسلام ايله متدين اولان مشكلمين ، يك چوق فرقه لره آيرماشلردور .
اساس اعتباريله اول امرده ايكي بيوك قسمة آيريليرلر :

۱ — اهل سنت و جماعت

۲ — اهل بدعت و ضلالت

باب اعتقاده اصحاب كزين و جمهور تابعينه پيرو اولانلره « اهل سنت و جماعت » دينير. اهل سنته ، اهل حق دخی اطلاق اولونور. مسلك اصحاب و تابعيني طائيفه رق اهل سنت عندنده متفق عليه اولان مسائل اعتقادييه مخالفت ايدن بالعموم فرق اسلاميه يده « اهل بدعت » و « متبدعه » نامی ويريلير. اشبو اهل بدعت ، في الاصل آلتی فرقيه انقسام ايدرکه شونلردور :

۱ -- معتزله

۲ — جبريه

۳ — شيعه

۴ — خارجيه

۵ — مشبهه

۶ — مرجئه

معتزليه ، (قدر) ی انكار ايتدكلى ايچون (قدريه) دخی دينيلير . بو معكوس بر تسميه ايسه ده اولنر حقنده اطلاق اولونمشدر. لکن غالب وشايع اولان (معتزله) اسميدر . بونك وجه تسميه سنه كلنجه : خلفای امويه دن « عبدالملك بن مروان » زماننده معتزله و ساسندن « واصل بن عطاء » ارتكاب معصيتك ، كناه ايشله مه نك كفر ايله ايمان آراسنده بر مرتبه ، بر حد وسط اولديقنه قائل اولور و بناء عليه مرتكب كييره ، يعنى معصيت كييره يي ارتكاب ايدن بر مسلم نه مؤمندر ، نه ده كافر در دير . بوكا علم كلامچيلر آراسنده (منزله بين المنزلتين) اطلاق اولونور . مشاراليه واصل ، بر كون بو فكريه ، بو نظريه سنى اثناء درسه كندی استادى اولان اعظم علماء تابعيندن مشهور « حسن بصرى » حضرتلرينه سويلر . مشاراليه ، بو فكري رد ايدر. واصل

اوتك بوردى قبول، ائيموب اوتك درسندن قالفار، كيدر. بونك اوزرينه
مشاراليه حسن بصرى حضرتلرى، (اعتزل عنا واصل = واصل بزدن
اعتزل ايتدى، يعنى آيرلدى) دير. ايشته بومنا-بته بوفرقيه معتزله و مذهبلىرىنه ده
مذهب اعتزال دنيلمشدر.

اهل سنته قارشى الك اول قواعده مخالفتي تأسيس ايدن فرقه، معتزله قرقيده.
مخالف فرقهلىر مياننده الك علمى فرقهده بودر. ايجلرند غايت جريرلى و بك
دكرلى بيوك عالم واردر. اكثريى ادبيات عربيه ده، علم بلاغته،
فلسفه ده و علوم عقليه ده وسعت معلوماته مال كدرلر. الله مقداول و تفسير لرك
الك قيمتلىسى اولان (تفسير كشاف) ك مؤلفى و محمود زنجشى ده، معتزله
علماسنددر.

معتزله، قدرى انكار ايدر و بشرد اراده مطلقه نك وجودينه قائل اولور
وقول فعلنك خالقيدر، افعال بشريه ده اراده الهيه نك تاثيرى يوقدر ديرلر.
صفات الهيه يده انكار ايدرلر. يعنى جناب حقك ذات اقدس الوهيتدن باشقه
آريجه صفات الهيه ي يوقدر ديرلر. و بوعقيده لرينه (توحيد) نامى ويرلر.
بوندن باشقه اصلح عباد رعايت، يعنى انسانلر حقده الك زياده اى و خيرلى
اولان شى نه ايسه آكا مراعات ايلك جناب حق ايجون واجبدر اعتقادنده
بولونورلر. كذا مطيعه مكافات، عاصيه به مجازات ترتيبى ده واجب الوجود
حضرتلرينك اوزرينه واجبدر. چونكه جناب حق، عادل و مطلقدر، عدالت
مطلقه مقتضاى ده بودر. مكر كه عاصى، صميمى و قطعى بر صورتده توبه
استغفار ايتمش اوله. ايشته آنجق بو صورتده عاصيك كناهى عفو ايدلك
جائز اولور. عكسى تقديرده، يعنى بلا توبه و بلا استغفار اصحاب معصيتى عفو
ايدوب مجازاتسز براقق، عدالت مطلقه به منافی دوشر ديرلر. بوعقيده لرندن
طولاي كنديلرينه و محاب عدل، اطلاق ايدرلر. ذات الوهيتدن باشقه صفات
الهيه ي نفي و انكار ايتدكلرى ايجونده كنديلرينى «اصحاب توحيد» تسميه
ايدرلر.

معتزله، دیگر بعض مسائل اعتقادی ده دخی اهل سنته مخالفت ایدرلر سده
 بونلر ایکنجی درجه ده مسائلدر. معتزله بی اهل سنتدن تفریق ایدن اصل وصف
 بمنز و علامت فارقه، شوذکر اولونان مسئله لرك هیئت مجموعه سیدر. شوراسنی ده
 سویلیه یم که اعتقادده بویله کندیلرینه مخصوص بر مذهبه سالک اوله رق اهل
 سنتدن آریلان معتزله علماسنک اکثریت عظیمه سی، عملده یعنی احکام
 فقهیه ده، اسلامیتک حقوق قسمنده مذهب حنفی بی التزام ایتشلردر، حنفیدرلر.
 جبریه - جبریه، انسانلرده قدرت و اراده نك وجودینی کلیاً انکار
 ایدرلر. بناء علیه انسانلر بالعموم افعال و حرکاتلرنده مجبور و مضطردرلر
 دیرلر. بو صورتله معتزله مذهبک تماماً ضدی بر مذهبه ذاهب اولورلر. ایشته
 آوروپاده (فالایزم) دینان مذهب، بو جبریه مذهبدر. فقط بو کون عالم
 اسلامده بویله (جبریه) نامی آلتنده طویلانمش، تبارز ایتش بر فرقه یوقدر.
 وقیله وارمش، بو کون یوقدر. شو قدر وارکه دیگر مختلف مذاهبه سالک
 افراد آراسنده بو فکرک سرینتیمی واردر خصوصیه بر چوق کیمسه لر آرسنده
 (قدر) مسئله سنک یا کلش آ کلاشله سی خصوصنده بو فکرک دخل کلیسی
 واردر. آشاغیده ایضاح اولونه جقدر.

شیعه - شیعه فرقه سی، بر فرقه علمیه اولمقدن زیاده بر فرقه سیاسیه در.
 «خلافت» غوغاسی یوزندن ظهور ایتشدر. حضرت امام علی و خاندان
 طالبیری طرفدارلرینک تشکیل ایتدکلری فرقه در. ذاتاً لغت عربیه ده «شیعه»
 لفظنک معنای، بر ذاتک اتباع و اعوانی دیمکدر. تذکیر و تأیینی، مفرد
 و جمعی مساویدر. بونلر، رسالتیه اقدمزدن سوکره امام یعنی خلیفه،
 حضرت عابددر. بوده جلی و یا خفی نص ایله ثابتدر. مشارالیه حضرت علی
 (کرم الله وجهه) دن و اولادندن باشقه سنک امامت و خلافتی جائز دکدر دیرلر.
 بو فکر اونلر ایچون لایتنزل بر عقیده قوتی جائزدر. بونلر اولای بر فرقه
 ایکن بالآخره حضرت علی نك ارتحالندن سوکره هر بری آنک اولادندن
 برینی التزام ایدرک و درلو درلو اعتقاداته ذاهب اوله رق، هله بعضیلری

ایشك ايچنه عن قصد بك كولونج خرافات قاريدديره رق بر جوق فرقهلره
 آيرلمشلدور . حتى بونلرك بعضيلرى يكدىكرلرني تكفير ايدرلر . علم كلامدن
 مشهور (موافق) ده بونلرك يكرمي ايكي فرقهيه آيرلمش اولدقلرى محروردور .
 مع هذا ينه (موافق) ده محرر اولديني اوزره على العموم شيعيلر ، اساس
 اعتباريله اوچ بيوك فرقهيه تقسيم اولونورلر . زيديه ، اماميه ، غلات ياخود غاليه ..
 (زيديه) فرقهيه ، حضرت امام « حسين » ك مخدوم عاليلى « على زين
 العابدين » ك اوغلى حضرت « زيد » ك طرفداريدرلر . آنكهچون بونلره (زيديه)
 ديلمشدر . بونلر جاروديه ، سايمانيه و صالحيه ناملريله اوچ فرقهيه آيرلمشلدور .
 « جاروديه » ، ابو جارود دذيالن ذاتك تشكيلى ايتديكي فرقهدير . بونلر ،
 « حضرت پيغمبر » حضرت على بك خليفه اولماسنه صراحة واسماً دكلسه ده
 دلالة اشارت ايتمشدر . بوبابده نص خفي واردور . اصحاب ، بو وصف و اشارتي
 آ كلاميه رق كندى اختيار و اجتهادلريله ابوبكرى خليفه نصب و تعيين ايتدكلري
 ايچون فاسق اولديلر . دييورلر . وبوندن طولايي اصحاب كرامى ديكر شيعيلر
 كي طعن و تشنيع ايدبيورلر .

« سايمانيه » و « صالحيه » فرقهلى . شيعيلرك اك معتدالريدرلر . ديكرلرى
 كي اصحاب كرامى تلعين و طعن و تشنيع ايتزلر . بو ايكي فرقهك خلافت
 مسئله سنده اساس و عهدهلى بردور . بونلر ، نصب امام يعنى خليفه تعيني
 قضيه نك طريقى ، « شورى » در يعنى خلقك مشورتى در ، بالا-تشاره انتخاب
 و بيعتدر ديرلر . بو نقطه ده اهل سئله بر اشيرلر . لكن بو بابده ايكنجى
 بر اساس اولق اوزره ده دييورلر كه « خلافتده اصل اولان ، خليفه انتخاب
 ايديله جك ذاتك ملت اسلاميه نك افضل اولماسيدر . حضرت پيغمبردن صوكره
 ملت اسلاميه نك افضل ايسه جناب امام على در . بناء عليه خلافت آنك ،
 صوكره مخدوم عاليتبارلر حضرت « حسن » ك ، صوكره « حسين » ك ، آنلردن
 صوكره ده ينه امام على بك حضرت (فاطمه) دن تولد ايدن و شرائط خلافتى
 جامع اولان اولادبك حقيدر . رضى الله عنهم . ايسته بو نقطه ده بونلر ، اهل

سندن آریلیورلر .

مع هذا بونلر ، « افضل موجود ایکن مفضـولك خلیفه اولمهـسی ده جائز و صحیحدر . » دیرلر . و بو اساسه بناءً حضرت ابوبکر ایله حضرت عمرک خلافتلرینی قبول ایدرلر . شو قدر وارکه حضرت علی موجود اولدینی حالدده اصحاب کرامک ، آنی انتخاب ایتمیوبده مشارالهمایی انتخاب ایتملری خطادر ، خطای اجتہادیدر . فقط بو خطا ، اوله فسق درجه سنده دکلدر دیرلر . و بو صورتله ینه زیدیه فرقه سندن معدود اولان دمین سـویلدیکم « جارودیه » شعبه سندن آریایرلر . بونکله برابر سلیمانیه فرقهـسی ، براز ایلری کیده رک یالکز معاویہ بی دکل ، آنکله برابر عایشه ، طلحه وزیر حضراتی - حضرت علی به قارشی محاربه یه قیام ایتدکلرندن طولانی - تکفیر ایدرلر . حتی حضرت عثمانی بیله تکفیر ایدرلر . فقط صالحیه فرقهـسی بو ذوات محترمه بی تکفیردن اجتناب ایدرلر . سلیمانیه فرقه سنک رئیس سلیمان بن جریردر . صالحیه فرقه سنک رئیس اکابر فقهادن « حسن بن علی بن حی » در . بو ذات امام اعظم ابو حنیفه حضرت قلینک معاصر لرنددر و فقهده اونک کی مستقل بر مذهب صاحبی بیوک مجتهددر .

زیدیه فرقه سی ، کندیلرینه مخالف اولان امامیه فرقهـسی (رافضه و جمع اوله رق روافض) تسمیه ایدرلر . سببی ده کندیلرینک امامی اولان سالف الذکر امام (زید) ی ، رفض ایتمش اولمه لریدر ، یعنی ترک ایتملریدر . رفض ، لغتده ترک ایتک دیمکدر . زیدیلر ، اعتقاد یاتده معتزله مذهبیه سـالیکدرلر . فقهده ایسه حنفیدرلر . یالکز بعض محدود مسائله مذهب شافعی بی التزام ایدرلر . (امامیه) فرقه سنک عمده سی شودر : (امام ، یعنی خلیفه نصب و تعیین جناب حق اوزرینه واجبدر . چونکه امام نصی بر لطفدر ، انسانلری اطاعته تقرب ، معصیتدن تبعید ایدر . بو صورتله لطف ایسه حکیم اولان جناب حق اوزرینه واجبدر . آنکچون شارع ، امام اوله حق ذاتی نص صریح ایله تعیین ایتشددر . اوده امام علی در . زیرا امام علی نک امامت و خلافتی حقنده

جلی و خفی متعدد نصوص وارد در). بونلر، بو اساسی بو صورتله بیان ایتدکن سوکره بوکامتفرع اولوق اوزره ایکنجی برعمده دها بیان ایدیورلر. دیورلرکه (انسانلری طاعتہ تقریب، معصیتدن ترمید ایدہ جک اولان امامک هرکدن اول کندیس طاعتله متصف و معصیتدن مجتنب بولونمہ سی لازمدر. بو ایسه امامک، پیغمبرلر کبی معصوم یعنی کناعدن مصون اولمہ سیله حاصل اولور). ایشنه بوایکنجی عمده یه بناء امامیه فرقہ سی، امام المسلمین اوله جق ذاتک حائز اولمہ سی لازم اولان دیگر شرائطدن اول، الک برنجی شرط اوله رق معصوم بولونمہ سی شرطدر دیرلر.

دیمک اولویورکه امامیه فرقہ سی نک خلافت مسئله سنده ایکی اساسی، ایکی عمده سی وار. بری امام و خلیفه نصی جناب حق اوزرینه واجب اولدیفندن امام اوله جق ذاتک نص ایله ثابت اولمہ سی، ایکنجیسی امامک کناعدن بری و معصوم بولونمہ سیدر. ایشته امامیه، نصب امام قضیه سنده بو ایکی اساسی بو صورتله تثبیت ایتدکن سوکره، (بوایکی عمده نک، بوایکی شرطک ایکیسی ده حضرت امام (علی) -ه اجتماع ایتشددر. چونکه بر کره آنک حقندہ ظاهر و جلی متعدد نص وارد در. وعین زمانده معصومدر. جناب حق آنی کناه ارتکابندن مصون بولوندرمشدر. چونکه سن صباوتنده مسلمان اولمش و آخر عمرینه قدر کناه ایشله مه مشدر. بناء علیه امام بالحق حضرت علی در) دیرلر. ایشته شو ایضا حادتن آکلا شلم مشدرکه (زیدیه) فرقہ سی، امام علی نک امامتی حقندہ ظاهر و جلی نص شرعی یوقدر، اما نص خفی وارد در. بونص معنایی ظاهر اولمایوب خفی اولدینی ایچون تدقیق و تأمله و بناء علیه اجتهاده محتاجدر. آنکچون نصب امام قضیه سنک طریقی، اجتهاددر، خلقک مشورتیدر دیورلر. (امامیه) فرقہ سی ایسه بوفکری قبول ایتیه رک (خایر، نصب امامک طریقی نص در، نص ایله ثابت اولوق لازمدر. آنکچون حضرت علی حقندہ بک ظاهر و قعایی نص وارد در) دیورلر. و (من کنت مولاه فعلی مولاه = بن کیمک مولای ایسم علی ده اونک مولاسیدر) کبی بعض احادیث

نبویه پی ، مقام احتجاجده ایراد ایدیورلر .

امامیه فرقه سی ، امامتی سالف الذکر امام (زین العابدین) ک دیکر مخدومی ، یعنی زیدیه فرقه سنک امامی اولان حضرت « زید » ک برادر ی (محمد باقر) ک اوغلی علم و فضل ایله ، زهد و تقوی ایله مشتهر امام (جعفر صادق) حضرت تدرینه قدر بالاتفاق سـوق ایدیورلر . آندن سوکره منصوص علیه اولان امام حقنده اختلاف ایدیورلر . اکثریسی عندنده تقرر اپدن رأی مختاره کوره امامت ، حضرت علی دن اعتباراً اون ایکنجی امام اولان حضرت (محمد مهدی) ده نهایت بولویور . بو اون ایکی امام ده اعظم امتدن اولان شو ذوات محترمه در : امام علی مرتضی ، حسن مجتبی ، حسین شهید کربلا ، زین العابدین ، محمد باقر ، جعفر صادق ، موسی کاظم ، علی رضا ، محمد تقی ، علی نقی ، حسن عسکری زکی ، اک سوکره بونک اوغلی محمد مهدی .. (رضی الله عنهم) .

بو اون ایکی امامدن هر بری دیکرینک مخدومیدر . یالکیز حضرت حسین ، حضرت حسنک برادریدر . بونلرک امامته قائل اولان امامیه فرقه سنه « اون ایکیجیلر » مناسنه (اثنا عشریه) اطلاق اولونور . بونلرک سوکنجی امام اولان مشارالیه (محمد مهدی) نک حیاتنده غیوبت ایدوب الیوم بر حیات بولوندیغی وبوکون کلوب ظهور ایده جک اولان «مهدی» نک ایشته بو حسن عسکرینک مخدومی (محمد مهدی) اولدیغی اعتقاد ایدرلر . وبو اون ایکی امامدن هر برینک امامتی ، کندندن اول امام اولان ذاتک نص و تعیینیه ثابتدر دیرلر .

مقدما امامیه فرقه سی ارکانی ، مسائل اعتقادی ده کندی اماملرینه تابع ایدیلر . بالآخره زمان اوزادقجه اماملردن منقول اولان روایتلرده اختلاف حاصل اولغه باشلادیغدن بونلرک متأخرینی مختلف مذاهب اعتقادییه هالاک اولدیلر . بعضیلری (مشبه) مذهبی ، بعضیلری وبلکه ده قسم کلیسی (معتزله) مذهبی التزام ایتدیلر . مسائل فقهیه به کلنجه : بونلر معین بر مذهبه تابع دکدرلر . بونلره کوره زمانک مجتهددن خالی اولمه سی جائز دکدر . آنکچون مطلقا هر زمانده هیچ اولمازسه بر مجتهدک وجودی لابددر . ایشته عوام ناس

اومجتهدك فتواسيله عال اولور. اولجدهه بالمناصبه سويله مشدم : اماميه علمای
عندنده اجماع ايله قياس ادله شرعيه دن معدود دكلدر . اونلر ، بر مسئلهده
كندی اماملری اتفاق ايتمش ايسه اونكله احتجاج ايدرلر . ويا لكز بو اتفاق
دليل شرعی عد ايدرلر . ذاتاً بونلر ، اصحاب حقنده سوء اعتقادده بولونقلری
ايچون اويله اصحاب وتابعينك وديكر مجتهدينك اتفاقه التفات ايتزلر . بر مسئله
نصوص شرعيه بولونماز ، كندی اماملرينك اتفاقلری ده موجود اولمازسه آرتق
اومسئلهده اجتهاد طریقه مراجعت ايدرلر . وقياسی ادله شرعيه دن عدايمدكلری
ايچون قياس ريئه (مصلحت) و (احتیاج ناس) کي اساسات فقهيه ايله عامل
اولورلر . ايچلرند ، يك مدقق ، يك بيوك عالم واردر .

(غلات) ؛ غينك ضميله غلات ، ينه غينك ولا مك ضميله « غلو » دن
مأخوذدر واسم فاعل اولان « غالی » نك جمعيدير . غلو ، برشيده ومثلاً دينده
حدي تجاوز ايتك ديمكدرد . ايسته بو غلات شيعه ، حضرت امام علي بي وآندن
صوكره امام اعتقاد ايتدكلری آنك اولاديني الوهيت مرتبه سنه چيقاره جق
قدر افراط و غلو ده بولونقلرندن بونلره (غلات) تسميه اولونمشدر . بونلر ،
يك چوق فرقلره آيرلمشدر . (موافق) ده اون سكز فرقيه آيرلدكلری
محرردر . بونلر خرافاتچيدرلر . جمله سي ده مذهب لرينه خاطر و خياله صيغماز
درلو درلو خرافات طولديرمشدر . بو كون عالم اسلامك هر طرفنده ، اهل
سندن اولان افراد آراسنده موجود اولان خرافاتك بر قسمی بونلردن انتقال
وسرايت ايتمشدر .

غلات شيعه دن اك اول حضرت امام علي به الوهيت اسناد ايدن ذات ،
« عبدالله بن سبا » دينيلن بر شخص مفسددر . بو ذات ، مشهور « صفين »
محاربه سنی متعاقب بر كون حضرت امام علي به (انت الاله حقا = حقا كه سن
اللهك) ديمشدي وامام علي اونی « مداین » نفی وتبعيد ايتمشدي . ديكر غلات
شيعه فرقلری هپ بوندن تشعب ايتمشدر . بونك تأسيس ايتديكي فرقيه
« سبايه » فرقه سي دينير . بونلر ، امام علي وفات ايتما مشدر ، بر حياتدر ، سبايه

صروج ایتمشدر. رعد یعنی کوك كورله سی اونك صداسیدر. برق، شمشك ده اونك بولوطله چاریدینی قیراجندن چیقان شراره در (دیرلر، دها نلر، نلر ...)

یمنده کی شیعیلر، یعنی امام یحیی واتباعی زیدیدرلر. ایرانیلر امامیه درلر. سوریه ده و هندستانک بعضی لرلنده بولونان اسماعیلیه و باطنیه فرقہ سی، غلاتنددرلر. کذا سوریه ده بولونان نصیریله غلاتنددرلر ...

خارجیه — خارجیه فرقہ سی، شیعیلرک بالکلیه خلافی، تماماً ضدی بر طریق التزام ایتمشدر. بونلر، جناب امام علی بی تکفیر ایدرلر. بونلر، (صفین) محاربه سنده امام علی ایله معاویه آراسنده جریان ایدن مشهور (تحکیم) اصولنه، یعنی مشار ایله حضرت علینک تکلیف ایله اکیسندن بریسنک خلیفه انتخاب ایدله سی حقنده (حکم)، مراجعت کیفیتنه مخالفنه امام علینک اردوسندن آریله رق اونك علیه قیام و خروج ایتش اولدقلرندن بونلره (خارجیه) نامی ویرلمشدر. بونلر مرتکب کیره بی ده تکفیر ایدرلر. معتزله ده خارجیلر کی عمل ایماندن جزء در دیرلر، اما عملی ترک ایله برکیره بی ارتکاب ایدن ذات، و منلکدن چیقارسده کافر اولمش اولماز دیرلر. خارجیلر ایسه کافر اولور دیرلر. خارجیلر، خلافتک وجوبی ده انکار ایدرلر، بناءً علیه خلیفه انتخاب و تعیین واجب دکلدر، جائدر. اولسه ده اولور، اولماسه ده اولور دیرلر.

مشبهه — بونلر جناب حق انسانه تشبیه ایدرلر. بونلردن بعضیلری ایسه آچیقدن آچیفه جناب حقک جسمانیته قائل اولورلرده جناب حق جسمدر، اعضا و جوارحی واردر، شوقدرکه آنک جسمی بزم جسممنز کی دکلدر دیرلر. مرجئه — بونلرده افعال و اعماله هیچ قیمت و یرمیوب ایمان ایله برابر معصیتک اصلا ضرری یوقدر، مؤنه کناه ضرر و یرمز، یتوکه برکیمسه حقیقه مؤمن اولسون. بواعتقاد انسانلری آمارشی به، هر دلو قتالنی ارتکابه سوق ایده جک براعتقاددر. تشکر اولونورکه بوکون بونلرک موجودی یوقدر. ایشته اساس اعتباریله اهل بدعتی تشکیل ایدن فرقهلر، بونلردن عبارتدر.

بونلرك شو ذكر اولونان اعتقادلري سوكره دن احداث وابتداع اولونديني
ايچون بو عقیده لره بدعت واولرله اعتقاد ايدنلرده اهل بدعت و مبتدعه اطلاق
اولونور .

(ستفترق امتي ثلاثاً وسبعين فرقة كلها في النار الا واحدة) حديث مشهورى
منطوقجه رسول الله افندمن حضرتلرى ، محضا بر معجزه اولمق اوزره امت
اسلاميه نك يتمش اوچ فرقه به انقسام ايدمكچى و بونلردن يالكز بردانه نى فرقه
ناجيه اولوب ديكرلرينك دوزخى اولدينى بيان و اخبار بيورمشدر . آنك
ايچون بعض علما ، بو ذكر ايتسدنكم آلتى فرقه دن هر بيرى اون ايكي فرقه به
تقسيم ايدمك مجموعى يتمش ايكي فرقه به چيقر بيور و بوكارده اهل سنتى علاوه
ايتكم صورتيه جمله نى يتمش اوچ فرقه به ابلاغ ايد بيور . فقط نه بو تقسيم ،
نده بو بابت ديكر تقسيماتك هيچ برى طوغرى دكلدر . بو خصوصده
الله بر مقاييس صحيح يوقدر . حديث شريفده يتمش اوچ عددى ايسه كئردن
كنايه در ، يوقسه معنای حقيقيسى مقصود دكلدر . عادت عرب اوزره وارد
اولمشدر . چونكه اولاد عرب ، بو عددى بوكي يرلرده كئردن كنايه اوله رق
استعمال ايدمك كئلمدر . شمدى ده اهل سنتى بيان ايدمك .

اهل سنت

اهل سنت ده ، اول امرده متقدمین و متأخرین اولق اوزره ایکی قسمه
تقسیم ایدمک اقتضا ائدر . متقدمین اهل سنت ، اصحاب کزین و جمهور تابعین
ایله اوچوز سنه هجریه سنه قدر آنلره پیرو اولان علماء صالحین و اکثر فقهها
و مجتهدین و محققین محدثیندر . بونلر ، جناب حق کمال صفتلریله توصیف
و جمایندن والوهیته نقیصه ایراث ایدمک سائر اوصافدن تنزیه ایتمشلر، و وارد
اولان نصوص متشابهدن مراد الهی نه ایسه آنی اعتقاد ایدوب تفسیر و تأویلندن
احتراز و منالری عام الهی به تفویض ایله مشلردر . نته کیم متشابهات بختده
ایضاح اولونه جیدر .

متأخرین اهل سنه کلنجه : بونلر ایکی قسمه آریلیرلر . بری امام ابوالحسن
الاشعری حضرتلرینک اتباعیدر . بونلره اشعریه (و جمع صیغه - یله (اشاعره)
اطلاق اولنور . دیکری امام ابو منصور ماتریدی حضرتلرینک پیروانیسدر .
بونلرده (ماتریدی) دینیر . ابوالحسن الاشعری ، بغدادده نشأت ایتمشدر
و مشاهیر فقههای اصحابدن ابوموسی الاشعری حضرتلرینک احفادندندر . ابو منصور
ماتریدی ایسه تورکدر ، (ماترید) سمرقند کویلرندن برکویک اسمیدر .
بو ایکی امام همام اهل سنتک ایکی رکن رکینی و کندیلرندن صوکره کلنلرک پیشوا-
اولوب اسلامیه پک بیوک خدمت ایتمشلردر . بربرلرینه معاصردرلر، ایکسی ده
اوچوز سنه سی رجالتنددرلر . ابوالحسن الاشعرینک تاریخ وفاتی پک مضبوط
دکدر . مورخ ابن خلکان کسدره میور، اوچوز یکرمی ایله اوتوز آراسنده
ویا خود اوچوز اوتوزده وفات ایتمشدر دیور . ابو منصور ماتریدی نک تاریخ
وفاتی ایسه مضبوطدر ، اوچوز اوتوز اوچده ارتحال ایتمشدر . مشار الیها
حضرتلری کرک تدریس و کرک تألیف صورتیله عقائد اهل سنتی توضیح و مدافعه
ودلائل عقلیه و نقلیه سی تقریر و تفصیل ایتمشلر، فرق مخالفه نک وبالخاصه معتزله نک
اعتقادات و مطالباتی جرج و ابطال ایله مشلردر .

احکام فقهیه ده مذهب حنفی به سالک اولان علماء اهل سنت ماتریدرلر. مذهب شافعی به تابع اولان علماء اهل سنت ده اشعریدرلر. یعنی امام ماتریدی حضرت تلمی، اساساً فقههای حنفیه دن اولدینی جهتله آنک بیان ابتدییکی اعتقادی اصللر، اساسلر امام اعظم ابوحنیفه حضرت تلمینک واتباعنک اعتقادیاتده کی عقیده لرینه، عمده لرینه موافق اولدیغندن فقهده حنفی اولانلر، اعتقاده ماتریدی درلر. کذلک امام اشعری حضرت تلمینک بیان ابتدییکی اعتقادی اصللر، نظریه لر امام شافعی حضرت تلمینک واتباعنک فکرلرینه، عمده لرینه تطابق ابتدیکندن عملده شافعی اولانلر، اعتقاده اشعریدرلر. ایشته «حنفیلر ماتریدرلر، شافعیلر اشعریدرلر»، سوزینک معناسی بودر. یوقسه امام اعظم حضرت تلمی، ابو منصور ماتریدی به و امام شافعی - حضرت تلمی، ابوالحسن الاشعری به تابع دیمک دکلدر. و یو تصویرده اولوناماز. امام ماتریدی ایله امام اشعری، مذاهب فقهیه مؤسسلری ائمه اربعه دن یوز سنه سوکره دنیابه ککشلر و آنفاً بیان اولوندینی وجه ایله کندی اماملرینک و دیگر اسلافک عقایدینی، اعتقادی اساسلرینی برر برر تحلیل ایله میدانه چیقارمشلر، دلیللرینی ترکیب ایله مخالفله قارشى مدافعه ایله مشلدر. مذاهب اربعه مؤسسلری امام اعظم، مالک، شافعی و حنبلی حضرتانی آراسنده واقع اولان اختلافات ایسه صرف مسائل فقهیه به متداردر، اعتقادیاته متعلق دکلدر. درودی ده اهل سنت اماملرنددر. هله امام اعظم حضرت تلمی، یالکیز فقهده دکل، اعتقادیاتده دخی اهل سنتک الذبیوک امامیدر. دور مجتهدینده نشأت ایدن بیوک مجتهدلر ایچنده اهل سنتی اک زیاده مدافعه ایدن اودر. (کشف بزدوی) ده تفصیلاً بیان اولوندینی اوزره عمرینک همان نصفندن زیاده سنی اهل سنتی مدافعه، مخالفلرک افکار و دلالتانی جرح و ابطال ایله کچیرمش و حتی اولوقتلر معتزله و جبریه کی مختلف مذهبلرک مرکز انتشاری اولان بصره شهرینه یکریمی دفعه دن زیاده کیدوب بعضاً بر سنه، بعضاً دها زیاده اقامت ایدمک اصحاب جبر و اعتزال ایله یک حرارتلی مناظره لرده بولونمشلدر. بیوک مجتهدلر آراسنده

هر كس دن اول علم فقهی تدوین شرقه مظهر اولان مشارالیه اولدینی کبی
اعتقادیانه دائر الاول نشر اثر شرقه نائل اولان ده اودر . نته کیم اهل سنت
عقائدینی مبین اولمق اوزره (فقه اکبر) نامیله قلمه آلمش اولدقلری رساله
مشهوره لری الیوم موجود و مطبوعدر . بوجهته مشارالیه ابوحنیفه حضرتقلری ،
هرایکی علمده دخی فضل تقدیمی احراز ایتمش و بناء علیه امام اعظمه وصف
مفخرته بحق کسب استحقاق ایله مشدر .

بوراده استطراد قیلندن اولمق اوزره شونی ده سویله ییم که بعض علماء
معتزله ، امام اعظمک معتزله اعتقادنده اولدینی ، بعضی یلری ده « مرجئه »
فرقه سندن بولوندینی ادعا ایتمشلردر . فقط بو ، محض افترادر . اویدیرلمش
وعین زمانده یاقیشدیرلمش قورو اسناددن عبارتدر . محض افترادر . چونکه
بتون علماء اهل سنتک آفاقیه دیدیکم کبی مشارالیه اهل سنتک ال بیوک مدافعی
والک بیوک امامیدر . بو یولده نشر ایتمش اولدینی (فقه اکبر) رساله سی
میداندهدر . فضله اوله رق (کشف بزدوی) ده تفصیلاً مذکور اولدینی اوزره
کندی مشاهیر طلبه سندن امام محمدک « مبسوط » و « زیادات » کبی کتابلرنده
استاذی امام اعظمک افکار اعتقادیه سی محرردر که بو افکارک جماعه سی ، اهل
سنت عقائدینه تماماً مطابقدر .

یاقیشدیرلمش بر اسناددر . چونکه مشارالیهک حلقه تدریسنده بالآخره
مذاهب مختلفه یه سالک اولان یوزلرجه بیوک عالم یقشمشدر . (مدخل) ده
دور مجتهدیندن بحث ایتدیکم اسناده سویله شدم که امام اعظم حضرتقلری ،
فرق قدر مجتهد مستقل مرتبه سی احراز ایدن بیوک مجتهدلر یقشدرمشدر .
بونلردن (بشر مریدی) کبی بعضی یلری معتزله مذهبه سالک اولمشدر . (ابو
مطیع باخی) کبی بعضی یلری ده جبری فرقه سنک رئیسی اولان « جهنم بن صفوان » ک
بعض افکارینی التزام ایتمشدر . (غسان کوفی) کبی بعضی یلری ده « مرجئه »
فرقه سنک مؤسسلرندندر . ایشته بو حال ، مشارالیه حضرتقلرینه او کبی
مدعیاتک قولایاقله اسنادینه باعث جرأت اولمشدر . بو کیلر صرف کندی

مذهب‌بری ترویج‌یچون مشار الیهک اسلام عالمده احرار ایتیش اولدینی او فوق‌الناده یو کسک موقع علم‌یسندن ، عظمت نام و شهرتندن استفاده جهتی دوشونورک او یولده اسناداتده بولونمشلردر . فاسل که بعض انصافسز فقها و محدثین ده صرف ساقفه تصب و حسدله صاحب‌رایدر ، کندی رأینی احادیث نبویه تقدیم ایدر . ، کبی بوش و معناسز ، حقیقتدن عاری سوزلرله مشارالیه امام اعظم حضر تلمیخی کوزدن ، او موقع عال‌المالندن دوشورمک ایسته‌مشلردر . حالبوکه اولر بویه یابدنجه اودها زیاده یو کسلمش ، دها زیاده تعالی ایتشدر . (رضی لله عنه)

خلاصه ، حقیلر ماتریدیدرلر ؛ شاعیلر اشعریدرلر مالکی و حنبلی فقها سنک بر قسمی ده اشعریدرلر . دیگر قسمی سلف ، یعنی متقدمین اهل سنت مسلکینه سالکدرلر . نصوص شرعیه‌نک متشابهات قسمنه معنی و برضلر . حضرت شارع متشابهاتدن نه مراد ایتیش ایسه اوکا ایمان ایدرز ، او معنای مرادی چیقاروب بولمقله مکلف دکلز دیرلر . و متشابهاتک تأویلندن احتراز ایدرلر . اشعریلر ایله ماتریدیلر ایسه متشابهاتی اصول و قواعد ادبیه و منطقیه یه توفیقاً مناسب بر صورتده تأویل ایدرلر . فقط متأخرین حنبلیه ، متشابهاتده غریب بر مسلک اتخاذ یتیشلردر که متشابهات بحثده ایضاح اولونه جتدر .

اشعریه ایله ماتریدیه آراسنده سکنز اون قدر مائل اعتقادیه ده نظر اختلاف واردر . فقط بو اختلاف یکدیگر لرینی ضلالت اعتقادیه یه نسبت ایدم جک درجه ده دکلدر . و مسائل قالیه حقنددر . اساساتده متفق درلر . و اختلاف ابتدکاری مسائلک اکثرنده یینلرینی تألیف قابلددر . آنکچون بونلر بربرلرینه بدعت و ضلالت اسناد ایتیلر و بنسأ علیه یکدیگر لرینی مبتدعدن عدا یتیلر . بونک ابجوندر که (اشاعره) تعبیری بعضاً اهل سنت مراد فی اوله رق استعمال اولونور . و بو صورتده بطریق التقلید ماتریدیه یه دخی شامل اولور . بونک سببی ، افراد اعتباریلر اشعریه فرقه سنک دها چوق اولما سیدر . مصرده ، آفریقانک سائر یرلرنده ، اندلسده اشعریه کتابلری انتشار ایتیش و اشعریه نامی هر طرفده

شایع اولمشد. ابو منصور ماتریدی حضرتلری ایسه تورک اولمق حسیله ترکستانده نشأت ایتمش، اونک نامی شرقده شیوع بولمش و ماتریدیه کتابلری ده الک زیاده اوطرفلرده و هندستانده انتشار ایله مشدر.

اشعریه ایله ماتریدیه آراسنده واقع اختلافات بر قسمی صرف اعتقادیاته عائد اولدیغندن اولنرک درس مزه تعلقی بوقدر آنکچون اولردن بحث ایتیه جکیز یا لکیز اراده، ح-ن و قبح، حکمت تشریعیه کبی بعض مبسات حقنده کی اختلافلری طوغردن طوغرییه درسلر مزه تعلقی ایتدیکی جهتله بزده درسلر مزده صرمسی دوشدکجه اولردن بحث ایده جکیز. شمدی بوراده هپسندن اول حقوقک و معاملات بشریه مک الک برنجی اساسی، ایلك تمل طائنی اولان (اراده) حقنده نفعه نظرلرینی ایضاح ایده جکیز. فقط یونی ایضاحدن اول، علی الاطلاق اهل - منک عقائد اساسیه - فی، یعنی یوقاریده بیان ایتدیکم فرق مختلفه اسلامیه مک اعتقادی عمده لرینه، عقیده لرینه مخالف و ضد اولان عقائد اهل - منی مجملأ بیان ایتک ایسته یورم. چونکه اولنر ککینی بیان ایدنبجه اهل - منک کینی ده بیان ایتک اقتضا ایدیور.

اهل - منک فرق - تبعه یه مقابل اولان اعتقادلری

بتون کائنات و حادثات داخل اولمق شرطیه عالم حائدر. آنک محدث و خالق جناب خلاق عظیم الشان اولان (الله) در. الله بردر، قدیمدر، واجب الوجوددر. آندن باشقه خالق بوقدر. شریکی، نظیری، هیچ بر وجه ایله مثلی بوقدر، طوغرما مشدر، طوغورما مشدر. زماندن، مکاندن، جسمدن و هر نوع جمانیتدن مزهدر. صفات کمال ایله متصف و صفات نقصاندن و هر درلو نقایصدن مزه و مقدسدر. اله دن باشقه بر آله، آندن باقه طایفه حق بر معبود و آندن باشقه بر خالق و بر مؤثر حقیقی بوقدر. اسباب و مسبباتی، طبیعی و طبعی دیزلن، مؤثرات و آثاری خلق ایدن و بتون

کائنات و حادثات آراستده کی مناسبات و روابطی تقدیر و تعیین ایدن آنجق
 اللهدر . هیچ بر شینه ، نه ایدادن ونه ده اولیادن هیچ بر کیسه سیه حلول
 ایتمه مشدر . علی العموم پیغمبران عظام حضراتی ده ویتون اولیاده بزم کی
 انساندر ، بزم کی بشر دوتر . هیچ بر پیغمبرده ، هیچ بر ولی اللهده الوهیت
 اثر و شایسته یی یوقدر . هر کیم وهر ناشی اولور له اولسون بر انسانه ، بر مخلوقه
 الوهیت اسناد ایتمک شرکدر ، کفردر . کیمک قبری اولور سه اولسون ولوکه
 اک بیوک بر پیغمبر ذی شانک صرقدی بر لوفسون علی العموم قبرلردن ، تربهلردن
 استغنه ایتمک ، خسته لر ایچون شفا قییرلر ایچون تروت ، قیصیرلر ایچون جوجق
 دعا ایتمک قطعاً حرامدر ، حتی شرکدر .

انسانلرک خالق الله اولدینی کی افعال بشریه نکه ده خالق اللهدر . قدرت
 و اراده الهیه سی هر شیشه شاملدر . مراد الهی خلافت هیچ بر شی حاصل اولماز
 و اولاما ز . عمل ایماندن جزء دکلدر . بناء علیه بر مسلمان ، حلال و جائز اعتقاد
 ایتماک شرطیله بر معصیت کبیره ارتکاب ایتمکله نه ایماندن ، مؤمنلکدن چیقمش
 اولور ، نه ده کافر اولور . اوینه مؤمندر . فقط مؤمن فایقدر . فسق و فجور
 ایسه بر مسلمانی ایماندن چیقاروب کفره ادخال ایتمز . مکرکه نصوص قاطعه
 دینه ایله صورت قطعیه ده ثابت و مجمع علیه اولان حلالی حرام ، حرامی حلال
 اعتقاد ایتمش و یا خود ضروریات دینه دن برینی انکار ایله مش اولسون ، اولوقت
 کافر اولور .

نصب امام قضیه سی ، ملت اسلامیه اوزرینه واجبدر . و بونک طریقی ، خلقک
 مشورتیدر ، بالاستشاره انتخاب و بیعتدر ، یوقسه نص دکلدر . و خلیفه نکه معصوم
 اوله سی شرط دکلدر . حضرت پینهدن صوکره امام حق و فضل خلق اولانده
 اولابو بکر ، صوکره عمر ، صوکره عثمان ، ده ها صوکره علی حضرتانیدر .
 دین اسلامی قبول ایدن اهل قبله ، آنجق شو آتیده کی شیلردن برینی ارتکاب
 ایتمکله تکفیر اولونور :

۱ - صانع قادر علیم اولان جناب واجب الوجودی انکار ، ۲ - جناب

حقه شرك، ۳ - نبوتی انكار، ۴ - نواترعام ايله ثابت اولان ضروریات دبیله دن
برینی انكار، ۵ - حلی و یا حرمتی نصوص قاطعه شرعیه ايله صوت قطعیه ده
ثابت و مجمع علیه اولان حلالی تحریم و یا حرامی استحلال . ایشته بر مسلمان
بونلردن برینی ارتکاب ایتمکله ارتکاب کفر ایتمش اولور و تکفیر اولونور .
فقط بونلردن ماعدا برشیئی اعتقاد ایدرسه اهل سنه مغلط ایتمش و بناءً علیه
اهل بدعت وضاللدن اولمش اولور، اما تکفیر اولونماز. و اهل خیر و صلاح
مظاهر مکافات اوله جفی کبی اهل شرو معصیت ده مستحق مجازات اولور . شو
قدر که جناب حق اونلردن دیلدیکنی عفو ایده بیایر .

ایشته اهل سنتک، اشعریه و ماتریدی فرقه لرینک اتفاق ایتمکلی اعتقادی
عمده لر، عقیده لر بونلردن عبارتدر ایشته هر وقت سوره فاتحه ايله کندیسنه
مظاهر هدایت ایدله منری جناب حقدن نیاز ایلدیکنمز صراط مستقیم، شاهره
قوم ده بودر. سلفک یعنی اصحاب کرامک، جمهور تابعین و ائمه دینک و علی الاکثر
کبار فقها و مجتهدینک سـلوك و تعقیب ایتمکلی طریق ده بوندن باشقه بر شی
دکدر . بوطریق براقوب ده اسلامیتله اصلا منافی اولمایان بتون بتون باشقه
برطریق خرافانه سلوك ایتمک ، اسلامیتدن خروج ایتمک دینک اولدینی کبی ،
بوطرغری و سالم بولاک اوتـه سـندن بریسندن، بعض نقطه لرندن انحراف ايله
باشقه برطریق صایمق ده بدعتدر، ضالالتدر. نته کیم اولجه بیان ایتمدیکنمز فرق
مبتدعه اوله یایم لردر. اعتقادیاته متعلق دها باشقه مسائل وارسه ده اونلر،
صد مزدن خارج اولدینی همچون اونلرک بری علم کلام درس لریدر ..



ارادہ، قضاء و قدر

اراده ، قضاء و قدر مسـئله لری ، من القديم هر ی رده ، هر زمانده دینلی ، دینسر مختلف ملل و اقوام متفکریخی تزدنده موضوع بحث اولمش ، جمله فی اوزون اوزادی به دوشـوندیرمش و آرارنده مدید اختلاف و مناقشائی موجب اوله رق حلـی مشـکل ، فهمی عسیر ، اک غامض ، اک معضل مسائل اعتقادی به و فلسفیه صره سنه کچمشدرد. حالا بو کون دخی آوروپاده درین مباحثائی موجب اولمقده و پیسیقولوزینک اک مهم موضعه عتی تشکیل ایتکرمه در .

قسماً فلسفه حقوق دینک اولان عام اصول فقهه و علم حقوقده طوغریدن
 طوغری به تعلق وارد . چونکه فقهک و حقوقک مستند اولدینی عرده لری ،
 اساسلرک مبنی علیی ، ایلاک نمل طاشی بو اراده مسئله سیدر ، بو تضاً و قدر
 مسئله سیدر . زیرا عقود و فساد خدن ، انسانلر آراسنده کی معاملات و مناسباتدن
 تولد ایدم جک وضعیت حقوقیه یی و مدنی ، جزائی ، سیاسی مسئولیتلری تعیین
 ایدم جک اولان اساسلر ، هر شیدن اول بو اراده و قدر مسئله لری دیر . انسانلرده
 (اراده) دینیان شی یوقدر دیر ایساک حقوقک ، مسئولیتک معنای قاناز .
 بوصورته انسانلری باشی بوش اوله رق کندی حالربنه ترك ایتمه من لازم کلیر .
 یوق بالعکس انسانلرده اراده وارد ، افعال و حرکات بشریه شعورلی براراده به
 مستددر دیر ایساک ، اولوقت حق و عدالتک ، مسئولیتک اساس و منشائی و بر
 فعاک مشروعیت و غیر مشروعیت ، ایلاک و کوتولکی ، خلاصه حقوقی و اخلاقی
 دستورلری تدقیق و تعیین ایدم بیلیرز . عکسی تقدیرده بونلرک جمله سی معناسز ،
 روحسز ، قورو و بوش الفاظ ییغیدن عبارت قالمش اولور .

ایشته بوندن طولاییدر که اراده و قدر مسئله لری؛ علوم اسلامیہ دن ہم علم کلامک (اعتقادیات)، ہم دہ علم اصول فقہک مباحث مشترکہ سندن اولمشدر۔ آنکچون بزده برایکی درس مزی بومسئله لره حصر ایده جکزر۔ اولاً (اراده) دن، صوکرده (قضا و قدر) دن بحث ایده جکزر۔

اراده

افعال بشریه طوغریدن طوغری به مستقله انسانلرک کندی قدرت و اراده لرینک تحت تأثیرنده اوله رقی وجوده کلیورلر ، یوقسه رأساً وابتداءً جناب حق طرفدنمی مخلوقدرلر؟ تعیردیگرله انسانلرده کندی فعللری اوزرنده مؤثر بر قدرت و اراده وارمینر ، یوقیدر ؟..

فلا فیه اسلامدن مشهور (ابن رشد) ک دیدیکی کی ، بومسئله حقنده وارد اولان نصوص شرعیه ظاهراً متعارض اولدینی کی قضایای عقلیه ده متبایندر . آنکچون علماء اسلام ، بومسئله نك حله قطعی بر فکر اطرافنده طوپالاناماشلر ، آرالرنده عصرلرجه دوام ایدن نك اوزون مناقشات جریان ایتیش ، نتیجه ده بر برینه ضد شودرت فکر تقرر ایتشدر :

۱ - جبر مطلق

۲ - جبر متوسط

۳ - تفویض مطلق

۴ - تفویض متوسط

برنجیسنه (جبریه) ، ایکنجیسنه (اشعریه) ، اوچنجیسنه (معتزله) ، درونجیسنه ده (ماتریدیه) ذاهب اولمش ، بوصورتله (اراده) مسئله سی حقنده عالم اسلامده درت مذهب تحصیل ایتشدر . بودرت فکر ، هر نه قدر بعضی اوفاق فرقلر اعتباریله درت ایسه ده ، اساس اعتباریله ایکیدر . بری جبریه نك ذاهب اولدینی (جبر) فکری ، دیگرى معتزله نك قائل اولدینی (تفویض) فکریدر . اشعریه نك فکری جبریه فکرینه قریبدر و نتیجه اعتباریله اونک عیندر . ماتریدیه نك فکری ده معتزله فکرینه قریبدر .

بودرت فکرک استنادایتدیکی دلائلی تدقیقه کیریشدیگمز زمان ، کنندیمزى ایکی مقدمه یقینه قارشیسند بولورز :

۱ - هر شینک خالق الاهد ، آندن باشقه خالق یوقدر .

۲ - انسانلر ، كندى اراده واختيارلر بله حرکت ايدرلر .
 برنجى مقدمه .، براهين عقليه ايله مثبت اولدینی كی ؛
 (الله خالق كل شیء = جناب حق مرشید خالقیدر .) و ،
 (قل كل من عند الله = سويله كه مرشی اللهیدر .) و ،
 (والله خلقکم وما تعملون = حالبو كه سزی و ایشلدکلریکزی خلق ایدن
 اللهیدر) مثالو برچوق نصوص قرآنیه ایلده نابتدر .

ایکنجی مقدمه بویلادر . یعنی بوده برطرفدن شعور و وجدان . تجربه
 و مشاهده ايله نابتدر . دیگر طرفندن .

(من يعمل سواءً یجزیه = کیم قتالقی یاپارسه آنکله مجازات اولونور) و ،
 (لا یكلف الله نفساً الا و سها = الله انسانه قدرتنک فوفنده برشی تکلیف
 ایتمز .) ،

(من شاء فلیؤمن ومن شاء فلیکفر = دیلهین ایمان ایتمسین ، ایستین
 کافر اولسون .) کبی یوزلرجه آیات قرآنیه ايله مؤیددر .

ایشته « جبرییه » فرفاسی ، شو ایکی مقدمه دن و ایکی نوع نصوص شرعیه دن
 یالکز برنجیسنی نظر اعتباره آلوب ایکنجیسنی کلیاً نظر دن اسقاط ایدیور .
 آنکچون جبره قائل اوله رق قدرت و اراده بشریه بی اساسدن انکار ايله
 انسانلرده قدرت و اراده نامنه هیچ برشی یوقدر . انسانلرک علی العموم افعال
 و حرکاتی ، جماداتک حرکتی کبی جبری واضطرا ایدر دیور و مرشی طووضیدن
 طوغری به قضا و قدره حمل واسناد ایدیور . بومذهب ، آوروپالیرک (فمالیزم)
 دیدکلری مذهب فلسفینک عیددر .

« معتزله » ده ، او ایکی مقدمه دن و ظاهراً متعارض اولان سالف الذکر
 ایکی نوع نصوص قرآنیه دن یالکز ایکنجیسنی نظر اعتباره آله رق ، جبرییه
 تماماً ضد بر فکر الزام ایدیورلر . بناء علیه « قول ، یعنی انسان فملنک خالقیدر .
 افعال بشریه یالکز قدرت بشریه ايله وجود بولور ، قدرت السبه نك افعال
 بشریه ده دخل و تأثیری یوقدر . بشرک افعال و حرکاتی ، جناب حق طرفندن

تمامیله کندینه تفویض اولونمشدر . انسان اراده سنده تماماً حر و سربستدر . انسانك قدری کندی النده در . قضا و قدرك افعال بشریه اوزرنده تأثیری یوقدر . حق کفر و معصیت ، فسق و فجور کبی بر جوق افعال بشریه ، مراد الهی خلافت و واقع اولمقددر . « دیورلر . و بوصوله اراده بشریه لك مطلقیتته و خلق و قدر الهی لك افعال بشریه اوزرنده هیچ بر تأثیری بولونمديغنه قائل اولویورلر . بونلر (قدری) ی کلیاً انکار استدکاری و هر فرد انسانی کندی آلینك یازیسی ، سرنوشت مقدراتی کندی یازار دیدکاری ایچون ، معتزلهیه (قدریه) دخی تسمیه اولونمشدر . جبریه فکرینه « جبر مطلق » دیندیک کبی ، معتزله فکرینده « تفویض مطلق » و یاساده جه « تفویض » دینیر ...

(اهل سنت) . کالج ، بویکی فکردن جبریه نلکی افراط ، معتزله نلکی ده تفویض اولدیغندن اسلاف کرام یعنی متقدمین اهل سنت ، (لاجبر و لا تفویض ولکن اصرا بین اصرا) یعنی جبرده یوقدر ، تفویض ده یوقدر . بلکه ایکسی اورتسی برشی واردر دیرك بومسئله ده بر طریق متوسط التزام ایتمشله ، بناء علیه (علی العموم افعالك خالق جناب حقددر ، فقط اختیاری اولان افعال و حرکاتده انسانك « کسب » ی واردر . آنکچون افعال اختیاریه لك خالق جناب حق ایسه ده ، انسان ده کایددر . انسان کسب ایدر ، جناب حق خلق ایدر . ایسته بو کسب سبیلله انسان مطیع و یا عاصی اولور . مکلفیت و مسئولیت ، بو کسبه تعلق ایدر) دیمشله . و اذهانی تشویش ایتهمنک ایچون ، بو مقامده (کسب) تعبیروندن نه معنی قصد اولوندیغی تعیندن اجتناب ایله مشله ...

اهل سنتك متأخری ، یعنی اشعریه ایله ماتریدییه ده ، سلفلرینه تبعاً جبریه ایله معتزله آره سنه کیره لك بر طریق توسط تعقیب ایتمشله و طبق سلفلری کبی بونلر ده « جبرده یوقدر ، تفویض ده یوقدر ؛ ایکسی اورتسی برشی واردر . انسان کاسب ، جناب حق خالقدر . دیمشله . بورایه قدر بر لرندن ایرلامشله . فقط صره (کسب) ك تعین ماهیته کالججه ؛ ایسته بو نقطه ده یکدیگر لرندن آیریلر قی باشقه باشقه طریقلر تعقیب ایتمشله در . ایسته بو مقدمه دن صوکره

شمدی ده بونلرک نقطه نظر لرینی تحلیل و ایضاح ایدم. لکن مسئله یی اطرافله احاطه ایده بیللمک ایچون اول امرده بو مقامده استعمال ایدیان « قدرت » ، « اراده جزئییه » ، « قصد » ، کلمه لرینک مفهوم لرینی تشریح ایتمک اقتضا ایدیور.

قدرت

قدرت ، علی وفق الاراده مقدورات اوزرنده اجرای تأثیر ایدن وفا علی برایشک فعل و ترکنه ممکن قبلان قوتدر. بومعناجه قدرت ، فاعلن فعل و ترک (فعل و ترک ممکن) دیه تعریف ایده بیلیرز. بو قدرته فاعله برایشی عین زمانده ایشله یوب ایشله ممک جهت لرینه ممکن حاصل اولور . و بناء علیه برایشی حقنده فاعلن فعل و ترک صدوری صحیح اولور . بو معناجه قدرت فاعل مختار اولانلر خاص اولان قدرتدر آنکچون بوکا (معنای اخص صجه قدرت) تسمیه اولونور. قدرنک برده معنای اعمی وارد که هم فاعل مختارلره ، هم ده فاعل مظهرلره عام وشاملدر . بومعناجه قدرت ، « بر قوتدرکه آنکله متصف اولان ، هنره قدر بر امر خارجی سببیه برایشی ایشله ممک و یا ایشله ممک موجب ومضطر اولسده ، ذاته نظر آ دیلر سه آنی ایشله ممک و دیلر سه ایشله ممک مقتدر اولور. » دیه تعریف اولونور. بو تعریفه دقت اولونور سه آ کلاشیلر که بومعناجه قدرته متصف اولان بر انسان ، دیلر سه برایشی ایشله ممک ، لکن بو صورتده ایشله ممک ، او ایشدن و ازچمک الندن کلز. کذلک دیله مزسه ایشله ممک ، فقط بو تقدیرده ایشله ممک ، حتی ایشله ممکی اراده ایتمک اونک ایچون ممکن اولماز. دیمک که ایشله ممک و یا ایشله ممک ، حتی دیله ممک و یا دیله ممک مجبور ومضطر .

ایشته بچشمزده ، اراده مسئله سنده بو نقطه یی اینجه آکلامق ، (قدرت) ک شوا یکی « معنایی تفریق وتمیز ایلهمک لازمدر . چونکه برنجی معنی ماتریدیلرک نقطه نظرینه موافقدر . ایکنجی معنی ده اشعریلرک ، نقطه نظرینه موافقدر . چونکه اشعریلر ، انسانده قدرت و اراده واردر دیدکری زمان ، بو ایکنجی

معنایی قصد ایدرلر. ماتریدیلرده برنجی معنایی مراد ایدرلر، براز صوکره
ایضاح ایده جکیز. قدرت، برده کلی و جزئی اولوق اوزره ایکی قسمه آیریلیر:

۱ - قدرت کلیه

۲ - قدرت جزئی

قدرت کلیه، انسانده بالقوه موجود اولان تمکن و مکنت در، قدرت صفتی در.
بو قدرت، اسباب و آلاتک، جوارح و اعضای بدنیه نک سلامت و صحیله حاصل اولور.
وانسان بونکله بر فعلک طرفینه، ایشله یوب ایشله مه مک جهتلرینه متمکن اولور.
قدرت جزئی، قدرت کلیه نک معین بر فعله تعلق، دها طوغریبی تعلق
ایدن بر فردی دیمک در که فعل بونکله حاصل اولور. اصل قدرت حقیقیه ایشه
بو قدرت جزئی در و فعل ایله برابر بولونور، آندن اول ویا صوکره
بولونماز. چونکه بو قدرت جزئی، قدرت کلیه نک فعله جیقان قسمی دیمکدر،
قدرت کلیه ایسه فعلدن اولده، صوکرده بولونور. آنکچون بو قدرت جزئی به
قدرت حقیقیه دبیر. متکلمین بوکا [استطاعة مع الفعل] یعنی فعل ایله برابر
استطاعت ویا استطاعت فعلیه اطلاق ایدرلر.

بو قدرت حقیقه، اشعریلره کوره فعلک طرفینه علی سبیل البدل صالح
دکدر. یعنی اشعریلره کوره بر فعلک یا بیک جهته باشقه قدرت تعلق ایدر.
یوقسه عین قدرت بر فعلک هم یا بیک جهته، همده یا بیک جهته تعلق ایتمک
صالح دکدر. ماتریدیلره کوره ایسه صالحدر. بونی الک اول امام اعظم حضرتلری
نهیئت ایتمش و « جبر فکریله تفویض فکری آراسنده توسط، آنجق قدرت
حقیقیه نک بر فعلک طرفینه صالح اولدیغنی قبول ایتمکله حاصل اولور. قدرتک
بو صلاحیتی قبول ایدایه جک اولورسه، جبردن قورتولونماز. » دیمش ..

اراده، اراده جزئی

اراده، مختلف صورتلره تعریف اولونمشدر. هر فرقه کندی نقطه نظرینه
کوره تعریف ایتمش. لیکن متفق علیه اولان تعریفی شودر: اراده، ایکی
مقدوردن برنجی وقوعه تخصیص ایدن صفتدر. علامه شهیر صدر الشریعه (توضیح) ده

شو صورتله تعریف ایدیور: اراده ، برصفتدرکه فاعل آنکله احد متساوینی
دیگرینه ترجیح و اشایی خصوصیاتنه تخصیص ایدر. اراده ده، قدرت کبی ایکی
قسمه تفریق اولونور :

۱ - اراده کلیه

۲ - اراده جزئییه

اراده کلیه ، انسانده صفت اوله رف موجود اولان قره اراده درکه شو
تعریف اولوبان اراده در . بواراده ، بالقوه انسانده موجود بولونوب فعله
جیقمادجه ، هیچ برشیئه بالفعل تعلق ایتمدکجه اوکا اراده کلیه دینیر . بو اراده
کلیه ده قدرتک هرایکی نوعی ده جناب حق طرفندن مخلوقدر. کندی نفسمز،
وجودمز ، تکمیل اجزا و اعضاضمه ناصل مخلوق ایسه بونلرده مخلوقدر . بو
متفق علمیدر. بوخصوصده نه اشعریه نك، نه ده مازیديه نك؛ حتی نه ده معتزله نك
اختلافی یوقدر .

اراده جزئییه، اراده کلیه نك، تعبیردیگرله اراده قوت و صفتك، معین بر
ایشك طرفیندن برینه تعلق ایتمسیدرکه قدرتی اوجهته صرف ایتمک دیمکدر.
قصد، عزم، نیت، اختیار کله لرله افاده ایتمک ایستدیکمز مفهومده بودر. فقط
اصطلاحده بوکا (قصد) اطلاق اولونور. اعظم فقههای حقیقه دن « ابن همام »
[مسایره] نامیه معروف اولان کتابنده بوکا (عزم مصمم) اطلاق ایدیور.
ایشته « اراده جزئییه » دیمک ، بو دیمکدر . یوقسه بو عوامی معناسیله
آزیمحق ، اهمیتمز بر شی دیمک دکلدر . بونک اوقدر اهمیتی و قیمتی واردرکه
بتون غوغالر بونک اوزرنده قوبویور. مسئله نك اصل حل اولونه حق عقده سی،
جان آله حق نقطه سی ده بودر . مدار تکلیف ده ، بتون حقوقك و حتی
احلاقلک ده اساسی، روحی هب بواراده جزئییه در، بوقصددر. اشعریله، بوقصد
واراده جزئییه مخلوقدر و یا اضطراریدر دیورلر. آنکچون بتون اساسات
شرعیه و حقوقیه بی تا تملمندن ییقمش اولویورلر. مازییدیلر ایسه « خایر مخلوق ده
دکلدر ، اضطراری ده دکلدر. انسانک کندی صنعیدر . « دیورلر . بوسورتله

دینی و بتون . مؤسسات حقوقیه بی ییقله قورناریورلر . شمعی بو ایکی
فرقه نك فكر لرینی ، نقطه نظر لرینی ایضاح ایدم .

اشعریه فیکری جبر متوسط

اعتراف ایدلما بدرکه بو اراده مسئله سی اک زیاده کوچلش دیرن ، ایچندن
جیه یله میه جق برحاله کتیرن ، هپ اشعریلر درر . سوزلری اضطراب ایچنده درر . برینک
سوزینی دیکرینکیکی طوتمبور . متقدمینی باشقه ، متأخرینی باشقه درلو سویله بور .
کرك معتزله علماسندن و کرك کندی اماملرندن بعضیلرندن وقوع پولان نقل
وروايتلری ده یا کاش . اونلرک کتابلرینی کورمدن بربرلرندن ایشیتمک صورتیله
نقل ایتدکاری آ کلاشیلیور . مدعالرینی اثبات ایچون درمیان ایتدکاری دلائلک
جمله سی ده ، خصمی الزام ایچون سویلنمش مطالعات جدلیه دن عبارتدر .

بوکون اشعریه کتابلرندن الله متداول واک مشهور اولان (مواقف) ،
(مقاصد) ، (طوالم) کی مؤلفات معتبره نك نقل و بیانیلرینه نظراً اشعریه فرقه سنک
مؤسس و رئیس اولی ابوالحسن الاشعری یه کوره ، بشرک علی العموم افعال
وحرکاتی یالکز جناب حق قدرتیله واقع اولور . قدرت حادثه نك یعنی قدرت
عبدک کندی افعال وحرکاتنده اصلاً تأثیری یوقدر . بشرک قدرتی ده ، اراده سی ده ،
مقدوری ده هپ جناب حق مخلوقیدر . انسانک یالکز (کسب) ی واردر .
بواعتبارله انسان کاسب ، جناب حق خالقدر . مکلفیت و مسئولیت ده بوکسبه توجه
تعلق ایدر .

ایشته اراده مسئله سنده امام ابوالحسن الاشعری نك نظریه سی بوندن عبارتدر .
جمهور اشعریه ده اولاً بوفیکری قبول ایتدکارینی صراحةً بیسان و اعتراف
ایدیورلر . و بو فکرک صحتی اثبات ایچون متعدد دلائل سرد ایدیورلر .

بونلره شودلائلی براقیکزده ، شو (کسب) دیدیکیکیز شینک نه دن عبارت
اولدیغنی بزه بیلدیریکنز . « دنیله یکی زمان ده ، آ کسب ، قدرت عبدک بلا تأثیر

افعاله مقارنتندن عبارتدر. [جوانی ویریورلر .

کورولیوزکه اشعریلر ، بر کره انسانده قدرت و اراده نك وجودینی انکار ایتیمورلر . و بوعتبار ایله جبریهدن آیرلمش اولویورلر . فقط اوقدرتك تأثیرینی انکار ایدیورلر . بوعتبار ایله ده نتیجه جبریله برلشمش اولویورلر . چونکه تأثیرسنز قدرتک وجودینی قبول و اعتراف ایتک، اساس وجودینی انکار ایتیمکه مساویدر . قدرتک تأثیرینی انکار ایتدکن صـ و کره وجودینی اقرار ایدوب ایتمه مکن نه چیقار ؟ تأثیرسنز، قوری بر قدرتک وجود و عدمی مساویدر، دها طوغریسی یوق دیمکدر . زیرا تأثیر ، قدرتک ماهیتی اقتضاسنددر .

اشعریلرک بونظریهسته کوره قدرت ده ، اراده ده ، (کسب) تعیری ده حد ذاتنده لفظ بی معنادن عبارتدر . بونی بویله سویله مکن ایسه جبریله کبی طوغریدن طوغری به « کسبی » ده انکار ایتسه یدیلر دها منطقی اولوردی . اوت کورونشه نظراً بونلر « کسبی » ده انکار ایدم جکلرمش اما ، قرآن کریم افعال بشریه بی انسانلره اسناد ایتدیکندن و [لهاما کسبت وعالم اما اکتسبت] دییه رانسانلرده کسبک وجودینی پک صریح اوله رق قبول بیوردیغندن، بونلرده کسبک وجودینی قبولده مضطر قالمشلردر .

متأخرین اشعریه، کندی فکریلرینی بویله (اولا انسانده قدرت و اراده نك وجودینی اعتراف ایتک ، صـ و کره قالقبوب آنلرک تأثیرینی کلیاً انکار ایله مک، صورتیله تصویر ایتمه نك مناطقه و کله لرک ماهیت اصلیه لریله پک آقیری دوشدوکی کوردکلرندن، مسئله یه دها علمی، شئونه دها موافق بر شکل ویرمک ایسته مشلر . بونی ده ینه کندی اماملری مشارالیه ابوالحسن الاشعرینک بر سوزندن تخریج ایتمشلر . مشارالیه [انسان فعلنده مختار ، اراده سنده مضطردر .] دیمش .

ایشه باشلرنده (تفسیر کبیر) صاحبی مشهور فخرالدین رازی اولدینی حالده متأخرین اشعریه، مشارالیه امام اشعرینک بوسوزینی اله آله رق دییورلرکه : [قدرت و اراده بشریه نك هیچ ده تأیری یوق دکدر . ذاته نظراً واردر .] فقط او تأثیر قومده قلوب فعله جیقماشدر ، یوق حکمنده در . زیرا اراده

انفسی و آفاق بر طاقم اسباب و عواملک تحت تأثیرنده زبون، ازلی بر اراده غالبه نك
تحت غالبیتنده اسیر و مقهور در . حائر حربت دکلدر . انسانك فعلی کندی
اراده سبله مسبوق اولدینی ایچون انسانه فاعل مختاردر دینیر . فقط اراده ،
بری برینه مربوط مختلف دواعینك تأثیرندن منبعث بولوندینی ایچونده انسان
حقیقتده اراده سنده مجبور و بو اعتبار ایله فاعل مضطر در . کندی قدرت
واراده سنك هیچ حکمی یوقدر .]

بوسوزلر، سالف الذکر فخرالدین رازی نك (محصل) بده ، (مواقف) ده
(مقاصد) ده دهها باشقه دلائل و مطالعات ایله برلکده مذکوردر . محققین
اشعریه دن ، جلال الدین دوانی ، بو سوزلری تلخیصاً دیورلرکه [انسانك افعال
اختیاریه سی اراده به مستند و منتهیدر ، اراده ده بر طاقم غیر اختیاری اسباب
ضروریه به منتهیدر . چونکه مثلاً بر امر ملایمی تصور، شوق و آرزونك انبغائی
موجب اولور ، شوق ده اراده بی ایجاب ایدر . زیرا اراده دینیلن شی ، نفس
شوقك تأ کندن باشقه برشی دکلدر . بوشوق و اراده ده ایسه اختیارك مدخلی
یوقدر . و بوراده او بیه بالاخیار صادر اولان و « قصد » تسمیه ایدیلن باشقه
برشی ده یوقدر .]

ینه محققین اشعریه دن مشهور علامه تفنازانی ده (شرح مقاصد) ده، بوراده
مسئله سنده مختلف فرق لرك نظریات و مطالعاتی بیان ایتدکن صوکره کندی
فکر اشعریه سی تلخیصاً [بز دیرزکه بومسئله به حق اولان ، بعض انمه دینك
« جبرده یوقدر ، تفویض ده یوقدر ، بلکه ایکسی اورتسی برشی وارد . »
دیدیکیدر . چونکه افعال بشریه نك مبادی قریبه سی ، انسانك قدرت و اختیاری
اوزرینه مؤسسدر ، مبادی بعیده سی ایسه عجز و اضطراری اوزرینه مبتئیدر .
آنکه چون انسان ، کاتبك الوده کی قلم کی فاعل مختار صورتنده فاعل مضطر در .]
دیور . و سوزیشه بو بایده شرب مثل اولان شوکلام تمثیلی ایله تهایت ویریور :
[قال الحائط لاوتد لم تشقنی فقال سل من یدقنی = دیوار جیوی به ، بی نیچون
باریور دلیورسك ؟ دیش . اوده جواباً بکا اورانه سور دیش .] ...

خلاصه ، بونلره كوره اراده ، (شوق متاكد) دن يعنى نفس انسانينك
برائشك ايشله يوب ايشله نك جهتلرندن برينه نزوع اشتياقندن عبارتدر . بواشتياقده
(دواعى) تسميه ايتدكلى عوامل وسوائق متقدمه نك ايجاب ايتدى اضطرارى
بركفيتدر ، اختيارى دكلدر . انسان ، هر هانكى بر فعلنده اولابر امر ملايمى
نصور ايدر ، صوكره اونك نفسنه ملايمتى ، فرض ومقصده موافقتى تصديق
ايلر . ايشته بوتصور وتصديق (شوق) ي ايجاب ايدر ، يعنى جبراً وبلا اضطرار
شوقى حصوله كتيردر . شوق ، اودواعى به تابع ومنقاددر ، آنلردن طوغار ، وینه
اونلرك اجبار وتضييقيله تاكد ايدرك قصد واراده شكلى اكتساب ايدر . بونلرك
هيچ برنده انسانك دخل وصنعى يوقدر . بونلر هب بربرينه مربوط برسلسله
اسباب ودواعينك قتيجه سيدر . بوسلسله دواعى هيچ بر حلقه سنده قدرت بشرية نك
اصلاً تاثيرى يوقدر ، بالعكس قدرت بشرية بونلرك تحت قهر وجبرنده مقهور
وكلاً تاثيردن ساقطدر .

ايشته اشعريلرك بوبابده كى فكرى بوندن عبارتدر ، وفرانسزلرك (ده تهرمينيزم)
ديدكلى مسلك ايجابك عيذدر . آوروپا فليسوفلرندن بومسلك فلسفى بى قبول
ايدنلرده ، عيذيله بويله سويورلر .

كوروليوركه متأخرين اشعرية ، قدرت حادثه نك يعنى قدرت بشرية نك
طوغربدن طوغرى يه رأساً وابتداءً تاثيرى انكار ايتيورلر ذاتنه ماهيت اصليه سنه
نظراً افعال اوزرنده مؤثر اولديغى قبول ايديورلر . بوسورتله جبريه دن آريليورلر ،
فقط صوكره دونوب اراده بى دواعينك و قدرت قديمه الهيه نك تحت غلبه سنده
مغلوب واسير كوستررك اوقدرت حادثه بى حكم و تاثيردن اسقاط ايديورلر .
يوقاريد (قدرت) مفهومى ايضاح ايدر ايكن قدرت نك ايكنى معناسى واردر .
برى هم فاعل مختاره وهم فاعل مجبور ومضطره تام وشامل اولان معنای اعمى ،
ديكرى فاعل مختاره حاص اولان معنای اخصى ديمشك . ايشته اشعريلره كوره
(قدرت) دن مقصد ، يوقاريد تعريف ايتديكمز معنای اعمجه اولان قدرتدر .
پوقسه فعل وتركه تمکن معناسنه اولان قدرت دكلدر . شو حلاله بونلره كوره

انسان (دیلرسه ایشلر و دیله منزه ایشله من) معناسنه اولان قدرته متصفدر و بو قدرته حرکت ایدر. بناءً علیه انسان، دیلرسه ایشلر، دیله منزه ایشله من، اما دیله بیکی صورتده دیله مک و دیله مدیکی صورتده دیله مک الندن کلز و بوجهته انسان، دیله مک و یا دیله مک، مجبور و مضطردر. چونکه دیله مسی ده دیله مه مسی ده اختیاری دکل، اضطرار ایدر. خلاصه، متأخرین اشعریه، رئیسری امام اشعری نک (انسان فعلنده مختار و فقط اراده سنده مضطردر). سوزنی، دمین ایضاح ایتدیکم طرزده تفسیر و توضیح ایدیورلر، و نتیجه ده ایشته مشارالیه کړک بوسوزندن و کړک (کسب قدرت عبدهک بلا تأثیر افعاله مقارنتدن عبارتدر) سوزندن مقصدی بودر. دیمک ایسته بورلر.

بیانه حاجت یوقدرکه قدرتهک تأثیرنی طوغریدن طوغری به ابتداء و اصلاً انکار ایتمهکله دواعی و سائرتهک تأثیرنی آلتنده طولانیسیله تأثیرنی حکمدن اسقاط ایله مک آره سنده نتیجه اعتباریه بر فرق یوقدر. هرایکی صورتده ده اشعریه نک فکریله جبری فکری آره سنده کی فرق لفظیدر، حقیقی دکلدر. چونکه قدرت بشریه نک اساساً وجودنی انکار ایتمهکدن نه نتیجه حاصل اولورسه، وجودنی قبول ایتمهکله برابر عین زمانده ابتداء و یا طولانیسیله اونک تأثیرنی نفی و اسقاط ایتمهکدن نه نتیجه حاصل اولور. او نتیجه ده، انسانک حقیقتده فاعل مضطر اولمه سیدر. نته کیم اشعریلر ده بونی صراحة قبول و اعتراف ایدیورلر.

فقط نتیجه بوندن عبارت قالسهیدی برشی دیمزدی، یالکیز حقایق اشیایه موافق دکلدر دینیر، کچیلیردی. حالبوکه نتیجه بوندن عبارت قالمیور، قاعده تکلیفک بطلانی ده اسلامزام ایدیور. اوله یا، انسان فاعل مضطر اولورسه آرتق انسانلری بر طاقم تکلیف شرعییه ایله مکلف طومنه نک نه معناسی قالیر ۱؟ علی العموم حرکات و سکناتنده کندی قدرت و اراده سنک هیچ بر حکم و تأثیرنی اولمایان هر نه یاپارسه بر قوه مجبره و قاهره نک تحت تأثیرنده یا یمنه مجبور و مضطر اولان بر انسانه، (شونی یاپ، بونی یاپه) دیمک و صوکرده یاپمیدن، ده

طوغریسی یاپامدیغدن طولای اوئی مسئول و جزا دیده ایتک عبث و پک صریح
ظلم اولماز می؟ بوبرجوجنی جبر و قوتله طوتوب باشدن آشاغی به قدر صویه
باتیردقن صوکره « بن سکا اوزریکی ایصلا تمه دیمه مشیمدم؟ نه دن ایصلا تده؟ »
دیه رک تجزیه ایتکه بکزرکه حکیم اولان حضرت شارعک شان حکمت و عدالتنه
اصلا یاقشماز. جناب حق بوکی عبث و ظلم صریح اولان کوچوکلکوردن منزله
و متعالیدر .

اشعریله بویولده براعتراض درمیان اولوندینی زمان ، (جناب حق مالک
مطلقدر ، و بتون موجوداتک خالقیدر . ملکنده کیف مایشا تصرف ایدر .
اراده سنه مانع ، قدرتنه نه ایت یوقدر . لایسئلدر ، اوکا عبث و ظلم اسناد
اولونه ماز .) دیمکدن باشقه جواب بوله میورلر .

بوجواب ، وجدان و اذعانه ، عقل و عرفانه قناعت و یرمچک بر جواب
اولمادینی کی قرآن کریمده توافقی ایتیمور . چونکه اصحاب کفر و معصیت
طرفندن او یولده درمیان ایدیلن وایدیله چک اولان اعتراضاته قارشى؛ قرآن کریم
(قل فله الحجة البالغة) آیت جلیله سیله بوکی اعتراضاتک اصلا وارد اولمادیغنی
و جناب حقک اصل آنلری الزام ایدمچک احتیاجه صالح و قاطع حجت بالغه سی
بولوندیغنی بیان ایدیور . (لها ما کسبت و علیها ما کتسبت) کی برجوق
آیات جلیله ایله ده انسانلرک کرک لهرینه و کرک لهرینه اولان افعال و حرکاتک ،
کندی کسب و اختیارلریله کندیلرندن صدور ایتکده اولدیغنی انیان ایله یور .
اگر انسانک کسب و اختیاری ، اشعریلرک ذاهب اولدقلری کی اضطراری
اولسه یدی ، اولوقت احتیاج و الزامه صالح (حجت بالغه) نک بو اضطراردن
بمثله اعتراض ایدن اصحاب کفر و معصیتک یدنده بولونمه سی لازم کلیردی .
و معقون بر دلیل ایله اونلری الزام و اسکات ایتک قابل اولمازدی .

ایشته بوملاحظه مینیدرکه اشعریلرک ایکنجی درجه ده رئیس و اماملرندن
اولان اوچ بیسوک ذات یعنی (قاضی ابو بکر باقلانی) ، (استاد ابو اسحاق
اسفرائینی) و (امام الحرمین ابوالمعالی الجوینی) ، بومسئله ده رئیس اول

ابوالحسن الاشعری دن آریله رق باشقه باشقه فکرلره ذاهب اولمشلردر. ابوبکر باقلانی ، انسانک افعال اختیاریه سی هم قدرت حادثه بشریه نك مجموعیه حاصل اولور . قدرت قدیمه فعلک اصلنده ، قدرت حادثه طاعت و معصیت اوراق کی وصفنده اجرای تاثیر ایدر دیمش .

استادده افعال بشریه ایکی قدرتك مجموعه و وجوده کلیر دییور و بونقطه ده قضی ایله برلشییور . لکن شونقطه ده آندن آریلییور . دییور که «ایکی قدرتك ایکیسی فعلک اصلنه تعلق ایدر . قدرت بشریه تأثیرده یعنی فعلی وجوده کتیر مکده کافی اولمادیغندن فعل ، قدرت قدیمه نك انضمام معاونتیه وجوده کلیر » .

فقه‌ای شافعیه نك ال بیوکارندن و مجتهد منتسب طبقه سندن اولان و علوم شرعیده اولدینی کی زماننک علوم عقلیه سنده دخی بحق « امام » عنوان مبعجانی اجرازایدن مشارالیه « امام الحرمین » ده (افعال اختیاریه یا لکنز انسانک کندی قدرتیله حاصل اولور . قدرت عبده تأثیرنی انکار ایتک مطالبات شرعییه قطع ایتک و پیغمبران عظام حضراتنک کتیر مشر اولدقلری ادیان و شراییه تکذیب ایانک دیمکدر . انسانک فعلی قدرت قدیمه و حادثه نك مجموعه واقع اولور دیمکده طوغری دکلدرد . چونکه تجزی قبول ایتمین مقدور واحد اوزرنده ایکی قدرتك مجتمعا تأثیری مستحیلدر . فعل واحد ، آنجق بر قدرتك تأثیریه واقع اولور که اوده ، بوراده انسانک قدرت حادثه سندن عبارتدر . مع هذا بوراده انسانه (خاق) اسناد ایدرک « انسان فعلنک خالقیدر » دیمکده جائز دکلدرد . زیرا انسانک قدرتی ، سائر قوایی و نفسی کی جناب حقک مخلوقی و فعلیدر . انسان آنجق جناب حقک تمکین و اقداریله ، آکا قدرت و اراده صفتلرینی بخش ایتمی سایه سنده بر شیئی اختیار و اجرایه مقتدر اولور . آنکچون انسانک فعلی ، خلق و تقدیر اعتباریه جناب حقه نسبت و اضافه اولونور (دییور . و بونقطه نظر دن کندی فکریله معتزله فکری آراسنده فرق بولوندیغنی بیان ایدیور . مع هذا بو فرق افضایدر ، حقیقی دکلدرد . معتزله نك ده مقصدی بوندن باشقه برشی دکلدرد .

(مواقف) صاحبی قاضی عضد و (طوابع) صاحبی مشهور قاضی بیخاوی
 کبی بعضی متأخرین اشعریه، مشارالیه امام الحرمینک فکرینی یا ککش نقل ایدیورلر.
 مشارالیهی حکما ایله یعنی فلاسفه قدیمه ایله همفکر کوستریورلر. حالبوکه بو،
 قطعاً طوغری دکادر. امام الحرمینک فکری، شو بزم نقل ایتدیکمز فکردن
 عبارتدرکه حکما مذهبه دکال، معتزله مذهبه مشاهددر، دها دوغریسی اونک
 عیندر. بز مشارالیهک بورای وفکرینی، محققین حنبلیه دن مشهور (ابن قیم
 جوزیه) نک اراده وقدر مسائله دأر تألیف ایتیش اولدینی (شفاء العلیل) نام
 کتابنک اون یدنجی بابنده بعبارته عیناً و حرفیاً نقل ایدلمش بولدق، اورادن
 ترجمه ایتدک. ابن قیم، مشارالیهک بو فکرینی و بو بابده اوچ بیوک صحیفهک
 افاداتی (نظامیه) نامیله موسوم کتابندن نقل ایدیور. فلاسفه اسلامدن
 واکابر فقهای مالکیه دن اندلسی مشهور (ابن رشد) ده، (فلسفه ابن رشد)
 نامیله مشهور اولان کتابنده (امام الحرمین) ک اراده و افعال بشریه حقیقه کی
 فکرینی بو صورتله بیان ایدیور، و اوده عین کتابدن یعنی مشارالیهک
 (نظامیه) سندن نقل ایلدیور.

آکلاشیلیورکه متأخرین اشعریه، امام الحرمینک عام کلامه مقدار (شامل)،
 (ارشاد)، (نظامیه) نامیله تألیف ایتیش اولدینی متعدد کتابلرندن هیچ
 برینی کورمه مشلر، آغزندن آغزه مخرف اوله رق نقل وروایت اولونان غیر
 صحیح برسوزی، اونک فکری اولوق اوزره همان کندی اثرلرینه کچیرمشلر.
 بوندن دها غریبی نودرکه متأخرین اشعریه، کندی فکریلرینک حقیقتندن
 غفلت ایدرک حکما فکرینک عینی اولدینی فرق ایتیمورلر، بونی بلاتحقیق
 (امام الحرمین) ده اسناد ایدیورلر. حالبوکه حکما فکری دیدکاری فکر،
 فرنکلرک (ده تهرمینیم) دیدکاری (فکر ایجاب) درکه یوقاریده ده ایضاح
 ایتدیکم وجه ایله بو فکر، متأخرین اشعریه فکردن باشقه برشی دکادر.
 هرابکی فکرده، انسا کندی افعالی بر طاقم دواعی نک وقدرت الهیه نک تحت
 تأثیرنده مقهور اوله رق بالا ایجاب و بالا اضطرار ایفا ایتسندن عبارتدر.

یوقاریده بواراده مسئله‌سی‌ک زیادہ قاریشدیران، اشعریلر اولمشدر دیمشدم. ایشته اوراده بوسوزی بوندن طولانی سویله مشدم. کورولیور که حقیقه بونلر، بومسئله‌نی قارمه قاریشیق ایتمشلر و نتیجه‌ده ایچندن چیقيله میه حق برحاله کتیر مشلردر. مع هذا اونلر، قولایخی بولمشلر: تکلیف مالایطاقی تجویز ایتک، افعال بشریه‌ده حد داننده ایملک و کوتولک دینیان شایرک وجودینی و برده احکام شرعی‌ده حکمت تشریعی‌نی انکارایدیورمکله ایشک ایچندن صیریله‌رق چیقوب کیتمشلردر. نته‌کیم بومسئله‌لرده آشاغیده برر برر بحث مخصوص اوله‌رق ایضاح اولونه‌جقدرد. شمدی صره ماتریدیلرک فکرنی ایضاحه کلدی. شمدی‌ده اونی ایضاح ایده‌لم.

ماتریدیه فکری، تفویض متوسط

ماتریدیلر کوره اختیاری اولان افعال بشریه‌ده مؤثر اولان جبریه و اشعریه‌نک دیدکاری کی یالکیز جناب حقک قدرت و اراده‌سی دکادر، معتزله‌نک دیدیکی کی یالکیز انسانک قدرت و اراده‌سی‌ده دکادر. بلکه ایکینی مجموعیدر. بناءً علیه بشرک افعال اختیاریه‌سی، انسانک (قصد) دینیان اراده جزئییه‌سی و جناب حقک خالق مجموعیله واقع اولور. انسانک قدرت و اراده‌سی تعلق ایتدیکندن طولانی انسان، او افعالك فاعل و کاسیدر، جناب حق طرفندن خالق ایدلایکندن طولانی‌ده جناب حق او افعالك خالقیدر. و جناب حق افعال بشریه‌نی خالق ایتک ایچون انسانک اراده ایتمی شرطدر، شرط عادیدر. یعنی عادت السیه بویه جاریدر. انسان بر فاعلک وقوعی قصد و اراده ایدر سه جناب حق او فعلی خلق آیدر. انسان اراده ایتز سه جناب حقه‌ده خالق ایتز.

ایشته (کسب) نامی ویریان شی اراده انسانیه‌نک برایش حقنده فعل و ترکدن برینه تعلق ایتمی، اونی ترجیح و اختیار ایله مسیدر. تعبیر دیگرله انسانک کندی قدرت و اراده کلیه‌سی، صرف و استعمال ایتسیدر. ایشته بو قصد و اختیار، بوسرف و استعمال انسانک کندی کسب و صنعیدر، طوغریدن طوغری به انساندن صادر اولور. جناب حقک مخلوقی دکادر. انسانک هر شیئی،

نفسی ، داخلی و خارجی با مجموعه اعضایی ، عموم قوای جسمانی و روحانیه سی ، خلاصه هر شئی مخلوق قدر ، جناب حق طرفندن خالق اولونمشدر . اختیاری واضطراری عموم افعالی ده مخلوق قدر . فقط یالکزی برشی مخلوق دکلدر که اوده ، بوقصد دیدیکمز «اراده جزئی» در . بو ، انسانک کندی اثر صنعیدر . اگر بوده جناب حق طرفندن مخلوق قدر دینله جک اولورسه ، اولوقت انسانک قصدی ده ، افعالی ده جبری واضطراری اولمش اولور . و آرتق انسانلری تکالیف شرعیه ایله مکلف طوتمق ، تکالیف مالایطاق اولور که باطل و عبثدر . و آرتق اورته ده مدار تکلیف اوله جتی برشی یوق دیمک اولور . حالبو که مدار تکلیف ، ایشته بوقصددر . بتون مکلفیتلر و مسئولیتلر حپ بوقصد اوزرینه مبتئیدر . حقوقک ده ، اخلاقک ده و بالعموم تکالیف شرعیه نک ده عمده سی ، بوقصددر .

بر کره مسئله نک دینی جهتی بویله اولدینی کبی عقلی جهتی ده بویله در . یعنی مسئله بی صرف عقل و حقیقت نقطه نظرندن تدقیق ایتدیکمز صورته ده بزه « قصد » ک وجودینی و بونک اویله اضطراری بر کیفیت اولمایوب اختیاری اولدینی ادراک ایده رز . چونکه کندی شعور و وجدانمزله حرکات اضطراریه منزله حرکات اختیارمنز آراسنده عظیم برفرق بولندیغنی و اختیاری حرکاتمزل کندی قصد و اختیارمنزله وجوده کلمکده اولدینی بک صریح بر صورتده ادراک ایده رز . مثلاً الیزک کندی اختیارمنزله واقع اولان حرکتیله رعشه دن متولد حرکتی آراسنده بک بیوک برفرق بولندیغنی ، برنجیسنک اختیارمنزله حصوله کلدیگنی ، ایکنجیسنک مرضی برحالت عصبیه دن نشأت ایتدیگنی هر درلو شبهه دن آزاده اوله رق بیلیرز . کذلک بز ، اختیاری حرکاتمزه توقیف وترکنه مقتدر اولدیغمز حرکات ایله مقتدر اولدیغمز حرکات آراسنده کی فرقی ده تمیز و تقدیر ایده رز . مثلاً دوز ، مستوی اراضیده کی حرکاتیزی ایتدیکمز آنده توقیف ایده بیلیرز . حالبو که دیکنه مائل بر دره کنارندن بری بزی ایتیویرسه ، آشاغی به قدرینه کندی اختیارمنزله آدیلمزنی آتیه رق کمال سرعتله اینه رزده ، یاری یوله اینمکدن کندیغیزی آلامایز ، یعنی بواپیش حرکتیزی توقیفه مقتدر اولامایز . چونکه بو حرکتیز

دور اراضیده کی حرکت کبی دکلدو اوندی کندی اختیار مزدن باشقه حاجی بر
برقوتک تأثیری یوق، بونده ایسه ثقلت جاذبه قانونلریزک تأثیری وار.

خلاصه بالبداهه بیلیرز که بزیده اولایکی نوع حرکت وار. بری نبضک، و قلبک،
وسائر اعضای داخلیه نک حرکتی کبی حرکات اضطراریه در. بونلرده اصلا دخلیز
و حتی شعور مزبیله یوقدر. دیگر کی کندی اراده منزله اولان حرکات اختیاریه در.
بونلرک بعضیلری صرف کندی اختیار منزله حاصل اولور. بعضیلرینده هم
کندی اختیار منزله هم ده خارجی بر قوتک تأثیری بولونور. بوندزده صورت
قطبیه ده بیلیرز که افعال اختیاریه مزده هم کندی قدرت و اراده مزوار، هم ده
هم ده اوقدرت و اراده منزله دخل و تأثیری وار. بناءً علیه جبریه کبی قدوت منزله
اساس وجودی و یا خود اشهریلر کی تأثیرینی انکار ایتک، شعور شئون،
ضرورت عقلیه یی انکار ایتکدر که اصحاب عقل و ادعانه یا قشماز.

بوجهت بویله اولدینی کبی شوراسی ده محققدر که بعضاً بز، بر فعل و حرکتی
متأخرین اشعریه نک تصویر ایتدکری وجه ایله حقیقه بر طاقم انفسی و آفاقی
اسباب و دواعی تحتیده ایفا ایدم رز. فقط بو هروقت دکلدو. بعضاً ده، حتی
جوق کره بلا داعیه ایفا ایدم رز. حتی بعضاً دواعی و شوق، نه قدر شدید و قوتلی
اولورسه اولسون، ینه اونک خلافت حرکت ایدم رز. چونکه اود دواعی اولیله
ادعا اولوندینی کبی مقاومتی قابل اولمایان مؤثرات دن دکلدو. بعضاً ده پک کره
و منفور کوردیکمز شیلری یاپارز. بوندزده پک ایی آکلارز که اراده دینیلن
شی، اولیله اشعریلرک دیدکری (شوق) دن عبارت دکلدو. شوق باشقه،
اراده باشقه در.

ایشته بو و بو کبی شئون و احوال کوستریور که بزده اولیله تأثیرسنز، قوری
بر قدرت و اراده دکل، بالعکس تأثیری اولان بر قدرت، ترجیحیه مقتدر بر
اراده واردر. و بو اراده دواعی به محتاج دکلدو. فاعل مختاردن صادر اولدینی
ایچون آریجه بر سبب مرجحه لزوم یوقدر. فاعل مختارک کندیسی مرجح،
اراده سی ده بر فعلک یا یوب یا پامق جهت لوندن بری دیگرینه ترجیحدر. آنکچون

بوراده اراده دن باشقه برداعی، بر سبب مرجح بولونمازسه، ترجیح بالا مرجح لازم کایر که باطلدر دینه من. چونکه بوراده مرجح وارد، اوده فاعلی مختاردر. اراده ده، یکدیگرینه مساوی اولان ایکی شیدن برینی دیگرینه ترجیح ایتک شاندن، ماهیتی اقتضاسندن اولان بر صفتدر. نته کیم بو، جناب حق حقنده ده بویله در. اوکا ویریه جک جواب بوکا ویریه جک جوابک عیندر.

کذلک « شو افاداتکزه کوره (قصد) بر فعل اختیاری دیمک اولویور. شو حالده اوده باشقه بر قصد، بویکنجی قصده بر او چنجینه و اوده کندندن اول دیگر بر قصد محتاج اولور. و بوقصدلر مبداء طوغری تسلسل ایدر و یا دور ایدر که ایکسی ده باطلدر. بولنده بر اعتراض دخی در میان اولونماز. چونکه قصد باشقه بر قصد محتاج اولماز، اولسه ده قصدی قصد، عین قصدر. یعنی بر قصدی قصد، او قصدک کندسی دیمکدر. خصوصیه قصد، یالکیز بر شینه محتاجدر که اوده قاصدر، فاعل مختاردر. فضله اوله رق او یوله بر اعتراض جناب حق جقنده وارد اولور. اوکا ویریه جک جواب، بوجوابک عیندر، باشقه درلو جواب ویریه من. مثلاً جناب حقک اراده سی قدیمدر. انسانک اراده سی حادثدر کبی بر جواب، طوغری و حقیقی بر جواب اولماز. چونکه اراده نک قدم وحدوثی، ماهیت اصلیه سی تبدیل ایتمز. ایشه (اراده) مسئله سنده ماتریدیلرک فکری بودر. یعنی ماتریدیه عنندن انسانک کندسی کبی بتون قوایی ده، اراده کلیه سی ده، علی الاطلاق قدرتی ده، افعالی ده جناب حق طرفندن مخلوقدر. بو نقطه لرده اشعریلر ایله ماتریدیلر آراسنده بر فرق یوقدر. ماتریدیلر کوره یالکیز برشی مخلوق دکادر، اوده اراده جزئییه در، قصدر. ایشه بو، انسانک کندی صنعیدر. بوکا بروجه آتی ایکی صورته اعتراض اولونمشدر :

۱ اعتراض — قصد، اراده جزئییه مخلوق الهی اولمایوبده صرف انسانک اثر صنعی اولورسه، انسان آنک خالق اولق واللهدن باشقه خالق بولونمق لازم کلیر. بویسه « هر شینک خالق اللهدر، اللهدن باشقه خالق یوقدر. » مفهومنده اولان نصوص قرآنییه منافیدر ..

بوکا ایکی درلو جواب ویرلمشدر . بری شودر : [هیچ شبهه بو قدر که
 هر شيك خالق جناب حقدر . لیکن قصد اراده جزییه شی دکلدر . لغت
 عربیه ده (شی) دیمک موجود دیمکدر . خارجده موجود اولمایانه شی دینمز .
 مع هذا شی تعبیری خارجده وجودی اولمایانلره تشمیل ایده جک اولورسهق ،
 دیرز که اشیا اوچ نوعدر . بری خارجده وجودی اولان شیلر ، ایکنجیسی
 معدوملر ، اوچنجیسیده موجود ایله معدوم آراسنده بولونان شیلردر که بو
 اوچنجی نوع موجودده ، معدومده اولمایان شیلردر . اوتورمق ، قالمق ،
 یایمق کی مصدر صیغهلرینک افاده ایتدیکی معنای مصدریلر هپ ایقاعادن
 عبارتدر . مثلاً اوتورمق ، اوتوروش و اوتورمه فعلی وقوعه کتیرمکدر . دیگر
 مصدرلرده بویلهدر ، هپ ایقاعدر . بوراده ایکی شی وار . بری معنای مصدری
 اولان ایقاع ، دیگری مصدردن حاصل اولان یعنی ایقاع ایله واقع اولان شی .
 بو واقع اولان شی که بوکا حاصل بالمصدر و یا حاصل مصدر دینیر ، بوجارجه
 موجوددر ، چونکه بوتک وجود خارججی واردر . افعال بشریه تعبیرندن
 قصد ایتدیکنز معناده بودر . بونلر خارجده موجود برر هیئتدرلر . بونلر
 مخلوقدرلر . خالقده جناب حقدر .

لیکن معنای مصدری اولان ایقاعات او یله دکلدر . بونلره (فعل) اطلاق
 اولونماز ، (حال) اطلاق اولونور . فعل تعبیری اطلاق اولوندینی وقتده
 بوندن یعنی فعل لفظندن معنای مصدری مرأ اولونور . ایشته بوکی حالر ،
 وجود خارجی ایله خارجده موجود دکلدر . بونلر امور اعتباریه دندر . فقط
 او یله بر معتبرك اعتبار مجرندن عبارت اولان واوهم و خیالات قیلندن بولونان
 امور اعتباریه دن دکل ، وجود نفس الامریهی بولونان حقایق نفس الامریه دندر .
 ابوت ، بنوت کی امور نسبیه و اضافیه ده بویلهدر . معدوم خلقه محتاج اولدینی
 کی بویله خارجده موجودده اولمایان فقط معدومده اولمایان حالر ایله امور
 نسبیه و اضافیه ده خلقه محتاج اولماز . و بناء علیه بونلره خلق تعلق ایتمز . قصد
 ایتک دیمک اولان اراده جزییه ده ایقاعات جمله سندن اولدینی ایچون خلقه محتاج

اولانلار . خلق ، وجود خارجی ایله خارجدن موجود اولان اشیا به تعلق ایدر .
 بونکله برابر قصد ، قدرت اراده کایه کی جناب حقک مخلوقاتنه مستددر .
 آنک اقدار و تمکینیه حصوله کلکده در . یعنی جناب حق ، انسانده قدرت
 و اراده صفتی خلق ایش و بو صورتله انسانی بر ایشک فعل و ترک جهتلرندن
 برنی اختیار و ترجیحه و قدرتی اوجهه صرفه مقتدر و متمکن قیلمشدر . ایشته
 السان بو تمکینله اوفعل ترکدن برنی ترجیح و قدرتی اوجهه صرف ایدر .
 اگر جناب حق آنی بووجه ایله متمکن قیلمامش ، آکا بو تمکینی ویرمه مش
 اولسهیدی انسان بوکا مقتدر اولامازدی ، قصد و اراده کندنن صادر اولامازدی .
 بواعتبار ایله قصده جناب حقک مخلوقیدر دیزله بیلیر و بو پک طوغری اولور .
 لکن بومضاجه مخلوق اولوق باشقهدر . اشمریلرک دیدکلری کی طوغرییدن
 طوغری به رأسا وابتداء جناب حق طرفندن خلق ایدلمش اولوقینه باشقهدر .
 بو جواب ماتریدیلرک الک بیوک محققلرندن اولان و علوم شرعیده اولدینی کی
 علوم عقلیهده و حق علم هیئت و هندسه کی علومده دخی درین برنظره ، بیوک
 بر فکر ابداع ودهایه مالک بولونان علامه (صدر الشریعه بخاری) نک
 (توضیح) و (تعدیل العلوم) ناملرنده کی کتاب مستطابلرنده مذکوردر .

ایکنجی جوابده شورد . (جناب حق هرشیئک خالقیدر ، مفهومینده
 اولان نصوص شرعیه ، نصوص عامه در . یعنی حکمی هرشیئه ، بالعموم شئون
 وحادثاته شامل اولان عمومات شرعیدر . قاعده بوکی معنای عموم افاده ایدن
 نصوص شرعیه ، اونلرک حکم عموم وشمولانی قصد و تخصیص ایده جک بر دلیل
 مخصوص بولونمادیقی صورتده عموم وشمولاری اورزم ابقا اولونور . فقط اگر
 اونلرک عمومیتلرینی تخصیص ایده جک یعنی بعض افرادینی حکم شاملندن اخراج
 واستثنا ایده جک قطعی بر دلیل مخصوص بولونه جق اولورسه ، اولوقت اونصوص
 عامه بالضروره تخصیص اولونور ، و بناء علیه اونلردن تخصیص و اخراج اولونان
 افراددن ماعداسی مراد ایدلمش اولدیغنه حکم ایدیلیر . مثلاً جناب حق هرشیئک
 خالقیدر ، اما ذات الوهیتک خالق دکلدر . چونکه ذات الوهیتکده خالق

اولمش اولسه حادث اولمسی لازم کلبیر ، انکچون جناب حقك ذات الوهیتلری (الله خالق کل شیء) آیت جلیله سنك شمول حکمندن استثناء عقلی ایله مستثنادر دینیر . بو بویله اولدینی کی بو آیت جلیله نك و امثالنك شمول حکمندن (عزم مصمم) ی یعنی قصدی ، اراده جازمه یی اخراج واستتنا ایتك بالضروره اقتضا ایدیور . چونکه استتنا ایدلیه جك اولورسه ، اولوقت افعال اختیاریه نك ده افعال سائر اضطراریه کی جبری واضطراری اولمسی لازم کلبیر . بوايسه قاعده تکلیفك بطلانی ، احکام شرعی نك ابطالنی استلزام ایدر و دین شریعت اساسندن بیقلمش اولور . ایسته جبری نفی ایتك ، قاعده تکلیفی تصحیح ایله نك و بناء علیه امر و نهی و شرایبی بطلاندن قورنارمق ضرورتیه بناء (عزم مصمم) ی ، قصدی او کی نصوص عامه نك دائرة شمولندن اخراج و نصوص مذکوره یی اونك ماعداسنه تخصیص ایتك ضروریدر . بو جواب ده ، اعظم فقهای حنفیه دن و فحول محققیندن (امام ابن همام) ك علم کلامدن (مسایره) نامیله معروف اولان اثر کزیننده محرردر .

آشاغیده بحث مخصوصنده تفصیلاً ایضاح اولونه جقدر که علم اصول فقه قاعده سنجیه برنص عامك شمول حکمندن بعض افرادینی اخراج ایتکه (تخصیص) دینیر ، بو بر اصطلاح مخصوصدر . ونص عامی تخصیص ایدنده (مخصص) اطلاق اولونور . بو مخصص بعضاً کندی کی دیگر برنص اولور . بعضاً ده عقل اولور . عقل ایله تخصیصه ، تخصیص عقلی دنیله یکی کی استثناء عقلی ده دینیلیر .

محقق شهیر امام برکوی ، بو ایکی جوابدن برنجیسنی ، صدر الشریعه نك جوابنی ترجیح ایدیور . واونی تأییداً (خلق ، معدومی ایجاددر . اراده جزئییه ایسه خارجه موجود اولمایه جفتدن مخلوق اولماز و بناء علیه اوکا خلق تعلق ایتمز . بونك ایچوندر که کندیسندن اراده صادر اولانه مرید دینیر ، خالق دینمز و اراده یی مرید اولان اونك خالق اولماز .) دییور .

ابن همام ، (مسایره) سنده شوذ کر او اوانان ایکنجی جوابی ویردیکی اشاده دها ایلری به کیده نك عزم مصممندن ، قصد و اراده جزئییه دن باشقه افعال

بشریه نك بيله خلق و قدرت الہیہ نك دائرہ شمولندن اخراج استثناسنده بر مانع عقلی اولدیغنی بیان ایدیور دیور که افعال بشریه دن جبری انی ایتک و بوضو رتله قاعده تکلیفی تصحیح ایلہ مک متصدیه اختیاری اولان افعالی (هرشیدک خالق جناب حقدر .) مقدمه کلیه سندن استثنا ایتکده بر مانع عقلی یوقدر . واقعا بو صورنده افعال بشریه ، یالکز انسانک کندی قدرتیله واقع اولور ، انسان افعالتک موجوددر دیمک لازم کله جک . فقط بو عین زمانده جناب حق اقدار و تملکینیلہ ، یعنی انسانی کندی افعالی ایجاده مقتدر و متمکن قیلمه سیله ، همده حاشا مکره و مقهور اوله رق بالاضطرار متمکن قیلمه سیله دکل ، بالعکس کندی اختیار و اراده ازیله سیله مقتدر قیلمه سیله حاصل اوله جفندن بو کیفیت ، شان الوهیتہ هیچ برقیصه ایراث ایتمز .

نهایت بو ، اولسه اولسه جناب حق کندی مقدوراتندن بر قسمنه ، همده مقدورات الہیه سنه نظراً بک اهمیتسز بر قسم قلیلنه انسانلری مقتدر قیلمش اولور . فاصل که فیاض مطلق اولان حق جل و علا حشرقلری ، بزلی بعض معلوماتنه عالم قیلمشدر . بو ذات الوهیتہ نقیصه ویرمدیکی کبی اوده ویرمن . مع هذا بو باده شرفوارد اولان و افعاله ده شامل بولونان نصوص عامه دن افعالی اخراج واستثنایه لزوم یوقدر . یالکز عزم مصممی (قصد ، اراده جزئیہ) اخراج ایتک کافیدر . چونکه بو قدرله جبر منتفی و قاعده تکلیف تصحیح ایدلمش اولور ...

۲ اعتراض — اراده جزئیہ بی جناب حق خلقندن استثنایله رأساً وابتداءً جناب حق مخلوقی دکلدر ، انسانک اثر صنعیدر دیمکله (جبر) دن قورتولونمش اولماز . چونکه سزده تسلیم و تصدیق ایدیور سکز که جناب حق علم و اراده سی و تقدیر ازیلی هرشیده ، حتی افعال اختیاریه به شاملدر . بناءً علیه انسانلرک افعال اختیاریه سی دخی جناب حق علم و اراده سی و تقدیر ازیلی ایلہ واقع اولور . شو حالده بونک نتیجه سی اولق اوزره انسان بالعموم افعالنده و بالجمله حرکات و سکناتنده مجبور و مضطر در دیمک اولور . عکسی تقدیرده تقدیر

از اینک بوزوله سی، اراده الهیه نک عجزه و علم الهیه نک ده جهله منقلب اوله سی لازم کلیر .

جواب — اوت، بزده صورت قطعی ده ایمان ایدرز که مرشی کی انسانلرک بتون افعال و حرکاتی، حتی اراده جزئییه سی ده جناب حقت عام و اراده سی، و تقدیر ازلیسی ایله واقع اولمقده در. فقط بوندن او یله ظن اولوندینی کی افعال اختیاریه ده جبر واضطرار لازم گلز و بناءً علیه انسانلر، حرکات و سکناتنده مجبور و مضطر اولماز. چونکه تقدیر اراده یه، اراده علمه تابعدر. علم ده معلومه تابعدر. یعنی علم، معلومک بتون اوصاف و شرائطیه اولدینی کی کشف و انکشافیدر. تعبیر دیگرله علم معلومه مطابق اولان کشفدر. و بونده مطابقت عام جانبنده آرانیر. معلومه مطابق اولورسه علم دینیر، مطابق اولمازسه جهل دینیر.

بونک ایچوندر که علم، معلومک ماهیتی تغییر ایتمز. بالعکس آکا تابع و آکا مطابق اولور. علمک معلومه هیچ بر تأثیری یوقدر. بناءً علیه جناب حق انسانلری قدرت و اراده صفتلریله افعالک فعل و ترکندن برینی اختیار و ترجیحه متمکن قیلمش و اونلرک لایزالده نه کی افعالی اختیار ایدم جکلرینی ازلیده کشف ایدمک بیلیمش و او وجه ایله یعنی کشف ابتدیی کی اونلرک کندی افعال و حرکاتنک ینه کندی اختیارلریله صدورینی اراده و تقدیر بیورمشدر. بوا یسه هیچ بوجه ایله بشرک افعال اختیاریه سنک اضطراری اولماسنی استلزام ایتمز. بوبراقدینک، ایلروده خدمتچیسنک نه کی افعال حرکاتی التزام و اختیار ایدم جکفی اولدن کشف ایدوب بیلیمسه و اونک بیلدیگی کی حرکت ایتمسه مانع اولمیوب او حرکاتی اراده و دفترینه ثبت و تحریر ایله مسنه بکزره. بوندن طولانی خدمتچینک افعالنده مجبور اوله سی لازم کلدیگی کی انسانک ده مجبور اوله سی لازم گلز. بومسئله آشاغیده (تکلیف مالایطاق) بحثنده آریجه ایضاح اولونه جقدر.

تلخیص

بواراده مسئله سنده فرقلر آراسنده کی اختلاف افکاری مختصراً آکلامق
میتونده ایکن سوزی اوزآتمغه مجبور اولدق . اعتقاد منجه فردی واجتماعی ،
حقوقی و اخلاقی حیاتک روحی اولان بو فوق العاده مهم مسئله حقنده نه قدر
سوز سویانسه ینه آزدرد . دها زیاده اختصار ایده بیلیردم . فقط او وقت مسئله بی
لطرفیله آکلامش اولمازدم . آنکچون سوزی اوزآتمغه مجبور اولدم . مع هذا
ضبطی تسهیل ایچون بحنی بروجه آتی تلخیص اییدیورم :

جبرییه جایله معتزله نك فکری ساده و بسیطدر . جبرییه ، انسانک قدرت
واراده سی اساسندن انکار ایده رک انسانده قدرت و اراده نانه اصلاً و هیچ
برشی بوقدر ، بشرک حرکاتی جماداتک حرکاتی کبی قسری و جبریدر دیمش ،
بوصورتله طوغریدن طوغرییه و بلاواسطه (جبر) قائل اولمش .

معتزله ده ، بوجبر فکری نك تماماً ضدینی التزام ایده رک بشرک اختیاری افعالی ،
مالک کز انسانک قدرتیله واقع اولور . افعال بشریه نك اجراسی جناب حق
طرفندن تماماً انسانه ترك و تفویض اولونمشدر . بناء علیه جناب حق ، انسانلرک
افعال و حرکاتنه قاریشماز دیمش .

بو ایکی فکریک ایکیسی ده نفصوص قرآنییه مخالف کوروندیکی ایچون
اشعریلر ایله ماتریدیلر ، بویکی فکریک ایکیسی ده رد ایده رک ایکیسی اورتیمی
برطریق متوسط اختیار ایتمشلر . هرایکی فرقه ده برکزه انسانده قدرت و اراده نك
وجودینی قبول ایتمشلر و بوصورتله جبرییه فکرینی رد ایله مشلر ، تانیاً انسانک
اختیاری فعللری ده دیگر اضطراری حرکتلری کبی جناب حق طرفندن مخلوقدر
دیمشلر ، بوصورتله ده معتزله فکرینی رد ایتمشلردر .

ایشته اشعریلر ایله ماتریدیلر بویکی نقطه ده برلشمش اولدقلری حالده ،
نونان سوکره سنده ، مسئله نك اصل حلی مطلوب اولان نقطه نرنده بربرلرندن
ایرلمشلردر . اشعریلر کندیلرینی آلامه رق جبرییه اوزرینه دوشمشلر نتیجه

اعتباریله آنلرله برلشمشلدور. یعنی جبریله کبی طوغریدن طوغری به دکل ایسه ده طولایسیله جبره قائل اولمشلدور. ماتریدیلر کرچه معتزله به پک زیاده تقرب ایتمشلدور، آرالرنده کی فرق ظاهری ولفظی کبی کورونور. فقط بونکله برابر آرالرنده پک آجیق وخیلی فرقلر واردور. آنکچون جبریله ایله معتزله آراسنده اصل طریق توسطی تعقیب ایدن فرقه، ماتریدییه فرقه سیدر. اشعریلر ایله ماتریدیلر آراسنده کی فرقلر شونلردور:

۱ - جمهور اشعرییه کوره قدرت حادثه نك یعنی قدرت عبديك افعالنده اصلاً تأثیری یوقدر. افعال عباد یالکیز جناب حقك قدرتیله واقع اولور. ماتریدیلر کوره قدرت حادثه نك افعال اختیاریه ده تأثیری واردور. انسانك افعال اختیاریه سی، ایکی قدرتك مجریعه یعنی قدرت بشریه ایله قدرت الهیه نك مجموعیله واقع اولور.

۲ - اشعریلر، قصد و اراده جزئییه دینیلن شی، نفسك فعل و ترکدن برینه میل و اشتیاقیدر، شوقدر دییورلر. ماتریدیلر، اراده صفتك فعل و ترکدن برینه تعلیقیدر. تعبیر دیکرله انسانك کندنده موجود و مخلوق اولان اراده کلیه سی فعل و ترکدن برینه صرف و استعمال ایتمه سیدر دییورلر.

۳ - اشعریلر، اراده جزئییه و قصد جناب حق طرفندن ابتداء مخلوقدر واضطراریدر دییورلر. ماتریدیلر، عکسفی ادعا ایله «تأخیر، مخلوق واضطراری دکلدر. انسانك صنعیدر و اختیاریدر. «دیورلر.

۴ - اشعریلرک اعتقادنجیه (کسب)، قدرت عبديك افعاله بلاتأثیرمقارنقندن عبارتدور. ماتریدیلرک اعتقادنجیه بالعکس قدرت عبديك افعاله مؤثر اوله زق تعلق ایتمه سیدر.

ایشته اشعرییه ایله ماتریدییه آراسنده اساسلی فرقلر بونلردن عبارتدور. بو فرقلری ده خلاصه الخلاصه اولمق اوزره برفرقه ارجاع ایده بیلیرز که شودر: اشعرییه اعتقادینه کوره قدرت بشریه نك تأثیری اولمديغندن آنلرک عندنده افعال بشریه، یالکیز قدرت الهیه ایله واقع اولور. ماتریدییه عندنده ایسه ایکی قدرتك

مجموعیله واقع اولور ...

بونلر آراسنده کی فرقلری بوسورنله تحلیل و تثبیت ایتدکن صوکره جمهور اشعریه یی بر طرفه براقلمده ، بنه اشعریلرک رئیس لرندن و اهل سنت اماملرندن یوقاریده اسملری و فکرلری کچن و هر بری بر فرقیه بدل اولان اوچ بیوک ذاتک یعنی قاضی ابوبکر باقلانی ، استاد ابو اسحاق اسفرائینی و امام الحرمین ابوالامالی نک بو مسئله ده کی اعتقادلریله ماتریدیلرک اعتقادی آراسنده موجود اولان فرقی آراشدیرلم :

یوقاریده سوبیله مشدم که بو اوچ امامک برنجیسی ایله ایکنجیسی ، افعال عبادک هم قدرت عبدک و هم قدرت الهیه نک مجموعیله واقع اولدیغنه قائلدرلر . فقط آرارنده شو فرق وار . برنجیسی جناب حقک قدرتی فعلک اصل و ذاتنه تعلق ایدر ، انسانک قدرتی ایسه فعلک طاعت و معصیت اولوق کی وصفنه تعلق ایدر و ایشته بونک ایچون انسانه مطیع و یا عاصی دینیر دییور . ایکنجیسی ایسه هرایکی قدرتمک ده فعلک اصلنه تعلق ایتدیکنه ذاهب اولوبور . انسانک قدرتی افعاله تأثیرده کافی اولدینندن فعل بشر ، قدرت الهیه نک اطانسیله حصوله کایر دییور . بو کا بر انرده ایکی مؤثرک اجتماعی عقلاً ممکن دکدر دیه اعتراض اولونمشدر . ننه کیم یوقاریده (اما الحرمین) ک بوفکره اویولده اعتراض ایتدیکی ذکر ایدلمشدی .

مشار الیه قاضی ابوبکر ، بواکی قدرتمک جهت تعلق و تأثیرلری تفریق ایتدیکی ایچون اوکا بویولده بر اعتراض وارد اولماز . فقط سوزی مبهم اولدینی ایچون محتاج تفسیردر . ماتریدیلر کلنجه : بونلرده افعال بشریه نک ایکی قدرتمک مجموعیله وقوعه کلدیکنه قائلدرلر . و بونلر قدرت عبدک متعلقیه ، یعنی محل تأثیریه قدرت الهیه نک محل تأثیرینی صراحة آیردقلری ایچون سالف الذکر ایکی امامه قارشى درمیان ایدیلن اعتراض ، ماتریدیلر حقنده وارد دکادر . چونکه ماتریدیلر کوره انسانک قدرت حادثه سنک متعاقب ، محل تأثیری قصددر ، اراده جزئیهدر . قدرت الهیه نک متعاقب و محل تأثیری ایسه انسانک فعل

و حرکتیدر . بناءً عليه انسان كندی قدرتیله عزم و قصدینی ايجاب ایدر ، یعنی اراده ایدر . جناب حقده اونك اراده ایتدیكى فعل و حرکتی خلق ایدر . شو حالده اوفعل ، حرکت اولمق حیثیتیله جناب حقه منسوب اولور و بناءً عليه اوفعلك خالق جناب حقدر دینیر . وینه اوفعل عین زمانده ملاصلات و یاسرقت اولمق اعتباریله انسانه منسوب اولور . و بوجهته فلان ذات ، صلات و یاسرقت فعلنك فاعلیدر ، نماز قیلمشدر ، سرقت ایتمشدر ، مصلایدر ، سارقدر دینیر . (بوسویله دكلم ، ابن همامك ، مسایره ، سنده عیناً و حرفیاً محرودر)

قاضی ابو بکر باقلانی نک (جناب حق قدرتی فعلتک اصلنه ، انسانک قدرتی ده وصفنه تعلق ایدر .) سوزندن مقصدی ده بواولسه کر کدر . اولوالده مشارالیه فکریلہ ماتریدیہ فکری آراسنده بر فرق یوق دیمکدر . ایشته ماتریدیئر ایلہ قاضی ابو بکرک فکرلرینہ کوره فعل واحدہ قدرت الہیہ ایلہ قدرت بشریہ نک جهت تأثیرلری . باشقه باشقه اولدیغندن استادک فکری علیہ درمیان اولونان اعتراض سابق ، بونلرک علیہ درمیان اولونا ما . (امام الحرمین) ک فکرینہ کنجه : یوقاریده ایضاح ابتدیکم وجه ایلہ مشار الیه ، افعال بشریہ یالکیز انسانک قدرتیله واقع اولور دیدیکندن آنک فکری ، معتزلہ فکرینک عینیدر . کرجه امام الحرمین حضرتلری ، کندی فکریلہ معتزلہ فکری آراسنده فرق بولوندیغنی و چونکہ کندی فکریته کوره ، انسان افعالک خالقیدر دیمک و بناءً علیہ انسانہ خالقیت اسناد ایتک جائز اولمادیغنی بیان ایدیورسده بوفرق ، لفظه وجواز وعدم جواز . عاندر . حقیقی بر فرق دکلدر . ایشته (اراده) مسئله سی حقیقه فرق اسلامیه نک افکار واعتقاداتی بونلردن عبارتدر . بونلری بوسورتله ضبط ایتک ، یکدیگریته قاریشدیرماق الزمدر . مملکتیمز اها لیسنک قسم اعظمی ماتریدی اولدینی جلدہ مع التأسف ذهنلری اشعریہ فکریلہ دولودر . بونی تصحیح ایتک ، حقایق شرعیہ بی اولدینی کی کوروب ایلدهجه آکلاتیق ، زمانمزدہ اک بیوک فریضدر . شمعی ده (قضاء و قدر) ک نعدن عبارت اولدیغنی ایضاح ایدلم .

قضا و قدر

اسلامیتده برده (قضا و قدر) مسئله یی واردر . بو مسئله ، اراده یی بحثك
 تجماندندور . آنكه چون درسلمزده بوندن ده بحث بحث ايتك اقتضا ایدیور .
 مع هذا بو ، اسلامیت مخصوص بر مسئله ده دکلدر . آذن اول ده ، سوکرده
 دینی ، دینمز بتون علمانك ، فیلسوفلرک ذهنلری اشغال و اتعاب ایتش غایت
 مهم ، غایت دقیق بر مسئله فلسفیه در . فلسفه حقوئله اشتغال ایتك ایستین بر
 ذات ایچون ده هرشدن اول تدقیق ایجاب ایدن اساسی مسئله لردن بری ده بودر .
 اکثر ملل و نحل ، ادیان و مذاهب ایمانی عندنده انتشار ایدن بر مسئله
 اعتقادیه در که کافه کائنات و موجودات ، بتون شیئون و حادثات جناب حقه قضا
 و قدر یله ساجه وجوده کلیر . بو قضیه کایه ، انسانلردن صادر اولان افعال اختیاریه ،
 حق قصد و اختیاره دخی شاملدر . (قل کل من عند الله = سویله که هرشی
 الله یندر .) ایت کریمه سنك مناسبی بودر . بو بر عمده اعتقادیه در که علم ،
 اراده و قدرت صفتلریله متصف ، علام القیوب ، مرید و قادر مطلق بر الله
 عظیم الشانك وجوب وجودینه قائل اولان بر ذات ایچون بو عقیده اساسیه یی
 قبولدن باشقه چاره بو قدر . چونکه بو (قضا و قدر) مسئله یی ، جناب حقه
 علم ، اراده و قدرت صفتلرینك نتیجه ضروریه سیدر . بو باشقه درلو تصور
 اولونا ماز . بونی انکار ، ذکر اولونان صیفات جلیله الهیه یی انکار اولور .
 آنكه چون بو مسئله ده معتزله ده داخل اولق اوزره علی العموم فرق اسلامیه
 متفقدور . اختلاف آنحق بو (قضا و قدر) مفهومك صورت تلقیسندور . معتزله نك
 قدری انکار ایتلری مطلق دکلدر . اولر ، جبری و اشعریه فرقه لرینك تلقی
 ایتدکلری مبرم و منحنم ، یعنی مایجی و مجبر (قدر) ی انکار ایدرلر . ماتریدیلر ده ،
 یوقادیده (اراده) بحثنده کوردیکمز وجه ایله ظاهراً بر طریق متوسط تعقیب
 ایدیورلر سده ، نتیجه اعتباریله معتزله ایله بر ایدرلر .
 اسلامیتك بدایت ظهورندنبری بزده ، عالم اسلامیه بو مسئله حقه ایکی

کلمه واردر : (قضا) و (قدر) . اونک ایچون ایکیسنی بربرینه ربط ایله
(قضا و قدر) دیرز . ائمه حدیث ولتندن « ابن اثیر » ، (نهابه) سنده بوایکی
کلمه متلازمدرلر ، یکدیگرینک لازم و ملزومیدرلر . بربرلرندن افشکا کلری
قابل دکلدر . زیرا (قدر) عمل ، (قضا) بنا منزله سنده در دیور . اولاً بو
ایکی کلمه نك معنای لغویلری ، صوکره معنای اصطلاحیلری ، ده صوکرده
افعال و حادثات بشریه به درجه شمولی تدقیق ایدلم .

قضا، فی الاصل بر شیشی قولاً و یا فعلاً قطع و فصل ایتمک معناسنه موضوعدر .
بر ایشی نتیجه لندیروب کسوب آئق ، تماملامق دیمک اولور . حاکمک حکمنه
قضا دیمسی ده بوندندر . دعوائی کسوب آتدیی ، نتیجه لندیردیکی ایچوندور .
ینه بومناسبتله قضا کلمسی ، علی الاطلاق (حکم) ، (ادا) ، (ایجاب و الزام) ،
(اعلام) ، (انفاذ) ، (خلق) ، (صنع و تقدیر) ، (ابلاغ و انهاء) معنالرنده
دخی استعمال اولونور . بونلرک بمضیلری معنای مجازی ، بمضیلری ده معنای
صرفیسیدر . اصل معناسی ، دیدیکم کبی بر شیشی قولاً و یا فعلاً قطع و فصل
ایتمکدر .

قدر ، ایستر دالک فتحله ، ایستر سکونیه تلفظ ایدلسین ، هر ایکیسیده
قضا کلمسی کبی (حکم) ، (اعلام و تبیین) ، (ایجاب و الزام) و (خلق)
معنالرنده استعمال ایدلمشدر . قرآن کریمده کرک قضا و کرک قدر کلمسی ، برینه
کوره شود کر اولونان معنالرک همان جمله سنده وارد اولمشدر . فقط قدر لفظنک
معنای اصلیدی (تقدیر) در که بر شیشک مقدار و کمیتی تبیین و تعیین ایتمک دیمکدر .
وفی الاصل مصدردر . مقدار معناسنده کلیر و بوصورنده اسم دیمک اولور .
ایشته قضا و قدر لفظلرینک معنای لغویلری بو ، معنای اصطلاحیلرینه کلنجه :
حضرت شارح ، بوایکی کلمه دن شرعاً مقصود اولان معنای لحکمة صراحة
بیان و تعیین ایتمه شدور . آنکچون علمای اسلام ، بونلرک تعیین معناسنده
اختلاف ایتمشدر . عام کلام و لغت کتابلری تبیع اولونورسه کو ولور که بو
ایکی کلمه نك مختلف تفسیر و تعریفلری ایچنده ائمه لغتک بیاناتنه اک موافق

تعریف ، ماتریدیلرک تعریفیدر . متأخرین ماتریدیه‌نک استاد کلی اولان علامه صدر الشریعه ، (تعدیل العلوم) نامنده کی کتاب کزیننده (تقدیر) ک بری اراده صفتنک ، دیکری حکمت السبیه‌نک نتیجه‌سی اولق اوزره ایکی معناسی واردر دییور . برنجیسی جناب حقک اراده ازلیه‌سی اقتضاسنجه هر شینه کندی خصوصیتی تخصیص ایتمه‌سیدر ، ایکنجیسی ده جناب حقک حکمت السبیه‌سی وجه‌ایله هر شینه لایق اولان خصوصیتی تخصیص و تعیین‌ایله مسیدر دیه تعریف ایدیور . قضایه کلنجه : قضا ، جناب حقک اشیا اوزرینه لایزالده بولونه‌جقلری ویالایق اولدقلری احوال‌ایله حکمیدر دییور و تقدیرک ذکر اولونان مفهوملریله قضانک بو مفهومی ، لفظاً متغایر اولقله برابر حقیقته متساوی اولدقلرندن قضا‌ایله تقدیر آراسنده مساوات بولوندیغنی بیان ایدیور و سوکرده ده بعضاً قضا لفظندن خلق معناسی دخی مراد اولونور . دییور .

(شرح مواقف) ده بیان اولوندیغنی اوزره اشعریلر ، قضا‌ایله قدری تفریق ایدیورلر و (قضا ، اشیا‌یه لایزالده بولوندقلری حال اوزره تعلق ایدن اراده ازلیه‌در . قدرده ، اواییابی ذوات و احوالنده تقدیر معین و مقدار مخصوص اوزره جناب حقک خلق و ایجادیدر .) دییورلر . فقط قدر لفظنک معناسی اصلیسنده خلق و ایجاد معناسی یوقدر . یوقاریده بیان ایتشدک که قدر کله‌سی فی‌الاصل تقدیر معناسه‌در ، تقدیرده برشینک کمیتی تبیین مناسنه موضوعدر . آنکچون اشعریلرک قدری ، خلق و ایجاد معناسی تضمن ایده‌جک صورته تعریفلرینه بویولده اعتراض اولونمشدر .

کور وایور که قضا‌ایله قدر مفهوملریبک صورت تلقیسنده ماتریدیلرله اشعریلرک نقطه نظرلری معکوسدر . ماتریدیلر ، برکره قضا‌ایله قدری بربرلرندن تفریق ایتیورلر . آرهلرنده مساوات بولندیغنه قائل اولیورلر . بونی هم صدر الشریعه ، هم ابن همام تماماً بیان ایدیورلر . تفریق ایتدکلری صورتده اشعریلرک قدر دیدکارینه بالمکس قضا دییورلر . قضا دیدکارینه قدر دییورلر . ماتریدیلرک بو تلقیسی ، ائمه لغتک و ازجمله ابوالقاسم راغب اصفهانی‌نک (مفردات

راغب) ناميله معروف اولان كتاب معتبرنده كي افاداتنه تماماً توافق ايدسيور .
 شونحيققاتدن شونتيجه حاصل اولوبوركه قدر ، جناب حق طرفندن علي-
 العموم اشيا و كائناتك وباطلله شتون و حادثاتك قبل التكوين اولده احوال و اوصافي
 و اسباب و شرائطيله ، لايزالده حائز اوله جقلى قوت ، استعداد ، قابليت
 و طبيعئيله ، زمان و مكانيله تعين ، ترتيب و تحرير ايدلمه سي عيمكدر . بوضورتيله
 تقدير و تعين ايديلن شيتك كنديسنده (قدر) اطلاق اولونور . بوشهديرده
 اسم مفعول معناسنه (مقدر) ديمك اولونور .

قضايه كانجه : قضا ، يا اشيا اوزرينه لايزالده حائز اوله جقلى اسحوال
 و خصوصيات ايله حكم ازايدر . بوضورتده قدر ايله قضا آراسنده دمين سويلايكم
 كي مساوات وار ديمكدر . ياخود قضا ، اولده تقدير اولونان شيتك بره قضاى
 تقدير لايزالده ساحه وجوده اخراجي ، خلق و ايجادى ديمكدر . بوضورتده
 قدر مقدم ، قضا مؤخردر . و آزالنده عموم و خصوص مطلق واردر . هر قضا
 قدردر ، فقط هر قدر قضا دكلدر . قضا اخص ، قدر اعمدر .
 ساحه وجودده تجلى ايدن شي ، هم قضا و هم قدردر . لکن هر قدر ساحه
 وجوده كلش اولماديني جهتله قضا دكلدر . يعنى تكون ايدن ، كسب حقيقت
 ايدن ، برشان اولان هر حادثه قدر اولديني كي عين زماندهده قضا در . بونكله
 برابر عدمده قالب ساحه وجوده چيقمايان ، تكون ايتمين شيلرده قدردر ،
 اما قضا دكلدر . بوني بر مثال ايله ايضاح ايدم :

بر انسان صيچاق حامدن بيقدقدن صوكره بچيريل چيلاق ، تماماً عريان
 بر حالده حمامك باغچه سنه كيدوب يارم ساعت قدر اوراده دوره جق اولسه ،
 شه سز او كيمسه خسته اولور . فقط ينه اوقات ، حمامك باغچه سنه چيقيويونده
 صيچاق و محفوظ بريرده وجوديني صوغوقدن و جريانندن محافظه ايدرسه ، خسته
 اولمايه جنى كي بالعكس واقعه استجمامدن طولاني صحجه بك يسواك استفاده
 ايدر . ايشته بر برينه ضد و مباح اولان بوايكي نتيجه نك اينكيسنده قدردر .
 جناب حق ، اولده صحت مرضك اسباب مختلفه سنى تقدير و تعين بيورزاينكن ،

شود کراولنان ایکی حالدن برنجیسی اسباب مرضدن ، ایکنجیسی اسباب صحتدن اولوق اوزره تقدیر بیورمشدر .

ایشته بری مرضك ، دیگرى صحتك سببی اولان بویکی سبب قدردر ، هر بری برقانون مقدر الهی در . نتیجه ومسئولری هنوز وجوده کلمردن اول ازلده موجود و (لوح محفوظ) ده مکتوبدر . یعنی وجود علمی ایله علم ازنی الهیده موجود وثابتدر . لوح محفوظ تعبیرندن مقصد ، علم ازیلدر . شو حالده حمادین چیقان برکیمسه ، بویکی سبیدن هانکیسنه توسل ایدرسه آتک نتیجهسنه دوچار اولور که بوده « قضا » در وعین زمانده مقضای تقدیر اولدانی ایچونده « قدر » در ، یعنی مقدردر .

دیگر برمتال : کذلک بر انسان ، شرائطی جامع بر اراشیده فن زراعته موافق بر صورتده اجرای زراعت ایدر ، تخم آتارسه او یردن محصول آلیر . آتمازسه معطل بر اقبیره برشی آلاز . آلامی بر قدر اولدانی کی آلامسیده بر قدردر . کذلک او یره بغدادی اکرسه بغدادی آلیر ، آربه اکرسه آربه آلیر . اوده قدردر ، بوده قدردر . آربه آلمق ایچون باقلاا کوبده آربه آلامسیده بر قدردر . ایشه بو تالارک مثبت جهتی هم قدر وهم قضا در . فقط منفی جهتی ینه قدردر ، اما قضا دکدر . چونکه قومه قلوب بالفعل ساحة وجوده چیقمامشدر . (وان من شیء الا عندنا خزائنه وما ننزله الا بقدر معلوم) آیت جلیله سنده بوسوبلدکارمه اشارت وارددر .

ایشته شو ایضا حادین (قضا و قدر) مفهوملرینک نهدن عبارت اولدقلری مع زیاده آکلا شلمشدر ، ظن ایدرم . شمیدیده قضا وقدرک افعال و حیات بشریه اوزرنده کی درجه تأثیر و شمولانی ایضاح ایدرم .

قضا و قدرک افعال و حیات بشریه درجه تأثیر وشمولی

ایضاخات سابقه‌دن مستبان اولمشدرکه قدر ، مسبباتی اسبابه ربط ایتمک و مسببات ایله اسباب آره‌سنده کی مناسبات وروابطی و آنلرک شرائطی نذیت ایتمکدر . بناء علیه حیاته وعلی العموم موجودات وکائناته هیچ بر حادثه هیچ برشی بوقدرکه ازله تقدیر الهی ایله مقدر و لایزالده قضاء الهی ایله مقضی و موجود اولماسون . هرشی ازله بتون اسباب و شرائطیله احوال و اوصاف معینه سبله ، زمان و مکانیله تقدیر بیورلمش و لایزالده بر مقتضای تقدیر زمانی حلول ایدنجه قضاء الهی ایله ساحه وجوده کلکده بولنمشدر .

مادی و معنوی هر حادثه ، کندندن اول بر حادثه ، بتون مسببات آنلرک حصولنده آز چوق تأثیری بولونان اسباب معینه ، او اسبابده کندیلرندن اول دیگر اسبابه ربط ایدلمش ، بواسباب و مسببات ایچونده استعدادلر ، قابلیتلر کبی بر طاقم قوت ، خاصیت و شرطلر وضع اولونمشدر . بونک ایچوندرکه بوعالمده هر نه زمان بر حادثه ساحه وجوده کلپر ، تکون ایدر ، بر حقیقت کسب ایلر سه مطلقا اونک برسبی ، او سبیکده قریب وبعید دیگر سبی واردر .

ایشته بواسباب ایله مسببات آراسنده کی شور وابط و مناسباتک جمله سی ، قادر مطلق اولان جناب خلاق عظیم الشان طرفندن ازله تقدیر ، تعیین و وضع ایدلمش قوانین الهیه درکه احکامی لایتنغیردر . بونلر برر دستور قانون و تکویندرلر . حیات وبتون کائنات بوقانونلر ایله قائمدر . هیچ بر حادثه بوقانونلرک تأثیرندن آزاده اولاماز . عادت الهیه بودر ، بویله جاری اولا کلمشدر . بودستورلره ، حیاتک بواللهی قانونلرینه قرآن کریم ، (سنت الهیه) نسمیه ایدیور . (لن نجد لسنة الله تبدیلا) دیور ، یعنی سن اللهک سنت و عادت ایچون تبدیل و تبدل بولامازسک بیور دیور .

حکمانک ، فلاسفه نک طبیعت و قوانین طبیعه دید کلری شی ، ایشته بو (سنت الهیه) دن باشقه برشی دکدر . طبعیونک « طبیعت » اطلاق ایتد کلری شی ندر ؟ اشیاده موجود اولان قوتلر ، قابلیتلر ، استعدادلر ، اشیا آراسنده کی

منا-بتلر ، ضرورتلر دکللی ؟ ایشته بز مسلمانلر ، بونلره سنت الهیه ، عادت الهیه وقوانین الهیه دیرز . و بونلره برابر بالاموم کائنات و حادثاته ، بالجمله احوال عوالمه (مقدمات) اطلاق ایدرر .

مثلاً زراعت ایدلمه یی ، تخم آنلایان اراضیدن ، نه قدر چوق قوه انباتیه یی حائز اولورسه اولسون ، محصول آینه ماز . چونکه سنت الهیه بو وجه ایله جاری اولماشدر . سنت الهیه بونک عکسنه در . یعنی اراضی قوه انباتیه یی حائز اولمق شرطیله حراست ایدیلیر ، تخم آتیلیر ، مطلوب درجه ده یاغور یاغار و یاخود اراضی صاحبی طرفندن کافی درجه ده صولانیرسه ، اولوقت محصول استحصال اولونور . وهانکی تخم آتیلیرسه آنجق اونک نوعندن محصول الیر . عکسی تقدیرده مطلوب اولان محصولات حصوله کلز . چونکه تقدیر ازلی بوسورتله تقرر ایتشددر . بر جفتجی ، تارلاسی زراعت ایتوبده دعا ایله ، عبادت ایله اوندن محصول الملق فکر و اعتقادنده بولونورسه ، قیامنه قدر انتظار ایتسه الینه محرومیتدن باشقه بر شی کچمز . جفتجینک بو انتظار و اعتقادی ، حقایق ازلییه وسنت الهیه یه منافیدر . سنت الهیه تبدل ایتمز .

(ولنی تجدد لسنة الله تبدیلا) . بو نقطه ده طبعیون ایله آراخزده بر فرق یوقدر . اونلرک طبیعت دیدکلرینه بزده طبیعت دیرز . بزده اونلرکی قوای طبیعه نك تأثیرینه قائل اولورز . فقط اونلرکی تأثیری طوغریدن طوغرییه رأساً وابتداءً طبیعه ویرمه یز . اونلر جناب حقل وجودینی انکار ایتدکلری ایچون تأثیرات طبیعه یی طبیعه ، ماهیات اشیایه عطف واسناد ایتمه که مجبور اولمشلردر . لکن بز او مجبوریتده بولونمورز . بز محیر العقول اولان بوبدایع مصنوعاتک برصانع حقیقی ، برمبدأ فیاضی بولوندیغنه ، هرشیی یوقدن وار ایتمه که قادر بر (الله) ک وجوب وجودینه قائل و معتقد اولدیغمز ایچون ، او تأثیرات طبیعه یی طوغریدن طوغرییه طبایع اشیایه دکل ، جناب واجب الوجوده اسناد ایدرر . مؤثر حقیقی اودر ، طبایعه بوتأثیراتی بخش ایدن اودر . آنکهچون بوتأثیرات ، تأثیرات عادیه در ، یعنی جناب حقل عادت الهیه بندن

متولددر . جناب حق اويله عادت ايتمشددر ، قرآن كريمك صراحتي موجبنجه عادت السهي تبديل ايتمز ديرز . مع هذا اوقوانين طبيعيي، بوسنت وعادتي وضع ايدن وقدرت مطلقي ممكن اولان هرشيئه شامل بولونان جناب حق اولديني ايجون ديلرسه بو قوانين طبيعيك احكامني تغير ، تأثيراتي ازاله ايدن بيلير اعتقادنده دخي بولونورز . وبوكا (خرق عادت) ديرز . معجزه اظهاري كبي بيوك بر مقصد السهي ايجون اويله خارق العاده بر كيفيتك امكان ظهورينه ايمان ايدنرر . ايشته بزم طبيعيتندن آيرلديغمز نقطه بودر . بونقطهده اونرله بزم آرامرده بويله برفرق وارددر . اونر بونك امكانه قائل اولمازلر . چونكه حاشا اللهم وجودينه اينمازلر . بونكه برابر بز مسلمانلر ، ديديكيم كبي بو (خرق عادت)ك اويله بيوك والسهي بر مقصد ايجون ممكن وواقع اولديغنه قائل اولورر . يوقسه على العاده جاري اولان حياتده (ولن نجد لسنة الله تبديلا) آيت جليلهسي متطوقنجه اوقوانين ومؤثرات طبيعيك، اوسنت السهيك تبديل وتبديل قبول ايتيمه جكني اعتقاد ايدنرر .

خلاصه ، بوتون كائناتده ، اجرام علويه وسفليهده ، جمادات ، نباتات وحيواناتده وبونلرك احوال وادافنده هب بروجه شروح بر طاقم معين ومقدر قوانين ازليه احكامي جاريدير . يرده ، هواده ، بحرده جاري اولان بوقوانين ازليه ، انسانلرده وانسانلرك افعال وحر كاتنده وفردلرك ، ملتلك و دولتلرك باشرينه كلن شيلرده دخي جاريدير . يعنى حيات ساديه ، فاصل بر طاقم معين ولايتغير قوانين ازليه ايله قائم ايسه فردى ، اجتماعي وسياسي حيات بشريه دخي اويله ازله تثبيت ايدلمش ، عين نتيجهي ويرر . معين ولايتزلزل قانونلر ايله قائمدر . خادئات ماديهك فاصل معين اسبابي وارسه ، خادئات اجتماعيه وسياسيهك دخي معين اسبابي وارددر . بو اسبابك بعضيلري حيات ماده ايله حيات بشريه آراستنده مشتركدر ، بعضيلريده بوايكي حياتدن برينه عائد و آكا مخصوصدر . بعضيلري يكديكريتككنه مشابه ، بعضيلريده مختلفدر . بونكه برابر ايستر متشابه ، ايستر متخالف اولسون هرايكي حياتده جاري اولان اسباب ، عين

نتیجه‌ی ویرمک‌اوزره تقدیر و تعیین ایدلمش اولدیغندن هرایکی حیاته‌ده تکررلری حالده عین نتایجی تولید ایدرلر .

ایشته (عین سبب ، عین نتیجه‌ی تولید ایدر .) سوزینک معناسی بودر . کرك حیات مادی‌ده و كرك حیات بشریه‌ده معین برمسبب ، بر نتیجه ایچون معین بر سبب تقدیر و تعیین بیورلمش اولدیغندن ، عین سبب تحقق و تکرر ایدنجه ، عین مسبب و نتیجه دخی تحقق و تکرر ایدر . چونکه مقتضای تقدیردر ، سفت الیه‌نك حکمی بودر . بونك ایچوندرکه نه‌یه دائر اولورسه اولسون ، هرهانکی بر حادثه حقنده او حادثه‌نك قبل الوقوع سببی کشف ایتمش اولان ذکی و تجربه‌دیده بر ذات ، او حادثه‌نك وقوعی‌ده کشف ایتمش اولور . علی‌العموم مخترعات و کشفیات قیه ، هب بوصورتله واقع اولور ، هب بالتجربه تعین ایدن سبیلرخی کشف ایتمکله حاصل اولور . عواقب‌اموری کورمک دیمک‌ده ، اسبابی کورمک دیمکدر . کرك فردی ، کرك اجتماعی و سیاسی حیاته حسن تدبیره بودر ، حادثاتک اسبابی اولدن کشف ایدوب آکا کوره حرکت ایتمکدر . یعنی حسن تدبیر ، تقدیره توفیق حرکتدر . انسان ، حرکتی تقدیره توفیق ایدر ، یعنی مطلوب اولان شینک اسبابنه توسل ایدرسه مطلوب حصوله کلیر . عکس تقدیره عکسی نتیجه حاصل اولور . بوندن طولاییدرکه خلیفه اول ابوبکر صدیق ، (سوء التدبیر سبب التدمیر = سوء تدبیر ، سبب تدمیردر .) بیورمشدر . احادیث معتبره می‌اننده (لا عقل کالتدبیر ± تدبیر کی عقل اولماز .) و (خذ الامر بالتدبیر = ایشیکی تدبیر ایله طوت) کی حسن تدبیری ثنا و توصیه ایدن حدیث شریفلر وارد اولمشدر .

ایشته بعض معتزله علماسنك «انسان ، کندی مقدراتی کندی تعیین ایدر . انسانک قدری کندی انده‌در . انسان آلتک یازیسفی کندی ایله یازار . » کی سوزلری ، شو ایضا حاتدن نشأت ایتمشدر . اولر ، بو کی سوزلریله برمعانی قصد ایتمشلردر . یوقسه او یله ظن اولوندینی کی (قدری) ، یعنی ازله وقوع بولان تقدیر الهی‌ی انکار ایتدکلرندن دکلدر . اولرده قدره قائل اولورلر . فقط

اويله جبريه و اشعريه كې افعال بشريه يې جبري و اضطراري قيلان قدر متحتم و مجبره قائل اولمازلر . شو بوقاريكي ايضاحات دائره سنده ماتريديه نك تلقيسي وجه ايله قائل اولورلر . ماتريديئر ايله معتزله آراسنده كي فرق ، افعال بشريه نك راساً و ابتداءً جناب حق طرفندن مخلوق اولوب اولما سنده در . (اراده) بحثنده در سويله مشدم كه ماتريديئر افعال بشريه مخلوق در ، مخلوق اولمايان يالكنز اراده جزيه نامي ويريان قصد و اختيار كيفي در ديرلر . معتزله ايسه هم قصد و اختيارك و هم افعالك طوغريدن طوغري به ابتداءً مخلوق اولمدينه ، جناب حك اقدار و تمكيزيله انسانك ارضعي اولدينه قائل اولورلر كه (قدر) بحثنده بو ايكي فكرك ايكي سي ده نتيجه اعتباريله بر در ، ايكي سي ده بر نتيجه و اير . معتزله ده ، (قدر) ي طبقاً ماتريديئر كي تفسير و تعريف ايدييورلر . نته كيم بو جهت ، مذهب اعتزله سالك اولان (اماميه) فرقه سندن محقق طوسي نك (تجريد) ناميله معروف كتابنده مذكور اولدني كي ، معتزله علماسنك اك بيوكلرندن مشهور (تفسير كشاف) صاحبي علامه محمود زحشري ده ، (انا كل شئ خلقناه بقدر = بزم شيتي قدرله خلق ايتدك .) آيت جليله سنك تفسيرنده (قدر) ي ماتريديئر كي تعريف و تفسير ايدييور .

ايشته زما تمزده بك زياده زبازد اولان (هر ملت كندی مقدراتنه حاكم اولميدر .) كي سوزلر ، شوايضا ايتديكم معناه آلي نتيجه طوغري اولور . و بو صورتده يعنى بو مقامده استعمال ايديلان « قدر » و « مقدر » كلمه لري ، خلق و مخلوق معناليينه آلماديني تقديرده بو كي سوزلرده شرع مخالف بر جهت بو قدر . حقيقه فردلر كده ، ملتركده كندی سعادت و فلاكلرينه باعث اولان ، ينه كنديلريدر . بر فرد كندی وسائط معيشتي استيخصاله جاليشير ، شرائطي جامع بر صورتده واقفانه اسبابنه توسل ايدرسه ، باشقه بر مانع بولونمديني صورتده باذن الله مقصدينه نائل اولور بالعكس چالشماز ، عطالت و بطالت ايچنده اوتور . هيچ شبهه سز ذات و مسكنت ، فقر و ضرورت ايچنده قالير . چونكه اسباب سعادتك سعادت حصوله كثر مه سي مقتضاي تقدير اولدني كي ، اسباب فلاكتك فلاكت

تولید ائمه سی ده مقتضای تقدیر در هر ایکسی ده مقدر در .

فردلر حقنده بویله اولدینی کبی ، ملتیر و جمعیتلر حقنده ده بویله در . جمعیتلر ده عین قانون ازی به تابعدر . آنک ایچوندر که هر هانکی بر ملت ، بر جمعیت افرادی ، حسن اخلاق ایله متصف اولور ، یکدیگرلرینک حقوقنه رعایت ایدرک عدالت و حقانیت دائر مسنده چالیشیرلر ده زراعت ، تجارت و صناعت کبی اسباب ترقی و اعتلایه مجتهد اصرف قدرت ایدرلر سه ، شبهه سزاومک و اوجیت مظهر سعادت اولور . عکس تقدیر ده دوچار ذات و مسکنک اولور ، و او ذات و مسکنکنی موجب اولان حال بطالت و جهالت ایچنده دوام ایتدیکجه نهایت منقرض اولور کیدر . تاریخ بو بایده شاهد عادل اولدینی کبی ، (ان الله لا یغیر ما بقوم حتی یغیروا ما بانفسهم = بر قومک افرادی کندی صفوت و سحیه لرینی تغیر و فساد تبذیل ایتدیکجه ، الله او قومک نعمت و سعادت ی تغیر ایتمز .) آیت منیفه سی ده بو خصوصده ازی بر قانون الهیدر .

بر مملکتک بقای عدل ایله ، اهالیسنک حقوقه حرمت و رعایت ائمه سیله قائم اولوب بر مملکتک کفر ایله دکل ، ظلم و اعتساف ایله محو و منقرض اوله جفته دایر قرآن کریمده (وما کان ربک لیهلک القرى بظلم و اهلها مصلحون = اهالیسی بینلرنده کی معاملاتده مصاح و حقوقه رعایتکار اولدقلى حالده ، مجرد اونلرک کفر و شرکلى سببیه مملکتلرینی محو و تباه ایتک ، سنک ربکک شان و حکمتندن دکلدر) کبی متعدد آیات کریمه شرفوارد اولمشدر . (قرآن کریمده کفر و شرک ظلم اطلاق اولوندینی کبی بو آیتک صوکنده « مصلحون ، قیدی ده ولوندیغندن امام فخرالدین رازی و سائر کبی بر قسم مفسرین ، بو آیتده کی (ظلم) کلمه سی کفر و شرک ایله تفسیر ایتشلر در که بزده اونلرک تفسیرینه کوره ترجمه ایتدک .) کرک ملنلرک تاریمخنده و کرک بو کونکی حیات ائمه جاری و موجود اولان حقایق ده بونی مؤیددر . بو حقیقته مبذیر که (الملک یبقی مع الکفر و لا یبقی مع الظالم = ملک و سلطنت کفر ایله باقی قالیر ، فقط ظالم ایله باقی قالماز .) کلام کباری ، جل حکمیه صرسته کچمشدر .

ایشته شو ایضا حاتدن پك ای آ كلا شلمش اوله جقدر كه (هر ملت كندی
مقدراتنه حاكم اولمالیدر .) دیمك ، هر ملت شو ذكر اولونان اسباب اقبال
وادبارندن هر هانكیسی دیلر سه كندیسی او كا توسل ایتمه لیدر دیمكدر . بعض
معتزله علماسنك (انسان كندی مقدراتی كندی تعیین ایدر) دیمه سی ده ، بو
معنا به كوره در . مسئله بونقده نظر دن ملاحظه ایدیلنجه بوكی تعبیر لرده بر محذور
شرعی اولمادیفی كورولور . بزم ده سوزی بوقدر اوزاتمقدن مقصدمزده بودر .
خلاصه امام فخرالدین رازی نك (تفسیر كیر) نده ، (والذین اجتنبوا
الطاغوت... الخ) آیت جلیله سنك تفسیرنده بیان ایندیكى اوزره « جناب حق ،
خلق وتكوین خصوصنده اشیاى ایكى قسمه آیرمشدر . بر قسمی طوغریدن
طوغری به بلا واسطه وبلا سبب تكوین وایجاد بیورمشدر . دیگر قسمی بالواسطه
وبرسبب تحتنده خلق واحداث بیورمشدر . برنجی قسم ، عالم اعلانك وعالم
روحانیاتك اشیا و حادثاتیسدر . ایکنجی قسم ده بزم عالمز اولان عالم اسفلك
حادثاتیسدر . بناءً علیه جناب حق ، بزم عالمزده ، بو دنیاده اشیا وحادثاتك
وجود وحدوثی ، بر طاقم معین ومعلو اسبابك خصوصنه معلق قیلمشدر .

شوحالده هر هانكى بر كیمسه بو عالم حادثاتی ، بو دنیا امور ومطالبی ، جناب
حقك اونلرك حصول وحدوثی ایچون تعیین وتخصیص بیورمش اولدینی اسبابه
توسل ایتمیوبده ، طوغریدن طوغری به بلا سبب خلق وایجاد بیورمه سنی جناب
حقدن طلب ایدمك اوورسه ، او كیمسه جناب حقه حكمتنده منازعه وتدبیر
وتقدیرنده مخالفت ایتمش اولور . چونكه واجب الوجود حضرتلری بو طلب
اولونان اشیاك آنلره مخصوص اولان اسباب معلومه نك حصولیه وجود بولماسنی
ازلده حكیم ایتمشدر . سن ایسه اونلرك بلا سبب وبلا واسطه حصوله كلسنی
طلب ایدیورسك كه تقدیر ازلی به منافیدر .

حقایق اشیا به پك مطابق اولان بومطالعات حكیمانه بی ، مشار الیه فخرالدین
رازی حضرتلری ، انشای نصیحتنده كندیسنه (قضا وقدره اعتماد واجب اولوب
جد واجتهاده ، سعی وغیره اعتماد جائز اولمادیفی) در میان ایدن بر چو جغه

سویلدیکی و د سن بو حق ، بو طوغری سوزی ایشیتمشسک ، اما معناسنی
آ کلامامشسک . دیدیکی بیان ایدیور . شمدی بونی احادیث صحیحہ ایلہ
مؤید براییکی مثال ایلہ تنویر ایدلم :

مثلاً خسته لقلری خلق و ایجاد ایدن جناب حق ، اونلری معین اسباب
تحتده خلق ایتدیکی کبی ، اونلرک دواسنی ، ازاله سی اسبابنی دخی خلق ایتشدرد .
بناءً علیه ازاله سی ممکن اولان برخسته لغه گرفتار اولان برذات ، برطیب حاذق
معرفیله خسته لغک تداویسنه توسل ایدر و دواسنه اصابت ایدیلیرسه باذن الله
اکتساب عافیت ایدر . بو حقیقت تجارب مختلفه اید ثابت اولدینی کبی ، (صحیح
مسلم) ده موجود (لکل دام دواء فاذا اصیب دواء الداء برأ باذن الله عز وجل
= هر خسته لغک بر دواسنی واردر . اگر خسته لغک دواسنه اصابت ایدیلیرسه
باذن الله اکتساب برأ و عافیت ایلر) حدیث شریفیله ده ثابتدر .

اسبابه ، تداویسنه توسل ایلہ علل و امراضدن شفایاب اولمق مقتضای قدر
اولدینی کبی ، علل و امراضی داعی احواله معروض قالان ذاتک خسته اولماسی
و میثروبلر واسطه سیله بعض امراضک باشقه لرینه سرایت ایتسی دخی مقتضای
قدردر . بو جهتله امراضی اصول و قواعد طیبیه ایلہ تداوی شرعاً مستحب
اولدینی کبی ، امراض ساریه اصحابک یا نلرینه صوقولما مقده مستحبدر . (کذا
فی الریقه للمحقق البرکوی) . حتی امام غزالی (احیاء العلوم) نامنده کی کتاب
مبجلنده علم طب تحصیلک فرض کفایه اولدینی بیان ایدیور .

(صحیح بخاری) ده مذکور (فر من المجذوم کما نقر من الاسد = آرسلاندن
ناصل قاجار سهک « جذام » علتیه مبتلا اولان کیمسه دن ده اویله قاج .) وهم
(صحیح بخاری) ، هم ده (صحیح مسلم) ده موجود و بناءً علیه صحفی متفق علیه
اولان (لایورد مرض علی مصح = خسته صاحبی دوه لرینی صاغلام و سالم
دوه صاحبک دوه لرینک یانه کوتورهن ، یعنی کوتورمه سین .) [۱] کبی

[۱] مفعول (لایورد) محذوف ای لایورد ایلہ المراض . المراض صاحب الابل
المراض والمصح صاحب الابل الصحاح فعنی الحدیث لایورد صاحب الابل المراض علی ابل
صاحب الابل الصحاح لانه ربما اصابها المرض بقل الله وقدره لا بطبعها والذی بمعنی النبی
(کذا فی شرح مسلم) .

متعدد احادیث شریفه ، مدعایانك صدقنی اثباته كافیدر . بو سوك ایکی حدیث
ایله شمدی بیان ایدم جكم (وبا = طاعون) حدیثی ، دین اسلامجه ده بعض
امراضك ساری اولدیغنی صراحة افاده ایدیور . بو حدیثلر اك موثوق واك
صحیح حدیثلدندر .

حضرت « عمر فاروق » ایله حضرت « امام علی ، نك

(قدر) مفهومنی صورت تلقیلری

علی العموم علمای اسلام ایچنده هر مسئله شرعییه ده اولدیغنی کبی ، بو
(قضا و قدر) مسئله سنده دخی مقصد شاری هر کسدن اول اك ای آکلایان ،
وهر کسدن اول اك ای آکلانان ، بوامتك مسائل دینییه ده اك بیوك ایکی عالمی
اولان خلیفه ثانی حضرت (عمر فاروق) ایله خلیفه رابع جناب (امام علی)
اولشدور . (رضی الله عنهما)

اعتراف ایدم که اکر بن ، مشارالیه جناب فاروقك لفظاً مؤجز اولدیغنی
قدر معنی معجز اولان بیانات حکیمانهلرینی کتب احادیثیه کورمه مش اولسه یدم ،
(بوقضا و قدر) مسئله سنك حقیقه ذوقه وارماش اولاجقدم .

حضرت عمرك صورت تنقیدی

مشارالیه حضرت عمر ، عهد خلافتلرنده هجرتك اون سکزنجی سنه سنده
برای تفتیش (شام) . کیتمك ایستر . مدینه منوره ده بولونان اصحاب کرامك
برقسمی معیت عالیترینه آلاق مدینه دن جیقار . شام جوارنده (شرخ)
دینیان قریبه یه مواصلت ایدنجه ، شام والیسی و سوریه اردوسی قوماندانی اعظم
صحابدن و « عشره مبیره » دن مشهور (ابو عبیده بن الجراح) حضرتلری ،
بعض امراي عسکریه ایله برابکرده حضرت عمرك استقباله کلیر ، وشامده (وبا =
طاعون) اولدیغنی خبر ویرور .

بو خبر اوزرینه جناب عمر ، مشاهیر فقهای اصحابدن امام المفسرین عبدالله
بن عباس (حضرتلری واسطه سیله معیت سنهلرنده بولونان اصحاب کرامی قدم

صره سبله آیری آیری وقسم ، قسم حضور خلافتناهیارینه دعوت ایدر . اولاً مهاجرین اولیفی ، صوکره انصاری یعنی مدینه منوره اهائی اصلیه سندن اولانلری ، دها صوکرده مکة مکرمه نك فتحندن صوکره مدینه یه هجرت ایدن مشایخ قریشی دعوت ایدر . وشامده (وبا) بولوندیغنی خبر ویره رك كیدوب کیتمه مک خصوصنده اونلرله استشاره ایلر . بر قسمی متوکلاً علی الله یولارینه دوام ایله شامه عزیمت ، دیگر قسمی ده وبا تهلکسنه معروض قالماق ایچون مدینه یه عودت رأینده بولونور . حضرت عمر ، اونلری حضورندن چیقاردقن صوکره ایکنجی رأی ترجیح ایله مدینه منوره یه عودته قرار ویرر وبوقرارینی معینلری ارکاننه تبلیغ ایلر .

بونك اوزرینه سالف الذکر شام والیسی (ابو عبیده بن الجراح) حضرتلری ، بوقراره اعتراض ایله حضرت عمره (افراراً من قدر الله = اللهم قدرندنی فرار ایدیورسکنز ؟) دیر .

خليفة کزین جناب عمر فاروق ، جواباً (کاشکی یا اباعبیده ، بوسوزی سندن باشقه سی سوبله سیدی) دیدکدن صوکره (نعم نفر من قدر الله الى قدر الله = اوت ، اللهم قدرندن ینه اللهم قدرینه فرار ایدیورز .) دیر ، وحقیقت مسئله یی تنویر ایچون (رأیک نادر ، سوبله باقالم ؟ سنك دوه لرك اولسهیدی ده برطرفی اوتلی وچنزار ، دیگر طرفی چوراق وشوره زار بردریه ایتمش اولسهیدی . شیمدی سن ، او دوه لری اوتلی جهته ده رعی ایدر وقارنلرینی طویورورسهك اللهم قدریله رعی ایتمش وبالعکس جـوراق وقوری طرفده رعی ایلر ، آج براقیرسهك ینه اللهم قدریله رعی ایتمش اولمازمیسک ؟) دیر وبوجواب حکیمانه سبله حضرت ابو عبیده یی اسکات والزام ایلر .

حضرت عمر ، صـوك جمله یی سونلیدیکی صره ده مقدما بعض خصوصات ذاتیه سی ایچون غیوبت ایتمش اولان ینه اعظم اصحابدن وابو عبیده کبی « عشره مبشره » دن (عبدالرحمان بن عوف) حضرتلری کایر ومسئله یه واقف اولونجه « بنم بوبابده معلومات مخصوصه » م واردر . رسول اکرم صلی الله علیه وسلم

افندمن حضرت تلویدن ایشیتمشدم : (اذا سمعتم به بارض فلا تقدموا عليه واذا وقع بارض واتم به افلاتخرجوا فراراً منه = بربرده (وبا) اولدیفنی ایشتدیکنکز زمان اویره ، اونك اوزرینه کیتمیکنز . وبربرده سز بولوندیکیکنز حلاله «وبا» ظهور ایدنجهده اوندن فراراً اویردن چیقمايیکنز .) بیورمشلردر ، دیر . امیرالمؤمنین حضرت عمر ، بوحدیثی ایشیدنجه رأی واجتهادینك بوحدیثه ، بو حکم شارعہ تماماً موافق دوشمش اولماسندن طولای جناب حقہ حمد و ثنا ایدر وکرك کندی قراری وکرك بو حدیثك حکمی وجه ایله مدینه منوره به عودت ایلر ...

بوحدیث ، هم (بخاری شریف) ده وهم (صحیح مسلم) ده عیناً موجوددر وبناء علیه صحفی ائمه حدیث عندنده متفق علیهدر . حدیث مذکور بخارینك (کتاب الطب) نده و مسلمك (باب الطب) نده محرردر .

ایشته حق ایله باطلی تفریق خصوصنده درین برنخوذ نظره ، بك بیوک اصابت رأیه مالك اولدیفنی ایچون جناب پیغمبر طرفندن (فاروق) لقیله تلقیب وبوصورتله قدر عرفانی اعلا ایدیلن حضرت عمر ، محضر اصحابده واقع شو بیانات عارفانه لريله « قدر » ك ماهیت حقیقه سی حقنده هم یارانئ ، هم اخلافی تنویر وارشاد ایله مشدر .

مشارالیه حضرت تلری ، اولی ویا اولتسز محلهده دومك رعی مثالیه شو حقیقه قی بیلدیرمك ایسته یورلرکه قدر دینلن سر السهی مسیباتك اسبابه ربطندن عبارتدر . خارجده سبب تحقق ایدنجه ، بر مانع بولونمادیفی صورتده مسببده تحقق ایدر . سبب تحقق ایتمزه مسببده تحقق ایتمز . بوجهتله انسانك قدرت و اراده سی تعلق ایده بیلن خصوصاتده قدرك بری مثبت ، دیکری منفی ایکی جهتی وارددر . وانسان کندی اراده سیله بواکی جهتدن هانکیسنه توسل ایدرسه اوجهت تعیین ایدر . وبناء علیه اهنه ویا علیهنه قدرك تحققنه کنیدیمی سنیت ویرمش اولور . ایشه بو حقیقت ازلیه به بناء درکه قدردن فرار و احتراز نمکندر . یعنی کندی ضررینه اولان سببك تحققنه میدان ویرمه مك انسانك ید اختیارنده در . جناب حق طرفندن بویه تقدیر اولونمشدر .

ایشته بوملاحظه یه مبنی حضرت عمر ، شامه کیتمکدن صرفنظر ایله مشدر .
 چونکه شامه کیتمکله وبایه طوتلق قدرینک تحقنه میدان ویرمش اوله جق .
 زیرا شامه کیدنجه وبایه مصاب اولاق سینه معروض قالینه جق ، اوسبب تحق
 ایدر و اجرای تأثیر ایتسنده بر مانع بولونمازسه ، (بنه نك وبا میقروبنه غلبه
 ایده جك قدر قوتلی بولونمسی کی) وبایه مصاب اولاق مسببی ده تحق ایده جك که
 قدردر ، مقتضای تقدیردر . بوقدری تحق ایتدیرمه مک ایچون شامه کیتمکدن
 صرف نظر ایتش وبوصورنله سیدک تحقنه میدان ویرمه مشدر که بوده قدردر .
 اما شامه کیدلش اولسه یدی حقیقه وبایه مصاب اولورلر میدی ، اولمازلر میدی ؟
 بو جهت مجهول . معلوم اولان برشی وارسه اوده ، کیدلدیکدن طولانی
 معیت خلافتناهیله رنده بولنا نلردن هیچ بریسنک وبایه مصاب اولما مسیدر .
 حالبوکه شامه عودت ایدن سالف الذکر امرای عسدریهدن بعضیلری وبایه
 طوتوله رق وفات ایتمشدر . احتمالکه شامه کیدلسه یدی اونلردن بعضیلری وفات
 ایتسه لر بیله خفیف بر صورتده مصاب اولورلر و یا خود هیچ اولمازلردی . بوراسی
 بیلینه میه جکی و یا او وبانک شدتله حکم سوردیکی بریره کیتمک تهلکلی اولدینی
 ایچسون حضرت عمر ، کیتمکدن صرف نظر ایتمشدر . چونکه قرآن کریم
 (ولانلقوا بایدیکم الی التهلکة) آیت کریمه سیله نهلکبه القاء نفس ایتمکدن
 اهل اسلامی منع ایتمشدر .

ایشته حضرت عمر ، قدری بویله آ کلابور . بوقاریکی ایضاحندن مستبان
 اولدینی اوزره ماتریدیلرده بویله آ کلامشردی . حق معتزله نك آ کلابورده
 باشقه برشی دکلدرد . حضرت عمرک ذکر اولونان کلامی پک واضح ، سیاق
 وسباق قرینه سیله تأویلی غیرقابل صورتده قطعی اولدینی حالده ، اغرب الفرائددر که
 ینه بعضی علما ، مشارالیهک بوسوزلورینی - صحیح مسلم شارحی امام نووی نك
 دیدیکی کی - پک معناسز وزیروا تأویللرله تأویله قیام ایتمشدردر . ایشته بوده
 اشعریه ذهنیتدن متولد پک یا کلش برتلقی نتیجه سیدر .

حضرت امام (علی) نك . قدر ، مفهومی صورت تلقینی

(شرح مقاصد) ، (شرح تجرید) و (شرح مسایره) کبی الک مقبر کتب
کلامیه ده محرر اولدینی اوزره خلیفه رابع حضرت امام علی « کرم الله وجهه » ،
مشهور (صفین) محاربه سندن عودت بیوردقلری انشاده معیت خلافتیناهیلرنده
بولونان اختیار برذات ایله بینلرنده شوبولده برمحاوره جریان ایدر :

اختیار — نه بیوررسکیز ؟ شامه یعنی (صفین) کیدیشیمز ، جناب حقك
قضا و قدریله می واقع اولمشدر ؟

امام علی -- دانه بی یاروب ایچندن فیلیز چیقاران و هیچ یوقدن ذی شعور
نفسر ، انسانلر یاراتان جناب خلاق عظیم الشانه قسم ایدرم که بزبرمحله آیاق
باصداق ، بردریه ایندك و بریایره چیقماق ؛ آنجق جناب حقك قضا و قدریله
باصدق ، ایندك و چیققدق .

اختیار — چکدیکم زخمت و مشقته مقابل عندالله مظهر مکافات اولمق
ایستم . حالبوکه بن کندم ایچون هیچ بر اجر و ثواب کورمیورم .
امام علی — صوص ، اختیار ! (صفین) . کیدر ایکن کیدیشیکیز ایچون
سزه جناب حق ، اجر عظیم احسان بیورمشدر . سزحالات و حرکاتکزدن
هیچ برشیده مجبور و مکره اولمادیکنز ، و احوالانه مضطر بولونمادیکنز .
اختیار — ناصل ؟ هانی یا ، بزی قضا و قدر شوق ایتشدی یا .. !!

امام علی — زواللی اختیار ! غالباً سن « قضا و قدر » ی انسانلری افعال
و حرکاتنه مجبور قیلان قضاء لازم و قدر حتم (یعنی موجب و مجبر) ظن ایندك ،
اولیله می ؟

اگر اولیله اولسهیدی ، اووقت ثواب و عقاب ، وعد و وعید ، امر و نهی
باطل اولور و جناب حق طرفندن هیچ برکناهاکاره لوم و تقییح و هیچ برمحسن
و مطیعه مدح و تحسین وارد اولماز ، و اییلک ایدن قتالقی ایدندن زیاده .
قتالقی ایدنده اییلک ایدندن زیاده ذمه لایق بولونمازدی .

اولیله برعقیده ، عبده اونان و عونته شیطانك ، شهرد زورك و حق باطلدن ،

خطایی صوابدن تفریق و تمییزه مقتدر اولمایان اصحاب جهل و عماك سوزیدر .
 اولئر ، بوامتك قدریه سی و مجوسیدر . جناب حق ، تخیراً امر ایدوب تحذیراً
 نهی ایتمش و قولای اولانی تکلیف ایله مشدر . و کنديسنه مغلوب و مجبور اوله رق
 معصیت و مکره اوله رق اطاعت ایله مشدر . پیغمبران عظامی قوللرینه عبث
 اوله رق بعث و ارسال ایتمه مش و سموات و ارضی و بینلرنده کی موجودانی باطل
 اوله رق خلق و ایجاد ایله مش . اولتقی ، بواعقاده اصحاب کفرک ظن باطلیدر .
 عذاب ناردن ویل ، او اصحاب کفره ...

اختیار — او حالده بزم کنديسنه سیر و حرکت ایستدیکمز قضا و قدر نادره ؟
 امام علی — او ، آنجق اللهم امری و صاحب حکمک حکمیدر =
 « هو الامر من الله والحکم من ذی الحکم » .

حضرت امام ، اختیاره بوجوابی ویردکن صوکره « سنک ربک یالکیز
 کنديسنه عبادت ایتمه کزه حکم ایتمشدر . ، مألنده اولان (وقضی ربک الاتعبد
 و الا اياه) آیت کریمه سی تلاوت بیورمش و بونکله (قضا) نک امر و حکم
 معناسنه کلدیکنه استشهاد ایله مشدر ...

کورولیورکه اصحاب کرامک اک بیوک عالم و فقیهی اولان و حقایق آموز
 ائم افندمز خضر تلرینک تحت تعلیم و تربیتند بیومک صـورتیه طوغری دن
 طوغری به مشکلات نبوتدن اقتباس انوار فیوضات ایلین حضرت امام علی ،
 (قضا و قدر) لفظلرینی الفاظ مترادفه قیلندن عد ایدهرک ، انسانلرک افعال
 و حرکاتنه تعلق ایدن یرلرده هرایکیسندنده مقصود اولان معنائک « امر و حکم »
 معناسی اولدیغی و بونک اراده بشریه اوزرنده جبریه و اشعر به نک ظن ابتدکاری
 کی مجبور و ماضی بر تأثیری حائر اولمادیغی صراخه بیان و او یله بر عقیده موهومه بی
 بک شدتلی بر صورتده رد و جرح ایله یور .

(۸۰۰) سکیز یوز سنه سندن صوکره کان علی العموم علمای حنفیه ایچنده
 تدقیق و تتبع ، نفوذ نظر و وسعت معلومات خصوصلرنده بر مثل دهاکله مش
 اولان وهله فقهده رتبه اجتهادی اخراز ایلین بیوک محقق امام « ابن همام » ،

(میسایره) سنده مشارالیه امام علی نك بو تلقیسی قبول و ترجیح ایدیور ، و بوتلقی به کوره حکم ازلی اتمیدن عبارت دیمك اولان قضا و قدری ، جناب حقك (علم) صفتنه ارجاع ایله یور . شو حالده قضا و قدر ، بالجمله اشیا و حادثاتك لایزالده نه صورتله وقوع بوله جقلری علم قدیمیه ازله بیلمه سی دیمك اولور . ایشته حضرت عمر ایله حضرت علی نك « قضا و قدر » مفهومی حقنده کی صورت تلقیلری بوندن عبارتدر . بویکی تلقی آراسنده بفرق یوق کیدر . هر ایکی تلقی بی ده بر اصله ارجاع قابلدور .

تلخیص

شو اوزون تحقیقات و ایضا جاتدن پك آجیق بر صورتده کور و لیور که (قضا و قدر) کله لرندن متصود شارعك نه اولدیفنی تعینده علماء اسلام حیرتده قالمشلردور . هر بری کندنی آ کلایشنه کوره معنی ویرمش ، بوندن طولاییدر که معین بر معناده اتفاق ایده مه مشلردور . بونك ده سببی ، كرك نصوص قرآنیه ده و كرك اجادیت نبویه ده بویکی کله نك مختلف و متعدد معنارده وارد اولماسیدر .

مع هذا شو جهت تحقیق ایدیور که حضرت پیغمبردن سوکره بوامت اسلامیه ایچندن حقایق اسلامیه دایر بیانانده بولمغه هر کسدن زیاده صلاحیتدار اولان ایکی پیوك ذاته ، حضرت عمر فاروق ایله جناب امام علی به کوره قضا و قدر ، اوپله جبرییه و اشعریه نك تلقیلری کی انسانلری افعال و حرکاتنده مجبور و مضطر قبلان قضاء ملزم و قدر مبرم دکلدور . بلکه قدر معلقدر ، یعنی بشرک افعال و حرکاتنی کندنی اختیار لرینه ربط و تعلیق ایدن تقدیر ازلیدر .

باشده امام اعظم حضرتلری اولدیفنی حالده علی العموم فقههای حنفیه و علمای ماتیدیه ، بومسئله ده مشارالیهما حضر عمر و حضرت علی به پیرو اوله رقی اولنلرک فکیرلرینی قبول ایتشلر و بوسورتله اشعریه دن آیرلمشلردور . هر کون کوزلرمن اوکنده بیکلرجه مثالی جریان ایتکده اولان حقایق اشیاده ، ماتریدلرله برابردور ، اولنلرک صدق عقیده لرینه شهادت ایتکده در .

بو عقیده‌نك خلاصه‌ی شوندن عبارتدر : قدر ، ازله مسیاتك اسبابه
ربطدن، علی‌العموم اشیا و حادثاتك حدوتی معین‌سیلر اوزرینه ترتیب‌ایتمکدن
عبارتدر . شوخالده لایزالده، خارجه سبب تحقق ایدنجه مسببده تحقق‌ایددر،
وبالعکس سبب تحقق ایتمزسه مسببده تحقق ایتمز . افعال اختیاریه‌نك سببی
خارجه تحقق‌ایتدیرمك، انسانك الندهدر . چونكه جناب‌حق، اراده‌جزئییه‌ی،
تعیردیکرله قصد و عزمی افعال بشریه‌نك وقوعه سبب اولمق اوزره تعیین و تقدیر
بیورمشدر . بوجهتله انسان معین برفعلك وقوعی قصد ایدنجه جناب‌حق او
فعلی خلق و ایجاد ایدر ، قصد ایتمزجده خلق ایتمز . جناب‌حق ، ازله بویله
تقدیر بیورمش، بویله حکم‌ایتمشدر . حادثات خارجه‌نك حدوتی ایچون برطاقم
معین‌سیلر اولدینی کبی، افعال اختیاریه‌نكده معین برسبی وارد اوده دیدیکم
کی انسانك قصد و اختیاریدر .

واقعا افعال بشریه‌نك انفسی و آفاقی دها باشقه سیلری وارددر . انسان بو
سیلردن طولای برفعلك اجرا و یا عدم اجرایی قصد ایدر ، بوجهت منکر
دکدر . فقط فعلك اصل سبی قصددر . اوسیلر قصدك صدورینه باعث اولان
دواعیدر . واکثریا مقاومتلری قابل اولان سیلردر . حتی زمانمزه آچلقله
اتحاره قرار ویرن بر بلدییه رئیسك بر آیدز یاده آچلقك تضیقنه قارشى مقاومت
ایتدیکی واوله‌مسئ. ایچون دولته رسماً صرف ایدیلن برچوق مساعی به رغماً
ینه عزمنده نبات‌ایدرك قرارى وجهله اولوب کیتدیکی کورولمشدر . آنکچون
افعال بشریه‌نك اصل معین سبی قصد و اختیاردر ، عزم مصممدر . بونك
خارجنده قالان عوامل و دواعی، قصدك اسباب محرک‌سیدر و قابل مقاومتدر .
قصدك صدوری اوزرنده کی تأثیرلری انکار اولونه‌ماز، درجات متفاوتده اولمق
اوزره آز چوق تأثیرلری وارددر . آنکچون مواد جزائییه‌ده بوجهت نظر
اعتبار آلمق ، بناء علیه بعضاً اودواعی بی اسباب مخففه‌دن عد ایتك لازمدر .
حتی بعضاً بتون بتون اسباب معافیتدن بیله محدود اولمق لازم کلر . لکن بو
جهت بویله اولمقله برابرینه بونلر اکثریا انسانك قدرت هرمنی کلیاً سبب‌ایدرك

وبناء عليه بتون افعال بشریه انسانلری معذور کوستره جک شیلر دکلدلرلر .
 آنک ایچوندركه هیچ بر فرد کندی قصورینی ، کندی تدبیرسزلکنی
 قدره حمل ایدرک ، کندیسنی معذور کوسترمکده حقی اولاماز . مع هذا شاید
 بعض حرکاتنده صورت قطعیده مجبور و مضطر قالدینی ، کلیاً مسلوب الاختیار
 بولوندینی اولور ایسه ، شبهه سز اوکی حرکاتندن مسئول اولماز . فقط اکثر
 حرکاتی اویله دکلدلر ، اولنلرک وقوعه کندی قصد و اختیار ، سبیت و برمشدر .
 ننه کیم بوجهت یوقاریده مثاللریله ایضاح اولونمشدی .

ایشته بو حقیقته مبنی قدری بری انسانک قدرت و اراده سنک تعلق ایدر بیله جکی
 افعاله ، دیگر قدری قدرت و اراده بشریه ک تعلق خارجنده قالان حادثانه مائد اولمق
 اوزره ایکی قسمه آیرمق اقتضا ایدیور . برنجیسی ، انسانلرک اختیارلرینه
 مربوط و تعلق اولان مقدراتدر . بوقسمک خارجنده تحقنه انسان کندیسی
 سبیت و برر ، صرف کندیسنک حسن تدبیری و یا سوء تدبیریله حاصل اولور .
 تارایه تخم اکوب اکمهک صورتیله محصول آلوب آلامسی کی . ایکنجیسی
 ایسه ، بویله دکلدلر ، انسانلرک قدرت و اراده سی تعلق ایتمین مقدراتدر . ایشه
 بوقسم مقدرات ، صرف قضاء لازم و قدر متعتمدر ، بزم (طالع) و شانس
 دیدیکمز شیلردر . بزه کوره آب آنسزین ظهور ایدن آفات سماویهدن حصوله
 کلن خسارات کی . بعضیلر مزک جیلز ، ضعیف و خسته لقی اوله رق یارادیلشمز
 و بونلره مائل حالات سائر کی .

ایشته بویکی نوع مقدراتدن برنجیسنده انسان کندی قدرینی کندی تعیین
 ایدر . تقدیر ازلی بویله تقرر ایتمشدر اختیار ایلان افعالك همان جمله سی بو
 قسمده داخلدر . موضوع بحثمز اولان قدردن اصل مقصوده بو برنجی نوع
 قدردر . ایکنجی نوع مقدرات ، قدرت و اراده مزک خارجنده اولدینی ایچون
 موضوع بحثمز دن خارجدر بونلرک بر قسمی صرف اثر تصادفدر ، بعضیلریده
 معین بر حسن طالع و یا بدو طالع نتیجه سیدر . واسبابی بزجه مجهولدر . ایشه
 اصل سرالهی اولان (قدر) ده بودر . و بوسر الاهی و قوف بزم ایچون مستحیلدر .

مع هذا كرك برنجی نوعدن اولان و كرك ايكنجی نوعدن بولونان مقدراتك كافسی ، ازله علم الهیده معلومدر . كافسیده او علم ازلی به كوره تقدیر وقضا اولونمشدر . فقط بوندن طولانی انسانلرك كندی فعل وحركتلرنده مضطر ومسلوب الاختیار اولالری لازم كلز ، چونكه یوقاریده (اراده) بحثندهده سویله مشدم كه جناب حقك لايزالده اشیاي خلق وایجادی ، ازله کی تقدیرینه ، تقدیری اراده سنه ، اراده سیده علمنه تابعدر . علم ازلی الهی ده لایزله کی معلومه تابعدر . معلوم ایسه ، بزم كندی اختیار مزله صادر اوله حق افعالمزدر . جناب حق ، بزه بخش ایتش اولدینی قدرت و اراده صفتلریله بزم نه کی افعالی اختیار ایده جكمزی ازله علم قدیمیله كشف ایتش وكشف ایتدیکی کی اراده بیورمش . یعنی ناصل ایسترسهك اویله قصد و اختیار ایتمه مزی اراده ایتش و بناء علیه افعالمزك كندی طرفندن خلق وایجادینی كندی اختیارلرمزه معلق اوله رق تقدیر بیورمشدر كه بو اراده و تقدیر ، بزم اختیار مزك ینه اختیاری ، اوله رق بزدن صدورینه منافی دكلدر . نته كیم بو کیفیت (اراده) بحثنده مثالیه ایضاح اولونمشدی . اورایه مراجعت اولونه .

ایشته (قضا و قدر) و (اراده بشر) مسئله لرنده ماتریدییه فرقه سنك ، یعنی باشده امام اعظم حضرتلری اولدینی حالده بتون علمای حنفیه نك فیکر وتلفیسی بودر . محققین حنبلییه دن (ابن تیمیه) نك (منهاج السنة) سند و (ابن قیم) ك (شفاء العلیل) نده بیانلرینه كوره مذاهب سائره فقهیه سنك اكثریسی ده ، بومسئله لرده حنفیلرله برابر درلر . حقوق ومسئولیت نقطه نظرندن بر حقوقی ایچون یا بوماتریدییه فکریخی ویاخود معتزله فکریخی قبولدن باشقه ده چاره یوقدر . ذاتاً ماتریدیلرله معتزله آراسنده کی فرق ، بك اوقدر بیوك بر فرق دكلدر . معتزله ، قدرك هم قصد و اختیار اوزرنده ، هم ده افعال اختیاریه اوزرنده تأثیری یوقدر دیرلر . ماتریدیلر ایسه یالکیز قصد و اختیار اوزرنده تأثیری یوقدر ، فقط افعال اوزرنده تأثیری واردر . یعنی انسان كندی افعالمك قاصد و كا سببدر وجناب حق خالقیدر دیرلر . بو ایکی فکرك بر نتیجه یه واره جنی درکاردر ،

آزاده کی نزاع ، نزاع لفظی قیلندندر .

جبرییه ایله اشعرییه کلنجه : بونلرک هر هانکیسنک فکرینی قبول ایتمک هم حقایق اشیا یی و هم مسئولیت حقوقیه فکرینی انکار ایتمک اولور . چونکه یوقاریده (اراده) بحثنده کورولدیکی وجهله جبرییه قدرت و اراده بشریه یی تا اساسندن وکایاً انکار ایدیور . اشعرییه ، قدرت و اراده بشریه نك اساسنی انکار ایتمه یور . سده ، تأثیرلرینی انکار ایدیور . شو حالده هراییکی فرقه یه کورده ده قدرک افعال بشریه یه تعلق ایدن قسمی ده ، انسانلری حرکتلرینده مضطر قیلان قدر مجبر و مبرم دیمک اولور .

ایشته روحلری اویوشدیران ، قانلری قوروتان ، اعتماد نفسی و هنرم و اراده یی اساسندن ییقان ، انسانلری عطات و بطالتیه سوق ایدن فکر ، بو فکردر . عالم بشریتیه بوندن دهامضر بر فکر تصور اولونا ماز . بو فکره کوره بتون ظلمه یی و هالجه اصحاب جنایتی ، هیئت اجتماعیه ده حاری اولان قنالقلری معذور و حتی مشروع کورمک ، علی العموم انسانلری حیوانلر کی باشی بوش کندی حاللرینه ترک ایتمک ، محکمه لری قیامق ، حکومتلری لغو ایتمک و بتون مؤسسات صناعیه و فیه یی بیله قالدیرمق لازم کلیر . واقعا اشعرییه ، بویله سویله میور . انسانلرک مکلفیتیه قائل اولویور . اولویور اما ، تکلیف مالایطاق قیلندن اولمق اوزره قائل اولویور . تنه کیم بومسئله آشاغیده آیریجه ایضاح اولونه جقدر .



شو اوزونجه سورن «مقدمه» نك فرق اسلاميه به ، اراده و قدر مباحثه متعلق اولمق اوزره محتوی اولدینی مسائل سالفهیی، بوصورتله تدقیق ایتدکدن صوکره اصل مسائل اصولیهیی، یعنی حکم ، حاکم، محکوم به و محکوم علیه حقیقه کی مسائلی ایضاح ایده لم :

- ۱ -

حکم

کچن سنه کی درسارده ، علم اصول فقهک تعریفی ایضاح صدندده سویله مشدک . (حکم) لفظی ، فی الاصلی منع معناسنده در لفه و عرفاً فصل خصومت و اجرای حکومت کبی دیگر معنارده استعمالی ، منع معناسنی تضمن ایتدکلرندندر . صرف فقهاوه «حکم» قضا معناسنده مستعمل اولدینی کبی «برشی اوزرینه ترتب ایدن اثر» معناسنده دخی مستعملدر . بیعک حکمی ملکیتدر دینیلیرکه عقد بیع اوزرینه ترتب ایدن اثر ، ملکیتدر دیمکدر .

«حکم شرعی» ده ، خطاب شارعک اثری اولدینی ایچون اوکا حکم اطلاق اولونمشدر . آنک ایچون حکم شرعی ، «افعال مکلفینه تعلق ایدن خطاب شارعک اثریدر» یعنی خطاب شارعله ثابت اولان شیدر . دیه تعریف اولونور . (الحکم مایبث بـخطاب الشارع المتعلق بافعال المكلفین) بزم بوراده ایضاح ایده جکمز حکم ده ، ایشه بو حکم شرعیدر . بزم برده اننای سخاورده ده «بو بویله در ، ظایر اویله دکدر» دیه واقع اولان حکممز واردرکه بو ، حکم

بو و مابعدی فورمه لر استانبول دارالفنونی «طلبة حقوق جمعیتی» طرفندن نشر

ایدیلشدر (۱۳۳۹) .

منطقیدر ، درسزدن خارجدر . خطاب شارعك اثری اولان بو حکم شرعی ،
اول امرده ایکی قسمه تفریق اولونور .

۱ - حکم تکلیفی .

۲ - حکم وضعی .

حکم تکلیفی ، تمییردده آ کلاشلدینی وجهله انسانلر ایچون مکلفیت
شرعییه کی کوسترن ، یعنی بر فعلك یا ییلماسنك و یا ییلمامسنك لازم اولدینی ،
صحیح و یا غیر صحیح بولوندینی بیلدیرن حکملردر . حکم وضعی ده ، افعال
شرعیه نك اوصافی و شرائط لازمه سی بیلدیرن حکملردر . افعال شرعیه دیه
عقود و فسخه ، یعنی بیع و اجاره کی عقدلره و اونلری اقاله کی فسخلره دینیر .
حکم تکلیفی ، یا فعل مكلفك صفتیدر . وجوب ، حرمت ، صحت و بطلان
کی . و یا خود فعل مكلفك اثریدر . ملك رقبه ، ملك منفعت کی . چونکه
ملکیت ، بیع و اجاره ، هبه کی بر عقدك اثریدر ، آنك اوزرینه ترتب ایدر .
علی العموم عقدلرایسه مکلفك فعلیدر ، صفتی دکلدر . حالوکه وجوب و حرمت ،
صحت و فساد کی حکم شرعیلر ، فعل مكلفك صفتیدر . آنك ایچون بو فعل
واجبدر ، بو ایش جرامدر ، بو عقد صحیح و یا فاسددر دینیلیر .

فعل مكلفك صفتی اولان حکملرده ، احکام دنیویه و احکام اخرویه
ناملریله ایکی قسمه آریلیر . احکام دنیویه ، کندیلرنده اولاً و بالذات مقاصد
دنیویه معتبر اولان حکملردر . صحت ، فساد ، انعقاد ، بطلان ، نفاذ ، لزوم
کی . چونکه بونلردن اول امرده مقصود اولان شی - عباداتده تفریغ ذمت
و عهده دن خروج ، معاملاتده ملکیت کی - امور دنیویه در . بو احکام دنیویه
اعتباریله فعل مكلف ، صحیح و فاسد ، باطل ، منعقد ، غیر منعقد ، نافذ ،
غیر نافذ ، لازم و غیر لازم کی قسملره آریلیر .

احکام اخرویه ، کندیلرنده اولاً و بالذات مقاصد اخرویه اعتبار اولونان
حکملردر . وجوب ، حرمت ، اباحه کی حکملردر که زیرده ایضاح اولونه .
جقدر . بو احکام اخرویه دن اول امرده مقصود اولان شی ، ثواب و عقاب

کبی امور اخرویہ در . آنک ایچون بونلره احکام اخرویہ اطلاق اولونمشدر .
شمدی صرہ سیلہ اولاً احکام دنیویہ پی ، صوکرده احکام اخرویہ پی برر برر
برر برر ایضاح ایدہلم .

احکام دنیویہ ، صحت ، بطلان ، فساد ، انعقاد ، عدم انعقاد ، فحاذ ، عدم
فحاذ ، لزوم وعدم لزومدن عبارتندر . بو حکملر اعتباریلہ فعل مکلفده صحیح ،
باطل ، فاسد ، منعقد ، غیر منعقد ، لازم و غیر لازم قسملرینہ منقسم اولور .
صحت - بر فعل مکلفک مقصود دنیویہ موصل اولماسنہ (صحت) واو
فعلہ (صحیح) دینیر . بو ، او فعلک اصلاً ووصفاً یعنی ہم ذاتی اعتباریلہ ،
همده اوصاف خارجیہ سی اعتباریلہ مشروع اولماسیلہ تحقق ایدر . بو جہتلہ
صحت ، بر فعل اصلاً ووصفاً مشروع اولمقدر دیہده تعریف اولونور .

بطلان — بر فعل مکلفک مقصود دنیویہ اصلاً موصل اولماسنہده
(بطلان) واو فعلہ (باطل) اطلاق اولونور . بو ، او فعلک اصلاً و ذاتی
اعتباریلہ مشروع اولماسیلہ اولور کہ ہم وصفاً ، همده ذاتاً و اصلاً غیر مشروع .
اولق دیمکدر . اصلاً صحیح اولمایان (بیع باطل) کبی کہ اصل و ذاتی اعتباریلہ ،
یعنی ارکان و شرائط اصلیلہ سی اعتباریلہ وجود بولاماش دیمکدر .

فساد — بر فعلک مقصود دنیویہ اصلاً موصل اولوبده رصفاً موصل
اولماسنہ ، تعیر دیکرلہ بر فعلک اصلاً مشروع ، وصفاً غیر مشروع اولماسنہ
(فساد) واو فعلہ (فاسد) تسمیہ اولونور . بوده ، ارکان و شرائط اصلیلہ سی
اعتباریلہ مشروع فقط اوصاف و شرائط خارجیہ سی اعتباریلہ غیر مشروع
اولقلہ حاصل اولور . بیع فاسد ، اجارہ فاسده کبی .

انعقاد — انعقاد ، بر فعلک و عقد کبی بر تصرف شرعی نک متعلقندہ
آری ظاهر اولہ حق و جہلہ وجود بولمہ سیدر . تعریف دیکرلہ انعقاد ، ایجاب
و قبولک متعلقندہ آری ظاهر اولہ حق و جہلہ یکدیگرہ تعلق و ارتباطندن
عبارتندر . او فعلہ ، او تصرف شرعی بہ (منعقد) دینیر . اجزاء تصرفک ،
یعنی ایجاب و قبولک اولوجہلہ عدم ارتباطنہده (عدم انعقاد) واو فعل

و تصرفه (غیر منعقد) اطلاق اولونور .

اجزاء تصرفك ، ايجاب و قبولك يكدیكره تعلق و ارتباطی ایکی درلودر .
بری متعلقنده اثری ظاهر اوله جق ، دیگرى اولمایه جق صورتده اولور . مثلاً
بیعده ايجاب و قبولك متعلق ، میبع ایله نمندر . ظاهر اوله جق اثر ایسه بایعك
نمنه ، مشتریك میبعه مالك اولمه لریدر . بیع غیر منعقدده ايجاب و قبولك
بر بریله ارتباطی ، متعلقنده اثری ظاهر اوله جق صورتده اولمادیغندن یعنی
بایعك نمنه و مشتریك میبعه مالكیتلرینى افاده ایتدیكندن ايجاب و قبولك
یكدیكره تعلق اولسه بیله انعقاد یوقدر . فقط بیع منعقد بویله دكلدر . اونده
ايجاب و قبولك يكدیكره اتصال و تعلق ، متعلقنده اثری یعنی ملكیت ظاهر
اوله جق وجهله وقوعبولمشدر . بوده شارعك وضع ایتیش اولدینی شرائط
انعقادات تحقیقه حاصل اولور . بناءً علیه بو صورتله حصوله كنن بیع منعقد ،
اثری اولان « ملكیت » ی افاده ایدر .

نفاذ -- بر فعل و تصرفك مقصودینه فی الحال موصل اوله سنه ، تعبیر
دیكره بر فعل و تصرف اوزرینه اثرینك فی الحال ترتب ایتمه سنه (نفاذ) واو
فعل و تصرفه (نفاذ) تسمیه ایدیلیر . مثلاً بیع نافذده اثری اولان ملكیت ،
هان وفی الحال ترتب ایدر . یعنی بیع ، منعقد اولور اولماز در حال بایعك نمنه ،
مشترینك میبعه مالك اولمه سی لازم کلیر . غیرك حق تعلق ایدن بیع موقوف
ایسه بویله دكلدر . او منعقد اولقله برابر اثری اولان ملكیت فی الحال ترتب
ایتمز . صاحب حقه اجازته موقوف قالیر . اجازت ویرسه اولوقت او بیع ،
نافذ اولور و بناءً علیه ملكیت ترتب و تحقیق ایدر . اجازت ویرمه بیع منقسخ
اولور .

لزوم -- لزوم ، بر فعل و تصرفك تراضی طرفین اولمق سزین رفع و الغاسی
ممکن اولمایه جق صورتده واقع اولمه سیدر . او فعل و تصرفه (لازم) اطلاق
اولونور . خیاراتدن عاری اولان عقد بیع کې . بر فعل و تصرفك عاقدیندن
یا لکز بری طرفندن رفع و الغاسی ممکن اوله جق صورتده واقع اولمه سنه (عدم

لزوم) و او فعله ده (غیر لازم) دینیر . کندیسند خیاراندن بری بولومان
عقد بیع کی که حاضر اولدینی بخیرینه بناء طرفین عاقبتندن یا لکیز بری طرفندن
فسخ و الغا ایدیه بیلیر . افعال سائرده بویه در . هر هانکی بر فعل مکلف ، او
فعلی ایلریده دفع و الغا ایتدیره بیهلجك شروط و قیوددن خالی اولور ایسه ،
او فعله لازم دینور . عکسی تقدیرده غیر لازم اطلاق اولور .

شو ایضا حاتدن آکلا شلمشدر ، که انعقاد ، صحت ، نفاذ و لزوم باشقه باشقه
وصف لر در . انعقاد ، صحت و نفاذ و لزوم دن هیچ بری مستلزم دکدر . یعنی
انعقادك وجودی ، صحت ، نفاذ و لزومك وجودینه متوقف دکدر . انعقاد
بولورده اولر بولونمایه بیلیر . صحت ده نفاذ و لزومی و نفاذده لزومی استلزام
ایتمز . بناء علیه بیع منعقد ، صحیح اوله جفی کی فاسدده اولاییلیر .
فقط بولری عکسنه آنچه اولوقت صحت ، انعقاد ، نفاذ هم صحت و هم
انعقاد ، لزوم ایسه بولرک اوچنده متوقفدر . یعنی انعقاد تحقق ایتدکجه
صحت ، صحت وجود بولمادکجه نفاذ ، نفاذ حاصل اولمادکجه لزوم تحقق ایدمه .
بیع ، اجاره و هبه کی افعال و عتوده (تصرفات شرعیه) اطلاق اولونور .
بیعده «ملك رقبه» ، اجازده «ملك منفعت» ، نکاحده «ملك متعه» و طلاقده
بنونت کی احکامه و مقاصد دنیویه ده (اختصاصات شرعیه) دینیر . بو
اختصاصات شرعیهك هر بری ، بر عقد و یا فسخ و رفع عقد اوزرینه ترتب
ایدرو آنکله حصوله کلیر . مثلاً ملك رقبه ، عقد بیع و یا هبه اوزرینه ترتب
ایدرو آنلرک بر بیه حاصل اولور . ملك منفعتده یا اجاره و یا اعاره ایه حصول بولور .
بوکی احکام مرتبه ، حیاته انسانلر ایچون بر طاقم اغراض و مقاصد مخصوصه
اولدیفندن شرع شریف ، اولرک هر برینک حصولی بر عقد تخصیص ایلهمش ،
بو صورتله هر بری بر عقد مختص اولمشدر . آنکچون بو مقاصد دنیویه ، بو
احکام مرتبه (اختصاصات شرعیه) دینلمشدر .

احکام اخرویه

بچن درسده احکام اخرویه بی ، « کندیلرنده اولاً و یا بالذات مقاصد اخرویه معتبر اولان حکملردر . » دیه تعریف ایتشدک . ایشه بواحکام اخرویه بشدر : وجوب ، ندب ، اباحه ، حرمت و کراهت . بونلر کورولدیکی وجهله بش حکمدن عبارت اولدینی ایچون بونلره « احکام حسه اخرویه ، اطلاق اولنور . و فعل مکلف ، بواحکام حسه اعتباریه واجب ، مندوب ، مباح ، حرام و مکروه قسملرینه منقسم اولور . شویله که :

بر فعل مکلفک ایشله نوب ایشلمه سی ، نظر شارعه یا مساویدر و یا دکلدر . مساوی ایسه اوفعل ، مباحدر . مساوی دکلسه یا ایشلمه سی راجح و مطلوبدر ، یا خود ترکی راجح و مطلوبدر . ایشلمه سی مطلوب اولدینی صورتده اگر طلب جازم ایله مطلوب و بناء علیه ترکی ممنوع ایسه اوفعل ، واجبدر . یوق اگر طلب غیر جازم ایله مطلوب اولوب ترکی ممنوع دکل ایسه مندوب دیمکدر . ترکی راجح و مطلوب اولدینی تقدیرده اگر ایشلمه سی منع اولونمش ایسه بو فعل حرامدر . منع اولونماش ایسه مکروهدر .

شو تقسیمدن منقسم اولویورکه « واجب » نظر شارعه ایشلمه سی مطلوب و ترکی ممنوع اولان فعلدر . « مندوب » ایشلمه سی مطلوب و فقط ترکی غیر ممنوع اولان فعلدر . « حرام » ترکی مطلوب و ایشلمه سی ممنوع اولان فعلدر . « مکروه » ترکی مطلوب و فقط ایشلمه سی غیر ممنوع اولان فعلدر . « مباح » ایسه ایشله نوب ایشلمه سی مساوی اولان فعلدر . حرام و اجبک ، مکروهده مندوبک ضدیدر . فقهای حنفیه عندنده واجب ایکی قسمدر . بری دلیل قطعی ایله ، دیکری دلیل ظنی ایله ثابت اولان واجبدر . اولکیسینه فرض ، ایکنجیسینه سادهجه واجب اطلاق ایدرلر . فرضده هم عمل ، همده حق اولدینی اعتقاد لازمدر . واجبه ایسه بالکمز عمل لازم اولوب حق اولدینی اعتقاد لازم دکلدر . بوندن آ کلاشیلورکه واجب تعیرینک ایکی معناسی وارددر . بری معنای اعمی دیکری

معنای اخصیدر . اصولیون عندندۀ عندالاطلاق معنای اعمی قصد اولونور . واجبك معنای اعمندن مقصوده ، ایستر دلیل قطعی ایله اولسون ، ایستر دلیل ظنی ایله اولسون علی الاطلاق ایشلنمسی مطلوب و ترکی ممنوع اولان فعل دیمکدر . مکروهده هم کراحت تحریمیه ایله ، همده کراحت تنزییه ایله مکروهه شاملدر . وجوب ، ایجاب و امر شارعك و حرمت ، تحریم و نهی شارعك موجب و اثریدر . بناءً علیه واجب مأمور به ، حرام منهی عنهدر . واجبی ترك ، امر شارع و حرامی ارتکاب نهی شارع و عدم اطاعت دیمك اولدیغندن جناب حقۀ قارشى معصیت و بوسیدله مستوجب عقوبتدر .

ندب و کراحت ، ایجاب و تحریم دیمك اولمایوب آنلرك دونندهدر . آنکچون معنای اصطلاحیجه مندوب مأمور به ، مکروه منهی عنه دکلدر . بتون فقها و اصولیونك اتفاقیه مندوبی ترك ایتمك و تنزیهاً مکروهی ارتکاب ایله مك و معصیت تشکیل ایله من و بو جهتله مستلزم عقوبت اولماز .

شوحالده واجبك فاعلی مظهر ثواب ، تاری مستحق عقاب اولور . حرامك فاعلی مستحق عقاب و تاری مثاب اولور . مندوبك فاعلی نائل ثواب اولور ایسه ده تاری مستحق عقاب اولماز شوقدر وارکه مندوب اگر اوقات خمسده قیلینان سنن مؤکده و رواتب کبی سنت هدی نوعندن ایسه تاری اساتکار و لوم و تکدیره دوجار اولور . و برده اذان و اقامت ، جماعتله صلات کبی شعائر اسلامدن معدود اولان سنت هدار ، واجب منزله سنندهدر . حتی برقریه اهالیسی بونلری ترکده اصرار ایدر لرسه ، سیاسته قوه جبریۀ استعمالی ایله ایضاً سوق اولونور لر .

تحریماً مکروه ، حرامه قزیبدر . لکن حرام دکلدر . فاعلی مستحق مجازات اولماز . یالکیز لوم و معاتبیه کسب استحقاق ایتیش اولور . فقط ائمه حنفیه دن امام محمد کوره تحریماً مکروه ، حرام حکمندهدر . تنزیهاً مکروه ایسه حلاله اقربدر . هرایکینسك ده تاری ، مظهر مکافات اولور . مباحه کلنجه اونك نه فاعلی ، نه ده تاری ، ثواب و عقابه مستحق اولماز . فعل و ترکی دتر

شارعه مساویدر. مباحه حلال و جائز دخی اطلاق اولونور. [ارشاد الفحول]
 اخطار — شو ذکر اولنان احکام خمسہ نک جملہ سنک احکام تکلیفیه دن
 عد اولونمسی، مسامحه به مستند و تغلیب طریقہ در. فی الحقیقه وجوب ایله
 حرمت، احکام تکلیفیه دن ایسه ده اباحه حکم تکلیفی دکلدر. زیرا اباحه ده
 تکلیف یوقدر. تکلیف مشقتی برایشی الزامدر. اباحه ایسه تخیردر، الزام
 دکلدر. حتی جمهور اصولیونه کوره ندب و کراهت دخی، احکام تکلیفیه دن
 معدود دکلدر. چونکه بونلرده الزام یوقدر. واقعا ندب ایله کراهتده طلب
 وارددر. فقط بو طلب جازم و قطعی اولمادیقندن معنای الزامی متضمن دکلدر.
 بناء علیه حقیقتده اباحه ایله ندب و کراهتده مکلفیت شرعیه یوقدر. بو جهتله
 مباح، مندوب و مکروه تکالیف شرعیه دن خارجدر لر. [فصول البدایع
 وارشاد الفحول]

فرض، فرض عین و فوض کفایه تاملریله ایکی قسمه آریلیر. اگر بر فرض،
 هرکس طرفندن ایفاسی لازم اولان فرائضدن ایسه اوکا «فرض عین» دینیر.
 یوق اگر او فرض، محدود برقاج کشی طرفندن ایضا ایدلمسکه مقصد شارع
 حاصل اولان بر فرض ایسه، اوکاده «فرض کفایه» اطلاق اولونور. مثلاً
 جنازه نمازی بویله در، یعنی فرض کفایه در. هیچ کیمسه بونمازی قیلمیوبده
 جنازه اورته ده قاله جق اولورسه هرکس آنم اولور. فقط بعض اشخاص بو
 فریضه بی ادا ایدرسه مقصد حاصل اوله جفندن، آرتق دیگر اشخاص اوزرندن
 آرتق دیگر اشخاص اوزرندن بو فریضه ساقط اولور. و بناء علیه هیچ بر
 کیمسه کناهکار اولمش اولماز. واجبده بویله در. اوده واجب عین و واجب
 کفایه اولق اوزره ایکیه آریلیر.

حرام لعینه، حرام لغیره

حرام ایکی نوعدر: حرام لعینه، حرام لغیره. حرام لعینه، عینی و ذاتی
 حرام اولان شیدر. لاشه و قان کبی. حرام لغیره، ذاتی حرام اولیوب ماهیتندن

خارج باشقه برسیدن طولایی حرام اولان شیدره غیرک مالنی اکل ایتمک کی .
 برنجیسنده منشأ حرمت ، اول شیئک ذاتی و ماهیتیدر . مثلاً لاشه نك حرمتی ،
 کندی ماهیتیدر . ا کله صالح اولماقله برابر نفسه مضر و طبعه مغایر اولمه سیدر
 حرام لغیره ده منشأ حرمت ، حرام اولان شیئک ذاتی و ماهیتی دکلدر ، ماهیتدن
 خارج باشقه برشیدر ، مثلاً باشقه سنک ا کمنکی آنک اذنی اولقسزین ا کل ایتمک
 حرامدر . لکن بونک حرام اولمه سی ، ا کمنک ماهیتدن متولد دکلدر . باشقه .
 سنک مالی اولمه سندن و بناءً علیه غیرک حتی تعلق ایتمه سندن ناشیدر . ا کمنک
 ذاتی ایسه ماهیته نظراً حرام دکلدر . بونک ایچونددر که صاحجه حلالدر .
 حالبوکه حرام لعینه صاحبنه ده حرامدر . هیچ برکیمسه ایچون حلال اولمازه .
 مکرکه ضرورت تحقیق ایدر . مواقع ضرورت قواعد عمومیه دن مستثناسدر .
 علی العموم ممنوعات شرعیه بویه در . یعنی یالعینه ممنوعدر ، یا خود لغیره ممنوعدر .
 بونلرک اوجنجی بر شقی یوقدر .

یوقاریده تعریف و ایضاح اولندینی وجهله حکم شرعی ، افعال مکلفینه
 تعلق ایدن خطاب شارعک اثریدر . بو جهته حل و حرمت کی احکام شرعیه ،
 افعاله تعلق ایدر ، اعیانه تعلق ایتمز . آنکچونددر که احکام شرعیه افعاله صفتیدر .
 اعیانک صفتی دکلدر . بونکچون شو فعل واجبدر ، بو فعل حرامدر ، او
 فعلده مباحد دینیر . شو حالده لاشه ، قان و شاراب کی شیلرده دخی حرمت ،
 فعله نسبت اولونمق و بناءً علیه لاشه بی بیک حرامدر ، شاراب ایچمک حرامدر
 دیمک لازم کلیر . حالبوکه اکثریا حرمت کندیلرینه نسبت اولونورده لاشه
 حرامدر دینیلیر . نته کیم (حرمت علیکم المینه) و (حرمت علیکم امهاتکم)
 کی بر چوق نصوص شرعیه ده دخی حل و حرمت ، اشیانک عینلرینه نسبت
 اولونمشدر . اکثر علمای اصوله کوره بو استعمال ، فی الاصل مجاز طریقیله در .
 اسنادده مجازدر . یا خود مجاز حذفی قبلندندر . و یا خود ذکر محل اراده حال قیامتدندر .
 « لاشه حرامدر ، دیمک ، لاشه نك ا کلی حرامدر دیمکدر . نته کیم « فلانک
 ا کی حرامدر ، دیمکده ، ا کمنکی بیک حرامدر دیمکدر .

فخر الاسلام بزدوی، شمس الائمه سرخسی و صاحب میزان علاء الدین
سمرقندی کی بعض ائمه اصول، حرام لعینه ده او صورتله نسبت واستنادك مجاز
اولیوب حقیقت اولدیقنه ذاهب اولمشلر و اوزون اوزادی به توجیهنه قیام
ایله مشلردر. مع هذا بو صورتله استعمال، آرتق بر حقیقت صرفیه اولمشدر.

مباح لعینه، مباح لفیره

بعض مباحلر، ضرورتدن متولد اولدینی ایچون مباحی ده مباح لعینه، مباح
لفیره تعیر دیکرله « حلال لعینه »، « حلال لفیره » اولمق اوزره ایکی به آیره -
بیلیرز. ذاتی و ماهیتی اعتباریه مباح اولان افعال و حرکاته مباح لعینه دینیله جکی
کبی، بر ضرورتدن ناشی ایفاسنه مساعده اولتان افعاله ده مباح لفیره دینیله
مثلاً شارب حرامدر. بونک حرمتی ماهیتدن متولد اولدینی ایچون حرام
لعینه ده داخلور. فقط بوغارنده لقمه قالوبده بوغولمق تهلککسنه معروض بولنان
بر کیمسه، یاننده شارابدن ماعدا ایجه جک بر شی بولونمیدینی جهته، لقمه بی
بوغازندن ازاله مقصدینه مبنی او شارابدن بر مقدار ایجه جک اولسه بو، جائز
اولور. ایشته بو جواز. بو اباحه نفسک تلف اولمسی تهلککسنی دفع ایتک
ضرورتنه مبتیدر. بو علتیه بناءً او شارابی ایچمک جائز و مباح اولمشدر. بو
اباحه ایسه اباحه ذاتیه دکل، اباحه غیریه در. آناغیکی ایضاحات، بو مسئله بی
اطرافیه توضیح ایده جکدر.

عزیمت، رخصت

احکام اخرویه، عزیمت و رخصت ناملریله آیریجه ایکی قسمه تقسیم اولونور.
عزیمت، هیچ بر عذره مبتی اولمایه رق رأساً و ابتداءً تشریع اولونان حکمدر.
بوکی حکملر، حکم اصلیدر لر. رخصت، اعذار عاده مبنی ثانیاً مشروع قیلینان
حکمدر. بو، مجرد یسر و سهولت، دفع مشقت مقصدیه مساحه و مساعده دن

عبارتند. آنکچون بوکي حکملره « رخصت » تسمیه اولونمشدر. دینکی مثال، بو مسئله نك کوزل بر مثالیدر. یعنی شاراب ایچمک شرعاً حرامدر. بو حکم اصلیدر، عزیمتدر. ابتداء و بر عذره مبتنی اولیه رق وضع ایدلمشدر. نفسی اولوم تهلیک سندن قورتارمق ضرورتنه مبنی شارابی ایچمک ایسه مباحدر. عذره مبنی مشروع قیلنمشدر، رخصتدر. مساعدده دن عبارتدر، حکم اصلی دکلدر. رخصت، ایکی قسمدر :

۱ — برنجیسی، حرمت و محرم یعنی سبب حرمت، موجود و قائم اولقله برابر حقنده مباح معامله سی اجرا اولونان شیدر. غیرک مالنی اتلافه اکراه ملجی ایله مکروه اولان ذاتک اول مالی اتلاف ایتمه سی کبی. ایشنه بومسئله ده حرمت، بالکلیه ساقط اولمامشدر، باقیدر. محرم یعنی سبب حرمت ده موجود و قائمدر. اوده اوماله غیرک حق تعلق ایتمه سیدر. چونکه شریعت اسلامیه ده عصمت ملک هیچ روجه له زائل اولماز. برکیمسه نك کندی مالتده کی حقک مصونیتی، دائمًا محترمدر. باشقه بر ذاتک ولو که اکراه ملجی سببیه اولسون، بوعصمتی، بو مصونیتی اخلال و ازاله به حق اولماز. بو ظلمدر. ظلمک حرمتی ایسه مؤبددر، ابدیدر. آنک ایچوندکه بومسئله ده حرمت و محرم قائم و باقیدر. شوقدر وارکه اکراه سببیه ضمان و مجازات کبی حکملر، اکراه اولونان ذاته توجه ایتمز. اونی اجبار و اکراه ایدن ذاته توجه ایدر. زیرا بو خصوصیه اکراه اولونان، اکراه ایدنک النده آلت دیمکدر.

بوجهتله مالی اتلاف ایدن فاعل مکروه حقنده مباح معامله سی اجرا اولونور. یعنی اومالی اتلاف مباح اولمادینی حالده آنک حقنده کویا مباح ایتمش کبی مسامحه ایدیلیر، مؤاخذه اولونماز. ضرر و زیانی تضمین و اجرای مجازات کبی احکام، اکراه ایدن اوزرینه ترتب ایدر.

۲ — رخصتک ایکنجی نوعی ده، هم حرمت و هم محرم ساقط اولان شیدر. بونده حرمت کلیاً ساقط اولور. آجلقدن هلاک اوله مرتبه سنه کلن ذاتک بوضروته بناء بالمجبوریه لاش بیمه سی کبی. ایشنه بومسئله ده لاشه نك

حرمت اكلی ، كلیاً ساقط اولمشد . آرتق اوحرمتك مشروعتی قالمایوب
تماماً اباحیه منقلب اولمشد . چونكه لاشهك حرام اولمسی ، نفسی وصحت
بدنی ضرردن ضیانت ایچوندرد . هلاكه معروض اولان نفسی قورتارمق ایچون
صحت موضوع بحث اولاماز . حتی اودات ، بو حکم شرعی بی یعنی بو رخصت
شرعی بی بیلدیگی حالده ، تعصب کوسترهك لاشه بی اكل ایتمیوب تلف اولسه
آثم وکناهکار اوله رق وفات ایتمش اولور .

حالبوکه اولیگی مسئله ده حکم بویله دکلدر . یعنی اومسئله ده قتل ایله تهدید
واکراه اولونان ذات ، حق الغیره ، عصمت ملکه احتراماً اومالی اتلاف اتمسه
و بوندن طولای حقیقه قتل ابدلش اولسه عندالله مأجور اولور . چونكه
اومسئله ده اومالی اتلاف ایتمك رخصت ایسه ده ، حق الغیره حرمت ایتمك ده
عزیمتدر . آنك ایچون اومسئله ده حرمت ، بالکلیه ساقط اولمامشدی . شو
ذکر اولونان لاشه بی بيم مسئله سنده ایسه حرمت کلیاً ساقط اولمش وعزیمت
قالمامشدر .

اخطار — (الضرورات تبیح المحظورات = ضرورتلر ممنوع اولان
شیلری مباح قیلار) قاعده فقهیه سنده بویحنی ، یعنی رخصتك شو ایکی قسمی
نظر اعتباره آلمق لازمدر . بو بحثدن مستبان اولویورکه ضرورتلر ، هر ممنوع
اولان شیئی تماماً مباح قیلما یور . بعض ممنوعاتی حقیقه و تماماً مباح قیلیور .
بعض ممنوعاتی ده مباح حکمنده قیلیور . یعنی مؤاخذه بی ترك صـورتیله مباح
معامله سی یابدیریور .

بعض حرمتلر ، ممنوع اولان شیلرده واردرکه اونلرک حرمت وممنوعیتی ،
هیچ برعذر وهانه ایله اصلاً ساقط اولماز . بوجهله ضرورتلر ، بوکی حرمت
وممنوعیتلری اسقاط ایدمـنـر . وبناء علیه اونلری مباح قیلامیه جفی کی ، مباح
معامله سی ده یابدیراماز . بغیر حق قتل نفس کی . بونك حرمتی لایتغیردر .
بونده رخصت جاری اولماز . شو حالده برکیمسه ، هیچاً تهدیدی ایقاعه
قادر بر شخص ظالم طرفندن قتل واتلاف ایله تهدید واکراه بناء باشقه سی

قتل ایدم جك اولسه ، قطعاً جائز و حلال اولماز . چونكه بوراده رخصتكم
 دليل و عاتى ، تلف نفس قورقوسيدر . بونده ايسه قاتل ايله مقتول مساويدر .
 هيچ برکيسه، کندی نفسی اولومدن قورتارمق ایچون باشقه سنی اولدیرمک
 حقى جائز اولماز. زنا، عرضه تجاوزده بویله در. بونكده حرمت و ممنوعیتی
 هيچ بر معذرتله ساقط اولماز . بو مسئلهلر ، حقوق جزائیة اسلامیه نقطه
 نظرندن يك مهمدر. دائماً خاطرده طوتولمسی لازمه دندر. بورایه قدر واقع
 اولان ایضاحات ، هپ حکم تکلیفی نك اقسام و انواعی حتمده در . شمده
 حکم وضعی نك اقسامی ایضاح ایدم :

حکم وضعی

حکم وضعی ، رکنیت ، علیت کبی بر صورتله حکم تکلیفی به تعلق اولان
 شیدر . و بوجه آتی درت قسمدر :

۱ — رکن .

۲ — علت .

۳ — سبب .

۴ — شرط .

بونلرک برده بشنجیمی واردرکه اوده «علامت» در. فقط بونك درسمزده
 يك او قدر اهمیتی یوقدر .

۱ — رکن : بر شیتك مابه التقوی اولان شیشه (رکن) دینیلیر . یعنی
 برشی، دیگر برشيله تقوم ایدر، قوامه کلیرسه ایکنجی شیشه رکن اطلاق اولونور.
 او ایکنجی شی ، برنجینك جزء داخلی و مستند الیهی دیتکدر . اونکچون
 برقاج جزدن مرکب اولان برماهیتك اجزاسندن هر برینه رکن دینیر . بعضاً
 برشیتك ماهیتهده، یعنی اجزاء مرکبه سنك هیئت مجموعه سنده رکن اطلاق
 اولوندینی واردر . فقط بو ، اطلاق مجازیدر ، مجاز طریقله در . اصل رکن
 دپه برشیتك جزء مقومنه دینیر . اشبو رکن ایکی قسمه آیریلیر .

۱ - رکن اصلی .

۲ - رکن زائد .

رکن اصلی - بر شیتک رکنتک انتفاسیله او شی ده منتفی اولور ایسه او رکن ، رکن اصلی دیمک در .

رکن زائد - اکر بر رکنتک انتفاسی حالده اوشی منتفی اولماز ، حکمی باقی قالیرسه بو رکنده ، رکن زائد دینیر .

مثلاً « ایمان » قلباً تصدیق ایله لساناً اقراردن مرکب بر ماهیتدر . دیمک ایمان ، بری تصدیق قلبی ، دیکری اقرار شفاهی اولق اوزره ایکی جزدن مرکبدر . فقط ایمانک حقیقی ، تصدیقن عبارت اولدینی ایچون تصدیق قلبی ، ایمانک رکن اصلیسیدر . بوندن طولاییدرکه بر انسان ، جناب حقک وجود و وحدانیتنی و حضرت پیغمبرک نبوتنی قلباً تصدیق ایتمدیکی حالده ، یالکیز لساناً بالاقرار « کلمه شهادتی » تلفظ ایتمسه « مؤمن » اولماز .

بر انسان مؤمن اولایلیمک ایچون قلباً تصدیق ایتمک لازم کلیر . فقط تصدیق قلبی امور باطنه دن اولدینی ایچون دلیل ظاهریسیله عمل ایتمک ضروریدر . آنکچون اقرار ، تصدیق مقامنه اقامه ایدلمشدر . بو جهته حقیقته الوهیتی و جناب پیغمبرک نبوتنی قلباً تصدیق ایتمه ن بر ذات ، لساناً بن مسلمانم دیر و کلمه شهادتی اتیان ایدرسه ، حقنده مسلمان معامله سی اجرا اولونور .

اونک حقیقته مسلمان اولوب اولمادینی کیفیتی ، جناب حقه حواله اولونور . احکام اسلامیته نک تطبیقی امرنده ایسه آنک اقراری نظر اعتباره آلینارق مادام که مسلمان اولدینی اقرار ایدیور ، او حالده مسلماندر دینیر . آرتق اونک حقنده مسلمان معامله سی اجرا اولونور . بناء علیه کندیسنه مسلمان قیر تزویج ایدیلیر . و اونکله مسلمان اقراسی آراسنده توارث جاری اولور . و وفاتنده مسلمان قبرستانه دفن اولونور . خلاصه بتون احکام اسلامیته ، آنک حقنده تطبیق ایدیلیر . ولو که او ذات ، حقیقت حالده جناب حق و حضرت پیغمبری منکر اولسون . بزه کوره بوجهت مجهولدر .

تصدیق قلبی ، ایمانك كن اصلیبی اولدینی ایچون هیچ بر حالدہ ، هیچ بر عذر ایله سقوط تکلیفی قبول ایتمز . بناءً علیہ تصدیق قلبی ، اکراه ملجی ایله ده ساقط اولماز . اقرار بویله دکلدر . اقرار ، بر کره رکن در ، یعنی اکراه عذری اولقمسزین اصلا ساقط اولماز . بناءً علیہ مؤمن اولان ذاتك حال اختیارده اقرار ایتمه سی شرطدر لکن اقرار ، عین زمانده رکن زائد اولدینمیدن حال اکراهده ساقط اولور .

۲ - علت

علت ، لغتده مرض وخسته لك دیمکدر . فقط اصل معنای لغویسی مغیر دیمکدر . خسته لك ده انسانك حالی تغییر ابتدیی ایچون علت دنیلمشدر . علت شرعییه ده علت دینمیه سی بوندندر . حکم شرعی بی عدمدن وجوده و یا خود « قیاس » ده اولدینی کی خصوصدن عمومه نقل ابتدیی ایچون حکمك حالی تغییر ایدیور دیمکدر . بوندن طولایی کندیسنه علت تسمیه اولونمشدر . بوجه تسمیه کوسترکه حکم شرعی ده اصل اولان عدمدر : برشی حقتده بر حکم در میان ایدم بیلمك ایچون او حکمی عدمدن وجوده کتیره جك بر علت لازمدر . او یله بر علت موجود اولماز سه حکم ده حال اصلیبی اولان عدمده قالیر . مثلاً بر کیسه ، باشقه نك ماله مالک اولابیلمك ایچون بیع ، هبه کی ملکیتی کندیسنه نقل ایدم جك بر عقدك یعنی بر علتك تحقیق مقتضیدر . او یله بر علت تحقیق ایتمدکجه مالک اولماز .

علت ، اصطلاح فقها ده ثبوت حکم کندیسنه نسبت واضافت اولونان شیدر . ایسته بر حکمی ، وجوده کتیرن ، تعبیر دیکرله بر حکمده مؤثر وعامل اولان شی نه ایسه ، او شیئه علت اطلاق اولونور . چونکه بر حکمك ثبوتی ، آنجق اونو وجوده کتیرن ، بو صورتله اونده عامل مؤثر اولان شیئه نسبت واضافت اولونور .

آشاییده ایضاح ایدیله جکی اوزره « سبب » ده ، بر نوع علتدر . لکن اصل حکمك علتی دکلدر . اولسه اولسه علتك علتیدر . بونك ایچوندرکه

علت ايله سبب اجتماع ايتدكده حكم مباشره مضاف قيلينير . سببه نسبت اولونماز . مجله نك « مباشر ايله متسبب اجتماع ايتدكده حكم مباشره مضاف قيلينير » ديمه سي بوندند . مباشر علت ديمكدر . متسبب ده سبب ديمكدر . خلاصه علت عامل مؤثر در . سبب واسطه دن عبارتدر ، و حكمه ايصال ايدن بر طريقتدر . لكن حكمده مؤثر دكلدر . حكمده مؤثر اولان ، آنجق علتدر . بونك ايجوندر كه فقها ، [الحكم يدور مع العلة = حكم علتله دائر در .] ديرلر . يعنى علت ، حكمك مداريدر علت زرده بولونورسه حكمده اوراده بولونور . علت بولونمازسه حكمده بولونماز .

آشاغنده بحث مخصوصنده ايضاح ايديله جكدركه جمهور فقهايه كوره افعال الهيه ، حكم ومصالحله معللدر . آنكچون [الاحكام مبنية على مصالح العباد = احكام شرعيه مصالح عباد اوزرينه مبتيدر .] سوزى ، السنه فقهايه دائر مثل سائر حكمنه كيرمشدر . بناء عليه تشريع احكامدن ، وضع شريعتدن شارعك مقصدى ، انسانلر ايجون جلب منفعت و دفع مفسدت صورتيه حصول سعادت مصلحتيدر . بوده بر علتدو ، بوكا حكمت تشريع و مقصد شارع دينير .

بزم بوراده بحث ايتديكمز علتدن مقصد ، بودكلدر . بو موضوع بحثمزدن خارجدر . بوندن آشاغنده آريجه بحث ايده جكيز . بوراده موضوع بحث اولان علتدن مقصد ، او علت غايه نك ، او حكمت و مصلحتك حصولي ايجون وضع و تشريع ايديلن احكام شرعيه يي معرف اولان علتدره بو علت ، حكم شرعيك معرفيدر . چونكه بو علت بيلينجه اونك اوزرينه ترتيب ايده جك اولان حكمك ده ، نهدن عبارت اولديني بيلينير . و شارع ، حكم شرعي يي بوكا ربط و تعليق ايتمش اولديغدن بو علتله « مناط حكم » دينير . بو علت ، « قياس » ك اركانندن اولان علتله شامل اولديني كي ، على العموم عقود و فسوخه دنخي شاملدر . چونكه عقدلرده برر علتدرلر . مثلاً بيع و هبه ملك رقبه نك ، اجاره و اماره ده ملك منفعتك علتدرلر . شارع ، بونلرك هر برينى بر حكمده مؤثر و آنك علتى اولاق اوزره وضع ايتمش اولديغدن ، بوكي علتله « عال و ضعيه » اطلاق اولونور . بو علت ، ايكي نوعدر :

۱ — علت تامه .

۲ — علت ناقصه .

۱ — علت تامه : بر علت ، بر حکم شرعی بی افاده ایچون وضع ایدلمش
واو حکمده مؤثر بولونمش اولمقله برابر آنک اوزرینه ترتب ایده جک اولان
او حکمده ، کندیسندن تراخی یعنی تأخر ایتیه جک اولورسه بو علت ، علت
تامه دیمکدر . فقهای حنفیه ، بونوع علت «اسماً و معناً و حکماً» علت «دیورلر»
بو علت طرف شارعدن حکم مطلوبی افادهیه وضع ایدلدیکی ایچون اسماً
علتدر . حکمده مؤثر اولدینی ایچون معنی ده علتدر . حکم مطلوب کندیسندن
تراخی و تأخر ایتدیکی ایچونده حکماً علتدر .

اسماً علت اولدیغندن طولایی حکم کندیسنه نسبت و اضافت اولونورده ، «بو
حکم شو علتک حکمیدر» ، دینیلیر . حکمده تأثیری بولوندینی جهتلهده «بو
حکمک مؤثر و عاملی شو علتدر» ، دینیر . و حکم مطلوب ، کندیسندن آیرلامادینی
و تأخر ایتدیکی ایچونده ، «بو علت تمامدر» ، دینیلیر ، و در حال اوزرینه او
حکم مطلوب ترتب ایدر . شرائط لازمه سی جامع اولان عقود و مقاولات کی .
مثلاً بیع صحیح ، ملکیتی افاده ایچون شارع طرفندن علت اولمق اوزره
وضع ایدلمشدر . آنک ایچون «بیع حکمی ملکیتدر» دینیر . شو حالده
عقد بیع ، صحیح و غیر موقوف و خیاراندن عاری و شرائط لازمه سی جامع
اولارق منعقد اولورسه علت تمام اولمش اولور . و آرتق اونک اثری دیمک
اولان حکمده ، یعنی ملکیتده در حال حاصل اولور ، مشتری میعه وایم
نمنه مالک اولور : و بو ملکیتک حصولی ایچون تسلیم و تسلیم کی باشقه برشینه
لروم قالماز . میبع هنوز بایعک بدنده اولوب مشتری به تسلیم ایدلمدیکی حالده
دخی ، مشتری نیک سالك ملکته داخل اولمش بولونور . بونک ایچوندرکه او
دقیقه دن ، یعنی صائش تاریخندن اعتباراً میعهده حاصل اولان زوائد دخی
مشترینک مالی اولور .

بایع ، قبل التسليم مبيعه حاصل اولان ميوه و سائره کي زوائد بنمدر ديه صر. بوبيله اولدني کي ، مبيك ثمن اولان شي دخي عقد بيع تاريخندن اعتباراً بايک ملکی اولور . شو قدر وارکه ثمن ، تعیین ايله تعیین اتمه چکی ایچون بايعه قارشى بوج اولمق اوزره مشتريک ذمتنده در حال ثابت اولور. و بناء عليه مشتري او ثمن ايله بايعه مديون اولمش اولور .

۲ — علت ناقصه : علت بعضاً بوبيله تمام اولماز ، بعض موافق بولونمش اولور . بو اعتبارله حکمک او علت اوزرينه تربی تأخر ايدر . او حالده بو علت ، ناقص ديمکدر . چونکه معلول علتدن تخلف ايتير . یعنی برشی ، علتندن آيريله ماز . علت تحقق ايدنجه معلولی ده تحقق ايدر . بو جهته عقی اولسون ، شرعی اولسون هر هانکی بر مسئله ده معلول علتندن آيريلير ، اونک وجود و تحققى تأخر ايدرسه او علت ، موافق حسیله ناکتمام ديمک اولور . نه وقت مانع زائل اولورسه اوده کسب تمامیت ايدر وار زمان حکم اونک اوزرينه ترتب ايلر . بيع موقوف کي .

بيع موقوف ده ، ملکیتی افاده علتدر . چونکه « بيع » در . شارع آنی ده افاده ملکه علت اولمق اوزره وضع ايتشد . بو جهته هم اسماً ، هم ده معنی علتدر . حتی بونک ایچوندرکه مبيع ، صاحبک او بيع موقوفه اجازتی وقوعنده عقد بيع تاريخندن اعتباراً مشتريک ملکنه داخل اولمش اولور . یوقسه تاريخ اجازتدن اعتباراً دکل آنکچون بيع موقوفه مال صاحبی بو بيعه واقف اوله رق اجازت ویرنجه ، مشتري وقت بیعدن اعتباراً مبيعه حاصل اولان کرک متصل و کرک منفصل زوائد دخي مالک اولور . چونکه بو ملکیتده مؤثر اولان بو عقد بیعدر . یوقسه مالکک اجازتی دکلدر .

کرچه حقیقتده اصل مؤثر ، مالکک اجازتیدر . اونک رضا و اجازتنه انتظاراً بيع مذکور ، موقوف اولشد . فقط شارع ، بوراده مال صاحبک اجازتی وقت بیعدر موجود فرض ایدیور . زیرا مال صاحبی اجازت ویرنجه ، اولج وقوع بولان بيع موقوف حکمنه اجازت ویرمش ديمکدر . او جهته

بیع موقوف، تاریخ انعقادند اعتباراً مؤثر اولمش اولور، و بناءً علیه مشتری ده بطریق الاستناد یعنی وقت بیعه استناداً بتون زوائیدله برابر میعه مالک اولور. بیع مذکور مالکک اجازتنه موقوف قالمه سنک سبی ، بایعک فضولی اولمی ایدی . مال صاحبی اجازت ورنجه اورتهدن فضولی قالمش ، بیع ده غیر موقوف اولارق قالمش اولور. ایشته بوملاحظه فقهیه به بناءً بوکی برلرده استناد قاعده سی جاری اولور . یعنی عقدک حکمی تاریخ وقوعنه استناد ایدر ، و او زماندن بدایله جاری اعتبار اولنور. مال صاحبنک بوبیعی حقننه اذن و رضایی معلوم اولمادیغندن ، آنک رضاسنه قدر عقد بیع حکمی اجرا ایدمه، ش و اوکا موقوف قالمشدر . بونکله برابر عقد مذکور اساس اعتباریله مؤثر اوله رق موجود اولدینی ایچون بعدالاجازه اوزرینه ترتب ایدمه جک اولان حکم، وقت وقوعدن اعتباراً او عقدده استناد ایله مشدر . خیار شرط ایله واقع اولان بیع ده بویله در ، اجاره مضافهده بویله در .

علی العموم موانع بولنان برلرده موجود علتلر ، هپ علت ناقصه درلر . بوکی برلرده علتک درحال حکمی اجرا ایدمه سی مؤثر اولمامسندن دکادره . بلکه تأثیرخی ایقاعه مانع بولونممسنددر . علت حکمی مقتضی ایسهده او حکمک وجوده کلمه سنه باشقه برشی مانع اولویور دیمکدر . « مانع ایله مقتضی تعارض ایندکده مانع تقدیم اولنور . « قاعده فقهیه سنه کوره مانع موجود اولدقجه مقتضی اولان علت ، حکمی اجرا ایدمه من . چونکه مقتضی نک شرائطی تمام اولمامش دیمکدر . لکن مانع اورتهدن قالمقجه ، اولوقت مقتضی اولان علت ، مانعک تاریخ زوالندن اعتباراً دکل بلکه کندیسنک تاریخ وجودندن اعتباراً حکمی اقاده ایدر .

سبب ده بعضاً علت مقامنه قائم اولور . یعنی سبب حد ذاتنده حکمده مؤثر اولمادیغنی حالده اصل مؤثر اولان علت اورتده موجود اولمادیغندن طولانی ، آنک مقامنه اقامه اولنور . و آرتق علت کی مؤثر عد اولنور ، حکمده آکا مضاف قیلنیر . اصولیون حنفیه ، بونی وامثالی نظر اعتباره

آلارق «علت» ی یدی قسمه تفریق وهر بریخی مثال مخصوص ایله توضیح ایدیورلر . لکن بونلرک بعضلری علت نافسه ده داخل ، بعضلری ده علت مقامنه قائم اولان اسباب جمله سندن معدود اولدیغندن بز بوراده اونلرک برر برر ذکر وایضاحندن صرف نظر ایتدک . خصوصیه بر قسمی ، قریباً زیرده اسباب میاننده ایضاح اولونه جقدر .

۳ - سبب

سبب، بلا تأثیر حکمه طریق موصل اولان شیدر. شوتعرفدن آ کلاشدیغنه کوره بر شی ، بر حکمک سببی اولق ایچون او حکمده دوغریدن طوغرییه مؤثر اولماسی لازمدر ، مؤثر اولورسه او شیئه اصطلاحاً سبب دینیوب علت تسمیه اولنور . ذاتاً علتی سبیدن تفریق ایدن شی ده بودر . یعنی تأثیردر . علت مؤثردر . سبب مؤثر دکلدر . سبب یالکنز موصلدر . مع هذا بز محاوراتمزده جوق کره سبب کلهسی علت معنا سنده استعمال ایدررز . حتی بعضاً آخرینه برده «موجب» لفظی علاوه ایدرک سبب موجب واسباب موجهه دیرز . علت مؤثره دیمک اولور . بو استعمال سببک معنای اعمنه کوره در . چونکه سبب لفظی ، بعضاً علی الإطلاق حکم شرعی یی معرف اولان شی معنا سنده استعمال اولونور . بومعنی اعمدر ، علتده شاملدر .

خلاصه ، سببده تأثیر یوقدر . او یالکنز حکمه موصل اولان طریق ووسیله دن عبارتدر . بر مثال ایله ایضاح ایدرلم . مثلاً برکیمسه بر قویو حفر ایدوب دیکر برکیمسه او قویویه بر حیوان القا ایتسه ده حیوان تلف اولسه ایشه بوراده حیوانک تلف اوله سنده مؤثر اولان ، حیوانی قویویه القا ایدندر ، قویویی قازان دکلدر . چونکه حیوانی اتلافه بالفعل مباشرت ایدن ، فاعل و عامل مؤثر اولان ، حیوانی قویویه القا ایدندر . قویویی قازان ، اتلاف فعلنده مباشر دکلدر . او متسببدر ، یعنی حیوانک تلفنه مؤدی و موصل اولان سببی احداث ایتشدرکه قویودر . کرچه قویو حفر ایدله مش اولسه یدی ، یالطبع

حيوان القا ايديله جك برچوقور بولونمش اولمازدى. بناء عليه اوصورتله حيوان اتلاف ايديله مزدي. آنك ايجون قويوي قازان، حيوانك تلفنه سبييت ويرمشرده فقط بونكله برابر او، بوتلف خصوصنده مؤثر دكلدر. تلفده مؤثر اولان، حيوانى قويويه آماندر. اتلاف فعلنده مباشردر، علتدر. حافر يعنى قويوي قازان ايسه سبيدر، متسبيدر.

ايشته علت ايله سبب آره سنده كي فرق بودر. بوفرقدن شونتيجه حقوقيه حاصل اولوركه برفعلك وقوعنده سبب ايله علت اجتماع ايتدكده اوفعل اوزرينه ترتيب ايدم جك حكم، علتله اضافت اولونور، سبيه دكل. ايشته مجله ده اوقودينگنر (برفعلك حكيمى فاعلنه مضاف قيلينر) و (متسبب ايله مباشر مجتمع اولدقده حكم مباشره اضافت اولونور) قاعده نرى، بو اساسدن استخراج ايدلمشدر. متسبب سبب، مباشرده علت ديمكدر. بوقاعده لر هر يره جارى ومطرددر. يعنى برفعلك حكيمى، كنديسنه نسبت واصافت اولونه جق اورته ده بر علت، برفاعل مباشر بولندقجه حكم اوعلته و اوفاعله اضافت اولونور و اولونمق لازمدر. اوفاعلى نظر اعتباره آلمايوبده سبيه، يعنى متسبيه اضافت اولونمق جائز اولمازه مثلا بر كيمسه، ديكر برينك دلالتيله بر باشقه سنك مالى سرقه ايله سه، بوراده اصل فعل سرقى ارتكاب ايدن شخص، فاعل مباشردر. بالذات وبالفعل اومال مسروقى اخذ ايدن اودر. دلالت ايدن ايسه بالفعل فعل سرقى ايقاع ايتمه مش، يالكيز سارقه يول كوسترمنش وبو صورتله بلا تاثير بر طريق موصل اولمشدر. بوده فعل سرقنده ذى مدخل ايسه ده، فاعل دكلدر، متسبيدر. بوجهتله مال مسروق، بالفعل سرقه يعنى مال مسروقى اخذه مباشرت ايدن شخصه تضمين ايتديرملك لازم كلير. متسبيه يعنى سرقه دلالت ايدنه تضمين ايتديرلمز. واقعا او كاده جزا ويريلير، فقط بو جزا سرقه فعلك جزاسى دكلدر. دلالت فاعلك جزاسيدر. بوجهتله بوجزاء اصل سارقك جزاسندن ده خفيف اولمق اقتضا ايدر. مقتضاي عدالت بودر. مكره سرقه دلالت ايدن شخص، يالكيز دلالتله اكتفا ايتمبوب فعل سرقه اشتراك ايتمش اولسون.

اولوقت اوده سارق اولمش اولور وعین حکم اوکاده ترمب ایدر .
 خلاصه بوراده ایکی فعل وار : بری دلالت فعلی ، دیکری سرقت فعلی .
 دلالت ایدن دلالت فعلنک فاعلی در ، آنده مؤثر در . فقط سرقت فعلنک فاعلی
 اولمادیغندن بونده مؤثر دکلدر . مؤثر اولمادیغنی شونکلهده نابتدرکه اگر سرقت
 فعلنی بالذات اجرا ایدن شتخص ، ایسته مش اولسه ایدی اوکا یول کوسترن
 ذاتک دلالتی موجود اولقله برابر فعل سرقتی ایقاعدن صرفظرا ایده بیلیردی
 وبوصورتده فعل سرقتده واقع اولمازدی .

۱ — سبب محض

۲ — علت حکمنده سبب

سبب ، سبب محض و علت حکمنده سبب اولق اوزره ایکی قسمه آیریلیر .
 سبب محضه ، سبب حقیقیده دینیر . اولا شو جهت بیلنملیسدرکه سیبله حکم
 آره سنده مطلقا بر علت تحال و توسط ایدر . چونکه یوقاریده سبب ، حکمه
 موصل بر طریقدر ، اونده مؤثر دکلدر دیمشدک . اوحالده حکم ایچون هر حالده
 بر علت مؤثره بولونمق لازمدر . علتک یالکیز مؤثر اولماسیده کافی دکلدر . حکم
 کندیسنه مضاف قیلنمغهده صالح اولسی مقتضیدر . شو حالده سیبله حکم آره سنده
 حیولت ایدن علت ، ایکیدن خالی دکلدر . یا اوعلت سببه نسبت و اضافت اولنور .
 و یا اولونمز . برنجیسی علت حکمنده سبیدره ایکنجیسی سبب محضدر . شمدی
 بوایکی نوع سببی ، شو صورتله تعریف ایده بیلیرز :

سبب محض ، کندیسبله حکم آره سنده حکمه مضاف الیه اولغه صالح وسیبه
 غیر مضاف بر علت بولونان سبیدر . یوقاریده کچن سرقتده دلالت مثالنده اولدیغی
 کبی . ایسته بومثالده کی سرقتده دلالت فعلی ، سبب محضدر . چونکه بومسئلهده
 حکم سرقت ، کندیسنه مضاف قیلنمغهده صالح بر علت مؤثره وارددر . اوده فاعل
 مطلق اولان سارقک فعل اختیار یسیدر . وبوفعل اختیاری ، سببه یعنی دلالت
 فعلنه مضاف دکلدر . آنکچون دلالت فعلی سبب محض و بونک فاعلیده متسبب
 حقیقی در . بوجهته حکم ضمان یالکیز سارقه مضاف قیلنیر . یعنی بو وجهله

واقع اولان سرقدن طولانی مال مسروقی تضمین ایتک ، فعل سرقت فاعلی اولان سارقه لازم کلیر . سرقت دلالت ایدن شخصی لازم کلر . قویوی قازمقله حیوانی قویویه آتمق مثالنده حکم بویله در : اونده ده ضمان ، حیوانی قویویه آتانه لازم کلیر . چونکه او ، علت مؤثره ومستقله در . قویوی قازان ایسه متسبب حقیقیدر . حیوانی قویویه آتمق فعلی ، بوکا اصلا نسبت اولونه ماز .

علت حکمنده سبب ، علت حکم کندیسنه مضاف قیلینان سبیدر . تعریف دیگرله کندیسیله حکم آراسنده مضاف الیه اولمغه صالح برعلت بولونمایان سبیدر مثلا برکیمسه برحیوانی اوکنده سوق ایدر ویا آرقه سندن چکر ایکن حیوان برینک مالنه باصه رق تلف ایتسه ، حیوانی سوق ایدن ویا چکن اومالک قیمتی ضامن اولور . کرچه اومالی تلف ایدن حیواندر ، علت مؤثره اودر . حیوانی سوق ایتک ویا چکمک ، تلف فعلنه موضوع وآنده مؤثر دکلدر ، بلا تأثیر تلفه موصل برطریقدر ، سبیدر . فقط بوراده علت ، برکره حکم ضمان کندیسنه مضاف قیلینمغه صالح برعلت دکلدر ، چونکه حیواندر . صوکره حیوانک حرکتی آنی سوق ایدنک ویا چکنک کیفه تابعدر . بوجهتله بوراده علت یعنی حیوانک اومال اوزرینه باصه سی ، سببه یعنی حیوانی سوقة ویا چکمکه مضافدر . آنک ایچون بوسبب ، علت حکمنده اولان سبیدر . سائق ویا قائد اولان اوکیمسه ده فاعل مباشر حکمنده در . بناء علیه او مالک قیمتی ضامن اوله سی لازم کلیر . کذلک برکیمسه ، طاوانه آسیلی اولان بر آویزه نک اپنی کسمکله او آویزه یره دوشه رک قیرلسه ، یاخود بر زیتون یاغی طولومنی یاروب یاع دیشاری به آقهرق تلف اولسه اوکیمسه ، آویزه نک ویاغک قیمتی ضامن اولور . واقعا اوکیمسه بالذات وبالفعل آویزه یی قیرمامش ، آنی الیله طوتوبده یره آتاماش یاغی ده الیله آقیتارق ، طولومدن خارجه ایته رک تلف ایتمه مشدر . اویالکزی اچی کسمش ، طولومی یارمشدر . آویزه نک یره دوشه سی ، یاغک آقهمسی ایسه نفلت و جاذبه قانونلرینک تأثیریه واقع اولمشدر . آنکچون کرک آویزه نک وکرک یاغک تلف اوله نده اصل و حقیقتده مؤثر اولان علت ، ارضک قوه

جاذبه سیدر . ایی کسمک و طولومی یارمق سیدر . تلفه طریق موصلدر . لکن بوراده ارضک قوه جاذبه سی ، حکمه مضاف الیه اولمغه صالح برعات دکلدرد . حکم ضمان اوکا اضافت اولونه من . اوانسان دکلدرد که ضرر واقع اوکا تضمین ایتدیر یله بیلسین . اورته ده متسییک فعلندن بشقه بر فعل اختیاری ده یوق . کیفیت تلف ، مجرد متسییک تسبیی الیه حصوله کلمشدر . او سبیت ویرمش اولماسهیدی نه آویزه یره دوشه ردی ، نه ده یاغ دوکولوردی . بوجهله متسبب ، یعنی بومثاله ایی کسن و طولومی یاران ، فاعل مباشر حکمنده در . الحاصل هر هانکی بر فعلک ، حکمه مضاف الیه اولمغه صالح برعاتی بولونما به جق اولور ایسه آرتق اوفعل واونک حکمی ، متسییه نسبت و اضافت اولونور . و اومتسبب علت و عامل مؤثر حکمنده طوتولور . بناء علیه ضرر واقع اوکا تضمین ایتدیر یلیر . اوکا تضمین ایتدیر یله سین دینله من . چونکه بوصورته بر شخصک مالی هدر ایدلش اولور . حالوکه عصمت ملک هیچ بوجهله زائل اولماز . و هیچ بر کیمسه نك مالی بلا سبب شرعی هدر ایدیله من .

۴ - شرط

شرط ، تأثیر و افضا بولونمق سزین بر شینک موقوف علیهی اولان سیدر . علت و سبب ده بر شینک موقوف علیهدر . فقط کچن درسارده ده ایضاح ایتمش ایدک که علتده تأثیر وارد . یعنی علت بر شینک موقوف علیهی اولمقله برابر او شینک وجود بولسنده عامل و مؤثر در . سبب ده بر شینک وجودنده مؤثر اولما مقله برابر آکا مفضی و موصلدر . شرطه کلنجه ، شرطه بویه نه تأثیر وارد ، نه ده افضا . یعنی شرط ، بلا تأثیر و بلا افضا بر شینک یالکیز موقوف علیهدر . شرط بولونما دقجه مشروط اولان اوشی ده یولونماز ، مشروط تحققی ایدم بیلیمک ایچون اوندن اول شرطک تحققی لازمدر .

بونکله برابر شرط ، مشروطک وجودنده مؤثر و مفضی دکلدرد . ایسته بونک ایچوندر که بز ، شرطی تعریف ایدر کن (تأثیر و افضا بولونمق سزین) دیدک .

بوقیدلر قید احترازیدرلر. «تأثیر بولونمقسزین» قیدیله علت، تعریفدن خارج
 قالدینی کی، «افضا بولونمقسزین» قیدیله ده سبب تعریفدن خارج قالیر.
 مثلاً نکاح، شرعاً موجود اولاییلمک ایچون حین عقدده ایکی شاهدک
 حضوری شرطدر. بلاشهود عقدنکاح، شرعاً صحیح و معتبر اولماز. زیرالشرط
 تحقق ایتمه مشدر. شرط تحقق ایتمکجه مشروطده تحقق ایتمز. چونکه شرط
 بر شیئک موقوف علیهدر. مادام که شرط بر شیئک، یعنی مشررطک موقوف
 علیهدر. احوالده شرط بولونمادقجه مشروطده بولونه ماز. آنکچون شهود
 حاضر اولمقسزین نکاح، ساحة شریعتده وجوده کله منر. شرط، یا کندیسنده
 اصلا معنای علت و سببیت بولونمایان شرطدر، یا حود علت و یا سببیت معنایی
 بولونان شرطدر. برنجیسنه «شرط محض»، ایکنجیسنه «علت حکمنده شرط»
 و اوچنجیسنده «سبب حکمنده شرط» دینیلیر. شرط محض، و شرط حقیقی
 شرط جعلی اولق اورره ایکی قسمه آیریلیر.

۱ — شرط حقیقی

۲ — شرط جعلی

شرط حقیقی، نفس الامرده و یا نظر شرعده بر شیئک وجودی کندیسنه
 توقف ایدن شرطدر. مثلاً یره تخم آتمق اویردن محصول آلمنک شرطیدر،
 شرط نفس الامریسیدر. چونکه قانون طبیعت اقتضاسنجه بر یردن محصول
 آلینه بیلمسی، او یره مطلوب اولان تخمی آتمقه متوققدر. بو بویله اولدینی
 کی علی العموم عقودده وجودی آرائیلان برطاقم اوصاف و قیودده، اوعقودک
 شرعاً معتبر اوله سنک شرطلیدر. زیرا قانون شریعت ایجابجه بر عقدک معتبر
 اوله سی، او اوصاف و قیودک وجودینه وابسته در.

شرط جعلی، مکلفک اعتبار و درمیان ابتدییکی شرطدر. بونی دوغریدن
 دوغرییه و ابتداءً بالذات شخص مکلف، شرط قیلمش اولدینی ایچون بوکا
 «شرط جعلی» اطلاق اولونمشدر. بو شرط جعلی، ایکی نوعدر. بری شرط
 تعلیقی، دیکری شرط تقيیدیدر.

۱ - شرط تعلیقی

۲ - شرط تقيیدی

شرط تعلیقی ، بر شئت وجودی کنديسنه تعلیق اولومان شرطدر . بو ، «اكر» و «ایسه» کبی ادات شرط وصیغه شرطیه ایله ویا تعلیقه دلالت ایدن بر عباره ایله ذکر اولونور . فلان ایش وقوع بولورسه بومالی سکا بیک غروشه صاندم کبی . شرط تقيیدی ، (شرطیله) ویا (اولوق ارزره) کبی تقيیدی مفید بر صورتله در میان اولومان قید و شرطدن عبارتدر . بدلی بر آی صوکره تأدیة ایدلمک شرطیله ویا ایدلمک اوزره بومالی سندن بیک غروشه صانتم آلام کبی . عقد بیع کبی تمایکاتک شرطه تعلیقی اصلاً صحیح اولماز . مثلاً یوقاریده کبی برنجی مثاله اولدینی کبی بر کیمسه دیکرینه فلان ایش اولورسه بو خانه یی سکا اوج بیک ابراهه صاندم دیسه ، بو بیع منعقد اولماز . چونکه تعلیق ، علنک ، تعبیر دیکرله تصرف شرعیلک علیته یعنی تأثیرینی اجرا ، حکمی اقتضا ایدمک صورتده فی الحال انعقادینه مانع اولور . زیرا تعلیق ، علت اوزرینه داخل اولایینی زمان ، او علنک محلله اتصالی منع ایدر . و علت تأثیرینی اجرا ایدم . بر علت تأثیرینی اجرا ایدم بیلیمک و بر تصرف شرعی علت مؤثره اولاییلیمک ایچون ، محلله متصل اولموسو ضروریدر . تعلیق ایسه بواتصاله مانعدر . آنکچون بر شرطه معلق اولان علنک زمان وجود و انعقادی ، اول شرطک زمان تحقیدر . بناءً علیه شرط تحققی ایدنجه علتده تحققی و انعقاد ایدر . وایسته آنجق اولوقت تأثیرینی اجرا ، حکمی اقتضا ایلر .

حالبوکه بیع و شرا کبی تمایکاتدن اولان تصرف شرعیلر ، فی الحال تمایک افاده ایتیه وضع اولونمشلردر . تعلیق بو ماهیتی تغییر ایدم جکندن «بیع» کبی فی الحال منعقد اولموسی لازم کلن عقدلرک ، شرطه تعلیقی جائز اولماز . خصوصیه او شرط ، تحققی وعدم تحققی محتمل اولان شیلردن ایسه او حالده بیی اویله بر شرطه تعلیق ایتیمک ، بر نوع قمار اولور . قمار ایسه قطعاً ممنوعدر . لکن شو یوقاریده کبی «تمایکات» قیدیله ده اشارت اولوندینی وجهله بو حکم ،

یعنی شرطه تعلیقك عدم جوازی ، اثباتاً نه یعنی ملکیت اثبات ایدن عقودده جاریدر . اما طلاق وعتاق کی اسقاطاً نه شرطه تعلیق جائزدر . مثلاً بر کیمسه دیگرینك کوله‌سنه « بن سنی صانون آبرسم سنی آزاد ایتدم » دیسه ، جائز اولور واونی صانون آلدینی زمان آزاد ایدلمش اولور . کذلک کفاله ووکالت کی تملیکاتدن اولمایان عقودده دخی شرطه تعلیق جائز اولور . چونکه تعلیق ، بو کی تصرفات و عقودك ماهیت شرعیه‌سنی تغیر ایتمز . ایشته بجه‌نك (۸۲) نجی ماده‌سنده مذکور اولان « شرطك نبوتی عندنده اكا معلق اولان شینك نبوتی لازم اولور . » قاعده فقهیه‌سی ، بو کی یرلرده جاری اولور .

*

شرط تقیدیه‌یه کانهجه: فقهای حنفیه بونی شرط جائز، شرط لغو و شرط مفسد اولق اوزره اوچ قسمه آییریورلر . شرط جائز ، مقتضای عقددن اولان ویا مقتضای عقدی تأیید ایدن شرطدر . بویله بر شرطه بیع جائز و شرط معتبردر . مثلاً بایع ثمنی قبض ایدنجه‌یه قدر مییی نزدنده حفظ ایتمک ویا خود مشتری رهن ویا کفیل ویرمک شرطیله بر مال صائمق ، صحیح و او شرطه رعایت ایتمک لازم اولور . شرط لغو ، احد عاقدینه هیچ نفی اولمایان شرطدر . مثلاً باشقه‌سنه صائمق شرطیله بیع کی . بویله بر شرطه بیع صحیح و فقط او شرط لغودر ، هیچ حکمی یوقدر ، کان لم یکندر .

شرط مفسد ، مقتضای عقددن اولماق و مقتضای عقدی تأیید ایتمه‌مکله برابر احد عاقدینه نفی اولان شرطدر . مثلاً بایع ایچنده بر مدت اقامت ایتمک ویا مشتری بایعه باشقه بر خانینی اعاره ویا ایجار ایله‌مک شرطیله بر خانه صائمق کی که بویله بر شرط نافعه بیع صحیح اولماز ، فاسد اولور . مکرکه بویله بر شرط ، بین الناس متعارف اولمش اولسون اولوقت بیع صحیح و شرط معتبر اولور . مثلاً کورکی قاپلامق و حیوانی بولاریله صائمق شرطیله صائمق صحیح و بایمک بو شرطه رعایت ایتمه‌سی لازم اولور .

لکن فقهای حنفیه‌نك رئیس اولی امام اعظم ابو حنیفه حضر تبارینك

معاصر لرندن واونك كې مجتهد مستقيلردن امام ابن شبرمه مذهبنه كوره متعارف اولسون ، اولماسون على الاطلاق احد عاقدينه نفى اولان شرطله دخی بيع صحيح و شرط معتبردر . مشاراليه ابن شبرمه نك اشبو اجتهادی ، [المسلمون عند شروطهم = مسلمانلر شرطلرندە نابتدرلر] حديث صحيحنه موافق كورونيور . ائمة حديثن امام ترمذی حضرتلری ، «كتب سته» ناميله معروف اولان آلتی معتبر حديث كتابلرندن بری بولونان (جامع السنن) نده ، «باب الصلح» ده بو حديثی ، [والمسلمون على شروطهم الا شرطاً حرم حلالاً او احل حراماً = مسلمانلر ، حلالی حرام ويا حرامی حلال قيلان شرطدن ماعدا شرطلری اوزرنده نابتدرلر] طرزنده تخریج ايدييور و «بو حديث حسندر ، صحيحدر ، دييور .

قرآن كريمك ظامری ده ، ابن شبرمه مذهبنی تأييد ايدييور . چونكه [يا ايها الذين آمنوا اوفوا بالعقود] و [اوفوا بالعهود] آيت جليله لرندە «العقود» و «العهود» لفظلری ، عام اولارق شرفنازل اولمشدر . فضله اولارق احد عاقدينه نفى اولان شرطله بيعك صحق، فعل بيعمبری ايله ده مؤيددر . چونكه (بخاری شريف) ده وسائر امهات كتب احاديثده بر تفصيل محرر اولديني اوزره بعض غزواتدن عودت نبويه اثناسنده جناب رسالتناز افندمنز ، اصحاب كرامدن «جابر بن عبدالله» ك دوه سنی ، حضرت جابر مدينه منوره يه قدر اوزرينه ينمك شرطيله صائون آلمشدي . اكر احد عاقدينه نفى اولان شرطله بيع فاسد و غير جائز اولسه يدي ، حضرت بيعمبر بومعامله بيبي اجرا ايتمزدي . و حضرت جابر ، بو شرطی درميان ايدنجه قبول ايتك شويله دورسون ، در حال اويله بر شرط ايله بيعك جائز اولمايه جغفی بيان بيورردی . چونكه وظيفة تشريعلری بونی مقتضيدر . عكسي تقديرده وظيفة سنی ايضا ايتمه مش اولوركه تصوری بيله محالدر .

«مبسوط سرخس» ده و امام طحاوی نك (شرح معانی الآثار) نده بو معنی تأويلاً «رسالتناز افندمنك بو معامله بيعملری ، مجرد جابر بن

عبداللهی تلطیف مقصدیله واقع اولمش بر لطیفه دن عبارتدر . یوقسه جدی دکلدر .
 نته کیم مدینه منوره یه مواصلنلرند . یالکیز دونهک بدانی دکل ، دونه بی ده برابر
 مشارالیه جابر احسان و اعاده بیورمشلردی . « طرزنده بر مطالعه در میان
 اولونیور . فقط بو مطالعه ، صرف مذهب حنفی بی مدافعه غیرتیله در میان
 اولونان تأویلات بعیده دندر . و هیچ بر وجهله شارعک وظیفه تشریعیه سنه
 توافق ایتمز . اکر او یله اولسه بدی رساندنیه اقدام ، بدلیله برابر دونه بی
 احسان و اعاده بیوررکن ، هیچ اولمازسه مقصدک صرف لطیفه دن عبارت
 اولدیغنی و چونکه احد عاقدینه نافع اولان او یله بر شرطه بیعک جائز اولمایه جغنی
 تصریح بیوررلردی زیرا معرض تشریعه سکوتک جوازه دلالت و مشروعیتی
 تقریر ایده جکتی ، هر کسدن زیاده بیایرلردی .

کرچه امام اعظم حضرتلری ده شرطایله بیعک عدم جوازینه دلالت ایدن
 باشقه بر حدیث شریف روایت ایله یور . فقط بو حدیثک دلالتی صریح
 و قطعی اولماقلا برابر شو ذکر اولونان حدیثلرله تعارض ایدیور . حدیثلر
 متعارض اولدقلرندن طولایی آرادن جیقاربیلرله حق اولورلرسه ، یوقاریده استمهاده
 اولونان آیت جلیله لک اطلاق و عمومی ، معارضسز قالیر . بو صورتله یینه ابن
 شهره ، حق قازانیر . خصوصیلرله محققین حنبلیه دن ، شهره « ابن قیم » ک (اعلام
 الموقعین) ده دیدیکی کبی ، علی العموم عقود و معاملانده اصل اولان صحندر .
 جمهور فقهایه کوره اشیاده اصل اولان اباحه و اقبالده اصل اولان عدم مکفیتدر .
 آنکچون هر هانکی بر فعلک شرعاً غیر مشروع اولدیغنی بر دلیل شرعی
 ایله انبات ایتمک لازم کلیر . انبات ایدیلر مدیکی صورتده او فعل ، جواز
 اصلینده قالیر .

قوجه ، قوجه اماملر آراستنده جاری اولان بو بحثی ، حدیثیه باقمایه رقی
 کمال عجز مزله محاکمه یه قالفشمقدن مقصد من شودر که زمانمزدده معاملات مدنیتهک
 اساسی ، (سربستی مقاوله) قاعده سی تشکیل ایدیور . مملکتیمزده انکشاف
 ملینکده بوکا بک بیوک احتیاجی وار . آنکچون مجلهک شرطه بیع فصلنه

شرط نافع ایله ده بیسه ك جائز و شرطك معتبر اوله جفته دائر بر ماده علاوه ایتك صورتیله معاملات ناسه وسعت ویرمك ، مدنی واجتماعی بر ضرورتدر . بو ، ابن شبرمه مذهبنه موافق اولدینی کی ، مذهب حنفی به ده منافی دوشمز . چونكه فقه حنفیجه حاجت عمومی اولسون ، خصوصی اولسون ضرورت منزله سنه تنزیل اولونور . ضرورتلرده ، ممنوع اولان شیملری مباح قیلار . حالبوكه شرط نافع ایله بیع معامله سی ، شرعاً ممنوع ده دكلدر . بالعكس دمین ذكر اولونان نصوص قرآنیه واحادیث نبویه تك ظاهرینه ده موافقدر .

علت حکمنده اولان شرط

بر فعلده . بر حادثه حقوقیه ده حکم کندیسنه اضافت اولونمیه صالح بر علت ویر سبب بولونما یوبده یالکمز شرط بولونه جق اولورسه ، اوشرطه فعلت حکمنده شرط ، دینیر . مثلاً بر کیسه طریق عامده ویا باشقه سنك ملککنده بر چوقور ، بر قویو آچوبده بالآخره اونك ایچینه بر انسان دوشه رك تلف اولسه ، ایشته بو مثاله چوقور آچق کیفیتی ، تلف فعلتك شرطی احداث ایتك دیمکدر . چونكه چوقورك وجودی ، تلفك شرطیدر . چوقور اولماسیدی انسان دوشوب تلف اولمازدی . لکن بو تلف فعلتك ، کندیسنه اضافت ایدلمه سنه صالح نه بر علتی ، نه ده بر سببی واردر . چونكه بوراده او انسانی بو چوقوره فلان ذات القا ایتشدر دیه جك بر کیسه یوقدر . اورته ده یالکمز چوقوری آچان ذات واردر . بو ذات ایسه اونی بالذات وبالفعل او چوقوره سوق والقا ایتمه مشدر . او انسان کندیلککندن دوشمشدر . او انسانك بوسقوطی ایسه تلف فعلتك ، کندیسنه نسبت اولونمیه صالح دكلدر . زیرا او انسان کندی اختیاریه کندینی او چوقوره آتما مشدر . یلمیه رك ، کورمیه رك سقوط ایتشدر . اونك چوقوره دوغرو بورومه سی ایسه ممنوع دكلدر ، مباحدر . بو جهته چوقوره دوغرو بورومك ، اورایه دوشمه تك سببی اولمقله برابر ، حکم کندیسنه اضافت اولونمیه صالح دكلدر .

آنکچون چوقوری آجان ، هر نه قدر تلف فعلنده فاعل مؤثر دکلسمده ، او حکمده اولان شرطک فاعلیدر . اوجهته تلف اولان شخصک دبتنی ضامن اولمسی لازم کلیر .

اصول فقه کتابلرندم بوم . مثله ده کی چوقور قازمق کیفیت ، تقریر اولوندینی وجهله علت حکمنده شرط ، مثال اولمق اوزره ایراد اولونیورسده ، فکر حاجزانه بجه بو دوغرو دکلدر . بو ، اولسه اولسه سبب حکمنده شرط اولایبیلیر . دها دوغروسی علت حکمنده سببیدر . واقعا چوقوره دوشن ذاتک چوقور اوزرینه یوروماسی ده بر سببیدر . فقط بو ، مباح اولمقله برابر قصدی اولمادیغندن حکم ، کندیسنه اسناد اولونمایوب سبب بعیده یعنی چوقوری قازان متسببه اضافت اولونمشدر .

معلومدر که تسببک موجب ضمان اولمسنده تعدی شرطدر . یعنی متسببک بر ضرری ضامن اولمسی ، او ضرره مفضی اولان فعلی حقیقته اولارق یاغیش اولمسیله مشروطدر . آنکچون یوقاریکی مثاله « بر کیمسه طریق حامده ویا باشقه سنک ملککنده بر چوقور آچوبده الخ . » دیدک . چونکه هیچ بر فردک طریق حامده ویا غیرک ملککنده خود بخود تصرفه حقی یوقدر . اما بر کیمسه ، کندی ملککنده بر قویو قازوبده اونک ایچینه باشقه سنک بر حیوانی دوشهرک تلف اولسه ، او کیمسه او حیوانک قیمتنی ضامن اولماز . چونکه اونک کندی ملککنده قویو قازمغه حقی وارددر و جواز شرعی ضما نه منافیدر . آنکچوندر که مجله نك (۹۳) نجی ماده سنده (متسبب متعمد اولمادیجه ضامن اولماز .) ذیلیمشدر . بو ماده ده کی « متعمد » تعیری ، متعدی دیمکدر .

سبب حکمنده شرط

سبب حکمنده اولان شرطه کلنجه : بو شرط ، کندیسسیله مشروطی آره سنده کندیسنه نسبت و اضافت اولونمایان بر فعل اختیاری حیولت ایدن شرطدر . ایچنده قوش بولومان قفسک ویا ایچنده حیوان بولومان آخورک

قابوسی آچق کبی . ایشته برکیمسه ، بر قفسک ویا آخورک قابوسی آچارده ، ایچنده کی قوش ویا بارکیر قاچارسه ، اوکیمسه قوشک ویا بارکیرک قیمتی ضامن اولماز . چونکه بوراده قوشک ویا بارکیرک فراریله حاصل اولان ضررکعلتی ، فرار فعلیدر . بوايسه قوشک ویا بارکیرک کندی فعل اختیاریسیدر . وقابویی آچق فعلنه منسوب ومضاف دکلدر . چونکه قایی آچلمقله برابر قوش ویا بارکیر قاچایه بیلیردی . قابویی آچان ، قوشی ویا بارکیری قووالامق کبی بر صورتله بالفعل قاچیر مامشدر . اونلر کندیلککندن قاچیشلردر . اولرده انسان کبی فاعل مختاردر . هر نه قدر حیواناتک عقلی یوقسه ده ، عقلک اولماسی اختیاره منافی دکلدر . اونک ایچون حیواناتک اختیار واراده لری صحیحدر . واونک ایچوندرکه قاچا ملری متصور و ممکندر ، حتی واقعدر فقط قابویی آچان ، یالکیز آچقله اکتفا ایتیبده فضلله اوله رق اوللری قووالامش ایسه ، اولوقت فاعل مباشر دیمک اوله جغندن ضامن اولور .

بو حکم ، قفسک ویا آخورک قاپیسی آچانه ضمان لازم کله می ، امام اعظم ایله امام ابو یوسفه کوره در . فقط ائمه حنفیه دن امام محمد ایله مذهب شافعی مؤسسی امام شافعی به کوره اوکیمسه به ضمان لازم کلیر . چونکه هر نه قدر بارکیرک فراری وقوشک اوچه سی ، کندی اختیار یله واقع اولان بر فعل و حرکت ایسه ده ، بوفعل اختیاری حیوانات ایچون حال طبعیدر ، یعنی قفسک قابوسی آچیلنجه قوشک اوچه سی ، آخورک قابوسی آچیلنجه بارکیرک فراری ، اوللرک مقتضای طبیعتیدر . بوکبی احوال وحرکات طبیعه دن احتراز ایسه ، غیر ممکن کیدر . بوجهتله بومسئله ده موجود اولان فعل اختیاری ، یوق حکمنده در . آنکچون قابویی آچان ذات ، فاعل مباشر حکمنده اولان متسبب متعدیدر ، ضامن اولمه سی لازم کلیر . مجله ده امام محمدک بورائی قبول وترجیح ایتدیکنندن (۹۲۲) نجی ماده نک فقره اخیره سی بورایه کوره تحریر اولونمشدر .

حاکم

بوندن اولکی فصلده (حکم)ک و انواعنک نهدن عبارت اولدیغنی بر تفصیل ایضاح ایله دک. شمدی ده اواحکامی وضع ایدن (حاکم)ک کیم اولدیغنی ایضاح ایدلم. بو احکام بختنک بدایتده دیمشدک که بو مبحثده حکمدن ، حاکمدن ، محکوم نهدن و محکوم علیهدن بحث اولونه جقدر . مادام که اورته ده وجوب و حرمت کی بر طاقم احکام واردر . شهسز اونک بر حاکمی یعنی واضی بولونمق مقتضیدر .

وجوب ، حرمت و اباحه کی احکام شرعیه بی وضع ایدن ، هیچ شبهه یوقدر که شارعدر . فقط عجباً عقل انسانی ده بو حکملری وضع ایده مزمی ؟ . عقلک وضع ایده جکی احکامی بردین ، بر شریعت تأیید ایتیه جک اولور ایسه او احکامک عموم افراد بشر اوزرنده هیچ بر نفوذی اولماز . حکومتلر خارجی قوتلر کی نفوذ مایسی اولسه ده ، نفوذ مغنویسی اولماز . نفوذ مغنویسی اولمایان احکام ایسه ، بشری جدال و قتالدن ، کیزلی کیزلی فناقلردن قورتا . و امازه خصوصیه عقول بشر متفاوت اولدیغندن برینک وضع ابتدکی و ایده جکی احکامی ، دیکری مناسب کورمز . بر مسئله ده کوچ حال ایله اتفاق ایدر لسه ، بیک مسئله ده اختلاف ایدر لر .

آنک ایچوندر که کرک اخلاقک و کرک حقوقک ، تعبیر فقهی ابله کرک احکام دینییه نک و کرک احکام قضائییه نک مغنوی بر قوه مؤیده سی بولونمق لابددر . احکام قضائییه نک حکومتلر قوه مؤیده سی اولاییلر سده ، احکام دینییه نک

یعنی وجدانیات و اخلاقیاتك قوه مؤیده سی اولامازلر. حتی حکومتلر، احکام حقوقیه نك نام مناسبه قوه مؤیده سی اولامیور. دینسز و طبعاً ای یارادلامش بر انسان، خلقك و حکومتك اطلاعی متعذر و حتی متعسر اولان برلرده هر درلو قنالی ارتکابدن خالی قالمایور.

انسان، احتیاجاته مغلوب بر حیواندو. حتی حیوانات مفترسه دندر. آزی دیشلری واردو، آكل اللحو مدر. آنکچون انسانلر، بر دینه، صمیمی بر عقیده به ربط ایدیه جك اولورلر، فرصت بولدقجه هر نوع قنالی اختیاردن فراغت ایتمزلر فنلر، علملر، مدنیتلر، انسانلرک اخلاقی تهذیب ایدیه میور. تهذیب شویله دورسون، بالعکس افساد ایدیور. چونکه علوم و فنون تکمل ایدیه رک مدنیت ترقی ایتدیکه، انسانلرک احتیاجاتی ده اون بئده تزايد ایدیور. یکی یکی کوره نکلر، موده لر، مدنی احتیاجلر حاصل اولویور. ایشته بواحتیاجلر انسانلری حیلله و دسیسه لر و بر چوق مدنی قنالقلره سوق ایدیور.

آنک ایچوندرکه اخلاقی تهذیب و حقوقی تثبیت خصوصنده معارف مدنیه نك اصلاً تأثیری اولمایور. واقعا ادیان صحیحهدن بر دینه سالک اولان يك چوق انسانلرده، قنالقندن کیری قالمایورلر. دینده بر چوق انسانلر اوزرنده تأثیرینی کوستره میور. لکن او کی اشخاص حقیقه تدقیق ایدیه جك اولورسه کورولورکه اونلرک بامقده اولدقلری قنالقلر صلابت دینه نك نقصاندن متولددر. ای بر تربیه دینه و برله مسندندر. اگر اونلر حقیقه و کمال صمیمیتله دیندار اولسه لردی، او قنالقلری ارتکاب ایتمزلردی.

خلاصه، بتون افراد انسانیه پی عین احکام ایله مکلف طوته بیلمک، اونلری عین احکامه حرمت و رعایت ایتدیره بیلمک ایچون، دینک وجودینه احتیاج بدیهیدر. بناء علیه کک اخلاقك و کک حقوقك حقیقی قوه مؤیده سی دیندر. فقط عجبا حضرت شارعك وضع ایدیه جکی اخلاقی و حقوقی احکامی، عقل بشر ادراک ایدیه مزمی؟ یعنی شریعت وضعندن اول ادراک ایدیه مزمی؟ بو حسن و قبح مسئله سیدر. علماء اسلامك بونده اختلافی واردو. ایضاح ایدیه لم.

مبحث حسن و قبح

یعنی

ایلك ، کوتولك

بو حسن و قبح تعبیملری ، تعبیر اصطلاحیدر . نیک و بد ، خیر و شر ، حق و باطل کی فضائل و رذائل بشری ، محاسن و مساوی اخلاقیه یی افاده ایدن نه قدر کلملر و ارسه جمله نیک مدلوللری ، بو حسن و قبح تعبیملرنده داخلدر . بناءً علیه بویحده (حسن و قبح) دن ، مقصد ، ایلك کوتولك در . یوقسه هر شیئه شامل اولمق اوزره کوزلك چیرکینلك دیمك دکادر . افعال بشریه ده کوزلك و چیرکینلکدر که ایلك و کوتولك دیمکدر .

براز ده ایشاح ایدم . لغةً کوزلك ، چیرکینلك معنالیینه موضوع اولان (حسن و قبح) کلملری ، بش معناده استعمال اولونور .

برنجیسی ، غرضه موافق و یا مخالف اولمقدردر . غرضه موافق اولانه کوزل دینیر ، عدالت کی . غرضه مخالف اولانه چرکین دینیر ، ظلم کی .

ایکنجیسی ، طبعه ملایم و یا منافی اولمقدردر . طبعه ملایم اولانه کوزل دینیر ، طائی کی . طبعه منافی اولانه چرکین دینیر ، آجی کی .

اوجنجیسی ، صفت کمال و یا نقصان اولمقدردر . صفت کمال اولانه کوزل دینیر ، علم کی . صفت نقصان اولانه چرکین دینیر ، جهل کی .

دردنجیسی ، بین الناس مدح و ثنایی و یا ذم و قدحی موجب اولمقدردر . مدح و ثنایی موجب اولانه کوزل دینیر ، سباحت کی . ذم و قدحی موجب اولانه چرکین دینیر ، بخل و امساک کی . ایکنجی ، اوجنجی و دردنجی معنالی ، برنجی معنایه ارجاع قابلدر . آنک ایچون امام غزالی حضرقلری ، اصول فقهیدن (المستصفی) نام کتاب کزینده یالکیز برنجی معنا ایله اکتفا ایتمشدر .

بشنجیسی ، عندالله مدح و ثوابه و یا ذم و عقابه مستحق اولمقدردر . مدح

و نوابه استحقاقی مستلزم اولان فعله کوزل دینیر. الله ایمان، عبادات وعدل واحسان کی. ذم وعقابه استحقاقی استلزام ایدن فعله ده چرکین دینیر. کفر وظلم وعد وان کی. بوراده «حسن و قبح» تعبیرلرندن مقصود اولان معنی، ایشته بو بشنجی معنادر. بو معنایه کوره «حسن و قبح» لفظلرینی کوزلاک، چرکینلک دیه دکل، اییلک کوتولک دیه ترجمه ایتک دها دوغرو اولور.

ایشته بومعناجه حسن و قبح، عقلمیدر. شرعیمیدر؟ یعنی نفس الامرده وحد ذاتنده افعال بشریه ده اییلک کوتولک وارمیدر، یوقمیدر؟ شریعتدن قطع نظر ایدلده عقل، کندی باشنه اییلک و کوتولک دینیلن شیلری ادراک ایده بیلیرمی؟ یوقسه بو وصفلر، صرف موضوعات شرعیه دئمیدر؟ ایشته بو مسئلهیه (حسن و قبح مسئلهسی) دینیرکه کرک علم کلامک و کرک علم اصول فقهک الک مهم مباحثدندر. وعین زمانده هم اخلاق، همده حقوق فلسفه سنک اسالاسایدر.

اراده بشر وقضا وقدر مسئله لرنده اولدینی کی علماء اسلام، بومسئله ده ده اختلافه دوشمشلردر. ذاتاً بو حسن و قبح مسئلهسی، اراده مسئله سنک تماندندر. آنک ایچوندرکه اراده بشری انکار ویا اضطراری اولدینی ادعا ایدنلر، نفس الامرده اییلک و کوتوللک وجودینی انکار ایتمشلردر. بالعکس اراده بشرک وجودینه و غیر اضطراری اولدیننه قائل اولانلرده، حسن و قبحک نفس الامرده موجود اولدیننه ذاهب اولمشلردر. بناء علیه بو مسئله ده اشعریلر جبری ایله، ماتریدلرده معتزله ایله برلششلردر. کرچه ماتریدیلرله معتزله آراسنده اراده مسئله سنده اولدینی کی، اوافق بر اختلاف نظر واردر. فقط بو، ذکره شایان اولیه جق درجه ده اهمیتدن عاریدر. وحقیقی اولمقدن زیاده لفظیدر. نزاع لفظی قیلدندر.

جبرییه و اشعرییه نظریه سی

جبرییه ایله اشعرییه نظرندۀ ذکر اولونان معنایه کوره حسن و قبح، یعنی اییلک کوتولک عقلی و نفس الامری دکلدر، شرعیدر. شریعتدن قطع نظر

ایله یکی صورتده اساساً نفس الامرده افعال و حرکات بشریه ده ایلیک کوتولک یوقدر. ایلیک کوتولک، خطابات شرعیه نك افعال مکلفینه تعلقی ایله حاصل اولان موضوعات شرعیه دندر. شرعک ورودندن اول عقل بشر، منفرداً و مستقلاً افعالک حسن و قبحی ادراک ایده مز.

آنکچون حسن امر شارعک، قبح ده نهی شارعک موجب و اثریدر. یعنی مأموره اولان افعال، جناب حق طرفندن امر اولوندینی ایچون ای وکوزل اولمشدر. منهی عنه اولان افعال ده، نهی اولوندینی ایچون چرکین اولمشدر. یوقسه اساساً وحد ذاتنده کوزل ویا چرکین اولدینی ایچون امر ویا نهی اولونمش دکدر. عقلک بوبابده اصلاً دخل و تأثیری یوقدر. عقل آنجق خطابات شرعیه بی فهم وادرا که آلتدر. ایشته بو مسئله ده جبریله ایله اشعریلرک دعواسی بودر.

معتزله و ماتریدیه نظریه سی

معتزله ایله ماتریدیه عندنده ایسه امر بر عکسدر. یعنی ایلیک کوتولک عقلیدر و نفس الامرده موجوددر. موضوعات شرعیه دن عبارت دکدر. افعالک حسن و قبح ایله اتصافی شرعک ورودینه توقف ایتمز. عقل او یله مجرد خطابات شارعی فهم وادرا که آلت دکدر. بلکه جناب حقک وجود و وحدانیتنه عرفان وایمان، عدل و احسان، منعمه قارشی عرض شکران و تخلص جان کبی بعض افعال واردر که عقل آنلرک حسنی، یا لکمز شرعک ورودینه دکل، احتی نظر و استدلاله بیله مقتدر اولمق سیرین بالبداهه ادراک ایدر. کذلک کفر، کذب مضر، ظلم و غدر، ایلیک قارشی کوتولک بغیر حق بر معصومی قتل و جرح کبی بعض افعال ده واردر که آنلرک قبحی ده، ینه او صورتله ادراک ایدر.

اعلاهی حق ایچون جهادک، بر جای نك الندن بر معصومک حیاتی تخلص ایچون اختیار اولونان کذبک حسنی، مجرد بر منفعت شخصیله ایچون کیمسه به ضرر ابراث ایتمدن کذبک قبحی کبی بعض افعالک حسن و قبحی ده نظر و استدلال

ایله ادراك ایدر. ایشته عقل، بوکی افعالك حسن و قبحی ادراك خصوصنده شرعه محتاج اولماز.

فقط حسن و قبحی خفی اولان انواع و اشکال عبادات، بین الناس جاری اولان عقود و معاملات کی دیگر^۱ - چونی افعالك حسن و قبحی ادرا کده شرعه محتاج اولور. بو جهتله بوکی افعالك حسن و قبحی ده، شرعک ارشاداتیله ادراك ایلر. شرع شریفده بالعموم فرق اسلامیه نك اتفاق اوزره وجوب و حرمت کی احکام ایله حاکم اولمقله برابر، عقلک مدرکانه افعالك حسن و قبحی تأکید و تأیید و عقلک ادراك ایتدیکی رلرده حسن و قبحی تبیین ایدر. خلاصه، اییلک امر شارعک، کوتولکده نهی شارعک مدلولیدر. یوقسه موجبی و اثری دکلدر یعنی فأموربه اولان افعال، اساساً و ماهیة کوزل اولدینی ایچون شرعاً امر اولونمشدر. نهی عنه اولان افعالده، نفس الامرده چیرکین اولدینی ایچون نهی اولونمشدر. یوقسه اشعریه نك دیدکاری کی امر و یا نهی اولوندینی ایچون کوزل و یا چیرکین اولمش دکلدر. ایشته بو حسن و قبح مسئله- سنده معتزله ایله ماتریدیلرک فکری ده بودر. هریکی طرفده مدعالرینی اثبات ایچون بر طاقم دلایله استناد ایدیور.

* *

اخطار - ذکر اولونان دلایلی ایضاح ایتزدن اول، مهم بر نقطه یی اخطار و بو بایده يك با کلش اوله رق معتزله حقنده حاصل اولان بر ذهابی تصحیح ایتک اقتضا ایدیور. شویله که: ایجاب و تحریم یعنی واجب قیلمق، حرام قیلمق معنایه حکم، آنجق واضع شریعت اولان جناب حق مخصوصدر. بو خصوصده جناب حقندن باشقه حاکم یوقدر. عقل بو مغناجه حاکم دکلدر. بونده معتزله دخی داخل اولدینی حالد. دین اسلامه انتساب دعاسنده بولونان هیچ بر فرقنک اختلافی یوقدر.

واقعا منلا خسرو و ابن کمال کی بعض متأخرین علما طرفندن معتزله نك بوبایده عقلی حاکم قیلدینی بیان اولونیورسده، دوغرو دکلدر. بونلر معتزله نك

نه کتابلرینی کورمشلر ، نه ده مقصدلرینی آ کلامشیر . تحقیق و تتبعلری غایت سطحیدر . هر معناسیله کرچکدن محقق اولان ابن همام ، علامه بنانی و همسلم الثبوت ، صاحبی کی محققینک تحقیقاتنه کوره معتزله نك بومشله ده مخالفتی یوقدر . ذاتاً باشقه د لوده اولاماز . چونکه معنای مذکور جه عقلی حاکم قیلمق دیمک ، عقلی واضح شریعت یایمق و دین و شریعتدن مستغنی قیلمق دیمک اولور که مسلم الثبوت شارحنک ده دیدیکی کی مسلمانلق ادعا سنده بولونانلرک لساننه یاقشماز .

اما حکم ، « بو فعل کوزلدی ، شو فعل چیرکیندر » کی کلام اخباریده کی نسبت جبرییه بی ادراک و اذعان معناسنه آلینیرسه بو تقدیرده عقل ، معتزله یه کوره حسن و قبح ایله حاکم اولابیلیر . لکن بوسورتده حاکم لفظنک معناسی واجب قیلان ، حرام قیلان ، تعیر دیکرله احکام شرعیه وضع ایدن دیمک اولمایوب بلکه حسن و قبحی ادراک ایدن دیمک اولور . و آنفاً بیان اولوندیغی اوزره بوندی معتزله یالکزدکدر . جمهور ماتریدییه ، یعنی بالعموم فقهای حنفیه دخی اولرله برابرر .

اوت ، بو بحثده معتزله ، ماتریدیلردن آریله رق باشقه بر طریق التزام ایتمشیر و بناء علیه حسن و قبحک انسانلر حقیقده شرعک ورودندن اقدم و جوب و حرمت کی احکام الهیهی استلرام ایده جکنه قائل اولمشلردر . لکن بونظریه یه قائل اولقله عقلک حقیقته و جوب و حرمت کی احکام ایله حا کمیتنه قائل اولمق لازم کلز . خصوصیه معتزله ، بو فکرمده یالکزدکدر . آشاغیده مفصلاً تحلیل و توضیح اولونه جنی وجهله معرفت الهیه نك وجوبی کیفیتنده باشده امام اهل سنت اولان علم الهدی شیخ ابو منصور ماتریدی حضرتلری اولدینی حالده جمهور ماتریدییه دخی معتزله ایله هم فکردر . ایشته مسائل مذکوریه یی بو صورتله تحلیل و تفریق ایدمک بر برینه قارشیدر ماملیدر .

بو جهت بو صورتله تصحیح ایدلدکن صوکره ، اصل بحثه رجوع ایله منازع فیه اولان مسائلی تلخیص و طرفینک دلائلی توضیح ایدم .

تلخیص مسائل

ابن هام حضرت لرینک (نحریر) نام تألیف بهینده بیان اولوندینی وجه ایله بو بحثده محل نزاع اولان مسائل اوچدر .
 برنجیسی، افعال اختیاریه نك نفس الامرده حسن و قبح ایله متصف اولوب اولماسی، تعبیر دیگرله حسن و قبحك عقلی و یا شرعی اولوب اولماسیدر .
 ایکنجیسی، اتصاف مذکورك، شرعك ورودندن اول احكام الهیه نك افعاله تعلقی استلزام ایدوب ایتمه مسیدر .
 اوچنجیسی، حسن و قبحك، تعذیب مطیع و تکلیف مالایطاق قضیه لرینك عدم جوازیخی اقتضا ایدوب ایتمه مسیدر .
 ایشته بو اوچ مسئله نك اوچنده ده اشاعره ایله معتزله، یکدیگرینه ضد باشقه باشقه نظریه لر تعقیب ایتشلردر . جمهور ماتریدیه ایسه برنجی مسئله ایله اوچنجی مسئله ده معتزله ایله همفکردر، ایکنجی مسئله ده یالکیز اساس اعتباریه معرفت الهیه نك وجوبنده معتزله ایله برابر اولوب دیگر افعال حقنده علی العموم ماتریدیلر اشعریلرله برابردرلر . جبرییه کلنجه، بونلر بو اوچ مسئله نك اوچنده ده اشعریلرله متفقدرلر . شمدی بو مسئله لری صره سیله برر برر توضیح و دلائلی تبیین ایده لم :

برنجی مسئله حقنده اشعریلرک دلائلی

برنجی مسئله که حسن و قبح عقلمیدر، شرعیمیدر؟ مسئله سیدر، بالاده بیان اولوندینی وجه ایله جبرییه ایله اشعرییه، شرعی اولدینی ادا ایدیور . بونلر کوره افعال بشریه حقیقتده و نفس الامرده حسن و قبح ایله متصف دکدر . کوزللك چرکینلك، اییلك کوتولک، افعالك نه ذاتندن و ماهیتندن، نه ده افعال ایله قائم بر وصف ذتیدن نشأت ایتشددر . بلکه شریعتك وروديله احکام شرعیه نك افعاله تعلقندن حاصل اولان بر کیفیتدر . بوجهته حقیقتده افعال بشریه ده کوزللك چرکینلك، اییلك فنالق یوقدر . آنک ایچوندرکه

شریعتدن قطع نظر ایدله جك اولور ایسه عقل مستقلاً افعالك حسن و قبحی
ادراك ایدمه مز . ایشته جبریله ایله اشعریه ، بو مسئله حقنده کی بو فکری بو
صورتله بیان ایتدکدن سوکره بونی ، بوجه آنی دلائل ایله اثبات ایتك
ایسته یورلر .

۱ — چونکه اولاً ، حسن و قبح شو یوقاریدم درمیان اولونان بش
معنادن هانکی معنایه آلیرسه آلینسین ، افعاله ثابت و مستمر اوصاف ذاتیه دن
دکدر . بالعکس امور اضافیه و اعتباریه دندر . آنک ایچون اضافات و اعتباراتك
اختلافیه تبدل و اختلاف ایدر . مثلاً غرضه و یا طبعه موافقت و مخالفت معنانه
حسن و قبح ، اغراض و طبایعك تبدیلیه تبدل و تخلف ایدر . بر ایش بر
شخصك غرض و طبعه موافق اولورده ، دیگر بر شخصك غرض و طبعه
مخالف اولور . بو حالده او ایش غرض و طبعه توافقی ایدن شخصه نظراً
محاسندن عد اولورنورده ، دیگر شخصه نظراً قبیاحتدن معدود بولونور .

انسان ایسه فطرة کندی نفسه اعتبار و باشقه سفی استحقاق ایدر اولدیغندن
هر فرد بر ایشك کوزل و یا چیرکین اوله سنده کندی غرض و طبعی اساس
و مقیاس اتخاذا ایلر . و بناء علیه غرضه و یا طبعه ملایم اولان افعالك حسنه ،
مباین دوشن افعالك ده قبحه حکم ایدر . بو بایده باشقه لرینی اصلاً نظر اعتباره
آلماز ، بتون عالمك کندی غرضه تابع اوله سفی آرزو ایلر . کویا که طالده
کندی غرض و مقصددن باشقه شایان اعتبار اغراض و مقاصد یوقش ، صانکه
بتون عالم کنندن عبارتتمش کی حرکت ایتك ایستر . ایشته فطری و جبلی اولان
شو حالت نفسیه سیبیلهدر که انسان ، بعضاً بر شئتك صورت مطلقه ده قبحه ،
فقالغه حکم ایدر . بعضاً آده چیرکینکی و فانی اوشئتك ذاته نسبت ایدرده ،
بوشی بنفسه چیرکیندر دیر .

بشرك حالات روحیه سی حقیقه تحلیل و تتبع ایدله جك اولورسه کورولور که
افعال حسنه و قبیحه دینیلن ، کوزل و یا چیرکین ، ابی و یا کوتو ، علوی و یا
سفلی دینیلن افعال و حرکاتده عامل و سائق اولان مؤثرات ، ایکی اصله راجعدر .

۱ - حب نفس

۲ - رقت جنسیه

حب نفس ساقه سیله در که بر انسان، خلقك مدح و ستایشنه کسب استحقاق
ایتمك مقصدیله بر چوق فدا کارلقلرده بولونور. حالبوکه ینه اوزات، کیمسه نك
اطلاعی قابل اولمایه جق برلرده اوکی فدا کارلنی اصلا اختیار ایتمز، بلکه ده
عکسینی التزام ایدر. شاعرك،

خلق عالم سرتسر حب وطن مجبولیدر

بیك كلستانه دكشمز بوم بر ویرانه بی

بیتمیله تصویر ایتمك ایسته دیکی محبت وطنیه، مسقط رأس محبتی ده، عین
حسدن متولددر. نفسك او وطنك بر جزئی اولمه سندن، حیات معصومانه نك
اوراده بکمنش بولونمه سندن، هرکسجه بك معزز اولان خاطراتدن ناشیدر.
بو خاطرات و حسیات ایسه نه قدر معزز و نه قدر مقدس عد ایدیایر سه ایدلرین،
نهایت حب نفسه دایایر.

مأرب قضاها الشباب ههالیکا

عهد الصبا فيها فاحتوا لیلیکا

وحبيب أوطان الرجال الهم

إذا ذكروا أوطانهم ذكرتهم

رقت - نسیمه تأثیر یلده انسان هم جنسته قارشى بك رحیم و شفیق اولور.
آمك ایچوندر که بنی نوعندن بریسنك بو غولمق اوزره اولدیغنی کورسه، تهلمکه بنی
کوزه آلهرق در حال صویه آتیلوب اونى نخلیصه شتاب ایلر. سن اونك بو
حرکندن طولای اوکا، نه عالیجناب، نه شفقلى بر ذات، دیرسك. حالبوکه
او نه عالیجناب و نه ده حقیقی شفقت صاحبیدر. اگر او یله اولسه بدی، بو
حسن شفقت و علوجنسائی، بنی نوعندن اولمایان فقط کندیسی قدر بو عالمده
باشامق حقنه مالك بولونان حیوانانه قارشى ده دویمش اولوردی. حالبوکه او،
حیوانانه قارشى نلبنده او یله بر شفق و رقت حسن ایتمك شویله دورسوز، بالعکس
بك بی رحمانه و غدارانه بر صورتده حرکت ایدر. آنکجه چون ابنای جنسی حقنده
بك رحیم و شفیق اولان نیجه انسانلر واردر که آو. چقمه بی کندیلمری ایچون

بك بويوك رذوق واكلنجه عد ايدرلر . واو كيمسه يه اصلا ضررى اولمايان
معصوم حيوانچقلىر حقنده يايىش اولدولرى ظلم ووحشى كال تفاخرله يكدىكرلرينه
نقل وحاكيه ايدرلر . ايدرلرده قىليرنده ذره قدر تاثر دويمازلر . بالعكس ذوق
آليرلر . هانى يا ، او عاليجناب و بك شفقتلى برذات ايدى ! اونك علوجنابى ،
رحم وشفقتى نروده قالدى ... !!

نروده قالاچق ؟ ذاتاً حقيقتده او تصور اولوان علويت ، رحم وشفقت
يوق ايدى كه اونك نروده قالدغى آرايهلم . اونك او رحم وشفقتى هم جنسه
مخصوص و منحصر ايدى . بوده ، مجرد اونك اغويستلىكندن ، حب نفس
حسنندن نشأت ايتمشدى . چونكه او ، بوغولمقده اولان ذاتى او حالده كورونجه
درحال وبران غير منقسمده اوندن كندى نفسه انتقال ايتدى ، كندينكده
اويله برتهلكيه دوشديكى زمان حالك نه اولاجغى دوشونرك تتره دى ، عقلى
باشندن كيتدى وبران غير منقسمده ذهندن كچن بودوشونجه نك سوقيله همان
كنديسى دكزه آتارق اوني قورتارمغه شتابان اولدى . بونك ايجوندر كه رقت
جنسيه ديديكمز حس شفقتده ، نتيجه اعتباريله حب نفسه راجعدر ، اوندن
متولددر . خلاصه بتون افعال وحركات بشريده ، بالعموم محاسن و مساويده ،
فضائل و رذائلده حاكم اولان ، ايشته بو ايكي حسدر . حب نفس و رقت
جنسيه حسيدر . و ايكنجيسنك منشأى برنجيسيدر . برنجيسى ايسه بر امر
جبلى و فطريدر .

والظلم من شيم لنفوس فان نجد

ذا عفة فلعله لا يظلم

بو خصوصده وهمك ، محبطك ، كوره نكك ، اعتيادتك ، چوجقلىقدن
برى اليان تربيه و تلقيناتك ده بك بيوك دخل و تاثيرى واردر . بو اسبابه ميبيدر كه
برقومه ، برملته كوره محاسندن عد اولان برشى ديكر برقومه ، ديكر برملته
كوره قبايچندن معدود اولور . كذلك بر مملكتده ، بر محبطده مكارمدن معدود
اولان بر ايش ديكر بر مملكتده ديكر بر محبطده مساويدن عد اولونور .

اوت بزده تسلیم ایدررز . بعض افعال واردرکه هر زمانده ، هریرده هر کس طرفندن محاسندن ویا قبايچدن عد اولونور . فقط بوندن حسن و قبحك اييلاك و کوتولكك اوافعالك ذاتندن ماهيت حقيقه سندن نشأت ايتمش اوله سی و بناء عليه نفس الامرده حسن و قبحك موجود بولونمسی لازم كله جگنی تسليم ایتمز . بز اشعریلر دیرزکه افعال مذ کوره نك عموم نظرنده حسن و قبح ايله اتصافی ذکر اولومان اضراض و مقاصد عمومیه نك اتحاد ایتمه سندن و یا خود بر دین ايله تدین ایدله سندن تولد ایتمشدر .

دیگر معالره کوره اولان حسن و قبح ده بویله در . اشخاصك ، احوالك ، طبایعك ، اضراض و مقاصدك اختلافیه تبدل ایدر . اضافات و اعتباراته تابع اولور . افعالك ذاتنده ثابت و مستقر دکدر .

اشعریلرک ابکنجی دلیل : اگر حسن و قبح ، افعالك ذاتنده ثابت اوصافدن اولسه یدی ، اصلاً تخلف ایتمه سی لازم کلیردی . حالبوکه اويله دکدر ، دائماً تخلف ایدیور . مثلاً کذب ، یالان سویله مک ، قبايچدن محدود اولدینی حالده بر معصومك حیاتی آنی قتلہ تصدی ایدن ظالمك الندن تخلص ایچون اختیار اولونورسه محاسندن عد اولونور ، حتی واجب اولور . اگر کذبك قبحی نفس الامرده ثابت بروصف ذاتی اولسه یدی ، بو مسئله دهده محاسندن عد اولونماق و شرعاً واجب اولماق اقتضا ایدردی . چونکه اوصاف ذاتیه ، احواله اضافتله تبدل ایتمز . خلقك اعتبارانك دکشمه سیله دکشمز . [بونلرک] جوابلری ماتریدی نك دلائلی ایضاح اولوندقدن صوکره ایراد اولونه حق سلسله کلامی بوزمامق ایچون شمیدین جوابلری ذکر اولونمامشدر .

۳ — اشعریلرک اوچنجی دلیل : ورده افعال بشر ، اختیار ی اولمایوب

اضطرار ایدر . چونکه بحث مخصوصنده بسط و بیان اولوندینی اوزره انسانلرک اراده جزئیسه سی ده اراده کلیه سی کی جناب حق طرفندن مخلوقدر . اراده جزئی نك مخلوقتی تسلیم ایدله جك اولور ایسه دیرزکه انسانی افعال و حرکاته

سوق ایدن، اراده جزئیه نك صدورینه باعث اولان عوامل و دواعی مخلوقدر.
 بونلرده مخلوق دكلدر دینله من . زیرا بو تقدیرده دور ویا تسلسل لازم کایرکه
 سزجده بطلانی مسامدر . شو حالد نتیجه اعتباریله افعال بشریه نك اختیاری
 ظن اولونان قسمی ده اضطراری اولمقدن قورتولاماز . چونکه اراده جزئیه ،
 او دواعی نك تحت تأثیرنده زیون و مقهور و بناء علیه انسان افعال و حرکاتنده
 مضطر و مجبوردر . افعال اضطراریده ایسه حسن و قبح تصور اولوناماز .

مع مافیه شوراسنی اخطار ایلمک بز اشعریلر ، حسن و قبحك نفس
 الامرده ثابت اولمایوب امور اضافیه دن اولدیغنه قائل اولمقله برابر ، مجاری
 عاداتده ناس بیننده حسن و قبحه دائر واقع اولان اطلاقاتی عقلك ادراك
 ایده جکفی انکار ایتمیز . بز آنجق جناب حقه نسبتله مدح و ثوابه ویا ذم
 وعقابه استحقاق معناسنه اولان حسن و قبحك عقلاً ادراك اولونه بیله جکفی
 انکار ایدیورز . [اشعریلردن مشهور امام غزالی نك (مستصفی) سنده وقاضی
 بیضاوی نك (منهاج) نده بو صورته محرردر .]

ماتریدیه نك دلایلی

یوقاریده بیان ایتمشدك كه معتزله ایله ماتریدیه عنندنه - اشعریه فکری نك
 تماماً ضدی اولارق - حسن و قبح عقلیدر ، شرعی دكلدر . شریعتدن قطع
 نظر ایدلدیکی تقدیرده عقل ، مستقلاً افعال اختیاریه نك حسن و قبحی ادراك
 ایدر . شو قدر كه یوقاریده مثالریله بیان ایدلدیکی وجه ایله بعض افعالك حسن
 و قبحی بالبداهه ، بعض افعالك حسن و قبحی ده تأمل و استدلال ایله ادراك
 ایدر . دیگر بعض افعالك حسن و قبحی ده خفاسی حسیله شرع شریفك
 ارشادیه ادراك ایلر . معتزله ایله ماتریدیه آراسنده شو قدر بر فرق واردركه
 معتزله نك بر قسمی ، حسن و قبحك أفعالك ذاتندن متولد صفت ذاتیه اولدیغنه ،
 بر قسمی ده افعالك ماهیتندن خارج بر صفتدن نشأت ایستدیکنه ذاهب اولمشلردر .

ماتریدیه عندئذ ايسه مطلقدر . ايستر فعلك ذاتندن متولد اوصاف ذاتيه دن اولسون ، ايستر باشقه بر وصف وسيددن نشأت ايتسين مساويدر . بو جهتله اشعريه نك بالاده ذكر اولونان دلائلندن بر قسمي معنزله حقنده وارد اولديني حالده ، ماتریدیه قارشى وارد دكلدر . ماتریدیه نك دليللری بوجه آتيدر :

۱ - ماتریدیلر ك برنجی دلیلی : حسن و قبح ، اكر حقیقه

ونفس الامرده موجود اولمايوده مجرد دين و شرعك ورود و اعتباری ايله كسب وجود ايتسه يدی ، شرعك وروددن اول مثلاً صدق ايله كذب ييتنده حسن و قبح جهتله مساوات تامه بولونمق اقتضا ايدردی . بو حالده مؤخرأ شرعك صدق واجب و كذبى حرام قيلمى ، عكسنى التزامدن اولی اولمازدی . بويله ايسلك فنالق اعتباريله تماماً بربرينه مساوی اولوب آرالرنده هيچ برفرق بولونمايان ايكي شيدن برى واجب ، ديكرى حرام قيلمق ايسه عتددر . حكيم اولان حضرت شارعك حكمت جليله صمدانيه سته منافيدر .

۲ - ماتریدیلر ك ايكنجی دلیلی : حسن و قبح ، اكر حد ذاتنده

موجود و عقلاً معلوم اولماسه يدی بشریتده محاسن و مساوی تامه هيچ برشى بولونماق ايجاب ايدردی . بو تقديرده انسانلری بر دين و شریعته تابع طوتماق ، حيوانات ساثره كى مطلق العنان اولارق سربست براقق ، بهوده يره حرکات بشری ققييد و تحديد ايتمه ك لازم كليردی . چونكه عكسى معامله انسانلری بلا موجب بر جوق لذائذ حياتيه دن محروميتله تضيق و بلا فائده حریتلرنی ققييد اولوركه عتله اشتغال ديمكدر .

خصوصيله احكام شرعيه رعایت ايتدكلرندن طولاي آنلری اك آغير جزا ايله تجزيه و تعذيب ايتمكده هيچ بر معنى قالماز . بو ايسه شان الويته هيچ بر وجهله لايق اولماز . حالبوكه حقیقت بويله دكلدر . دين و شریعت وضعنده حكمت عظيمه و فوائد كثيره وارددر . بونك انكارى ضرورت عقليه يني

انکاردر . بر جوق آیات قرآنیہ بو بایده شاهد عادلدر . حتی قرآن کریم ، وضع شریعت و تأسیس نبوت خصوصتک محضاً رحمة الله علیه اولدیفی ناطقدیر .

۳ — ماتریدیلرک اوچنچی دلیل : عدل و احسانک حسنی ، ظلم

وعدوانک ، اییلکه قارشى کفرانک قبیحی ، بتون عقول سلیمه اصحابی عیندندمه متفق علیهدر . حتی هیچ بر دین ایله متدین اولمایانلر بیله عادلری ، کوره - نکلری ، غرض و مقصدلری باشقه باشقه اولدینی حالده بوندی اختلاف ایتمه مشلردر . اکر بوکی افعالك حسن و قبیح عقلاً و ضرورتاً ادراک ایدلمه مش اولسه یدی دینی دینسر بتون اصحاب عقولک بو اتفاق حصوله کلمزدی . هر زمانده کره ارض اوزرندمه بولونان بتون اصحاب عقولک بو ذکر اولونان فعللرک حسن و قبیح ایله اتصافندمه متفق اولملرندن آ کلاسیلیرکه بوکی فعللرده کوزللك ، چرکینلک دینلن صفیلر ، اوفعللرک صفات ذاتیه سندیدر . دوغرودن دوغرویه فعللک ذاتندن نشأت ایتمشدر . ذاتاً اصحاب عقولک بو اتفاقلرینه باعث اولان کیفیتده بودر ، یعنی کوزللك چیرکینلک وصفلرینک او فعللرک برر وصف ذاتیسی اولمه سیدر . چونکه مثلاً ظلمک قبیحی آلمک وصف ذاتیسی اولماسه یدی (ظلم چیرکیندر) قضیه سندمه دینی ، دینسر کافه عقلاً اتفاق ایتمزدی . زیرا بو صورتده بالجله اصحاب عقولی بو حکمدمه اتفاقه سوق ایدمک بر سائی بولونمازدی .

بو دلیل قارشى ، سائف الذکر افعالك حسن و قبیحی افعال مذکورمک ذاتندن نشأت ایتمیوب بلکه او افعالده عمومک اعراض و مقاصدی اتفاق ایتمش اولدیفندن و ذکر اولونان افعالك مصالح عمومیه ناسه موافقت و یا مخالفتندن تولد ایتمشدر . طرزنده اعتراض ایدلمک اولورسه بو اعتراض ، حسن و قبحک ذات فعللک مقتضای اولدیفنی ادعا ایدن بعض علمله معتزله حقنده وارد اولور . فقط بزم حقمزده وارد اولماز . چونکه بز کوزللك ، چیرکینلک ، اییلک ، کوتولک دینلن وصفلرک همه حال ذات فعللک مقتضای اولدیفنی

و یا خود اوله سی لازم کلدیکی ادا ایتیمورز . اونی بعض علماء معتزله ادا ایدیور . بزه کوره بر فعلک حسن و قبح ایله اتصافده مصالح عمومی ناسه موافقت و مخالفتی کافدر .

بو مقامده بزم (ذاتی) تعیرندن مقصد مزده بدر . یعنی فعلک مقاصد و مصالح عامه به موافقت و یا مخالفتیدر . یترکه عقل ، مجرد بر فعلی تصور ایتمکه بو وصف موافقت و یا مخالفتک او فعل ایچون نبوتنه جزماً حکم ایتمش اولسون . ایشه بو وصف اعتباریله درکه بو فعل عدالتدر ، کوزلدر . شو فعل ظلمدر ، چیرکندر دینیر . اما بو وصف ، فعلک حقیقه ذاتیاتندن اولمایوب بر امر خارجی ایتمش . و حسن و قبحده بو امر خارجیدن نشأت ایدیورمش . و ارسین او یله اولسون ، بونده بر بآس یوقدر . مادام که بو وصفی و بو اعتبار ایله حسن و قبحی ادرا کده کافه اصحاب عقول تردد ایتیمور ، بو کافدر . و آرتق کرک او وصف و کرک اونک لازمی اولان حسن و قبح ، اوصاف ذاتیه دن دیمکدر . بو بایده باشقه برشی آرامقه لزوم یوقدر . چونکه چونکه اساس دعوی ، حسن و قبحک عقلاً قابل ادراک اولوب شرعه متوقف اولماسیدر . بو دعوی ایسه بالعموم اصحاب عقل و ادعائک بوجه مشروح حسن و قبحی ادرا کده اتفاق ایتمه سیله ثابت اولویور . [هکذا استفيد من التحرير و مسلم الثبوت] بو مقامده سویله جک دها بعض سوزلر و ارسده ، اونلری بوجه آتی اشعریلرک دلیللرینه ویرله جک جوابده سویله جکمزدن بوراده اونلرک ذکرندن صرف نظر اولونمشدر .

اشعریلرک دلیللرینه ماتریدیلرک جوابی

۱ — برنجی دلیلک جوابی : حسن و قبح مسئله سنده بر شخصک ، بر جماعتک ، بر قومک غرض و طبعی ، مدح و ذمی اساس اتخاذ ایدیله جک اولورسه بزده تسلیم ایده رزکه بو اساسه کوره حسن و قبح ثابت ولایتیر بر

وصف اولماز. اشخاص واضع، احوال وعاداته، زمان ومكانه تابع وآنلرك تحويله متحول اوصاف نسيه وامور اعتباريه دن اولور .

لكن انكار اولنه بيليرمي كه كائناتده هر شيك كندينه كوره بر فرض اصليسي ، بر غايه سي اولديني كي انسانلغكده بر فرض اصليسي ، بر غايه سي واردر . بشریت دائما اوغايه يه متوجهدر . دينلر ، شريعتلرده هب او غايه يي استحصال ايچون وارد اولمشلردر. بو غايه ايسه دائم وانسانلق ايله قائمدر . افرادك ، احوال وعاداتك ، زمان ومكانك تبدلي ايله متبدل دكلدر . آنلر نه قدر تبدل ايدرسه ايتسين اودائما ثابت ، اصلا تحول قبول ايتمز ، لايتغير بر حقيقتدر. بوغايه ده ، بشرك حائر اولديني استعدادده كوره مطلوب اولان منتهای كماله وصوليدر . يعنى تام بر مدنيت فاضليه وصوليله حقيقي سعادت بشريه نك حصوليدر .

شوحالده بواساس، افعال حرركاتك حسن وقبحنده مقياس اتخاذايديليرسه، بوتقيدرده ايسلك كوتولك ثابت وغير متحول بر حقيقت ماهيتي اكتساب ايدر. انسانلق بر ، غايه ده بر اولديني ايچون بونده اويله كوره نكك ، تربيه نك ، محيطك ، اعتيادات وتلقيناتك اصلا دخل وتأثيري اولاماز بناءً عليه بو غايه يه موافق و آكا موصل اولان هر نوع افعال و حرركات ، هر يرده و هر زمانده محاسندن وبالعكس بوغايه يه مخالف و آني محل اولان بالجملة حرركاتده قبايچدن عد اولونور .

بو حقيقته مبنيدير كه هيچ بر غرض شخصي و نفع خصوصي يه تابع اولمايان انساني فدا كارلقلرك ، فضائل ومعالى اخلاقيه نك ، صانع طاله و حقايق اشيايه متعلق علم ومعرفتك ، عدل واحسانك ، هر كسه شامل افاضة نعمك حسنده هيچ بر عاقل تردد ايتمز . بو كي افعال ، دنيا نك هر يرنده بو يوكلكدن معدود اولور . بونك ايچوندر كه بو كي مآثرعاليه هر دين وشريعتده مظهر تحسین اولمش وهيچ بر دين حقيقي طرفندن تهيهج اولونما مشدر .

بوتون نصوص دينيه واحكام شرعيه برر برر تحليل ايديله جك اولورسه

کورولورکه بو اساس، شریعتده اصل الاصولدر . دینکده شریعتکده هدف اتخاذ ایله دیکی غایه بودر . آنک ایچوندرکه بو معناه حسن و قبیح ، منازع فیه اولان حسن و قبحک یعنی شارعک مدح و ثوابه و یا ذم و عقابنه استحقاق مناسنه اولان حسن و قبحک اساسی و مبنی عایددر . بو جهته بو ، اونک لازم غیر فارقیدر . اعظم اشعریه دن مشهور امام غزالی حضرتلری ، اصول فقهه دائر اولان (المستصفی) نام اثر جلیلنده عقلک بو حقیقتی ، حقایق شرعیه دن اقتباس ایتیش اولدیفنی بیان ایله جواب ویریورسه ده ، او یله اولسه یدی حقیقت مذکوره هیچ بر دینه سالک اولمایان عقول مجرد اصحابی عندنده مظهر حسن قبول اولمازدی . حالبوکه امر بر عکسدر . متدین و غیر متدین بوتون ارباب عقول بو مسئله ده متفقدر .

قالدی که صدق و کذب کی بعض افعالده وارددرکه بونلرک کوزلکی چیرکینلکی دوشوردن دوشوریه ذاتلرندن ، ماهیتلرندن تولد ایدر . مثلاً یالان ذاتنده و ماهیتنده چیرکین برشیدر . بونک چیرکینلکی کندی ماهیتندن ، کندی مفهومندن متولددر . ذکر اولنان غایه یه مخالفتی حسیله ده چیرکین ایه ده ، اوندن قطع نظر ایدلکی صورتده دخی مجرد ماهیتی اعتباریله ده چیرکیندر . آنکچون یالان ، یالان اولق حیثیتیه چیرکین برشیدر . بناءً علیه چیرکینلک آنک ذاتنده مندمج بر وصف ذاتیدر . عدل ، ظلم و صدق مفهوملری ده بویه در . بو مفهوملر دوشونوله جک اولورسه کورولورکه بونلرک حسن و قبیحی ده ذاتلرنده مندمجدر . آنکچون بونلرک حسن و قبیحی هیچ بر وقت ، هیچ بر سیبله کندیلرندن تخلف ایتمز .

۲ — اشعریه نک ایکنجی دلیلنه جواب : اشعریلر نه دییورلردی ؟ دا کر حسن و قبیح افعالک اوصاف ذاتیه سندن اولسه یدی . اصلاً تخلف ایتمه مسی لازم کلیردی . حالبوکه تخلف ایدیور . مثلاً کذب ، قیاسیحدن معدود اولدیفنی حالده بر معصومی ، اونی اولدیرمک ایسته یین ظالمک آلتدن فور تارمق ایچون اختیار اولونورسه محاسبندن عد اولونور . حتی شرعاً واجب اولور . اگر

كذبك قبحی سزك دیدیكیكز کی كندیسنك ذاتیاندن بر وصف ذاتی اولسه.
یدی ، بومسئلهده حسن ایله متصف اولماسی اقتضا ایدردی . « دیورلردی ،
دکلی ؟

محققین علمای حقیقه بوکا بوجه آتی جواب ویریورلر : بوتصویر اولوفان
مسئلهده چیرکینلک کذبدن تخلف ایتمش دکلدر . یالان دائماً قیجدر ، آنک
قبحی بو مسئلهده دخی باقیدر . بوراده اختیار کذب اولونمسنک وجوبی دها
بیوک بر قیجک ارتکاب اولونماسی ضرورتنه مبتیدر . اهون شریخی اختیار
قیلندندر . بومسئلهده ایکی فساد ، ایکی قیج تعارض ایدیور . پری یالان
سویله مک . دیکری بر مظلومک حیاتی قورتارماقدیر . ایشک دوغروسی
سویلنه جک اولسه هم اومعصومک حیاتی بغیرحق هدر اولاجق ، همده اون
تعقیب و تحری ابدن شخص متهور بر جنایت عظیمه ارتکاب ایدمک . و بو
تقدیرده یعنی دوغروسی ومثلاً اومعصومک نره به کیزلندیکی سویلندیکی صورتده
دها بیوک بر مفسدت ارتکاب ایدلمش اولاجق . ایشه بوندن احترازاً مسئله
مذکورده یالان سویله مک اضطراری حاصل اولمشدر . بوندن چیرکینلک
کذبدن تخلفی لازم کلز . آچلقدن اوله مرتبه سنه کلن بر شخصک دیکرینک
مالی، مثلاً اکه کی جبراً آلارق ییمه سیده بو قیلندندر . وبونک امثالی یک
چوقدر .

سؤال — بو مسئلهده یالان سویله مک ، شرعاً واجب اولویور . مأمور به
اولان هر واجبک حسن ایله متصف اولمه سی لازم کله جکی قضیه یی ایسه ،
سزجده مسلمدر . او حالده بوراده کذیک حسن ایله اتصاف ایتمه سی لازم
کلزمی ؟ . .

جواب — اوت ، مسئله معروضهده کذب ، فی الواقع حسن ایله اتصاف
ایدر . فقط بر حسن ، حسن اصلی دکل . حسن طاریدر . یالان سویله مک حقیقتده
ونفسنده چیرکیندر . آنک بو مسئلهده کی کوزلادیکی باشقه بر سبیدن بالواسطه
حاصل اولمشدرکه اوده ، معصومک حیاتی تخلص کیفیقدر . کذب ، لذاته

قیسح اولدینی حالد بوراده باشقه برواسطه دن اکتساب حسن ایدیور. بویه اساساً چیرکین اولوبده باشقه برواسطه حستک توسطیله کوزللك اکتساب ایدن افعاله (حسن لغیره) دینیر. ننه کیم آشاغیده آیریجه بحث اولونه جقدر.

بونده بر بآس یوقدر وامثالی ده بک چوقدر. چونکه حسن غیری قیسح ذاتی یه، تعیر دیکرله بالواسطه کوزل اولق بالذات چیرکین اولمغه منافی دکدر. جهتلر، اعتبارلر باشقه باشقه اولونجه کوزللك، چیرکینلک ایکیسی ده برشیده اجتماع ایدمیلیر.

ایشته (ضرورتلر ممنوع اولان شیلری مباح قیلار) قاعده فقهییه سنک معناسی ده بودر. یعنی بالذات قیسح اولان برشی، صوکرده دن عارض اولان ضرورتک دفی واسطه سیله اکتساب حسن ایدر. و آنده مباح معامله سی اجرا اولونور.

اهون شرین اختیار اولونور.

ایکی فساد تعارض ایتدکه اخفی ارتکاب ایله اعظمینک دفی چاره سنه باقیلیر.

ضرر اشد، ضرر اخف ایله ازاله اولونور.

کبی قواعد فقهییه، هب بو اساسک باشقه باشقه صورتلرله افاده سیدر.

[کذافی مسلم الثبوت و شرحه]

۳ — اشعریه نك اوچنجی دلیلنه جواب: یوقاریده (اراده) بحثده بر تفصیل ایضاح ایتمشدک که اشعریلر، اراده جزئییه ده اراده کلیه کبی رأساً وابتداءً جناب حق طرفدن مخلوق ویاخود بر طاقم دواعی نك تحت تأثیرنده مضطر و مقهور اعتقاد ایلرلر. و بونک نتیجه سی اولق اوزره افعال و حرکات بشریه یی افعال اضطراریه جمله سندن عد ایدرلر. ایشه بو اعتقاد، اشعریلری افعال بشریه ده حسن و قبحک وجودینی انکاره سوق ایتشیدر. چوتکه شبهه سز افعال اضطراریه ده حسن و قبح تصور اولوناماز.

ینه (اراده) بحثده تفصیل ایتمشدک که ماتریدیه کوره «قصد» و «اختیار» کلمه لرله افاده ایتک ایستدیکمز (اراده جزئییه)، اویله رأساً وابتداءً جناب

حق طرفندن مخلوق اولدینی کبی ، بر طاقم دواعی نک تحت تاثیرنده مضطر و مقهورده دکلدر . چونکه اراده جزئییه نک مخلوق اولدینی قبول ایدیه جک اولورسه ، انسانلرک افعالی ده ، اراده لری ده جناب حقک افعالی دیمک اولور . بو صورتده انسانلری تکالیف شرعیه ایله مکلف طه تمق ، الله مخصوص اولان افعالك اجراسنی انسانلردن ایسته مک دیمک اولورکه بطلانی بدیهیدر . اراده اوزرنده مؤثر اولان دواعی به کنتجه ، یونلر اراده یی بالکلیه سلب ایدیه جک و بناء علیه مقاومت قابل اولمایه جق درجه ده مؤثر دکلدر . نتیه کیم بحث مخصوصنده مثالیه ایضاح اولونمشدی . خلاصه ، قصد واختیارک وجودی بداعت عقلیه ایله ثابتدر . اختیار ایسه اضطراره مانعدر . بناء علیه افعال بشریه اضطراری دکل ، اختیاریدر . عکسفی ادعا ، ضرورت عقلیه به قارشی مکابره دن باشقه برشی دکلدر .

دلائل مذ کوره نک ایکی اصله ارجاعی

طرفینک بو بایده ده بعض دلائل وارسده اطنابدن احترازاً ذکرندن صرف نظر اولونمشدر . ذاتاً بو بحثده متقابلاً ایراد ایدیلن دلائل ، تعمیق نظره تحلیل ایدلیدی صورتده کافه سنک ایکی اصله راجع اولدینی تظاهر ایدر . بری اراده جزئییه ، دیکری حکمت الهیه نظریه لریدر . اکابر علماء اسلامیه طرفندن کرک علم کلامه و کرک علم اصول فقهه متدائر تدوین اولونان اک بیوک مؤلفات امان ایله تتبع ایدیه جک اولورسه ، کورولورکه حسن و قبحده منشأ اختلاف بو ایکی نظریه ده کی اختلافدر . او جهته حسن و قبح مسئله سی فرعدر ، اصل اولان بو ایکی نظریه در . آنک ایچون اراده جزئییه یی و حکمت الهیه یی انکار ایدنلر ، حسن و قبح عقلی یی ده انکار ایتشلردر . بالعکس اراده جزئییه و حکمت الهیه یی قائل اولانلرده ، اییلک و کوتولکک عقلی و نفس الامری اولدینه ذاهب اولمشلردر . ایشته جبرییه بالذات و اشعرییه بالواسطه اراده یی انکار ایتدکری کبی ،

جناب حقك افعالنده وامر و نهيشده حكمت و مصالحتك لزومى ده انكار
ايتدكرندن حسن و قبح حقيقى مسئله سنده دخی بالضروره انكار جهتنى
الزام ايتمشلر وبالنتیجه افعالك حسن و قبحنى شرعك موضوعات و اعتباراتندن
عد ايله مشلردر . معتزله ايله ماتریدیه ایسه هم ارادهك وجودینه ، هم ده
حكمت الهیهك لزومنه قائل اولدقلرندن حقیقنده حسن و قبحك وجودینه
و عقلاً قابل ادراك بولونديغنه ذاهب اولمشلردر . بو حكمت الهیه مسئله سنده ،
يك مهم بر مسئله اولدینی ایچون بوندن آشاغیده آیریجه بحث ایده جکیز .

منازع فيه ایکنجی مسئله

حسن و قبح ، افعالك افعاله تعلقی استلزام ابرمی ، ایتزمی ؟

اشعریه حسن و قبح عقلی بی ، یعنی حقیقته و نفس الامرده ایملك و کوتولکی
انكار ایتدکری ایچون آنلرك نظریه سنه کوره شرعك و رودندن ، دین و شریعت
وضعندن اول افعال بشریه و جوب ، حرمت کبی احکام الهیه تعلق ایتمز .
بناء علیه انسانلر قبل الشرع تکالیف شرعیه ايله مکلف اولمازلر .

معتزله ، حسن و قبح عقلی مناط حکمدر . بو سببله افعال بشریهك
حسن و قبح ايله اتصافی ، احکامك افعاله تعلقی استلزام ایدر دیرلر . بونظریه یه
بناء معتزله یه کوره حسن و قبحی ظامر و عقلاً معلوم اولان افعاله احکام
مذکوره تعلق ایدر . بنابرین مدرکات عقلیه دن اولمایان مسائلده فی الواقع
مکلفیت شرعیه بولونماز . امامدرکات عقلیه دن اولان مسائلده امر برعکسدر .
بو کبی عقلك حسن و قبحنى ادراك ایتدیکی افعال و حرکاتده ، شریعتدن قطع
نظر ایدلدیکی تقدیرده دخی انسانلر تکالیف الهیه ايله مکلفدزلر .

ماتریدیه یعنی حنفیه کلنجه ، مشایخ حنفیه بو مسئله ده احساس اعتباریه
ایکی قسمه آیرلشلردر . بر قسمی اشعریهك فکرنی قبول ایتمش و بناء علیه
بعث نبویه دن اول مکلفیت شرعیه یوقدر دیمشلر . دیگر بر قسمی ده ، یالکیز

معرفت الهیه نك وجوبی مسئله سنده معتزله نك رأی قبول ایتشلر . فقط مسائل سائرده برنجی قسمله برلشهرک اشعریه فکرینه ذاهب اولمشلردر . شو حالده بونلر کوره بعث نبویه دن اول جناب حقك وجود و وحدانیتته و صفات کالیه سنه ایمان ایتك واجب ، کفر ، کذب و ظلم و سفه کی افعال قبیحه نك جناب حقه اسنادی حرامدر .

ایضاح

حسن وقبح بحثك ابتداسندن بورایه قدر جریان ایدن مباحثات، حسن وقبحك شرعك ورودینه احتیاج مس ایتكسزین عقلاً ادراك اولونوب اولو . نامیه جغه دائر ایدی . بو شمديکی بحث ایسه ، وجوب و حرمت ، فساد و بطلان کی احکام شرعیه نك افعال بشره تعلقی ، دین و شریعتیه مفتقر اولمقسزین عقلك کندی باشه ادراك ایدوب ایدمه چکنه متعلقدر .

یوقاریده بیان اولوندینی اوزره بو مسئله ، حسن وقبح بحثه مقدار فرق اسلامیه آراسنده موجب اختلاف اولان اوج مسئله نك ایکنجیسیدر . و حسن وقبح نظریه سنك نتایجندن وعین زمانده اختلاف واقعك ثمراتسنددر .

اشعریلر ، نفس الامرده افعال بشریه ده حصن وقبحك وجودینی انکار ایتشلردی . طبعی بو فکرك نتیجه سی اولمق اوزره بو مسئله ده دخی عقل بشره قبل الشرع احکامك افعاله تعلقی ادراك ایدمه من دیورلر . بو جهتله اشعریلر کوره ابناء بشره ، بعث نبویه دن یعنی طرف الهیدن بر پیغمبر بعث وارسال اولونمق صورتیه قانون شریعت وضع اولونمازدن اول ، تکالیف الهیه ایله مکلف طوتولاماز . بناء علیه نه صبی عاقله ، نه ده سن رشده واصل اولان اصحاب فکرتیه ایمان واجب ، کفر حرام اولماز .

برکره عقل بشره مستقلاً و منفرداً افعالك کوزللك و چیرکینلک کی ادراك ایدمه چکی نظریه سی اساس اولارق قبول ایدیلنجه بالنتیجه احکام شرعیه نك

افعال بشریه به تعلقی عقلک ادراک ایده می‌جکی قضیه سنی دخی اولویتسه قبول ایتک ضروریدر. بو ایکنجی مسئله برنجینک نتیجه منطقیه سیدر. بونده سوز یوقدر.

لیکن برنجی مسئله اساساً قبول ایدلمزده، معتزله و ماتریدیه نک قائل اولدقلری وجه ایله عکسی ادعا ایدیلیر و بناءً علیه قبل الشرع افعالک حسن و قبحی عقلاً ادراک اولونا ییلیر دینیلسه، بو نظریه دن عقل بشر شرعه محتاج اولمق سزین احکام الهیه نک افعاله تعلقی ادراک ایدر حکم منطقیسی، نتیجه اوله رق لازم کلیرمی، کلمزی؟ یعنی او نظریه دن بو نتیجه چیقارمی، چیقمازمی؟ ایشته اصل تدقیقه شایان اولان جهت بودر.

برنجی مسئله ده، یعنی نفس الامر ده افعال بشریه ده حسن و قبح عقلی نک وجودی نظریه سنده معتزله ایله ماتریدیه متفق اولدقلری حالده اشبو ایکنجی مسئله ده بررلرندن آیرلمشلدردر. معتزله ایکنجی مسئله یی برنجینک نتیجه ضرور. ریه سی تلقی ایدیور. ماتریدیه ایسه بو تلقی یی مطلق بر صورتده قبول ایتمیهور، مسئله یی تفصیل ایدیور. اهمیتته بناءً برر برر ایضاح ایده لم، شویله که:

معتزله، «حسن و قبح ده اولدینی کی بو مسئله ده دخی عقل، مستقلاً احکامک افعاله تعلقی ادراک ایدر. چونکه افعالک حد ذاتده حسن و قبح ایله اتصافی وجوب و حرمت کی احکامک افعال بشریه به تعلقی استلزام ایدر. زیر احسن و قبح، اییلک فالحق، احکامک مناط و مداریدر. فضله اولارق جناب حق عادل مطلقدر. عدالت مطلقه اقتضاسی ایسه بودر. بناءً علیه بعث نبویه دن و بر پیغمبر مبعوث طرفرن واقع اولان دعوت و تبلیغات دینیه نک وصولدن مقدم دخی، انسانلر تکالیف الهیه ایله مکلفدرلر.» دیورلر.

شو نظریه به کوره مثلاً بحر محیطده، قطب نقطه لرنده صیت نی، یعنی طرف الهیدن مبعوث بر پیغمبرک دعوت و تبلیغاتی اصلاً و اصل اولمایان بر آطه ده ساکن بولونان انسانلر، احکام شرعیه ایله مکلف اولورلر. شو حالده بونلر، افعال حسنه یی ترک و افعال قبیحه یی ارتکاب ایله عقاب اخروی به مؤبد آدوچار اولورلر.

معتزله دییورکه وجوب و حرمت ، نذب و کراهت کبی احکام اخروی دهده
عقلک منشأ ادراکی ، افعال بشریه نك مصلحت و یا مفسدتی اشتهادر . زیرا
افعالک حسن و قبحی ، مصلحت و مفسدته تابعدر . عقلک بو خصوصی ادراکی
ایسه ظاهر در . ایشته معتزله ، احکام مذکورینی بو اعتبار ایله تعریف ایدیورلر
دیورلرکه :

افعال بشریه دن برایشک فعلی مصلحتی و ترکی مفسدتی متضمن اولورسه او
فعل واجبدر . عدالت کبی . فعلی مصلحتی متضمن اولوبده ترکی مفسدتی مشتمل
اولمازسه او فعل مندوبدر . احسان کبی . بالعکس برایشک فعلی مفسدتی متضمن
اولورایسه او فعل حرامدر . ظلم کبی . فعلی مفسدتی موجب اولمایوبده ترکی مصلحتی
متضمن اولور ایسه او فعل مکروهدر . اگر فعلی ده ، ترکی ده نه مصلحتی و نه
مفسدتی مشتمل اولمازسه او فعل ده مباحدر . [کذافی جمع الجوامع و شرحه]

ما تریدیه کلهجه : ابن همامک تحقیقنه کوره ائمه حنفیه ، بو بجنده اولو
اساس اعتباریله ایکی قسمه آیرلشلردر . بر قسمی که - بخاراده نشأت ایدن
مشایخ حنفیه در - اشعریه ایله همفکر اولاراق احکامک افعاله تعلق عقللاً ادراک
اولوناماز دیور . فقط بونلرک بو مسئله ده اشعریلرله برلشمه لری نتیجه اعتبا-
ریله در . یوقسه اساسده اونلرله متفق دکلردر . اشعریلر ، حسن و قبح
عقلی بی انکار ایتدکاری ایچون بو نتیجه واصل اولشلردی . مشایخ بخارا
ایسه حسن و قبح عقلی نك وجودنده دیگر فقهای حنفیه دن آیرلماشلردر .
بالعموم علماء حنفیه ، نفس الامرده وحد ذاتنده حسن و قبح عقلینک وجودنده
متحددرلر . ذکر اولونان مشایخ بخارانک ، احکامک افعاله تعلق وعدم تعلق
مسئله سنده اشعریه نك فکرنی قبول ایتمه لری ، حسن و قبح عقلی بی انکار
ایتدکلرندن دکلدر . بلکه نفس الامرده حسن و قبحک وجودی احکامک
افعاله تعلقنی استلزام ایده جکفی تسلیم ایتدکلرندندر .

بونلر دیورلرکه افعال بشریه نك نفس الامرده حسن و قبح ایله انصافی ،
وجوب و حرمت کبی احکامک ثبوتنی استلزام ایتمز . بالکمز حکمه استحقاقی

یعنی افعال حسنه نك وجوبه ، افعال سيئه نك حرمته مستحق اوله سی استلزام ایدر . استحقاق حکم ایسه ثبوت حکمی مستلزم دکلدر . بونلر باشقه باشقه شیلر اولمقله برابر یینلرنده ملازمت یوقدر . یعنی وجوب اییلکک ، حرمت ده کوتولکک لازم غیر مفارقی دکلدر . جناب حقل انسانلری احکام شرعیه ایله مکلف طوتمامسی جائدر . زیرا عدم تکلیف ، جناب حق حقنده قبیح دکلدر . بناء علیه بر فعل کوزل وایی اولمقله برابر واجب ویرایش فنا اولمقله برابر حرام قیلنمایه ییلیر . خلاصه ، حسن وقبح اعم ، وجوب وحرمت کبی احکام ایسه اخصدر . چونکه واجب دیه فاعلی مظهر مدح و ثواب و نازکی مستحق عقاب اولان فعله دینیر . کوزل وایی دیهده یالکیز فاعلی مستحق مدح و ثواب اولان فعله دینیر که واجبه و مندویده شاملدر . قبیح ده هم حرامه و هم مکروهه عام و شاملدر . آنکچون حسن وقبح مفهومی ، وجوب وحرمت مفهومندن اعمدر . اعمک ثبوتندن اخصک ثبوتی لازم کلیه جکی قضیه سی ایسه محتاج تأمل دکلدر . بونک ایچوندر که شریعت وارد اولمادقجه احکام شرعیه ثابت اولاماز . [وما کنا معذین حتی نبعث رسولا = بزینمیر کوندرمدجکه انسانلری تعذیب ایتمیز] آیت جلیله سنک ظاهر معناسی ده بونی وایددر . محقق ابن همام ، بو فکری ترجیح و اختیار ایله مشدر .

مشایخ حنفیه نك دیگر قسمی ده ، یالکیز معرفت الهیه مسئله سنده یعنی جناب حقل وجود و وحدانیتنه ایمان و آکا عرض عبودیت و شکران ایتک ، کفردن و ذات الوهیتنه کذب ، ظلم ، عبت و سفه کبی افعال قبیحه اسنادندن اجتناب ایله مک کبی بعض افعاله معتزله ایله برلشه رک قبل الشرع بو مثالی افعال ایله انسانلرک مکلفیتنه ذاهب اولمشلردر . فقط افعال سائرده بونلرده مشایخ بخارا ایله همفکر درلر . بونلر ، اشبو معرفت الهیه بمخنده عقلک حکم شرعی بی ادرا که کافی اولدیغنه ، لکن افعال سائره بشریه ده ، از جمله معاملات و مناسبات اجتماعیه ده ایسه عاجز و غیر کافی بولوندیغنه قائل اولمشلردر . بونلر ، آنفاً ذکر اولونان [وما کنا معذین حتی نبعث رسولا] آیت جلیله سنده کی

تعذیبی ، تعذیب دنیوی به حصر و تخصیص و بناء علیہ آیت مذکورہ بی بو صورتله تاویل ایدیورلر .

فقط بونلرده بو مسئله ده بوسورتله اتفاق ایتدکدن سوکره ، صبی عاقلک دخی معرفت الہیہ ایله مکلف اولوب اولمادیغنده اختلاف ایتشلردر . بعضیلری صبی عاقل اوزرینه دخی جناب حقلک وجودینه وصفات کمالیه سنایمان واجب ، کفر حرامدر دیمشله . بو فکر ماتریدیہ نیک پیشواسی اولان امام ابو منصور ماتریدی حضرتلری ایله آکا پیرو اولان مشایخ عراقک فکریدر .

علم اصول فقہک اوچ رکن رکنی اولان امام ابو زید دبوسی ، فخر الاسلام بزدوی و شمش الائمة سرخسی حضراتی ، بو مسئله ده مشارالیه امام امام ابو منصور ماتریدین آیرلمشله و اکثر علمای حنفیه ده بونلره پیرو اولمشلردر . بونلره کوره بر کره صبی عاقل ایمان ایله مکلف دکلددر . سن بلوغه واصل اولانلر ایچوندده اشبو مکلفیتده تجربہ دن خالی اولان عقل مجرد کافی دکلددر . عقل تجربی لازمدر . بوده حادثات و موجوداتک احوال و اوصافی امان ایله تدقیق ایدمک اثر دن مؤثره استدلال طریقله مؤثر حقیقی اولان صانع عالمک وجودینی اذعان ایدمیلله جک قدر بر مدتک ضروری ایله حاصل اولور . بوجہتله سن بلوغه واصل اولانلر ایچوندده معرفت الہیہ نیک وجوبنده اشبو مدت تجربہ نیک ضروری شرطدر . شو قدر وارکه مدت مذکورہ نیک مرورندن اول کفر و شرکی معتقد اولارق وفات ایدن ، مجازات الہیہ به گرفتار اولور . چونکه اونک کفر و شرکی اعتقاد ایتمه سی ، قلبنه جناب خالقک خطوط ایتدیکنه و بر نوع استدلالک وقوعه دالدر . آرتیق اولبابده کی جهلی معذرت تشکیل ایتمز .

مؤسس مذهب امام اعظم ابو حنیفه حضرتلرندن بو مسئله حقنده نقل ایدیلن عبارتله صراحتنه نظراً مشارالیه حضرتلرینک بو نقطه ده ابو منصور ماتریدینک فکرنده اولدینی آکلاشیلیر . عبارت مذکورہ شودر : [لؤللم بیعت الله للناس رسولاً لوجب علیهم معرفته بقولهم = جناب حق ، انسانلره

پیغمبر ارسال ایتمه مش اولسه یدی بیله ینه اولنلرک اوزرینه جناب حق گندی عقلاری ایله بیلمک واجب اولوردی . [نقل اولونان دیکر بر عبارتیه سیده شودر :] لا عذر لاحد فی الجهل بخالقه لما یری من خلق السماوات و الارض و خلق نفسه = سماوات و ارضک و گندی نفسک صورت خلق و ایجادینی کورن بر ذات ایچون خالقنی و صانع عالمی بیلمه مک خصوصنده هیچ بر معذرت شایان قبول اولاماز .

مشایخ بخارا و آنلرک رأینی قبول ایدن ابن همام ، حضرت امامک بو باده کی نقطه نظرینی گندی فکر لرینه موافق ظن ایتدکلری ایچون برنجی عبارتیه کی (واجب اولوردی) سوزینی ، « لایق اولوردی » معناسنه حمل ایتدکلری کی ، ایکنجی عبارتیه حکمنی ده بعث نبویه دن سوکره یه حمل ایدیورلر . لکن عبارتیه لک ظاهر معناسی و شرعک و رودندن اول احکام فرعیه ایله مکلفیتده انسانلرک معذور اولاجقنه دائر مشار الیه امام اعظمدن منقول دیکر بر روایت صحیحنه نک وجودی ، تأویل مذکوره مانعدر . [هذا ما استفيد من تحریر ابن همام و من لا خسر و لم یأت بتحقیق هذا المقام] .

مبازع فیه اولان اوچنچی مسئله

تعذیب مطیع و تکلیف الایطاع هانمیر ، و کلیمیر ؟
عمرینی طاعات و عبادات ایچنده اقنا ایدن ، هیچ بر قتالنی ارتکاب ایتمه ن بر ذاتی ، جناب حقک تعذیب ایتمه سی ، کذا طاقت بشر فوقنده اولان برایشک اجراسنی انسانلره تکلیف ایله سی ، اشعریلر عنندنه شرعاً جائز دکلسه ده ، عقلاً جائزدر .

دیورلرک جناب حق ، هر شیتک خالق و بتون موجوداتک مالک مطلقیدر . دیلدیکی کی تصرف ایدر ، ایسته دیکنی امر وارده ایلر . اراده سی دافع ، حکمنه مانع یوقدر . حکمتندن و هیچ بر فعلندن سسوال اولوناماز . قدرت مطابقه سی بی نهایتدر ، هیچ بر صورتله قیید و تحدید ایدیله من . و اوزرینه هیچ برشی واجب و هیچ بر فعلی قییح اولماز .

معتزله ايله ماتريديه به كوره نه تعذيب مطيع ، نه ده تكليف مالا يطاق
 قضيه لري ، شرعآده ، عقلا ده اصلاً جائز دكدر ، محالدر . دييورلر كه مطيعي
 تعذيب ، محسن ايله مسي ، ايبلك ايدن ايله قتال ايدن آراسي عدم تفرقه در كه
 بونك قبحنده والوهيت ايچون نقيصه اولاجنده شبهه ايديله من . كذلك قدرت
 بشريه نك تعلق ايدمه چكي بر شي ايله تكليف ، وقوعي محال اولان بر شينك
 ايقاعني طلب ايتكدر كه عبث و سفه در . يالكز جناب حق ايچون دكل ،
 فطرت سليمه اصحابي ايچون بيله بر نقيصه در . عدالت ، حكمت و كمال آلهي به
 كلياً منافيدر . حكيم اولان جناب فياض مطلق ، بوكي قبايح و نقايصدن منز
 و متعاليدر .

ايضاح

تكليف ، لغته كلفتي بر ايشي بر كيمسيه الزامدر . اصطلاحده تعجيز
 قصدي اولمقسزين كلفتي بر فعلك اجراسني طلب و الزامدر . مخاطبي عاجز
 براق ، آنك عجيزني و عدم اقتدارني اظهار ايله مك قصديله واقع اولان
 تكليفلر ، تكليف حقيقي دكدر . مخاطبك عجيزني اثباتدر . بونلردن احترازاً
 تكليفك لمريضنده « تعجيز قصدي اولمقسزين » قيدي علاوه اولونمشدر .
 مالا يطاق ، قدرت و طاقت بشر خارجنده اولان شي ديمكدر . علماء
 اسلام ، مالا يطاق اوج مرتبه به تقسيم ايديورلر . ادني ، اوسط واقصي ..
 ادني مرتبه سي — مالا يطاقك ادني مرتبه سي ، عقلاً وعادة ممكن
 و انسانك تحت قدرتنده اولمله برابر عدم وقوعي جناب حقت علمندن و يا
 اراده سندن و يا خود اخبارندن ناشي وقوعي ممتنع اولاندر . اصحاب مصيبتك
 طاعتي و ارباب كفر ك ايماني كي : بوقيل افعال ايله تكليف هم واقع وهم
 جائزدر . بونده اختلاف بو قدر . چونكه بو مثالي افعال ، اساساً وعادة
 انسانك قدرتي داخلنده در . ذات فعل ممتنع دكدر .

بو کي افعا لك ممتنع اوله سی ، علم الہی نك تعلقندن نشات ایتشدرد . علم الہی نك تعلق ایسه اوفعلی لذاته ممتنع قیلماز . زیرا علم ، معلومه تابعدر ، معلومك انكشافندن عبارتدر . یوقسه معلومك سبب مؤثر ومغیری دكلدر . آنکچون علم ، معلومك ماهیتی تغییر ایتمز . معلوم حد ذاتنده نه ایسه ینه اودر . ممکن ایسه ینه ممکندر ، ممتنع ایسه ینه ممتنعدر . کذا اخبار و اراده الہیه نك تعلق دخی اوفعلی نفسنده محال قیلماز . چونکه كرك اخبار و كرك اراده ، هرایکی سیده علمه تابعدر . تنه کیم بو کون اوامر الہیه اطاعت ایتین اصحاب کفر و معصیتك ایمان و اطاعت ایتیه جکری نزد الوهیتده معلومدر و او یله اراده بیورلمشدر . بوندن اونلرك ایمان و اطاعتلری محال اولمق لازم گلز .

زیرا اونلرك کفر و معصیتلری کندی اراده و اختیارلریله وقوع بولمشدر . طبیعی جناب حقك علم ازلیسی بو صورته تعلق ایتشدرد . یعنی جناب حق ، اونلرك کندی اراده و اختیارلریله ارتکاب کفر و معصیت ایدم جکریخی ازله بولمشدر . و بیلدیکی کبی اراده بیورمشدر . یعنی وارسین ارتکاب کفر و معصیت ایتسینلریله اراده بیورمشدر . یوقسه اونلری بوکا اجبار ایتمه مشدر . آنک ایچوندرکه بالعموم اصحاب کفر و معصیت عاصی عد اولونورلر . خلاصه معلوم اصل ، علم فرع و تابعدر . اونوتاملیدرکه علم معلومك اولدینی کبی کشف وانکشافندن باشقه برشی دكلدر . عکس تقدیرده اوکا علم دینمز ، جهل دینیر . بو مسئله یوقاریده (اراده) بحثندهده کچمشدی . اورایه مراجعت ایدلسین .

اوسط مرتبه سی — مالا یطاقك اوسط مرتبه سی ، اساساً و عقلاً

ممکن اولوبده عادة و قدرت بشره نظراً ممتنع اولاندر . خلق اجسام و سمایه صعود کبی . خلق اجسام ، قدرت بشره نظراً محالدر . سمایه صعود دخی انسان ایچون عادة محالدر . وجود انسانك صورت تشکلی بوکا مساعد دكلدر . هر ایکسیده قدرت بشریه کوره ممتنع ایسهده قدرت بشریه ، خلق اجسامه اساساً تعلق ایدم مز . سمایه صعود کیفیتنده عادة ، یعنی یارادیلشنه نظراً تعلق

ایده من : ظن ایتک ایسته مم که مقام اعتراضده « انسان دهه ، قولارینه ایکی یایمه قناد طاقرق ویا طیاره یه بینه زک سهایه صعود ایده بیلیر . » طرزنده خاطر کزه بر سوال وارد اولسون . »

اقصى مرتبه سی - مالا یطاقك اقصى مرتبه سی ، اساساً وعقلاً تمتنع
اولاندر. ایسته اصل تمتنع و محال دیه بوکا دینیر. جمع ضدین ، اجتماع نقیضین و قلب حقایق کی . جمع ضدین ، بیاض ایله سیاهک برشیده و بر زمانده اجتماعی کی شیلره دینیر. اجتماع نقیضین ده ، بر شیتک بر زمانده و بر مکانده هم موجود و هم غیر موجود اولمه سیدر. موجود ایسه غیر موجود اولاماز. غیر موجود ایسه موجود اولاماز . خلاصه ، بر شیتک بر آنده منفی و مثبت جهت لرینک اجتماع نقیضین دینیر که عقلاً محالدر. « قلب حقایق » دن مقصد ، ممکن محال ، واجبی ویا محالی ممکن قیل مقده در .

ایسته بو کی تمتنعات ، هم عادة و هم عقلاً محال اولان شیلر در . ذاتلری و ماهیتلری اعتباریله محالدر. مثلاً بیوک برشی ، بیوک کلکی محافظه ایتک شرطیله کندندن کوچوک اولان بر شیدن دها کوچوک اولاماز. چونکه قلب حقایق لازم کلیر که محالدر . آنک ایچوندر که دوه بی ایکنه ده لیکنندن کچیرمک تمتعدر . اوت ایکنه دلیکی غایت کنیشلر و یا خود دوه میقروب قدر کوچولورسه ، اولوقت کچیرمک ممکن اولور . اما اوده لیکه ایکنه ده ایکی دینه میه جکی کی او دوه به ده دوه دیتمز ، میقروب دینیر . خلاصه بیوک بیوک کلکی کوچوک ده کوچوک کلکی محافظه ایتک شرطیله بیوک ، کوچوکدن دها کوچوک اولاماز . بونی اولدیرمغه چالشمق محالی ممکن یاپه بیلیمکله اوضراشمق در که ماهیه و عقلاً تمتعدر .

بونلره قدرت بشر تعلق ایده من . حتی علماء اسلام ، بو کی تمتنعاته قدرت آیه دخی تعلق ایده من دیرلر . خلق اجسام قضیه سی بویه دکلدز . او بزم قدرتمزه نظراً عادة محالدر . یوقسه ذاته نظراً عقلاً محالی دکلدز ، ممکندر .

آنکه چون قدرت الهیه اوکا تعلق ایدر . نته کیم جناب خلاق عظیم الشان ، بو کائناتی یوقدن یارانمشدر . چونکه حد ذاتنده ممکندر . امتناع عقلی ایله ممنوع دکلدر . بو مقامده (واجب) دن مقصد ، ممکن ایله ممنوع مقابلهدرکه وجودی ضروری اولان شی دیمکدر . بو کائناتک بویله جه موجود اولایلمهسی ایچون جناب حقک موجود اولمهسی کبی . آنکه چون جناب حق « واجب الوجود » دینیر . (ممنوع) ده عدمی ضروری اولان شیدر . شریک باری کبی ، یعنی ایکنجی براللهک موجود اولمهسی کبی . ممشعه ، محال و مستحیل و متعذر دخی اطلاق اولنور . (ممکن) ایسه نه وجودی ، نه عدمی ضروری اولمایان شیدر . کائنات کبی .

بعضیلری « مالا یطاق » ک شو اقصى مرتبه سیله تکلیفک عدم جوازنده بین العلماء اختلاف یوقدر دیمشله سه ده ، (کشف بزدوی) صاحبک بیاننه کوره ، مالا یطاقک هم اوسط و هم اقصى مرتبه سیله تکلیفک جوازنده اختلاف اولونمشدر . بعض اشعریه علی الاطلاق و امام غزالی کبی بعضیلری ده اوسط مرتبه سیله تکلیفک جوازینه قائل اولمشلردر . شوقدر وارکه بو اختلاف ، تکلیف مالا یطاقک عقلاً جائز اولوب اولماسنده در . اشعریلرک عقلی ، بونی تجویز ایدیور . فقط بوتکلیفک شرعاً واقع و جائز اولمادیقنده اختلاف یوقدر . بالعموم علماء اسلام بونده متفقدر . (لا یکلف الله نفساً الا وسعها) آیت جلیلهسی ، بو بایده شاهد عادلدر .

ایشته بو اختلافک ، تکلیف مالا یطاقک عقلاً جائز اولوب اولمادیق حقیقده کی اختلافک منشأی ، حسن و قبح مسئله سیدر . حسن قبح عقلی بی وافعال الهیه ده حکمت و مصلحتک وجودینی انکار ایدنلر ، تعذیب مطیع و تکلیف مالا یطاق قضیه لرینک عقلاً جوازینه ذاهب اولمشلردر . خصوصیه جبرییه ایله اشعریه ، اساساً جبره و اراده بشریه نک مخلوقیتنه و یا اضطراری اولدوغنه ذاهب اولدقلری ایچون ، بونلر تکلیف مالا یطاق مسئله سنک عقلاً جوازینه قائل اولمقده مضطر قالمشلردر . چونکه جبرییه کوره حد ذاتنده

بشریه مقصود ، اشعریه به کورده مخلوق و یا مجبور اولدیغندن بویله حر و مختار بر ارادهیه مالک اولمیان بر انسانه بر ایشی تکلیف ایتک ، قدرت و ارادهسی خارجنده برشی تکلیف ایتک دیمکدر . دها دوغروسی جناب حقه مخصوص و آنک فعلی دیمک اولان بر ایشک اجراسنی انسانه تحمیل ایله مک دیمک اولورکه تکلیف مالایطاقدن باشقه برشی دکدر .

ایشته شو ملاحظهیه نظراً آرتق تکلیف مالایطاق بختنده بر فعلک قدرت بشر خارجنده اولوب اولمادیغنی آراشدیرمه لزوم قالماز . بوتون تکالیف شرعیه ، تکلیف مالایطاق قییلندن اولور . الحاصل ، حسن و قبح ، قدرت و اراده ، حکمت الهیه بختلرنده اشعریلرک قبول ایلدکاری اساسلره کوره تعذیب مطیع و تکلیف مالایطاق کبی مسائلک جوازینه ذاهب اولملری ضروریدر . عکس تقدیرده برنسیلرندن آیرملری اقتضا ایدر . چونکه بو مسائل ، او برنسیلرک نتایج طبعیه سیدر .

معتزله ایله ماتریدییه کلنجه : اونلرک عنندنه اشبو تعذیب مطیع و تکلیف مالایطاق قضیهلری ، قطعاً جائز اولماز . یوقاریده تفصیلاً ایضاح ایلدیکی اوزره اونلر ، مباحث مذکورده اشعریلره مخالف اولارق نفس الامرده حسن و قبحک وجودی ، اراده بشریهک حریت و مختاریتی ، حکمت الهیهک لزوم نبوی اساسلرینی قبول ایتمشلردر . مباحث عنه ایکی مسئله ایسه ، اشبو اساسلر ایله قابل تألیف دکدر . آنکچون معتزله ایله ماتریدییه ، یکزمان اولارق نه تعذیب مطیع ، غریبهسی ، « نهده مالایطاق » عجوبهسی اصلاً تجویز ایتمه مشلردر .

معتزله ، بو ایکی مسئلهی تجویز ایتمه مکله قالمامشدر . فضله اولارق اصلح عبادیه صراعاتک و مطیعیه مکافات ، عاصیه به مجازات ترتیبک جناب حق اوزرینه وجوب و لزومنهده قائل اولمشدرکه ماتریدیلر ، بونقطهده اونلردن آیرلمشلردر .

اخطار — بوراده دقت اولونه حق بر نقطه وار . اوده بو مقامده جناب حق حقندنه استعمال اولونان قبح لفظیک معناسیدر . بوراده قبح ، ذم و عقابه استحقاق معناسنه دکدر و اولاماز . چونکه بو معناه قبحک جناب واجب - الوجودک حق مقدسلرنده تصور اولونه میسه جنی بدیهیدر . او جهتله بوراده

قبحك ديكرا ايكي معناسى مقصوددر . برى « عقاب » قيدينى طى ايله يالگىز
 ذمه استحقاق معناسى ، ديكرى صفت نقصان اولمق معناسيدر . اشعريلىر ، بو
 بو ايكي معناه دىخى تعذيب مطيع وتكليف مالايطاقتك جنساب حق حقمنده
 قبيح اولمادىغى ادا ايدىيورلر .



حکمت تشریع و مقاصد شارع

- ۱ -

حکمت تشریع

اسلامیتک غایبسی ، بشرینی مروت فاضله ایصال دبو صورت
معارف حقیقیلی استحصالد.

بو بحث، علم اصول فقهک اک مهم مباحثنددر، دها دو غروسی اک مهمیدر.
بو بحثی تحلیل کبریشمزدن اول ، بو مقاصد مستعمل اولان « حکمت » ،
« غایه » و « علت غاییه » کبی کله لک معناری ایضاح ایتک اقتضا ایدیور.
« حکمت » لغتده و صرف ناسده متعدد معنارده قوللانیلیر . (مفردات
راغب) ده بیان اولوندینی اوزره حکمت لفظی ، فی الاصل برشیقی اصلاح
مقصدیله منع معنایه اولان « حکم » دن مأخوذدر. حیوانک آغزینده داقیلان
« کم » حیوانی صاغه صوله انحرافدن منع ایتدیکی ایچون آکا لسان عربده
حکمت اطلاق اولونمشدر . بالآخره علت ، فائده ، مصلحت ، حقایق اشیا
وقوف ، حقه اصابت معنارنده استعمال ایدلشدر . حکمت ، عین زمانده
اسماء حسنادندر . جناب حقه « حکیم » اطلاق اولونور . حکمت بو صوره رتله
جناب حق حقنده استعمال ایدلدیکی وقت، ازله حقایق اشیا بیلیمک و آنلری
صوک درجده احکام و اتفاق ایله ایجاد ایله مک معنایه کلیر . انسانلر حقنده
استعمال ایدلدیکی صورتده معرفت موجودات و فعل خیرات معنایه کلیر که
حقایق اشیا بیلیمک و بویلیکی ایله عامل اولق دیمکدر . « فقه » و « فقهات »

کلمه لرینک لغتده معناسی ده بودر. [من یؤت الحکمة فقد اوتی خیراً کثیراً]
 = کیمه حکمت اعطا اولونمشمسه شهسز اوکا خیر کثیر اعطا اولونمشددر [آیت جلیله سنده کی « حکمت لفظی ده ، بو معنایه در . بعضاً مقتضای حکمت ، موافق مصلحت اولان شیئه وبر فائده و حقیقت اجتماعیه ده حکمت اطلاق اولونور . (سنن ترمذی) ده موجود [الحکمة ضالة المؤمن حیثا وجدها فهو احق بها = حکمت ، مؤمنک غیب ایدوب ده آرامقده اولدینی اوز مالیدر . نره ده بولورسه آنی آلمقه جمله دن زیاده مستحقدر .] حدیث صحیح سنده کی « حکمت ، لفظی ده بو معنایه در . فقط بو بحثده حکمت لفظندن مقصود اولان برنجی معنادر . یعنی فائده و مصلحت معناسیدر .

خلاصه ، بر فعل اوزرینه ترتب ایدن حکمت و مصلحت ، درت درلو تسمیه اولونور : غایه ، فائده ، غرض ، علت غاییه . بو درت شی حد ذاتنده متحد برشیدن عبارت اولدینی حالده ، بالاعتبار یعنی جهتلك اختلافله بربر . لرندن آریلیرلر . آنکچون بو کبی مفهوملمر بالذات متحد وبالاعتبار مختلفدر دینیر . شویله که :

بر فعل اوزرینه ترتب ایدن حکمت و مصلحت ، او فعلک نهایتده واقع اولمق اعتباریله (غایت و غایه) ، فعلک نتیجه و ثمره سی اولمق اعتباریله (فائده) فاعل ایچون او فعلدن مطلوب اولمق اعتباریله (غرض) ، فاعلی او فعل اوزرینه اقدامه باعث و سائق اولمق اعتباریله ده (علت غاییه) تسمیه اولونور . ایشته شوايضاحدن آکلاشلدینی وجه ایله بومفهوملمر ذاتاً متحد و فقط اعتباراً مختلفدرلر . بو مناسبتله شو جهتی ده عرض ایدیم که فلسفه ده و علم کلامده (علت) تعیری ، درت معناده استعمال اولونور و بو صورتله درت قسمه تفریق ایدیلیر : علت فاعلیه ، علت مادیه ، علت صوریه و علت غاییه . بر ایشک فاعلنه (علت فاعلیه) ، او ایشدن مقصد نه ایسه اوکاده (علت غاییه) ، ایشله نن و یاپیلان شیئک اجزای مرکبه سینه (علت مادیه) و اونک شکل و صورتنده (علت صوریه) اطلاق اولونور . مثلاً کرسی یی یاپان ذات علت فاعلیه ، بو کرسینک

نخسته و جیبوی کبی اجزاء مرکبه سی علت مادیه ، یا بلدقدن سوکره حاصل اولان شوشکل و صورتی علت صوریه و او زرنده درس تقریر ایتک مقصد و مصلحتی ده علت غائییه در . ایشته بو علت غائییه ، خارجه دیکر علتلردن سوکره وجود بولورسه ده دهند جمله سندن مقدمدر . چونکه فاعل اولا بونی ، بو مقصد و مصلحتی دوشونور ، سوکره اونک سوقیله فعلیه مباشرت ایدر . بونک ایچوندرکه علما « علت غائییه ذهناً مقدم ، فعلاً و خارجاً مؤخردر » دیرلر .

یوقاربده سبب و علت بحثنده کجن « علت » دن مقصد ، علت فاعلییه در . فقها ، فاعل مباشره علت دیدکاری کبی اونک فعلیه ده علت دیرلر . آنکچون مکلفک فعلندن عبارت اولان بیع و اجاره کبی عقدلرده علت اطلاق ایدرلر . شو حالده مکلفیندن صادر اولان علی العموم افعال و عقود علت فاعلییه درکه فاعلک اسم و وصفی کندی فعلیه اسناد اولونمشدر . او عقدلردن مقصود اولان ملک رقبه ، ملک منفعت کبی مصلحتلرده علت غائییه در . بونلری بو صورتله تفریق ایدوب بربرینه قاریشدماملیدر . و علت نفی ، فاعلییه و غائییه کبی قیدلردن مجرد اولارق « علت » صورتنده مطلق ذکر ایدلایکی زمان ، بونلردن هانکیسی مراد ایدلمش اولدیغنه دقت ایدله ایدر ، بوده مقام و سیاق و سباق قرینه سیله آکلاشیلیر . ایشته بزم بو بحثده ، بو درسه ذکر ایدم جگهز « علت » دن مقصد ، علت غائییه در . شمدی بو مقدمه دن سوکره مقصده شروع ایدلم :

افعال آله حکم و مصالح ایله معللدر

بالجمله علما و حکما ، « افعال عباد » معلل بالاغراضدر . « دیرلر . یعنی انسانلرک افعال و حرکاتی بر طاقم اغراض و مقاصده مستنددر . طاقل هیچ بر انسان تصور اولومامازکه هر هانکی بر فعل و حرکتنده مادی و یا معنوی بر مقصد مخصوص تعقیب ایتمش اولماسین . هیچ اولمازسه خیالی و یا پاک اهمیتینز اولسون بر مقصدی وارددر . مقصدسز حرکت عبثدر ، مقصد غیر صحیحه مستند حرکتده سفهدر و مجنونلرک کاریدر . بونده اختلاف یوقدر . بو دینی ، دینسز عموم اصحاب عقل و ادیان عندنده متفق علیه بر قضیه در .

فقط عجبا افعال الهیه ده یویه میدر ؟ یعنی جناب حقك ارادات و افعالی ده ، حکم و مصالح و مقاصد مخصوصه اوزرینه مبتیمیدر ؟ ایسته بونده اختلاف اولونمشدر .
ینه جبریه ایله اشعریه ، یکنزبان اولارق علی الاطلاق حکمت الهیه بی و مقاصد
شارعی انکار ایدیورلر . دییورلرکه افعال الهیه نك غرض و حکمت ایله معلل
اولمسی ، شان الوهیت منافیدر . چونکه بو بر نقیصه در . زیرا بر فعلی بر
غرض و حکمته مبنی ایشله مك دیمك ، او غرضله استکمال نقصان ایله مك
دیمکدر . بو تقدیرده فاعل و غرضله مستکمل ، غرضده آنی مکمل اولور .
جناب حق ایسه بو کبی نقایصدن مزهدر و برده بز ، عالم وجودده امراض
مستولیه و حیوانات مضره کبی وجودنده هیچ بر حکمت و فائده متصور اولمایان
مخلوقاته تصادف ایدیورز . اگر افعال الهیه نك حکمت و مصلحتی متضمن
اولمسی لازم کلسهیدی ، آنلرک وجود بولماسی اقتضا ایدردی . حالوکه
دنیاده او کبی مضر و فائده منر مخلوقلر پك چوقدر . بوندنده آ کلا یورزکه
ارادات و افعال الهیه ده حکمت یوقدر ...

معتزله و ماتریدیه کوره ایسه افعال الهیه ، خفی و جلی بر چوق حکم
و مصالح اوزرینه مبتی در . بونلر ، جبریه ایله اشعریه جواباً دییورلرکه ارادات
و افعال الهیه بی حکمت و مصلحت ایله تعالیك شان الوهیت منافی اولاجفنی اصلا
تسلیم ایتمز . بلکه عکسی ادعا ایدرز . چونکه بر فاعلک حکمت و مصلحتی
مشمتمل اولمسی نقیصه دکل ، بالعکس کلدرد . بر فاعل نه مرتبه حائر کمال
اولورسه ، افعالی ده او مرتبه حکمتی متضمن اولور . زیرا کمال ، کمالی اقتضا
ایدرد . یعنی فاعلک فاعلک کمالی استلزام ایلر . فاعلک کمالی ده ، حکمت و مصلحتی
متضمن اولقله اولور . جناب فیاض مطلق ایسه کمال مطلق حائزدر . او حالده
افعالی ده کمالی و بناء علیه حکمت بالغه بی مشتملدر . بر فاعل ایچون اصل نقیصه ،
افعالنک هیچ بر حکمته مقرون اولماسی و کایشی کوزل وجوده کلسیدرکه
عبث و سفهدر . بو ایسه جناب حقه دکل ، انسانلره بیله لایق دکلدر .
حیوانات مضره بختنه کلنجه : اوت ، عالمده بعض شیلر کورولورکه ظاهراً

فائده‌سز و بلكه ده مضر ظن اولونور . حالبوكه اويله دكلدر . تدقیقات لازمه اجرا اولوتجه بر چوق فواندی اولدینی تبین ایدیور . عقل بشر ، بالعموم حادثات و موجوداتك مشتمل اولدینی حکمت الهیه بی حقیله کشف و ادراک کافي و مقتدر دكلدر . علممیز يك ناقص و کندی عالمیزه مخصوص و منحصر در . اونده بيله عجز من ظاهر در . نته کیم اولجه فائده‌سز ظن اولونان بعض اعضای داخلیه مزك ، بالاخره اجرا ایدیلن تدقیقات فیه نتیجه‌سند . يك ، مهم وظیفه وفائده‌سی بولوندینی تحقق ایتشدرا .

ایشته امراض مستولیه و حیوانات مضره و آنلره ثنائیل اولان احوال سائره هپ بو قییلنددر . بونلرك وجودنده هیچ بر حکمت وفائده یوقدر دینیه مزه . آنلرك حکمت وفائده‌سی عقل قاصر مزك ادراک ایتمه‌سی باشقه در ، حقیقتده نفس الامرده موجود اولمامسی باشقه در . بر شینك وجودینی عقلاک ادراک ایتمه‌سندن ، اول شینك حقیقتده موجود اولمامسی لازم کلز .

مع هذا بو عالمده مضر و شر اولان شیلرده بولونه بیلیر . بو جناب حقك خلق و ایجادنده حکمت و مصلحت بولونمادیقنه دلالت ایتز . چونكه بو عالمده خیر ، شردن جوقدر . شر قلیلی دفع ایچون خیر کثیر ترك اولر ناماز . هیچ شر و مضر برشی ده یارادلامیلیدی . دینیه مزه ، زیرا جناب حق اویلهر عالم ، اویلهر کندیسندره هیچ شر بولونمایان ، خیر محضدن عبارت اولان بر عالمده یاراتمشد . اوده عالم علینیدن ، عالم لاهوتدن عبارتدر .

بو بحثده شو نقطه بی قید و اخطار ایتك اقتضا ایدیوركه افعال الهیه نك مشتمل اولدینی حکم و مصالح ، قوللرینه و مخلوقاتنه راجعدر . یوقسه جناب خلاق عظیم الشان ، هر درلو حکمت و فائده دن مستغنیدر . آنیکچون افعال الهیه نك ، خصوصیه احکام شرعیه نك حکمت و مصلحتله معلن اولمه‌سندن جناب حقك استکمال ذات ایتمه‌سی لازم کلز . او حکمت و مصلحتله استکمال ذات ایدن ، بز قوللری یز . یوقسه فیاض مطلق اولان جناب حق دکل .

الحاصل ، اشیو حکمت الهیه بیعی ، كرك علم کلامك و كرك علم اصول فقهك مباحثه مهمه‌سنددر . و يك چوق مسائل اعتقادیه و احکام اصلیه نك

اصل الاصولیدر . حسن و قبح ، ایلیک کوتولک بمختلکده امانی تشکیل ایدر . دینک ، شریعتک ، احکام فرعیه و حقوقیه متعلق بتون اسباب و علل شرعیهک . افعال مکلفین ایله احکام شرعیه آراستده کی مناسباتک ، خلاصه بالجله تکالیف شرعیهک اسالاس ایشته بو مسئلهدر .

ایشته جبرییه کوره حد ذاتنده و نفس الامرده حکمت و مصلحت بولونما . دیغندن ، اساساً کائناتک خلق و ایجادنده سبب و حکمت اولمادیفی کی ، دین و شریعت وضعنده حکمت و مصلحت یوقدر . جبرییه عندنده اعمال ، ثواب و عقابه علامت محضدر ، اسباب مقتضیه دکدر . اشعریلره کمنجه ، بونلرک بر قسمی جبرییه ایله همفکر ایسهده ، دیگر بر قسمی تماماً همفکر دکدر . بونلر ، افعال الهیهده و تخصیص دین و شریعت وضعنده حکمت و مصلحتک وجودنی انکار ایتزلر . یالکیز علیتی انکار ایدزلر . یعنی افعال الهیهده و تشریع احکامده حکمت و مصلحت واردر . اما اوحکمت و مصلحت ، جناب حق خلق و ایجادینه و تشریع احکامه سائق علت موجبۀ غاییه دکدر ، بلکه افعال و احکامی اوزرینه ترتب ایدن تأثیردن خالی غایات مجرددر دیرلر .

معزله ایله ماتریدییه عندنده علی العموم ، افعال الهیه ، حکم و مصالح و مقاصد مخصوصه ایله . علل اولدینندن ، بونلره کوره عالمده هیچ برشی علت و حکمتسز وجوده کیز . اک کوچوک واهیتسز ظن اولونان شیلره قدر هر شیده ، هر حادثه کونییهده بر جوق حکمت صمدانیه مندجدر . ساحه وجودده و قانون تکوینده بویله اولمادیفی کی ، ساحه شریعتده و قانون تشریعهده دخی بویله دره بناء علیه حکمت تشریع مفتضاسی اولارق ، احکام شرعیه ، مصالح عبادۀ تابعدره . دین و شریعت وضعندن مطلوب اولان اصل حکمت و غایه ، بشریتی بر مدنیت فاضلییه ایصال و بو صورتله عموم انسانلر ایچون دنیوی و اخروی سعادت حقیقیه نی اتمهسالدره . [۱]

[۱] بویله قدر واقع اولاق افادتک جمله سی ، کتب کلامیهده و اصول فقه کتابلرندن ابن همامک (تخریر) نده محقق هندی ابن عبد اشکورک (مسلم الثبوت) نده و ابن تیمیهک (منهاج السنه) و (جواب اهل العلم) نام کتابلرنده و ابن قییمک (شفاء اللیل) نده بو صورتله محرردر .

فقط بوراده معتزله ایله ماتریدیه آراسنده اوفاق بر فرق واردر . نته کیم اراده جزئیة مسئله سنده ده بونلر آراسنده اوپله بر فرق واردری . شویله که معتزله ، تشریع احکامده حکمت و مصلحتک علی سبیل الوجوب لزومنه قائل اولورلر . وفضله اولارق اصلح عبادہ رعایت ، جناب شارع اوزرینه واجبدر دیرلر . ماتریدیه ایسه ، بو حکمت تشریعیه نک علی وجه التفضل لزومنه ذاهب اولورلر یعنی معتزله ، تشریع احکامده حکمت و مصلحته رعایت ، جناب حق اوزرینه واجبدر دیرلر . ماتریدیه ایسه واجب دکدر ، مقتضای فضل وکالیدر دیرلر . واصلح عبادہ یعنی انسانلره اک زیاده صالح اولان شیئه رعایتک وجوبنه قائل اولمازلر .

مع هذا معتزله ماتریدیه آراسنده کی بو فرق ، حقیقی دکدر ، نزاع لفظی قیلندندر . چونکه معتزله نک بوراده کی « وجوب » تعیرندن مقصدلری ، خارجدن جناب حق اوزرینه عارض اولان بر قوه مجبره نک جبر والزامندن متولد وجوب دکدر . بوکا « وجوب علی الله » دینیرکه مقصد ، بو وجوب دکدر . بلکه جناب حقت ذات وکال الوهیتندن نشأت ایدن وجوبدر . بوکاده « وجوب عن الله » دینیرکه ماتریدیلرک « مقتضای فضل وکالیدر » دیدکاری لزومک معناسی ده بودر . حتی اشعریلرک علم اصول فقهه دائر اولان کتابلری تتبع ایدیلرسه کورولورکه اولرکده بو مقامده استعمال ایتدکاری « تاثیردن خالی غایه » وعلامت ، کی تعیرلرک معناسی ده بوندن باشقه برشی دکدر . « جمله نک مقصودی بر اماره وایت مختلف . »

تنبيه — فحول محققین حنبلیه دن مشهور ابن تیمیه نک (منهاج السنه) نامنده کی کتاب کزیننده وینه مشاهیر محققین حنبلیه دن مشارالیهک تلید تمنازی (ابن قیم ک) (شفاه العلیل) اسمیله مسمی تألیف بهیننده بیسانلرینه کوره امام مالک ، امام شافعی و امام احمد بن حنبل حضرانی ایله آنلره پیرو اولان عامه فقها و بالجملة مجتهدین و کافه سلف صالحین والاصل جبریه ایله بر قسم قلیل اشعریه دن ماعدا جمهور اهل سنت ، بو بمجمله « ماتریدیه » یعنی باشده امام

المجتهدین امام اعظم ابو حنیفه حضرت تلمیذ « رضی الله عنه » اولادینی حالده
فقهای حنفیه ایله متحداللساندرلر .

بناءً علیه جمهور فقها واهل سنت عندئذ افعال الهیه و احکام شرعیه ،
حکم و مصالحی مشتملدر . آنک ایچوندرکه [الاحکام مبذیه علی مصالح العباد
= احکام شرعیه مصالح عباد اوزرینه مبذیره . سوزی ، السنه فقهاده دأر
مثل سائر حکمنه کیرمشدر .

ذاتاً باشقه درلوده اولاماز . چونکه حضرت قرآن ، [ولکم فی القصاص
حیاة = سزک ایچون قصاصده حیات واردر .] کبی ، احکام شرعیه نک حکمت
ومصلحت اوزرینه مبتنی اولدیفنی افاده ایدن بیکارجه آیات کریمه ایله دولودر .
نه حاجت ؟ [وما ارسلناک الا رحمة للعالمین] آیت منیفه سی ، جناب پیغمبر
اقد سزک انسانلره محضاً رحمت الهیه اولمق اوزره بعث وارسال بیورلمش اولدیفنی
بیان بیوریور . بو ایسه آنجق رسالتیه اقدمزک تبلیغ بیوردقلری شریعت
اسلامیه نک ، بشرک صلاح وسعادتی کافل احکامی محتوی اولمه سیله اولور .
آیت مشارالیه ، بو معنای افاده ایتدیکی کبی ، عین زمانده ارسال رسول
وضع شریعتدن انسانلرک صلاح وسعادتی مقصود اولدیفنی معاسی ده افاده
ایدیور . و بونی نفی واثبات طریقله صورت قطعیه ده بیان اینه یور .

بونک ایچوندرکه اشعریه دن مشهور « علامه تفتازانی » ، ناصلسه انصافه
کله رک (شرح مقاصد) نده ، بعض افعال الهیه نک وبتخصیص تشریع احکامک
حکم و مصالح ایله معلل اولمه سی درکاردر . علماتک اجماع درجه سنده اکثریت
عظمیه سی ، بو بابده متفقدر . قیاسک دلیل شرعی اولایلمه سی ده بوکا
وابسته در . « دیور .

— نتیجه —

فی الحقیقه حکمت تشریعیه نک لزوم و وجودینی انکار نظریه سینه کوره
(قیاس) ی ادله شرعیه دن عد ایتمه مک اقتضا ایدر . نته کیم بو نظریه یه ذاهب
اولانلرک بر قسمی قیاسی کلیاً انکار ایتمشدر . بر قسمی ایسه قیاسی ادله

شرعیه دن عد ایدیورسهده ، علل شرعیه بی احکامک علامات و امارات مجرد سندن عبارت قلیور و احکام شرعیهده جلب مصلحت و دفع مفسدت کی علت و حکمت یوقدر دیور .

حکمت تشریعیه نك لزومی نظریه سنه کوردهده بالضروره احکام شرعیه نك مصالح عباده تابع اوله سی اقتضا ایدر . بوندن ده قیاس نك دلیل شرعی اوله سی لازم کلیر . نسه کیم بو فکره قائل اولان جمهور فقها عندنده انبات احکام خصوصنده قیاس ، ادله شرعیه دن بر دلیل معتبردر . علل شرعیهده او یله مجرد احکامک علامات و امارات مخصوصه سندن عبارت دکادر . بالعکس جلب منافع و دفع مفسد کی حکمت و مصلحت عامه بی مشتمل علل صحیحهدر .

علت شرعیه ، حکمک مجرد علامت و اماره محضه سی اولسه یدی احکام شرعیهده قیاس ، جاری اولماق اقتضا ایدردی . چونکه قیاسک حکمی بعدیهدر . یعنی اصل و مقیس علیه اولان مسئلهده کی حکم شرعینک فرع و مقیس اولان مسئلهیه تعدی ایتدیرلمه سیدر . علامت محضهده ایسه تعدیه متصور اولمادیغندن آکا متبی اولان قیاسده دخی تعدیه تصور اولوناماز . او حالدهده احکام شرعیهده قیاس جاری اولماز .

قیاس و قیاسده تعدیه جاری اولابیلیمک ایچون اولا علل شرعیه نك مؤثر اوله سی ، سوکردهده تشریع احکامدن مقصود اولان حکمت و مصلحتله مناسبی بولونمهی ایجاب ایدر . بوراده مناسبندن مقصد ، علتک تشریع حکمدن شارعک مقصودی اولان مصلحتی مشتمل اوله سیدر . ایشته علم اصول فقهده بر علتک بو صورتله مصلحت مطلوبه بی اشمالنه (مناسبت) و او علتک (وصف مناسب) اطلاق اولونور . علتک مطلوب اولان مصلحتی مشتمل اوله سی دیمکده ، حکم شرعی نك او علت اوزرینه ترتبی مصلحت مقصوده بی محصل اوله سی دیمکدر .

علتک مؤثر اولمه سی دیمک ده ، جناب شارع ایچون وضع و ترتیب حکمه باعث اولمه سی دیمک در . مثلاً چوجفک لک اموالی اوزرنده باباک حق و لایغی ثابت اولمه سی بر حکم شرعیدر . شارعک بو حکمی وضع و تشریفنه باعث اولان علت ده ، چوجفک چوجفلق حسیله کند ی اموالی محافظه دن عجزیدر . او حکم شرعینک بو علت اوزرینه ترتیب ایدلمه سندن مقصود شارع ایسه ، چوجفک اموالی حفظ و صیانت مصلحتیدر . ایشته بو مصلحت ، حکمت تشریعدر . او حکم شرعینک علت غائییه سیدر . چوجفک عجزی ایسه او حکمک علت فاعلییه سی منابه سنده در . بو ایکی علتک ایکیسی ده ، تشریع حکمه باعث ایسه ده برنجیسی ، ایکنجیسنک علتک یعنی علت اولمه سنک عاتیدر . علمه العلمه دیمکدر . ایشته حکمت تشریعدن مقصد ، بو علت غائییه در ، بو مصلحتدر . یعنی انسانلر ایچون جلب منفعت و دفع مضرتدر .

اصولونک (وصف مناسب) دیدکاری علت ، او علت غائییه ، او حکمت و مصلحت دکلدر . بلکه ذکر اولونان «عجز» در . بو عجزک ثبوت ولایت حکمیه مناسبی وارددر . چونکه مصلحت مذکورده بی مشتملدر . یعنی بو حکمک اونک اوزرینه ترتیب ایتمه سیله ، چوجفک مالی صیانت مقصد و مصلحتی حصوله کلش اولور . آنکچون بو حکم شرعی نک وضع و ترتیبه مناسب اولان وصف و علت ، عجز کیفیتیدر . یوقسه چوجفک مثلاً بیاض و یا سیاه ، کوزل و یا چیرکین اولمه سی کی اوصافی دکلدر . بو کی وصفلرک ذکر اولونان حکم شرعی ایله هیچ مناسبتی یوقدر . دیگر علت شرعیله رده بویله در . جمله سنده کنیدیله حکملری و اونلرک مصلحتلری آراسنده بالاده بیان اولونان «مناسبت» ک موجود اولمه سی لازمدر .

ایشته (قیاس) ده مناط حکم اولان علت ، بو مناسبتی حائز اولان وصفدر ، وصف مناسبدر . یوقسه راست کله هر هانکی بر وصف دکلدر . شو حالده اگر او وصف مناسب ، مورد نص اولان مسئله اصلییه دن باشقه بر مسئله ده ده موجود اولور ایسه حکم مخصوص او مسئلهیه تعدی ایدر . موجود اولماز ایسه

علت قاصره دیمك اولاجفندن ذكر اولونان حكم منصوص، موردینه منحصر
قالیر . مثلاً شراب ایچمك حرامدر . علنی سکر وصف مناسیدر . حکمتی ده
عقلک موازنه سی حفظ ایله دفع مفهدت مصلتیدر . ذكر اولونان علت یعنی
سکر وصف مناسی ، دیگر مسکرانده دخی موجود اولدیغندن حکم حرمت
آنلره سرایت وتعدی ایدر . بناء علیه شرابه قیاساً بتون مسکرات حرامدر
دینیر . و بو صورتله شرابك تحریمنندن مقصود اولان حکمت و مصلحت ده ،
تام اولارق حصوله کلمش اولور . عکسی تقدیرده مقصد تمام اولماز .

یوقاریده ذكر اولونان بابانك اولاد صفاری حقنده کی وجوب ولایت
مسئله سنده حکم بویله در . او مسئله ده بابانك ثبوت ولایتیه باعث اولان علت
چوجفك کندی اموالی حقنده نفع و ضرری تمیزدن عاجز اولمسی دکلیدی؟
ایشته بو عجزك نوعی، مجنون و معتوه ده دخی موجوددر . او حالده عین ولایت،
مجتون و معتوه اولان اولاد کبار حقنده دخی جاریدر .

ایشته شو ایضا حادتن آکلاشلمشدر که مناط حکم اولان علل شرعیه ،
اولیه علامات محرده دن عبارت دکلدر . بلکه تشریع احکامه باعث اولان علل
مؤثره در . بعض اصولیون خفیه نك علنی نصك حکمنه علامت قیلینان شیدردیه
تعریف ایتملری ، معتزله ایله ماتریدیه آراسنده کی فرقه اشارت ایچوندور . زیرا
معتزله به کوره علل شرعیه ، مؤثرات حقیقیه و علل موجب در . ماتریدیه عندنده
ایسه علت شرعیه ، نه اشعریه نك دیدیکی کی علامت محضه در ، نه ده معتزله نك
ویدیکی کی مؤثر حقیقی و علت موجب در . بلکه علت عادی در . یعنی عادت الیه مقتضای
سیدر . کرچه علت شرعیه تشریع احکامده مؤثر در ، فقط آنک تأثیری بزه نسبتله در .
یوقسه حقیقته تأثیر، جناب شارع اعظمه مخصوصدر و بناء علیه مؤثر حقیقی
ایجاب آلهیدر . علت شرعیه ایسه تشریع احکامه باعث، سبب و مؤثر عادی در ،
مقتضای سنت الیه در . فاصل که دیگر علت مادیه و عقلیه ده بویله در . ایشته بو
نکته به اشارت ایچون بعض مشایخ حنفیه، علنی اوصورتله تعریف ایتشلردور .
[کذا فی الکشف والتوضیح]

اخطار - (۲۷۲) تاریخ‌نحده بغدادده وفات ایدن امام «داود ظاهری» نك

تأسيس ايتمش اولديني مذهب ظاهري يه منسوب فقهای اهل حديث، «قياس» ي
ادله شرعيه دن عدايتمز لر. بعض علمای معتزله ايله شيعيه دن (اماميه) فرقه سي ده
بو فكرده در، بونلرده قياسي اثبات حكومه احتجاجه صالح عدايتمه يورلر.
فقط بونلرك قياسي ادله شرعيه دن عدايتمه ملري، حكمت تشريعي انكار
ايتدكلرندن دكلدر بالعكس حكمت ومصلحته قياسدن زياده اعتبار ايتدكلرندندر.
آنكچون بونلرده جمهور فقها كي احكام شرعيه نك حكم ومصالحه معال اولديقنه
قائلدرلر. قياسي انكار ايتمه لري باشقه نقطه نظر دندر. بوراده «قياس» دن
مقصود، وجهي بك ظاهر وزنه واضحا متبادر اولان قياس جلي دكلدر.
اونلر بوكا قياس ديمزلر، بوني نصك مفهومه ارجاع ايدرلر.

مقصدلري، (رأي) دن، فقيهك آكلایشندن عبارت اولان قياسدر.
بوني ادله شرعيه دن عدايتمز لر و اثبات احكامده بويله بر قياس ايله عملك
لزوم و وجوبنه دائر صريح وقطعي هيچ بر نص شرعي يوقدر. بو بر
رايدر، رأي ايله تدین جائز اولماز. خصوصيله شريعتده مسكوت عنه اولان
مسائلده مكلفيت شرعيه يوقدر. اشياده اصل اولان اباحه و افعالده
اصل اولاده عدم تكليفدر. ديرلر. ايشته بو ملاحظه يه مبني بونلر، بوكي
مسائل قياسيه ره قياسه التفات ايتيوب مصلحته عمل ايدرلر.



- ۲ -

مقاصد شارع

مصلحت دینیه ، مصلحت دنیویه

مصلحت دینیه

مصلحت، اعتبارات مختلفه ایله تقسیم اولونور. (توضیح) ده بیان اولوندینی وجه ایله مصلحت، برکرمه دینی و دنیوی اولوق اوزره ایکی یه آریایر. مصلحت دینیه ، ذهنی خرافاتدن و افکار باطله دن تجرید ایله روحی تصفیه ، فکری تمیه نفسی ریاضت و تزکیه ، عزم و اراده یی تقویه ، اخلاقی تهذیب و تربیه در . ایسته اعتقاداته ، عبادات و اخلاقه دار وضع ایدیلن احکام دینیه ، بومصالح و مقاصده منی وضع اولونمشدر .

ایمان کامل ، انسانی اللهندن قورقودر . کیمسه یه فئالق ایتدیرمز . هر کسه ایملک ایتمکه ، عدالت و حقوقه رعایت و حرمته سوق ایدر . نفسی ایچون سودیکی شیلری دیکرلری ایچون ده سودیرر . نفسی ایچون چیرکین کوردیکی شیلری باشقلری ایچون ده چیرکین کوردیرر . بو صورتله حب نفسی ، خودکاملغنی تعدیل ، حب غیری و دیکر اندیشلکی تحصیل ایدر . الله توکل و اعتمادی تأسیس ایله عزم و اراده یی تقویه ایلر . خلاصه حقیقی و صمیمی ایمان کامل ، انسانی حیوانیتدن ملکیتنه ، سفلیتدن علویته ایصال ایدر و عالم انسانیت ایچون مفید و خیرلی برعنصر نافع قیلار .

عبادات و از جمله صلات ، جناب حقه عرض عبودیت و منعم حقیقی اولان الله کمال خشوع و تذلل ایله بیان شکر و محمادت اولمقله برابر برچوق محاسن اخلاقیه ، اجتماعیه و سیاسیه یی دخی جامعدر . روحی تصفیه ، نفسی تربیه و اخلاقی

تهذيب ايدر. انساني احتراصات وافتراساندن ، فواخش ومنكراتدن منع ايلر. جماعته قيلينان نماز لرله جمعه و بايرام نماز لرله ده محاسن مذكوره دن ماعددين المسلمين تعارف و تساندي ، اخوت و اتحادي تايمين ايدر . هله فريضة حج ، بو محاسن و مصالح ده واسع بر صورتده تايمين ايدو چكي كي ، سياسي و اقتصادي بر جوق مصالح و مقاصدك حصواني دخی تايمين ايدر . اوروج ، نفس اماره يي قهر و تربيه ايله انساني نفسه حا كميته آليشدردر. زكات و صدقه فطر كي مالي فريضة و عبادت لرده ، اصحاب فقر و احتياجي ذلت و مسكنتدن تخلص ايله رفاه عمومي بي تايسيده خدمت ايدر .

اخلاقه متعلق وضع ايديلان احكام شرعيه به كنجه: بونلرك برر برر تعدادي قابل دكلدر . و بونلرك يري بوراسي دكل ، علم اخلاق كتابلريدر . بالكنر شو قدرني عرض ايديم كه اخلاق اسلاميه ، حقيقه و جدا يك بوكسك ، يك عاليدر . فضيلت صرفه ، علويت محضه در . نه قدر معالي انسانيه و فضائل عاليه و ارسه اونلر ، اخلاق اسلاميه ده داخل و مرغوبدر . حق بر چوقلري و جائبدين معدوددر . نه قدر مساوي بشريده و ارسه اونلرده و ذائلدن معدود و ممنوعدر . اسلاميت بر كره عقل و عرفانه يك بيوك قيمت ويرر . عقلي الهی يرحمت و مشمل هدايت ، علم و حكمتي (ضالة المؤمن) يعني مؤمنك غيب ايدوبده آرامقده اولديني اوز مالي عذا ايدر . جهلدن ، كوري كورينه تقليد جيلكندن ده او او نسبتده نفرت ايلر . صوكره تعاون و ناصره ، اخوت و اتحاد و بو صورتله ملي و اجتماعي تسانده نهايت در جهده عطف اهميت ايدر . او جهته حسد ، استرقاب ، غيبت ، بهتان و نيمه يعني قوغوجيلق كي بين الناس تنافري ، بغض و عداوتي و بالنتيجه تفرقي موجب احوال و افعالي شدتله منع ايتشدردر . بونلره مقابل سوشمك ، عفو و صفح ايله معامله ايتك ، كرم ، فداكارلق و علوجناب كي تساندي تقويه ايدن افعال و حركاتي ده بالاكس ايمان كامل اوصافندن عد ايله مشدر .

خلاصه اسلاميت ، بتون بونلره برابر سويرنده استقامتي ، يعني هر حال

وکارده دوغروانی و بالانچیلقدن ، غل و غشدن فسق و فجوردن ، حيله و فساددن
اجتنابی ، عدالتی و هر نوع حقوقه حرمت و رعایتی ، صداقت و وفاکارانی
و بونلره بمائل سائر فضائل انسانییهی ، مسلمانلغك شعارى عد ایتمشدر .

بونلردن باشقه فردی و ملی حیات معیشته متعلق احلاق اسلامییه کئنجه :
بوندهد . قورقاق ، جبین ، جسارت مدنیهدن ، نفوذ و قدرتدن عاری بعض
ایم سالفه حقنده شرفنازل [و ضربت علیهم الذله و المسکنه = اونلرك اوزرینه
ذلت و مسکنت ضرب اولونمشدر .] آیت جلیله سنك مضمون منیفندنده واضحاً
آ کلاشیله جنی وجه ایله اسلامیت ، حیانتدن و ذلت و مسکنتدن پك زیاده نفرت
ایدو . بنام علیه [لاینبغی للمؤمن ان یذل نفسه = نفسی ذلیل ایتمك مؤمنه
یا قیشمازا] و [عز المؤمن استغناؤه عن الناس = مؤمنك عزتی ، تاسدن
استغناسیدر .] حدیث صحیح حلی مفادینجه نفسی ذلت و مسکنتدن قورقارمق ،
دائماً عزت نفسی محافظه ایتمك ، [فاذا عزمت فتوكل على الله = بر ایشه عزیم
ایدنجه الله دایم ، عزیمکده ثبات ایت .] آیت منیفه مدلولنجه ، هر
ایشده جناب حقه دایمق صورتیه قدرتلی عزیم و ادارهیه و اعتماد نفسه مالک
اولق ، [وان ليس للانسان الا ما سعى = انسان ایچون نمره سعیندن باشقه بر
شی یوقدر .] نص مبینی مضموننجهده ، عطالت و بطالتی ، اولو و اویوشق
بر حیاتی ترك ایله فعال و جانلی بر حیاته آتلق ، مسلمانلغك اك برنجی
وظائف اخلاقیه سندندر .

• حدیث ، اولق اوزره هر کسك لساننده دوران ایدن [الفقر فخري
وبه افتخر = فقر و ضرورت بنم مدار مفخرتمدر ، اونكله افتخار ایدردم .]
سوزی ، قطعاً یالاندر . افترای محضدر ، کافه اهل حدیثك اتفاقیه موضوعدر .
جاهل و حقایق شرعیهدن غافل زهد خشك اصحابی طرفندن صوکرهدن
اویدیرلمش بر ارجوفهدر . شریعت اسلامییهك هیچ بر اصل و اساسنه مستندده
دکدر . بالعکس رسالتینام افندمز بر حدیث صحیحنده [کادالفقر ان یکن
کفراً = فقیرلاک آز قالدی کفر اولاجقدی .] بیور، شددر .

ایشته اسلامیتك اخلاقی عمدہ لری، اساسلری بونلردر . غایۃ اصلیه اولان مدنیت فاضله یه ودرایتده سعادت حقیقیه یه وصولده . آنجق بو اساسلره رعایتله حاصل اولور . آنك ایچوندرکه جناب نبوتساب اقدمن ، [انما بعثت لاعم مكارم الاخلاق = بن آنجق مكارم اخلاقی اتمام ایچون بعث اولودم .] بیورمشلر و بو افاده رسالت پناهیلرله اسلامیتدن مقصود اصلیك نه اولدیغی بیان ایتمشلردر . مع التأسف عصر لردنبری بو اساسلره رعایت ایدلمه یوب عن جهل عكسی التزام ایدلمش اولدغیدن بو كدن عالم اسلامك زره سنه باقیلسه فقر و ضرورتدن ، ذلت و مسكنتدن باشقه برشی كورلر . صآنكه ملت اسلامیهك ناسیه مقدراننه نمنای ذلت و مسكنت اورولمشلدر ، بونك یكانه سببی جهلدر . حقایق شرعیه یی اصلیللمه مكدر . ذاتاً برائسان و بر ملت ایچون جهالتدن بیوك بر مصیبت اولاماز .

— عدالت —

عدالت ، هم اخلاقی و هم حقوقی اك مهم بر اساس اولدیغندن اونك فلسفه اسلامیه کی موقعی و مقصد اصلی اولدیغنی كوسترملك ایچون بو مقامده (عدالت) مفهومی حقنده براز ایضاحات ویرمك اقتضا ایدیور . شویله كه :
 بو مقامده اوج كلمه قوللانیرز : عدل ، عدالت و معتدات . . . الچی ده بر معنایه در . (مصباح) ده بیان اولوندیغنی اوزره عدل ، فی الاصل امورده اقتصاد معناسنه در ، یعنی بر ایشده افراط ایله تقریط بیتنده امر متوسطدرکه اعتدال دیمكدر . ذاتاً « اقتصاد » لغتده اعتدال معناسنه در . عدل و عدالت ، بو معنی ایله برابر مساوات و موازنت معناسنی ده متضمندر ، « عدل » مفهومده مساوات و موازنت معناسی بولوندیغندن طولانییدرکه [و بالعدل قامت السماوات والارض = ارض و سماوات آنجق عدل ایله قائمدر .] حدیث شریفی ، ضرب مثل حکمنه کبرمشدر .

[ان الله يأمر بالعدل والاحسان = شبهه من الله ، عدل واحسان ایله

امر ایدر . [آیت کریمه سنده کی « عدل » دن مقصود اولان معنی بودر . یعنی مکافات و مجازاتده مساوات و توازن در . بناءً علیه خیره مقابل کیت و کیفیتجه مساوی خیر ایله معامله عدلدر . فضله بر خیر ایله مقابله اولونورسه احسان اولور . كذلك شره قارشی آکا مماثل شر ایله مقابله عدالتدر . فقط آندن دها از شر ایله مقام احساندر . ایشه امر وعدالته بو معنای مساواتی کوزه تمه نك لزومنی افاده ایچون [و جزاء سیئه سیئه مثلها = بر سیئه نك جزاسی ، آنک مثلی اولان سیئه در .] نص جلیلی شرفوارد اولمشدر . [کذا فی مفردات الراغب]

شو ایضاحات ، عدالتک معنای لغویسنه کوره در . عدالتک برده معنای اخلاقی و فقهیسی وارددر . شمدی ده صره سیله اونلری ایضاح ایدم ا

(عدالتک) ک معنای اخلاقیسی

یوقاریده « عدالت » فی الاصل افراط ایله تقریط آراسنده امر متوسط معناسنده در دیمشدک . بو معنی ، عدالتک هم معنای اخلاقیسنده ، همده معنای فقهیسنده موجوددر . ذاباً همان همومثله معنای اصطلاحیبارده معنای لغویلر داخل بولونور . عدالتک معنای اخلاقیسی ایجه آکلاده بیلیمک ایچون مقدمه قیلندن اولوق اوزره ایضاحات آتییه بی اعطایه محبوریت وارددر .

مؤلفات اصولیه دن (توضیح) ایله شرحی (تلویح) ده بیان اولوندیجه وجهله حکمای اسلام نفس انسانیده اوج قوت تصور ایدیورلر . بری قوه عقلیه ، دیکری قوه شهوانیه ، اوچنجیسی ده قوه غضبیه در ، قوه عقلیه یه قوه ملکیه ، قوه شهوانیه یه قوه بهیجیه و نفس اماره ، اوچنجیسنه یعنی قوه غضبیه یه ده قوه سبعیه دخی اطلاق ایدیورلر .

قوه عقلیه ، حقایق و عواقبی ادراکک و مصالح ایله مفاسد بینتی تمیزک مبدأیدر . قوه شهوانیه ، جلب منافع و آرزوی لذائذک مبدأیدر . قوه غضبیه ده ،

قورقولو و تهلكىلى شيلره اقدامك و تسلط ترفعه ميل و شوقك مبدأيدر .
 قوه عقليه نك اعتدالدين « حكمت » ، قوه شهوانيه نك اعتدالدين « عفت » ،
 قوه غضبيه نك اعتدالدين ده « شجاعت » ، حاصل اولور . ايسته امهات فضائل ،
 بو اوج شيدن عبارتدر . يعنى حكمت ، عفت و شجاعتدر . ديكر فضيلتلر هپ
 بونلردن تركب و تولد ايدر . و بو اوج فضيلتك برى افراط ، ديكرى تفريط
 اولمق اوزره ايكي طرفى واردركه اولوره « رذيلت » و جمع صيفه سيله « رذائل »
 ده نير . فضائلك ضديدر ، اخلاق مذمومه در .

بوراده « حكمت » دن مقصد ، بقدر الاستطاعه حقايق اشيايى ، اولدينى كچي
 بيلمكدر . علم نافع ده بودر . نفس انسانيتك لهته و عليه اولان شيلرى
 بيلمه سيدر ديهده تفسير اولونور . بو تفسيره كوره (فقه) دن اعم اولور .
 چونكه فقه ، نفس انسانيتك لهته و عليه اولان احكام شرعيه يي بيلمه سيدر .
 حكمت ايسه ايستر احكام اولسون ، ايستر حقايق سائر اولسون على العموم
 له و عليه اولان شيلرى بيلمكدر . بو جهته بومعناجه حكمت اعم ، فقه اخصدر
 « حكمت » افراط طرفه « جزيره » ، تفريط جهته « غباوت » اطلاق
 اولونور . جزيره ، فكري ادراكى قابل و يالايق اولمايان شيلرده لايق اولمايه جق
 وجهه استعمالدر كه سفسطه و شارلانانلقه منجر اولور . غباوت ، قوه فكريه يي
 معلومات نافع اگتسابى صورتيله ايشلتمكدن تعطيلدر كه حماقتى استاج ايدر .
 وطبعاً موجود اولان ذكا و استعدادنى كورله دير . بمضاده بو غباوت ، فطرى
 اولور . فقط قوه فكريه ، اصولى دائره سنده حسن صورتيله ايشله تيله رك
 تربيه ايديليرسه اكثر يا انكشاف ايدر . اولوقت او فطرى غباوت ، ذكابه
 منقلب اولور .

عفت — عفت ، قوه بهيميه نك قوه ملكيه يه اتقياديدر . عفت ، نفس
 انسانيده بر ملكه راسخه حالى اگتساب ايدنجه آرتق انسان ، بوملكه عفت
 سبيله بالجله هوسات نفسانيه يه وغير مشروع حظوظات شهوانيه يه مغلوب اولمقدن

قور تولور : وعلى العموم حرکات و تصرفاتی قوه عقليه و ملكيه نك مقتضاسی اوزره واقع اولور .

عفتك ايكي جهتندن افراط جهتهده كي خصلته « خلاعه » تسميه اولونور كه عار و حيایي آثارق هر نوع كستاخلفی ، يوز سزلکی ارتكابدركه فجور ديمكدر نوکي کيمسه لره (خلیع العذار) اطلاق اولونور . بو خصلت ، قوه بهيميه نك قوه ملكيه يه غلبه سسندن نشأت ايدر . عفتك تفريط جهتهده ، خلك ضميله « خود » اطلاق اولونور . خود ، لغته آتشك قوری سونمیه رك يالكز آلوی سكون بولمق معناسنه در . بوراده عقل و شرعك تجویز ابتدیكي اذواق ولدانمدي طلب و آرزودن سكون معناسی مقصوددر . بو ، [خلق لكم مافی الارض جميعا] ير يوزنده بولونان شيلرك جمله سی سرك همچون خلق اولونمشدر . آیت کریمه سی منطقجه ، جناب حقك انسانلره بخش و احسان بیورمش اولدینی ازانمدي حیاتیه دن بلا سبب محرومیته قاتلا نمقدركه معناسزدرد . عقلا ده ، شرعآده مذمومدر . ايشته تکیه لره ، مناسترلره قیابوب نفسی هر درلو حظوظانندن محروم قيلمق بو قیلدندر .

شجاعت — شجاعت ، لغته قوت قلب ديمكدر . یعنی قور قولاجق شيلره فارشی قلبك قوت و متاتی ، مخوف و هولناك احوال و حرکاتی هيچانسنر فتورسنر قارشيلامه سیدر . فلسفه اخلاقيه ده شجاعت قوه سبعیه نك قره عقليه يه منطقه انقيادی ديمكدر . ايشته شجاعت ، اويله علی الاطلاق جسارت ، بلا تأمل هر شیه در حال آتلق ، جرأت کوسترمك ديمك دكلدر . عقل و بصیرتك رشد و رویتك مقتضاسنه کوره جسارت و متانت قلییه در كه حقیقی مردلك و قهرمانلقدر . بناءً علیه سكون و تمکين ، آخر باشلیلق ، هيچانه قانلماق ، صوغوقه قانلیلق کبی کيفیتلر ، شجاعتك ماهیتی اقتضاسندندر . بو شجاعت ، بو قوت قاب سبيله در كه انسان ، قلبنده اضطراب و هیجان حس ایتمکسزین ، تلاشسز و فتورسنر امور هائله يه اقدام ايدر . آنکيچون شجاعت ، بيوك بر فضیلتدر .

شجاعتك طرفیندن افراط طرفه «تهور»، تقریط جهته ده «جبین و جبات»، دینیر «تهور»، اقدامی لایق اولمایان احواله، عاقبتی دوشونمیه رك بلا رویت آنلقدرد. قوه غضبیه نك عقل و حکمت غلبه سیدر، جبات ده، قورقافلقدرد. احتراز ایدلمه سی لایق اولمایان شیردن احتراز در. هر ایکسی ده مذموم در.

عدالت — عدالت کانه : عدالت، شو او چ فضیلتك یعنی حکمت، عفت و شجاعتك اجتماع و امتزاجدن حصوله کله بر ملکة راسخدر. و آنلرك محصله سیدر که صراط مستقیم اوزره حرکنده رسوخی اقتضا ایدر. بناء علیه عدالت، دوشور و لقدرد، طریق حقه استقامتدر. دوشور و لقدرد، حق بولدن آبرلماقدرد. ایشه (عدالت) ك معنای اخلاقیسی بودر.

شواقدانی، براز دها خلاصه ایتك صورتیه تلخیص ایتك اقتضا ایدر سه دیرز که بتون فضائل انسانیه، افراط ایله تقریط آراسنده توسطه منحصر و آنندن متحصل امور متوسطه در. چونکه رؤس فضائل درتدر: حکمت، عفت، شجاعت و عدالتدر. حکمت، قوه عقلیه نك اعتدالی و نتیجه کمالیدر. و جبرزه ایله غباوت ییتده بر امر متوسطدر. بو توسطه، قوه عقلیه نك، عقل ایچون وصول ممکن اولان حده قدر کیدوب اوراده توقف ایتمه سی و آرتق او حدی تجاوز ایدر ك شارلاتانغه، سفسطیه صابمایدرد. عفت، قوه بهیمیه نك نتیجه تهذیبدر. و خلاصه ایله خود آراسنده متوسط بر کیفیتدر. شجاعت ده، قوه غضبیه نك نتیجه اعتدالیدر. و تهور ایله جبات ییتده بر خصلت متوسطدر. عدالت ایسه، بو او چ فضیلتك یعنی حکمت، عفت و شجاعتك هیئت مجموعه سنده توسطدر. یعنی اونلرك اجتماع و امتزاجدن حصوله کله حالت متوسطه در که بو او چ فضیلتك محصله سی دیمکدر.

ایشته بتون فضائل اخلاقیه نك منبعلری، اصللری بو دوت فضیلتدر. دیگر فضیلتلرك کافه سی، بولردن تولد ایدر. بعضیلری بو دوت فضیلتدن یالکز برینك فرعی و آنندن متولددر. بعضیلری ده اونلرك ترکبندن متحصلدر.

مثلاً جسارت مدنی و نواب دهره قارشی مناسبتله صبر و تحمل فضیلتی شجاعتن متولد اولدینی کی کرم، علوجناب، حب غیر، مرحمت و شفقت کی فضیلتلرده، حکمت و عفت و شجاعتک ترکبندن متحصلدلر .

ایشته شو تدقیقاندن « عدالت » ک معنای اخلاقیسی تماماً آ کلاشلمشدر ظن ایدرم . بو مناسبتله استطراد قیلندن اولوق اوزره شو جهتی ده عرض ایدیم که بو فضائل انسانیه نک جمله سی ، عدالت ارجاع قابلدن . یعنی بونلرک کافه سنه و حتی کائناتی اداره ایدن قوتلره ، قوانین طبیعییه ، معنای لغویجه عدل و عدالت اطلاق صحیح اولور . چونکه کوردک که شودرت امهات فضائل ، ذکر اولونان قوای انسانیه نک اعتدال لرندن و او قوتلر آراسنده موازنندن عبارتدر . کائناتی اداره ایدن قانونلرده ، قوای طبیعیه نک اعتدال لرندن و بینلرنده کی توازنندن باشقه برشی دکلدن . یوقاریده بیان اولونمشدی که « عدل » ک معنای لغویسی ، امورده اعتدالدر و مساوات و موازنت مناسنی ده متضمندر . شو حالده بالعموم فضائل اخلاقیه و بالجمله قوانین طبیعیه عدالتدن عبارت دیمکدر .

بونندن ده شونتیجه حاصل اولور که نه انسانلر ، نه ده اجرام علویه و سفلیه ، عدالتسز بقا بذیر اولاماز . بتون عوالمک انتظام و بقای ، عدالتله قائمدر . ایشته حقایق آموز ایم افندمن حضرتلری ، [وبالعدل قامت السماوات والارض = سماوات وارض ، آنجق عدل ایله قائمدر] . حدیث حکمت اشتهالریله بونکتهیه اشارت بیورمشلردن .

(عدالت) ک معنای فقهیسی

عدالت ، لسان فقهده ، ایکی معناده استعمال اولونور . بری معنای اعمی ، دیگرکی معنای اخصی در . معنای اعمی ، سیرنده استقامتدر . بو معنی ، عدالتک یوقاریده کچن معنای اخلاقیسیدر . سیرنده ، استقامت ده ، محظورات دینی و دنی مجانیته حاصل اولور . تعیر دیگرله کبائر دن اجتناب و صغائر ده عدم اصرار

ایله حصوله کبیر . ایشته حدیث روایتده و شهادتک معتبر اولمسه سنده مشروط اولان عدالت، بو معناجه اولان عدالتدر . بناءً علیه بو وجهله سیرنده مستقیم اولان ذاته عادل دینیر . مجله نك «عادل» ی ، «حسناتی سیئاتنه غالب اولان زاندر» . دیه تعریف ایتمه سی ، عدالتک معنای لازمیه سینه کوره در . چونکه سیرنده استقامت، حسناتک سیئاتنه غالبه سی استلزام ایدر . شبهه یوقدرکه سیرت اسلامییه ده مستقیم اولان ذاتک حسناتی سیئاتنه غالب اولور . بتون بتون سیئاتدن بری اولوق ایسه عقلاً ممکن اولسه ده ، عادة متعذر در . زیرا بشریت بوکا مانع در .

عدالتک معنای اخصی ده ، حق ایله حدم ایتک ، احقاق حق و ابطال باطل ایله مک دیمکدرکه حقه حرمت ورعایت ایله مک دیمک اولور . بومعنی ، اولی معناده داخل واونک بر قسمی اولدینی ایچون ، آندن اخصدر . عدالتک شو ایکی معنادن برنجیسی ، علم فقه ایله علم اخلاق بیننده مشترکدر . ایکنجیسی ایسه علم فقهه مخصوصدر . واقعا بوده اخلاقی بر مسئله ایسه ده ، بوندن دوغروندن دوغرویه علم فقهده بحث اولونور . علم اخلاقده یالکیز جهت اخلاقیسی ذکر ایدیلیر . مع هذا کړک کتب فقهیه ده و کړک دیگر کتب اسلامییه ده «عدالت» کلمه سی ، مطلق ذکر اولوندینی زمان اکثریا برنجی معنی ، یعنی سیرنده استقامت معنای مراد اولونور . بو معناجه عدالتک ضدی «فسق» در . احقاق حق و ابطال باطل ایله مک معنانه اولان عدالتک ضدی ده ، «ظلم» در . بونلر آراسنده کی فرق ده ، عدالتک برنجی و ایکنجی معنای آراسنده کی فرق کیدر . یعنی ظلم اخص ، فسق اعمدر . بناءً علیه هر ظلم ، فسقدر . اما هر فسق ظلم دکدر . مثلاً بر کیمسه ، شخصنه طأد و منحصر اولوق اوزره کبأردن برینی ویا بر قاچنی ارتکاب ایتسه اوکا فاسق دینیر ، فقط ظالم دینمز . ظلم ، باشقه سنک حقنه تجاوزدر ، حقنی ابطالدر .

مسئله — عجبا عدالت ، هر زمانده ثابت ولایتغیر بر شیمیدر ؟ . بو سؤاله دفعه مثبت ویا منفی بر جواب ویرله مز . براز دوشونمک لازمدر .

بو، حسن و قبح مسئله میدر. اگر عدالت، حقیقتده و نفس الامرده ثابت و لایتغیر بر حسن ایله متصفدر دیرسهك، اولوقت عدالتك لایتغیر اولدیغنه حکم ایتمه من و بناء علیه سؤال مذکور مثبت بر جواب ویرمه من دوغرو اولور. فقط حقیقه عدالت، اولیله لایتغیر. بر حسن ایله متصفمیدر؟ ایشته مسئلهك روحی بوراده در. عدالتك یالکیز مفهومی نظر اعتبارده آلیر سهق آنك دائمی و غیر متحول بر حسن ایله متصف اولدیغنه شبهه ایتمه یز. نته کیم (حسن و قبح) بحثده اولیله بر حکمده بولونمشدق. عدالت، ذاتنده ثابت و حقیقی بر حسن ایله متصفدر دیمشدك.

فقط مسئله بونده دکل، عدالت مفهومك ماصدقی حقنده در. یعنی «عدالت» دینیلن افعال و حرکات حقنده در حاکمك حکمی، حکومتك اجرا آتی کبی. ایشته مسئله یی بوصورتله تحلیل ایدنجه، بوتحلیلدل ترکیبه کچرک ذکر اولونان سؤاله بری مثبت، دیکری منفی اولق اوزره ایکی شقلی جواب ویریرز. بناء علیه بعض عدالتلرده واردرکه ثابت و هر زمانده لایتغیردر. و اولیله اولمه سی لازم کلیر. بعض عدالتلرده واردرکه اضافی و اعتباریدر، زمانه و اعتباره کوره ده کیشیر. برنجیسی عدالت مطلقه، ایکنجیسی عدالت اضافیه در،

۱ — عدالت مطلقه

۲ — عدالت اضافیه

دیمك اولویورکه عدالت، مطلق و اضافی اولق اوزره ایکی قسمدر. عدالت مطلقه، حسن عتلاً ادراک اولونان و هیچ بر نقطه نظر دن کندیسنه حقسزلق و تعدی اسناد اولونامیان عدالتدر. اییایکه اییایک، خیره خیر ایله مقابله ایتمك، اذا ایتمه ین ذاتن کف اذیت ایله مک، هروجهله ثابت اولان حق صاحبنه ایصال ایتمك کبی بوتعریفه کوره بونوع عدالتك حسن مطلق اولوب هیچ بر زمانده کندیسنه چرکینلک عارض اوله میه جفتدن، بونده نسخ جاری اولماز. آنکچون بر قیل عدالت مطلقه، هیچ بر دین و شریعت طرفندن نسخ ایدلمز.

عدالت اضافیه، بویله دکلدره. آنک حسننی وعدالت اولدیفنی عقل کنندی
باشنه ادراک ایده من اونی آنجق شریعت واسطه سیله ادراک ایدر. قصاص،
دیت وعلی الموم جرائم و جنایانه عائد انواع مجازات و مقدارلری کی. عقل
بشر، بوکی احکامک عدالت حقیقیه به درجه اصابنی تعیندن عاجزدر. چونکه
بویله یرلرده جرم ایله جزا آراسنده آرائماسی لازم کلن نسبت عادلانی تعیین
ایچون آله ثابت بر میزان عدالت یوقدر. آنکچون عقل، و بوکی احکامک
وحسننی وعدالت توافقی، آنجق معرفت شریعتله بیلینیر.
ایشته نسخ، بومثلی احکامده جاری اولور. چونکه بو بوکی احکام، زمانه
کوره دیکشیر.

اعتباری و اضافیدرلر. آنکچون شرع شریف، کرب عقوبانه و کرب عقود
و معاملات دایر یك آزار احکام وضع ایتمش، اکثریت عظیمه سنی زمانک ایجابانه
واو ایجابانه کوره علمانک و حکومتک اجتهادینه ترک ایتمشدر. کتب فقهیه ده
یالکز (بیع) دایر بیکلرجه مسئله و احکام فقهیه موجود اولدیفنی حالده،
قرآن کریمده ایکی اوچ آیتدن باشقه آیت یوقدر. آجاره حقنده ایسه یالکز
ایکی آیت واردر. اونلرده آجاره آدمی به متعلقدر. بری مرضعه به اجرت
اعطاسنک لزومنه دایردر. ایکنجیسی ده حضرت موسی علیه السلام قبل النبوه
برمدت اجیر اولدیفنی حکایه دن عبارتدر.

هله حواله، کفاله، مزارعه، مساقات و شرکت کی دیگر عقود و معاملات
حقنده دوشورون دوشوریه اونلرک احکامنی بیلدیرمک ایچون نازل اولمش
هیچ راءت یوق کییدر. بویله معاملات متعلق حدیثلرده پک آزدور اونلرکده
چوغی متکرردر. مثلاً آجاره به دایر وارد اولان حدیث صحیحلرک عددی،
یدی سکزدانه دن عبارتدر. اونلرده آجاره آدمی حقنده در. زمانزده پک زیاده
حائز اهمیت اولان آجاره عفار حقنده ایسه نه بر آیت، نه بر حدیث واردر.
بونکده سببی، ایکیدر. بری دین سویله دیکمز کی جناب شارعک، بویله
تبدیلله تبدل ائتمه سنی لازم کلن احکامی، زمانک ایجابانه ترک ائتمه سیدر.

دیگری ده عضو سعادتمند بین الناس اجاره عقاره دانه معامله جاری اولماسیدر .
 خلاصه ، مطولات فقهیه ده محرر اولان مسائل فقهیه نك درنده اوچندن
 زیاده سی ، همه بك جوق زیاده سی ، فقهانك اجتہاداتندن عبارتدر .
 وا کثریسنده اختلاف اولونمش و یکدیگرینه ضد فکر لر حاصل اولمشدر .
 بونلرک هانکیسی موافق و یا مخالف معدلتدر بیله من . چونکه آله سالم
 وقطعی بر میزان عدالت یوقدر . اجتہادات واقعه (رأی) دن عبارتدر . بر
 رأیک ایسه دیگر رأی اوزرینه رجحانی یوقدر . شریعت ایسه ، بوکجی مسائل
 اجتہادیده اختیار سکوت ایتمشدر . آنک ایچوندرکه جناب رسالتناه اقدمز ،
 [استفت نفسک وان افتاک المفتون = مفتیلر فتوی ویرمش اولسه ده ، سن
 ینه نفس و وجدانکدن استفتا ایت .] بیورمشلردر . بوندن ده آکلاشیلیرکه
 عدالتله درجه موافقی عقلاً کس دیر یله مین مسائله و خصـوصیله موضوعات
 قانونیه ده عدالت ، نسبی و متحولدر . زمانک و مصلحت عامه نك ایجاباته کوره
 تحول ایدر . مصلحت عامه بی بحق تقدیر ایتکده قولای دکدر . نیجه مسئله لر
 و فکر اجتہادیلر اولورکه ظاهراً مصلحته موافق ظن اولونورده ، حقیقته
 موافق اولمایه بیلیر .

عدالتك شریعت اسلامیة نك موقی

عدالتك شریعت اسلامیة ده موقی بك یوکسکدر . حتی برنوع عبادتدر
 وبر فریضه محکمه در . بوحدیث شریفده [عدل ساحة حیر من عبادة سنین
 سنة = بر ساعت عدالت ، آلتش سنه عبادندن خیرلیدر] بیورولمشدر .
 وقبیله داود علیه السلامه شرفوارد اولان خطاب عزتی حکایه ایدن [یا داود
 ابا جملناک خلیفه فی الارض فاجکم بین الناس بالحق] = یا داود بر سفی یر یوزنده
 کندیمزه خلیفه قیلدق . او حالده بین الناس حق ایله حکم ایت . [آیت جلیله سی ،
 نبوت و وضع شریعتدن مقصود اصلی نك احقاق حق و اجرای عدالت اولدیغنی
 بك بارز بر صورتده افاده ایدیور . چونکه آیت مشار الیه ده کی برنجی جهه بی

تعقيب ايدن ايكنجى جله ، (او حالمه . بناءً عليه ، اويله ايسه) كې بر معنى افاده ايدن « فاه تفريقه وتعقيبيه ، ايله » ذكر اولونمشدور .

قرآن كريمده عدالتى امر ايدن و ظلم و جورى نهي ايله ين آيات جليله ، يك جو قدر . هله بعضيلرى يك زياده شدت ونهيدى محتويدير . [و سيعلم الذين ظلموا اى منقلب ينقلبون] آيت جايلهسى ، او جله دندور .

بو آيات قرآنيه تدقيق اولونورسه كورولور كه تزد آلهيده ام و اقوامك هلاك وانقراضنه باعث اولان نهي ، كفر و شرك دكلدر . بلكه ينلرنده ظلم واعنسادك انتشاريدير . [وما كان ربك ليهلك القرى بظلم واهلها مصلحون] اهاليلى مصلح و حقوقه رجايستكار اولدينى حالمه ، مجرد اولانلرك كفرى سبيله مملكتلرى هلاك ايتك ، سنك ربك شانسدين دكلدر . [آيت كريمهسى ، بو خصوصه يك صريحدير . بر سنت آلهيه ، لايتغير بر قانون ازليدير . [۱]

بو بويله اولدينى كې ، بر ملك بقا و اعتلاسنه سبب اولان مشيده ، او ملك يالكيز ايمان وتوحيد ايله متصف اولمىسى ، نماز قلوب اوروج طوعهسى دكلدر . بلكه اونك ايجابانندن اولان عدل ايله و حقوقه حرمنه اتصافيدور . عكس تقديرده اولمت نه قدر مؤمن ونه قدر عبادتله متصف اولور ايسه اولسون ، نهايت انقراض و اضمحلاله محكومدير . بو حيات ائمه جازى بر دستور آلهيدر . « بز ، آنجق اهاليلى ظالم اولدينى زمان مملكتلرى هلاك و خراب ايدور . مألنده اولان [وما كنا مهلكي القرى الا واهلها ظالمون] آيت منيفه سندره بو كا دالات واردير . تاريخ وشئون و حادثات ده بو بابه شاهد عادلدر . ايشته بوايكي قانون ازلى به مبتديدر كه [المالك يبقى مع الكفر ولا يبقى مع الظلم] ملك و دولت كفر ايله باقى قالير ، اما ظالم ايله باقى قانااز [سنوزى ، السنه عقلايه مثل سائر حكمنى اكتساب ايتمشدور .

[۱] تفسير كبريه بيان اولوندينى اوزره بو آيتك بو صورتله تفسير وترجمهسى اهل سننه كورهدور . يعنى علماء اهل سنت بو آيتده كي (بظلم) اميرينى « كفر و شر » سبيله « ديه تفسير ايتمشدور .

ایشته (عدالت) حقننده کی ایضاحات بوندن عبارتدر . اوندن اول واقع
اولان ایضاحات ، مصلحت دینییه دائر ایدی . عدالت ایسه هم مصلحت
دینییه ، هم ده مصلحت دینیویه بی مشتملدر . شمدی ده مصلحت دینیویه بی
ایضاح ایدم :

*
*

مصلحت دنیویه

ضروریات ، هامیات ، تحسینات
یاخورد

مصلحت ضروریه ، مصلحت حاجیه ، مصلحت تحسینیه

مصلحت دنیویه . اوج تسمدر ! مصلحت ضروریه ، مصلحت حاجیه
ومصلحت تحسینیه . . مصلحت ضروریه بشدر : نفسی ، مالی ، نسلی ، دینی
وعقلی حفظ و صیانتدن عبارتدر . بونلره ضروریات خمس ، کلیات خمس
ومقاصد خمس اطلاق اولور . بو بش شیک محافظه سی خصوصنده کی احتیاج
حد ضرورته بالغ اولدینی ایچون بونلره ضروریات ومصلح ضروریه دنیلمشدر .
چونکه بو بش شیدن مر هانکی بری محافظه ایدلمه جک اولسه ، امور دنیویه
مختل وفساده منقلب وبالنقیجه حیات بشر کلاً فوت اولور . بونک ایچوندرکه
بونلری حفظ وصیانت ، نزد شارعه مقصود املی اولان مصلحت اولدینی
کی ، بونلرک فوتی موجب فعل جرکتده دینی واجب مفیددر .

ایشته خلق اضلال وعقائد مسلمینی افسارایدن بر شخص مضل ومفسدی
تجزیه ایتک ، دینی محافظه ایچون مشروع قیلندینی کی ، امر جهاده هم
دینی وهم اهل اسلامی محافظه ایچون مشروع قیلنمشدر . کذلک مالی وحق
تملکی صیانت ایچون سارق و غاصبه مجازات وتضییات ، نسلی وعرض وناموسی

محافظه ایچون حد زنا وحد قذف ، سلامت عقلی محافظه ایچون ده حد شرب
تشریع اولونمشدر . بعض علما عرض وناموسی محافظه کیفیتنی آلتنجی بر
مصلحت ضروریه اولق اوزره ذکر ایدیورلرسده ، دیگرلری بونی (حفظ
نسل) ماده سنه الحاق ایدیورلر . مناکاتک مشروعتی ده ، نسل ونسبی محافظه
مقصودینه مبتیدر .

مصلحت حاجیه یعنی احتیاجیه ، ناسک کندیسنه اولان احتیاجی حد
ضرورته بالغ اولمایان مصلحتدر . بو کبی مصالح احتیاجیه ، ضرورت درجه سنه
بالغ اولمدیی جهته بونلر اولقسزین ده انسانلر ایچون یاشامق ممکن اولور .
بونلرک فقدانندن طولانی حیات بشره فساد طاری اولمازسده ، امر معیشتده
دارلق ومعاملات ناسده که چلک ، عبادات و مناکاتده خرج ومشقت حاصل
اولور . بناء علیه توسعه و رفع مشقت نقطه نظرندن خلکک بو مثلی مصالح
احتیاجیه مبتنی رخص وتخفیفاته احتیاجی درکاردر . ایشته مثلا معاملاتده
سلم ، استقناع ، بیع بالوفا ، مزارعه ، مسافات وانواع شرکت کبی عقودک
جوازی حقنده کی احکام ، بونوع مصالحک استحصالی ایچون مشروع قیلنمشدر .
(مسلم الثبوت) صاحبی کبی بعض اصولیون ، بیع واجاره کبی معاملات متعلق
علی العموم عقودی ، مصالح احتیاجیه عدادینه ادخال ایدیورلر . چونکه
بو عقوددن هیچ بری مشروع اولماقله ذکر اولونان مقاصد و مصالح
ضروریه دن هیچ بری فوت اولماز . دیورلر .

مصلحت تحسینه ، نه ضروریاندن ، نه ده حاجیات جمله سندن اولمایوب
مجرد احسن اولی اولانی اختیار قیلندن اولان مصلحتدر . قاذوراتک و لاشه
وقاذورات اکل ایدن حیواناتک وعلی العموم حشرات مضره وخبائثک اکل
حرام اولمسی کبی . چونکه بونلرک حرمتی نجاستلرندن ومنصب آدمی تک
علویتندن ناشیدر . جناب شارع ، انسانلری بو کبی خبائثدن تنزیه و مکارم
اخلاقه سوق وتشویق ایچون بومثلی شیلری تحریم ایله مشدر . فقط سم قاتل
کبی تلف نفسه بادی ویا صحته مضر اولان شیلرک حرمتی ، بوقیلندن دکلدر .
بلکه مصالح ضروریه ویا حاجیه میانته داخلدر .

مصلحت معتبره ، مصلحت مردوده ، مصلحت مرسله

مصلحت، شرعاً اثبات حکمه معتبر اولوب اولماق اعتباريله اوج قسمه تقسیم اولونور . برنجیسی مصلحت معتبره ، ایکنجیسی مصلحت مردوده ، اوچنجیسی ده مصلحت مرسله در . مصلحت معتبره ، اثبات و وضع حکمه شرع شریفك اعتبار ایتدیکی علت و مصلحتدر . مثلاً مناط تکلیف اولان « عقل » ك محافظه سی ، شارعك مقصودی اولان بر مصلحتدر . بو مصلحت ملاحظه سینه مبنیدر که شارع ، شیپارای حرام قیلمشدر . چونکه شاراب ، سکر و برمك صورتيله عقلی افساد وازاله ایدر .

شو حالده سکر و برن نه قدر مشروبات و مأکولات وارسه ، جمله سنك حرام اولمسی لازم کلیر . زیرا بو خصوصده اونلرله شاراب آراسنده بفرق یوقدر . اونلرده شاراب کی مسکدر ، وعین مصلحت بونلردهده موجوددر . یعنی بونلرده تحریم ایدلیه جك اولورسه ، ذکر اولونان مصلحت مقصوده فوت ایدلمش اولور . ایشته شرعك اعتبار ایتدیکی بو مصلحت مقصوده بی محافظه ایچون بتون مسکراتك حرمتنه حکم اولونور .

خلاصه ، مصلحت معتبره بر حجت و بر دلیل شرعیدر و قیاسه راجعدر . زیرا قیاس ، نصك و یا اجماعك معنای معقولندن اقتباس حکمدن عبارتدر . آنکچون مصلحت معتبره ایله استدلالك بعض انواعی وارددر که (قیاس جلی) ده داخلدر . نته کیم بو جهت ، ذکر اولونان مثاله پك ظاهردر .

مصلحت مردوده — مصلحت مردوده ، شرعك ابطال و الفنا ایتدیکی

مصلحتدر . بونی بر مثال ایله ایضاح ایدلم : بر کیمسه قصداً و بیله رك رمضان اوروجنی بوزارسه ، شرعاً بر نوع جزا اولمق اوزره « کفارت » ایتمسی لازم کلیر . بو کفارت ده ، استطاعت مالیه سی اولدینی صورتده بر کوله و یا جاریه آزاد ایتمسی ، بوکا مقتدر اولدینی تقدیرده بربری آردی صره متابماً

آلتش کون اوروج طومتق، بوکاده مقتدر بولونمازسه اولوقت آلتش فقیری اطعام ایله مکدر . ایشته بو کفارت شرعاً معتبر اولمق ایچون بو ترتیه رعایت ایتک شرطدر . بو نص ایله ثابتدر .

حالبوکه وقتيله (اندلس) ده تأسس ایدن دولت امویه حکمدارلرندن « عبدالرحمان مرتضی » ، بر کون هیج بر مجبوری اولمق سزین قصداً رمضان اوروجنی بوزمش اولدیغندن طولایی، اولوقت اندلسک الک سیک فقیه و مجتهدی وفقه مالکی مؤسسای امام مالک حضرتلرینک شا کرد ممتازی مشهور امام یحیی بن یحیی ، ذکر اولونان حکمدارک آلتش کون اوروج طومتسی واجب اولدیغنه دائر فتوی ویرمش . بعض علمای طرفندن بو فتوانک حکم شرعه موافق اولدیغندن و چونکه موسی الیهک استطاعت مالیه سی بولوندیغنی ایچون بر کوله ویا جاریه آزاد ایتمکه فتوی ویرلمه سی لازم کله چکی مقام اعتراضده درمیان ایدیلنجه ، مشارالیه امام یحیی ، بو اعتراضه « کفارت ، زجر ایچون مشروع قیلنمشدر . حالبوکه بن اوکا اعتناق رقبه یعنی قول آزاد ایتمکه فتوی ویرسه یدم ، بو اوکا بک قولای کلیردی . چونکه نروت جسیمه سی حسیله اونک ایچون هر کون کوله آزاد ایتمه نک هیج اهمیتی یوقدر . شو حالده اونک حقنده کفارتدن مقصود اولان مصلحت زجری حاصل ایتک ایچون ، کفارتک ایکنجی شققی بالترجیح آلتش کون اوروج طومتسی لزومیله فتوی ویردم . زهرا اونک انزجار ، یعنی کفارتدن منزجر و متنبه اولوب بر دها یا بنامسی ، آنجق بو حکمله حاصل اولور . » جوابی ویرمش .

اصولون ، بوجوابی قبول ایتمه یورلر . بو ، نص شارع مخالفدر . شارع بو . نصوصده زنکین ایله فقیری تفریق ایتمه مشدر . احکام کفارتی بروجه مشروح صورت مطلقده ترتیب ایله مشدر . بو ترتیه رعایت ایتمه مک ، حکم نصه مخالف مصلحتله عمل ایتمکه درکه تجویز اولونماز . بو قایبی آجق ، احوالک تغیری سببیه بر چوق حدود شرعی و احکام منصوره نک تغیرینه مؤدی اولور . بوايه جازر دکدر دیورلر . [کذا فی المستصفی للغزالی]

غریبه و یریلن بو فتوانك بر عینی ده ، ینه اوزمانلرده شرقة و یرلمش .
 ائمه حنفیه دن امام محمدك مشاهیر طلبه سندن امام « عیسی بن ابان » ، خراسان
 امیری حقنده عین مسئله ده عین حکمله فتوی و یرمش . فقط بو ، فتوا سنی
 مشارالیه امام یحیی نك علتیه ایتنا ایتدیرمه مش . باشقه ملاحظه یه منی اوصورتله
 افتا ایتمش . فتوی ، عین فتوی ایسه ده علتی باشقه . عین اعتراض ، بوكاده
 درمیان ایدیلنجه جواباً دیمش که : « بوذاتك - یعنی خراسان امیرینك ثروتی
 اسباب مشروعه یه مستند دکلدر . جبراً و ظلماً ، ارتشا طریقله و یا باشقه یر
 صورت غیر مشروعه ایله اخذ و جمع ایدلمش اموال مسلمیندن عبارتدر . جمله سنی
 اعاده ایتك او اتلاف ایتدکرینی ضامن اولمسی اقتضا ایدر . بو ، اونك اوزرینه
 شرعاً واجبدر . بناءً علیه مدیون مشغرقدر . فقیر حکمنده در . شودقیقه ده
 دینی ادا و اموال موجوده سنی اصحابنه و یا بیت الماله اعاده و تسلیم ایده جك
 اولسه - که ادا و اعاده سنی صورت قطعیه ده واجبدر - آئنده برکوله و یا جاریه
 آزاد ایده جك قدر پاره سی قالماز . او ثروت ، او اموال جسیمه اونك دکلدر .
 اونك ایچون اوروج طوتمه سیله فتوی و یردم . »

اصولون : بو جوابی تحسین ایدیورلر . « بو جواب ، بك دوغرودر .
 و شرعاً معتبر بر علت و مصلحتدر . بونکله مشارالیه امام یحیی نك استناد
 ایتدیکی علت آراسته بیوک بر فرق واردر . بونی اونکله قارشیدر ماملیدر .
 بناءً علیه بو ، شرعک اعتبار ایتدیکی مصلحت مقبوله در . اما امام یحیی -
 نکدی شرعک الفا ایله دیکی مصلحت مردوده در . » دیورلر . شوراسنی اخطار
 ایده می که خراسان والیسنك مسئله سی ، یمینده حاث اولق مسئله سیدر . مسئله لر
 باشقه باشقه ایسه ده حکملری بردر . هر ایکسنده ده اوصورتله کفارت ایتك
 لازم کلیر . یالکزر کفارت یمینده اوروجك مقداری آزدر .

مصلحت مرسله - مصلحت مرسله دیه شرعک نه اعتباری ، نه ده
 ابطال و الفاسی معلوم اولمایان مصلحت دینیر . حقنده شرعاً التزام سکوت

اولمش، کتدی باشنه صالیویرلش دیمک اولدیغندن بوقسم مصلحتنه ، مصلحت
مرسله اطلاق اولونمشدر. سرقت جرميله متهم اولان برکیمسه نك عندالاستطاق
جرمینی اقرار ایتمه سی ایچون تضییق و ضرب ایدله کی. امام مالک حضرتلری،
بو مصلحت مرسله ایله عمل ایدیور. یعنی مشار الیه کوره اثبات احکامده
مصلحت مرسله دخی قیاس کی بردلیل شرعیدر حتی بر چوق یرلرده قیاسه
راجهدر.

بوجهله سرقتله مظنون اولان برکیمسه یی، عندالاستجواب جرمینی اعتراف
ایتدیرمک مصلحتنه مبنی ضرب ایتک، امام مالک کوره جائزدر. فقط اکثر
اصولیون، بونی تجویز ایتدیرورلر. دیورورلر که « او مظنونک جرمیدن بری
ومعصوم اولمه سی محتملدر. بواحتمال آنی ضربه مانعدر. چونکه بو صورتده
برمعصومی ضرب ایتک احتمالی وارددر. برمعصومی بغيرجق ضرب ایتمکدن
ایسه، بر مجرمی ضرب و تجزیه ایتمه مک اولی واهونددر. »

زمانمزدده تنظیم قوانین و معاملات ناسی توسیع خصوصنده، اشبو مصلحت
مرسله ایله عمل واستدلالت پک بیوک اهمیتی وارددر. آنکچون بو مسئله یی
بروجه آتی بر بحث مخصوص اولارق توضیح ایتک لازمه دن کورلمشدر. واقعا
یوقاریده، ادله بحثنده بوندنده بحث ایدلمشدی. فقط اوراده مختصرأ بحث
ایدلمش و فقهانک بومسئله حقنده کی نظرو تلیقیری کوسترلمشیدی. بوراده ایسه
مسئله یی اطرافیه تفصیل و علمانک بوابده کی اختلاف افکارینی کوستره جکز.

مصلحت ایله عمل جائز میدر، دکلیدر ؟

بومسئله، الک غامض واک مغلق مسائل اصولیه دنددر. وهنوز صورت قطعیه
و واضحه ده حل ایدلمش دکلدر. اصولیونک بوبحث حقنده نظارلری،
اضطراب ایچنده در. سوزلری بربری طوتمه یور، حنفیلرک اصطلاحلریله

شافعیلر لکی بر برینه قاریشیور . بو صورتله مسئله ، اوילה گرفت وقاریشیق بر
حاله کلمش که ایچندن چیقمق قابل دکل . اصولیونک بوبابده کی نظریاتیه فقهانک
تطبیقات فقهیه موده یکدیگرینه اویمایور . حق عینی ذات اصوله دائر یازدینی
کتابده باشقه ، فقهه دائر قلمه آلدینی ائرده باشقه درلو سویله یور .

مثلا اعظم فقههای شافعیه دن (امام الحرمین) لقبیه شهرت شعار بر عالم
وارد . بو محترم ذات پک بیوک بر عالمدر . زماننده موجود عقلی ونقلی هر
علمده ید طولاً صاحبدر ، استاد کل در . هر علمدن ، متعدد ، مبجلی و فیاض
کتابلری وارد . اصول فقهدهده ، فروع فقهدهده امامدر . حق مجتهد
مطلق درجه سنده قدرت فقهیه مالکدر . محققین مالکیه دن « قرافی » نک
دیدیکی کی ایشه بو بیوک ذات ، یعنی امام الحرمین حضرتلری ، اصول فقهه
دائر تألیف ابتدکی کتابلرنده علی الاطلاق « مصلحت مرسله » ایله عمل
ایتدیکندن طولانی امام مالک علیه پک زیاده هجوم ایتدیکی حالده ، امور حکومت
واداره مملکت حقنده قلمه آلمش اولدینی (غیایه) نامیه معروف کتابلنده
اوילה مسئله لک جواز و مشروعیتنه قائل اولمشدر که مصلحت مرسله ایله عمل
ایدن فقههای مالکیه آنلری تجویزدن پک اوزا قدر .

فقههای ختفیهده بویه در اولرده اصول کتابلرنده « مصلحت مرسله » ایله
عمل جائز دکلدر دیورلرده ، صوکرده فقه کتابلرنده یعنی تطبیقات فقهیهده
اوילה مسئله لک جوازینه حکم ایدیوزلرکه بو حکملر ، مصلحت مرسله ایله
عملدن باشقه برشی دکلدر . مثلاً (مجله) ده مذکور اولان « بیع بالوفا » بی
آله آلام . بو، ماهیتنه نظراً حد ذاتنده نه بیعدر ، نهده رهندر . برکره بیع
دکلدر . چونکه بیعده بایع ، مشتری نک رضای اولقسزین کندیلکنندن بیی
فسخ واقاله ایدمز . بونده ایده بیلیور . رهنده دکلدر . چونکه رهنده دکلدر .
چونکه رهنده مرتهن رهندن انتفاع ایدمز . بیع بالوفاده ایسه ایده بیلیر .
شو حالده بو بیع وفا ، هر ایکی جهندن فاسد و غیر جائز اولق لازم کلیرکن ،
فقههای ختفیه بونی تجویز ایتمشلردر . سبب وعائی ده اقراض و استقراض

خصوصنده ناسك بوكا اولان احتياچيدر. مجله « بخارا اهاليستنده بورج تگش ايتدكده كورولان احتياچ اوزرينه بو معامله، مرعى الاجرا اولمشدر » دييور. بوعلت ايسه، مالكيلرك عامل اولدقلرى « مصاححت مرسله » قاعده سنه تمسكدن باشقه برشى دكلدر .

غريبدر كه بيع بالوفاي تجويز ايدن حنقيلر ، منفعتك مضمون اولمىسنى تجويز ايتمىورلر . وبو صورتله بر چوق حقوقك ضياغه ميدان ويرمش اولو- يورلر. نته كيم وقتيله مجله جمعى، حق وعدلى ناسك احتياچنى اصلا دوشونمىوب صرف بر تعقيب مذهبي اثرى اولق اوزره بواساسى قبول ايتديكندن مجله نك (۵۹۶) نجى ماده سى بواساسه كوره تنظيم ايدلمشدر. بوجهته بوكون اخلاقسز وحيله كار بر ذات ، بو ماده دن بالاستفاده هيچ بر اجرت ويرميه رك اوته كينك بريكينك معدلاستقلال اولمايان خانلرند قرق سنه اقامت ايدمىلير . عليهه آلينان اعلاملر كسب قطعيت ايدمىرك اوتوردىنى خانه دن چيقارلدقجه، برتقريله بلاعقد ومقاوله ديكرينك خانه سنه كيره رك بر مدت ده اوراده اقامت ايدر . خانه صاحبنك ايشى يوقسه وپاره سى ده چوقسه ، عليهه اعلام آلاچم ديه وكيلىرك آرقه سندن محكمه لرده قوشدورسون دورسون .

حنقيلره ، بيع بالوفا جائز اولويورده منفعتك مضمون اولمىسى نهدن جائز اولمايور . و اوكا ناسك احتياچى وارده ، بوكا يوقيدر ؟ ديه بر سؤال ايراد ايديله جك اولسه ، « منفعت مال دكلدر . مال اولمايان برشىئ ايسه مال ايله تضمين ايتك جائز اولماز. چونكه ضمانده مماثلت شرطدر. مان ايله مال اولمايان منفعت آراسنده ايسه مماثلت يوقدر . آنكه چون بز ، منفعت مضمون دكلدر ديدك . طرزنده جواب ويرلر. شافعيلىر صورارسه كز عكسنه جواب آليرسكيز. چونكه اونلره كوره منفعت مالدر . بناءً عليه فقه شافعى يه كوره منفعت ايله مادی حال آراسنده قيمت وماليت اعتباريله مماثلت واردر . آنكه چون هذهب شافعيده منفعت مضموندر .

مالكيلره كانجه، اونلر بويله بر سؤال واستفتا قارشيسنده بويله دولامباچلى

طریقله کینمزله هرشیدن اول «مصلحت بونی اقتضا ایدیورمی، ایتیورمی؟»
 دیه بر سؤال ایراد ایدرله . ایدیور جواجی آلیرلر و بوکا قناعت ایدرلر سه،
 اولوقت مصلحت مرسله قاعده سنه توفیقاً «اويله ایسه جائزدر» جواب وقتواسنی
 ویررله . هیج شبهه یوقدر که حنفیلردن وقتيله «بیع وفا» تک جوازینه فتوی
 ویرن اوفقیه حکیم، بو کون بر حیات اولسه یدی منفعتک مضمون اولاجفنه
 دائره فتوی ویرردی . مجله نك سالف الذکر ماده سیده اوصورتله تحریر
 اولونوردی . کیمسه ده برشی دیغزدی . حال بوکه وقتيله اويله بر فتوی ویرله مش
 اولدینی ایچون، مذهب شافعی به توفیقاً تعدیلنه قیام ایديله جك اولسه، در حال
 حقایق شرعیه دن غافل و صرف بوغلتدن ناشی تعصب مذهبی ذهینتيله متصف
 بر جوق کیمسه لر طرفدن «شرعاً جائز دکلدر .» دینلیور .

صانکه مذهب حنفی شریعتدرده، مذهب شافعی ویا مالکی شریعت دکلش
 کبی . حقیقته ایسه مجرد رأی واجتهاددن عبارت اولان مذاهب فقهیه نك
 هیج بری، شریعت دکلدر . جمله سنك شرع شریفه نسبتی مساویدر . شریعت
 دیه، نصوص شارع ایله ثابت اولان احکامه دینیر . فقها نك رأی واجتهادندن
 تولد ایدن احکام فقهیه یه، دینسه دینسه احکام شرعیه دینیر که شریعته منسوب
 احکام دیمکدر . شریعته منسوب اولمق، عین شریعت اولمق ینه باشقهدر . بونلری
 بر بر بنه قارشیدر ماملیدر .

بو حقیقته بناء در که دولته تنظیم قوانین خصوص سنده مذاهب فقهیه دن
 اقتباس احکام ایديله جکی زمان، تعصب مذهبی به اصلاً لزوم شرعی یوقدر .
 اولردن هانکیسی احتیاج ناسه و مصلحت عصره اوفق ایسه، همان وبلاترد
 اونی ترجیح ایتلیدر . بو صورتله حرکت، شرعاً دهها زیاده شایان قبولدر .
 چونکه یوقاریده بیان ایتشدک که جمهور فقهایه کوره احکام شرعیه مصالح
 عبادیه تابمدر . بناء علیه هانکی مجتهدك رأی وفکری مصلحت ناسه اوفق
 ایسه، آنی ترجیح ایتک حکمت تشریعه و مقصد شارع دهها موافق اولور .
 عکسنه حرکت، معاسر جهل و تعصب دن عبارت اوله جنی کبی، فضله اولارق

معاملات ناسك تضییقی و بالنتیجه خلقك اسلامیتدن تفریخی موجب اولورکه حکمت و مقصد شارع کلیاً منافیدر .

مع هذا بوراده دقت ایدیه جك بر نقطه واردرکه مهملدر . اوده شودر : مصلحتله عمل ایدیه جكم دیه شرعاً بطلان و الفاسی معلوم اولان مصلحت مردوده ایله حامل اولغه قیام ایتمه ملیدر ، بوده دوغرو اولماز . اوته کی تفریط ایسه بوده افراطدر . هر ایکسی ده طریق مستقیم حکمتدن و مقصد شارعدن انحرافدر . آنکچون « مصلحت » نامیه اورتیه بر مسئله وضع ایدلدیکی زمان ، اول امرده آنک حقیقه مصلحت اولوب اولمادیکی ، صوکرده مفسدتدن خالی ویا آکا راجح بولونوب بولونمادیکی تدقیق ایدلک اقتضا ایدر . نیجه مسئله لر و حکملر واردر واولا بیلیرکه ظاهر مصلحت ظن اولونورده ، حقیقه مفسدتدر . یاخود مفسدت مصلحتدن دها بیوک ویا آکا مساوی در .

شبهه یوقدرکه بوکجه مصلحتله عمل ایتک جائز اولماز . چونکه شرعاً معتبر اولان مصلحت ، مفسدتدن کلیاً خالی ویاخود آندن دها بیوک ویا آکا راجح اولان مصلحتدر . اونوتما ملیدرکه بوراده ، یعنی مصلحت ایله عمل بحثنده « مصلحت » تعیرندن مقصود اولان معنی ، خلقدن دفع مفسدت صورتیه مقصود شارعی محافظه در . بو جهتله بر ایش و بر مصلحت ، خلقدن مفسدت و مضرتی دفع ایتمز ویا آندن دها بیوک بر منفعتی جلب ایله مزسه ، اونکله مقصود شارع محافظه ایدلش اولماز . و بناء علیه اونکله عمل جائز اولماز .

خلاصه ، بر مصلحت ایله استدلال معتبر اولمق ایچون شرعاً مردود اولان مصلحتلردن اولما ملیدر . بوده ایکی صورتدن بریله اولور . بری شرعک او مصلحتله اعتباری معلوم اولمق ، دیکری نه اعتباری ، نه ده رد و الفاسی معلوم اولما یوب هر ایکی جهت ده مجهول بولونمقدردر . شرعک بر مصلحتله اعتبار ایتدیکی ایسه ، شریعتده کلی ویا جزئی بر اصل معینک ، بر قاعده شرعیه و بر حکم شرعینک او مصلحتک معتبر اولدیغنه شهادت و دلالت ایتمه سیله معلوم اولور . و بو مصلحتله « مصلحت معتبره » دینیر . شرعک بو صورتله اعتباری معلوم اولما مقله

برابر رد والفاقی ده معلوم اولمایان، یعنی هم اعتباری وهم الفاسی مجهول اولان
مصلحتلرده ده، «مصلحت مرسله» اطلاق اولونور. معلوم الالفا اولان، یعنی
شرعك رد والفاقی بر دلیل شرعی ایله معلوم اولان مصلحتلرده ده، مصلحت
مردوده در. نته کیم یوقاریده تعریف وتوضیح اولونمشدی.

شو ایضاحات، بوصورتله ضبط ایدلدکن صوکره، شمیدی ده علی الاطلاق
مصلحتله عملک نه درجهیه قدر جائز اولاجغنی وعلماء اسلامک بو بایده نقطه
نظرلرینی توضیح وتفصیل ایده لم. «مصلحت» تعیرینی مطلق ذکر ایده جک
اولورساق، «مصلحت معتبره»، مردوده ومرسلهیه شامل اولور. وبوصورتله
صره سیله بونلردن بحث ایتک اقتضا ایدر. او حالد بزدده، او صورتله ایضاح
ایده لم:

— ۱ —

مصلحت معتبره

یوقاریکی ایضاحاتدن آکلاشلمشدرکه بر کره بر مصلحت، مصالح معتبره
عدادینه داخل اولاییلمک ایچون اولا مصلحت صحیحیه اولمسی، یعنی مفسدتدن
خالی ویا آکا راجح بولونمسی، ثانیاً شریعتده کلی ویا جزئی بر اصل معینک،
تعیر دیکرله نص ویا اجماع ایله ثابت بر مسئله شریعه نك او مصلحتك شرعاً
معتبر اولدیغنه دلالت ایتمسی شرطدر. بوایکنجی شرطه «شهادت اصل» دینیر.
ایشته بو شرائطی جامع اولان مصلحت ایله عملک جوازنده شبهه یوقدر.
بتون فقهای اسلام بونده متفقدر «قیاس» ایله عملی تجویز ایتمین فقهای
ظاهریه و علمای امامیه بیله بونوع مصلحت ایله عملی تجویز ایدیورلر. قیاسک
دلیل شرعی اولدیغنی قبول ایدن جمهور فقها ایسه، بونی قیاسه ارجاع
ایدیورلر. چونکه بونوع مصلحتله استدلال ایتک دیمک، حد ذاتنده اونک
اعتبارینه شهادت ایدن اصله قیاس ایتک دیمکدر. هله بو قیل استدلال لاتدن

بعضیاریک قیاسده داخل اولمسی بک ظاهر در . و قیاس جلی انواغنددر .
مثلا سن بلوغه واصل اولمایان بر صغیرک اموالنده بابانک حق ولایتی واردر .
بو اجماع ایله ثابت بر مسئله شرعیه و بر اصل معیندر . علتی یعنی مناط حکمی
چو جفک کندی اموالنی محافظه دن عجزی ، حکمتی ده آنک اموالنی محافظه در .
بو علت و حکمت ایسه مجنونک اموالنده موجوددر .

او حالده بو مسئله ، بو اصل معین ، مجنونک اموالنی محافظه مصلحتک
شرعاً معتبر اولدیغنه شهادت ایدیور دیمکدر . بناء علیه بو مصلحت معتبریه
استناداً « مجنونک اموالنده بابانک حق ولایتی واردر . » دینلیر . ایشته مصلحت
معتبره ایله استدلالده اکثریا جهت قیاس ذکر اولونماز . ظهورینه مبنی عبارده دن
طی اولونور . وشو حالده (قیاس مطوی) دیمک اولور . ایشته کتب فقهیه ده
مذکور تعلیلات فقهیه نک اکثریسی بو قیللندر . یعنی اصل و مقیس علیه
اولان مسئله ، عبارده دن طی اولونوب یالکزه عاتی ذکر اولونان قیاس مطوی
جمله سنددر . افادات مذکوره ، مصلحت معتبریه باشقه بر دلیل شرعی معارض
اولمادینی صورتده در .

فقط عجیباً مصلحت معتبره ، باشقه بر قیاس و یا نص کبی بر دلیل شرعی
ایله تعارض ایدمک اولورسه ، ینه او مصلحت ایله می عمل ایدلمیدر؟ یوقسه
آرتق او مصلحته التیات اولونمایوب قیاس و یا نصک مقتضاسنه کوره حرکت
ایتمک می اقتضا ایدر ؟ ..

ایشته اصل حلی مطلوب اولان مسئله بودر . بوکا دفعه صورت مطلقه ده
مثبت و یا منفی جواب ویرمک دوزرو اولاماز . بوکا دوزرو بر جواب ویره .
بیلیمک ایچون مصلحتک درجه قوتی تدقیق و بناء علیه مسئله بی تفصیل ایتیمک
اقتضا ایدر . یوقاریده مقاصد شارعک نلردن عبارت اولدیغنی و مقاصد و مصالح
ضروریه ، حاجیه و تحسینییه نامرلیله اوچ قسمه ، اوچ درجهیه آیرلدیغنی ایضاح
ایتمش ، براز اولده بوراده یعنی (مصلحتله عمل) بحثنده کی « مصلحت »
تعبیردن مقصد شرعی محافظه معناسی مراد ایدلدیکنی سویله مشدم . ایشته

موضوع بخشمز اولان مسئله حقیقه جواب ویره بیللمک ایچون اول امرده بو تقسیمی ، بو جهتلری پیش تأمله آلمق مقتضیدر .

شو حالده بر کره بش ماده دن عبارت اولان مقاصد ضروریه بی محافظه یعنی نفسی ، مالی ، عرض ونسبی ، دینی وعقلی محافظه معاسنه اولان مصلحت ایله عمل ، ضروریدر . چونکه بو نوع مصلحت ، حد ضرورته بالغ اولمش دیمکدر . یوقاریده (رخصت) بخشنده کورمشدک که شرع شریف ، تخفیف احکامده وعمرماتی استباحه خصوصنده ضرورته اعتبار ایتمش و آئی الک بیوک معذرت شرعیه اولارق قبول ایله مشدر . فقها ، موارد نصوصی برر برر تدقیق وتبع ایده رک بر چوقلرنده شارعک ضرورته اعتبار ایله دیکنی ، یعنی رخص و تخفیفاتی ضرورت اوزرینه بنا ایتدیکنی کورمشلر وبوندن [ضرورتلر ممنوع اولان شیلری مباح قیلار] قاعده سفی استخراج ایله مشلردر .

ایشته بر جوق نصوص شرعیه ومسائل اصلیه نک شهادتیه نایت اولدینی اوزره بو نوع مصلحت ، شرعاً مقبر اولان مصلحتلرک باشنده اخذ موقع ایتمشدر . آنکچون مصلحت ضروریه ، علی العاده قیاس ایله تعارض ایتدکده قیاسه تقدیم وترجیح اولونه جفی کبی ، نص ایله تعارض ایتدکده دخی بطریق التخصیص نصده تقدیم اولونور . یعنی نصک شمول حکمندن بو مصلحت ضروریه نک مقتضاسی اخراج واستثنا ایدیلیر . و آرتق نصک حکمی آندن ماعداسنه تخصیص اولونور . نته کیم آچلقدن تلف اولمه درجه سنه کلش اولان بر کیمسه نک لاشه بی اکل ایتمه سی کبی که بونک جوازی ، حسب الضروره وتخصیص طریقله « لاشه نک اکل حرام اولمه سی ، حکم عامندن اخراج واستثنا ایدلمشدر .

اخطار — بر دلیل عام ایله دیکر بر دلیل خاص قارشیلانلاقده ، دلیل عامدن دلیل خاصک مقتضاسی اولان حکم خاصدن ماعداسی مراد اولونور .

واودلیل عامک حکمی ، حکم خاصک ماعداسنه تخصیص ایدیلیر . بوبر اصول قاعده سیدر . وبوکا علم اصول فقه اصطلاحنجه « تخصیص » طلاق اولونورکه آشاغیده بحث مخصوصنده تفصیلاً ایضاح اولونه جقدر ...

مصلحت حاجیه ایله مصلحت تحسینییه کلنجه : امام غزالی ، (المستصفی) نامیله معروف اولان کتابنده [بر اصل شرعی بوکبی مصلحتلری تأیید ایتدیکجه مجرد بونلرله حکم و عمل ایتک جائز اولماز ، مکرکه ضرورت درجه سنه تابع اولالر .] دییور . شبهه یوقدرکه غزالی نیک بوسوزی ، قیاس جلی ویا بر نص قطعی ایله تعارض ایدن مصالح احتیاجیه و تحسینییه حقنده در . چونکه قیاسه ویا نصه معارض اولمایان بو قیل مصلحتلر عمل جائز وبلکده لازمدر . زیرا مقصود شاری محافظه در .

فقهایی حنفیه ، بویابدهدها مساعد حرکت ایدرک [حاجت عمومی اولسون ، خصوصی اولسون ضرورت منزله سنه تنزیل اولنور .] دیمشلروبونی ، بر قاعده فقهیه اولق اوزره وضع ایدرک اوزرینه بر جوق احکام تفریع ایله . مشلردر . از جمله بیع بالوفا ، مزارعه و مساقات کبی عقودک جوازی ، هپ بوقاعده اوزرینه متفرعدر . اصول شافعیه دن (جمع الجوامع) نام کتاب معتبرده بیان اولوندینی وجهله محققین شافعیه ده ، [مشقت ، تبشیری جلب ایدر .] قاعده سنی ، علم فک مبنی علیهلری اولان بش قاعده دن بری عد ایتشلردر . نته کیم یوقاریده « ادله تالیه » بحثنده ایضاح اولونمشدی .

شو حالده مصلحت حاجیه ، قیاس ایله قارشیللاشه جنی اولور ایسه ، قیاسک حکمی ترک ایدیلرک اومصلحت ایله عمل اولونور . چونکه بوسورت حرکت ، مقصد شاری دهها زیاده محافظه ایتمش اولور . بوکا غزالی ده موافقت ایدر . بو بویله اولدینی کبی ، شاید مصلحت حاجیه یعنی ناسک بر شیئه احتیاجی ، ضرورت درجه سنده ویا اکا قریب بر صورتده شدید اولور ایسه ، اولوقت مصلحت مذکوره ضرورت حکمی اخذ ایدر . وبوتقدیرده آکا معارض

اولان نصه دخی ، بطریق التخصیص تقدیم اولونور . بونده اختلاف یوقدر .
بالجمله مذاهب اربعه فقهای بونده متفقدر . امام غزالی نك سالف الذکر کلامی
دخی بوکا منافی دکلدر .

مصلحت مردوده — یوقاریده جمهور فقهایه کوره اویله شرعاً معلوم
الاعمال اولان مصلحت مردوده ایله عملک جائز اولمایه جغفی ذکر ایتمشدک .
مثال اولق اوزرده وقتیلہ « اندلس » ده کی دولت امویہ حکمدارلرندن « عبد
الرحمن مراتی » نك کفارت صوم حقنده وقوع بولان استفتای اوزرینه ،
ائمه مالکیده دن امام « یحیی بن یحیی » طرفندن مشار الیه عبدالرحمانك آلتش
کون اوروج طوتمه سی وجوبنه دائر ویریلن فتوای نقل وایراد ایله مشدک .
بزهیچ ظن ایتمه یزکه شرعاً بطلانی صورت قطعیه ده مجزوم اولان بر مصلحت
مردوده ایله عملک جوازینه ذاهب اولاجق بر فقیه بولونه بیلسین . مثلاً خلق
زحمنه صوقامق ویا خود افرادك حظوظ واذواقی اوقشامق ایچون بلامعذرت
نماز قیلماق ، اوروج طوتمامق ویا شراب ایچمک جائزدر دییه جک بر عالم تصور
اولوناماز . بومصلحت دکل ، مفسددر . حال بویله ایکن مشار الیه امام « یحیی » نك
اویولده فتوی ویرمه سی ، اونك مصلحت مردوده اولدیغنی قبول ایتمه یوب
بالعکس مصلحت معتبره ویا مرسله قیلندن اولدیغنه ذاهب اولمہ سندندر . فی الحقیقه
بعض مصلحتلر اولورکه اونك نوعی ، مصلحت مردوده می ، یوقسه مصلحت
مقبوله می اولدیغنی تعیین ایتمک ، قولای دکلدر . خفای حسیلله اجتهاده ،
آکلایشه کوره دیکشیر ، شرع شریف ، نه کی مصلحتلرک مصالح مردوده دن
اولدیغنی ، هانکیلرینك معتبر بولوندیغنی صراحة بیان و تعیین ایتمه مشدر .
آنك ایچوندرکه علمای اصول ، مصلحت مرسله ایله استدلالک جوازنده اختلاف
ایتمشدر . شمیدی ده اونی بیان ایده لم .

مصلحت مرسله ایله استدلال

مصلحت مرسله — یوقاریده ده تعریف ایتشدک . «مصلحت مرسله» دبه، شرعاً اعتبار والفاقی مجهول اولان مصلحته دینیر . شو تعریفدن آکلا- شیلیورکه بونوع مصلحتک شرعاً معتبر اولدینی معلوم اولمادیفی کبی، باطل وملنی اولدینی ده معلوم دکلدر. چونکه نص ویا اجماع ایله ثابت احکام شرعیه میاننده کلی ویا جزئی براصل ، بونک اعتبارینه شهادت ایتدیکی کبی ، بطلاننه دلالت ایده جک بر دلیل شرعی ده یوقدر . شریعت آنک حقنده سا کتندر. آنکچون شرعاً معتبر ویا مردود اولوب اولمادیفی مجهولدر .

ایشته بو «مصلحت مرسله» ایله عمل جائزیدر ، دکلدر ؟ جائز ایسه نه درجه یه قدر جائزدر ؟ بو، مذاهب مختلفه یه منسوب علمای اصول عندنده مختلف فیه بر مسئله در . وعلمانک بومسئله حقنده کی سوزلری پک مضطربدره بوده ، کندیلرینک منسوب اولدقلری مذهب مؤسسلرینک بو مسئله حقنده کی نقطه نظرلری ، صریح وقطعی بر صورتده آ کلاشیله مامسندن نشأت ایتشددر . زمانمژده ایسه بو اساس فقہینک پک بیوک اهمیتی واردر . آنکچون مذاهب اربعه یه منسوب علمانک بوباده کی فکرلرینی آیری آیری ذکر ایتمکی مناسب کوردک .

بر کره باشلرنده امام مالک حضرتلری اولدینی حالده فقهای مالکیه عندنده اشبو «مصلحت مرسله» ، قیاس کبی احتجاجه صالح بر دلیل شرعی ، بر اساس فقہیدر . اثبات احکام خصوصنده آنکله احتجاج اولونور . حتی بعضاً وبلکده اکثریا قیاسه ترجیح ایدیلیر . کرچه «ابن حاجب» و «قرطبی» کبی بعض علماء مالکیه ، بونک مذهب مالکیده مختار اولمادیفی ادعا ایدیور . فقط بو ادعا دوضرو دکلدر . بو آنجق اونلرک کندی فکرلریدر . و تحقیقه مستند دکلدر . چونکه فقهای مالکیه نک ال بیوکلرندن اولان امام «ابوبکر

العربی ، نك (احكام القرآن) نامنده كى كتاب مبعجلنده صراحت قطعيه واردر .
 و امام مالكة كوره نصوص عامه مصلحت مرسله ايله تخصيص اولونور . دييور .
 وبوكا (استحسن) اطلاق ايديور .

مشاراليه ، مذهب مالكيته مجتهد منتسب طبقه سنه داخل اولان ائمه
 مالكيه دندز . و علمآده ، زمانآده ابن حاجب ايله قرطبي دن اقدمدر . مشاراليه
 ابوبكر ابن العربي ، مصلحت مرسله نك مذهب مالكيده بوجه معروض بر حجت
 شرعيه اولديغي بيان ايتدكن صوكره [ولم يفهم الشريعة من لم يحكم بالمصلحة =
 مصلحته حكم ايتين ، شريعتي آ كلامشدر .] دييور . [احكام القرآن له
 جلد اول ، صفحه ۳۱۱] .

كذا فحول فقهای مالكيه دن شاطبي نك (الموافقات) نده و محقق قرافي نك
 (تنقيح الفصول) نده مذهب مالكيده مصلحت مرسله نك حجت شرعيه اولديغي
 مصرحدر . مذهب حنبليده ده بويلدر . يعنى فقهای حنبليه عندنده ده مصلحت
 مرسله قياسه راجح دليل شرعيدر .

غزالي و فخر رازي كبي اصوليون شافعيه نك اكثريسي ، اشعري مسلك
 فلسفينه سالك اولدقلري ايجون اونلر ، مصلحت مرسله نك احتجاجه صالح
 براساس شرعى اولمى سنى قبول ايتيورلر . يوقاريدى كورمشدك كه اشعريلر ،
 تشريع احكامده حكمت و مصلحتك عليتنى انكار ايدرلر . آنكه چون اونلرك
 بونظريه لرينه كوره مصلحت مرسله نك حجتني انكار ايتملري لازم كلير . فقط
 عجبا فقهای شافعيه نك رئيسلري اولان امام شافعي حضرتلري ده ، بوفكرده ميدور ؟
 بوراسي ايجي آ كلاشيلاميور . افاخم فقهای شافعيه دن يوقاريدى اسمي كچن
 امام الحرمين ، [مصلحت مرسله ، مصالح معتبره يه شبيه و ملايم اولور ايسه ،
 اولوقت امام شافعي ايله ائمه حنفيه نك اكثريسي عندنده مابه الاحتجاج بر حجتدر ،
 ديمش ، كنديسي ده بو فكري اختيار ايله مشدور .] كذا في ارشاد الفحول
 و جمع الجوامع [

امام غزالي ، (المستصفي) سنده مصلحت مرسله نك احتجاجه صالح دليل

شرعی اولایلمه بی ایچون اوچ شرط در میان ایدیور. بری ضرورت، دیگری کلیت، اوچنجیسی ده قطعیت در. بناء علیه «مصلحت مرسله ضروری، کلی یعنی عمومی و قطعی اولدینی صورتده حجت اولور، دیور. وطن غالب ایله مظنون اولدینی ده قطعیت الحاق ایدیور. مشهور تفسیر صاحبی قاضی بیضاوی ده عام اصوله تألیف ایتیش اولوینی (منهاج) نده غزالی نك بوفکرینی التزام ایله یور. لکن بو صورتده او مصلحت، آرتق مصلحت مرسله اولمقدن چیقوب یوقاریده ایضاح اولونان مصالح معتبره عدادینه داخل اولور. چونکه مادام که او مصلحت، ضرورت صفتی اکتساب ایتشدر، شبهه سز او آرتق مصالح معتبره جمله سندن اولمشدر. حتی مصالح معتبره نك برنجی درجه سنی اشغال ایدن مصالح ضروریه میانه داخل اولمش دیمکدر. آنک ایچون او شرائطی جامع اولان مرهانیکی مصلحتله عمل آرتق واجب اولور. و اوکا مصلحت مرسله دینیز. [کذا فی جمع الجوامع]

مذهب حنفی به کتبیجه: مدقق شهر ابن همامک (تحریر) نده و (مسلم الثبوت) ده بیان اولوندینی وجهله مصالح معتبره به شبیه و ملایم اولان مصلحت مرسله، فقهای حنفیه عندنده حجت شرعیه در. آنکله عمل صحیح اولور. علم اصول اصطلاحنده بو کبی مصلحتله (مرسل ملایم) اطلاق اولونور. آنفاً ذکر اولوندینی اوزره اثمه شافعیه دن امام الحرمینک قبول ایتدیکی و امام شافعیدن قبولی نقل ایله دیکی مصلحت، ایشه بو نوع مصلحتدر.

بو «مرسل ملایم» دینیلن مصلحت ایله مالکیلرک قبول ایتدیکی «مصلحت مرسله» آراسنده ایجه فرق وارد. مالکیلرک مصلحت مرسله سنه علم اصول اصطلاحنده (مرسل غریب) تسمیه ایدیلیر. برفقیه طرفندن بر حکم شرعی به علت و مناط اتخاذ اولونان بر مصلحت، او حکمله برلکده بر اصل معینه یعنی شرعاً منصوص اولان بر مسئله معینه ده ثابت اولماقله برابر، نظر شرعه اونک الفاسی معلوم اولماز و عین زمانده او علت و مصلحتک جنسی و یا عینی، جنس حکمده و یا خود جنسی عین حکمده شرعاً اعتبار ایدلمش اولدینی معلوم

اولور ایسه ، او علت و مصلحت «مرسل ملایم» اطلاق اولونور. بواعتبارادن هیچ بری معلوم اولماز ایسه اولوقت «مرسل غریب» تسمیه ایدیلیر .
 شو ایضاخن آ کلاشیایورکه مصلحت مرسله ، ایکی نوعدر، بر مرسل ملایم ، دیگری مرسل غریبدر . برنجیسنه «ملایم» دیمه سی یوقاریده کجن مصالح مقبره یه شبیه و ملایم اولم سندنذر . ایکنجیسنه «غریب» دنیلمه سی ده اعتبارات شاردن تباعد ایتمه سی حسیله حاصل اولان غرابتندذر . مع هذا عندالاطلاق «مصلحت مرسله» تعیرندن اکثریا مرسل غریب دینیلن ایکنجی نوع مصلحت مرسله مراد اولونور .

ایشته بوایکنجی نوع مصلحت مرسله ، مالکیلرایله حنبیلر عندنده احتجاجه . صالح حجتدر . فقط صنفیلرله شافیلر عندنده حجت دکلدرد . اصول فقه کتابلرنده بیان اولوندیغنه کوره حنفیلرله بر قسم محققین شافیه ، یالکز برنجی نوع مصلحت مرسله یی ، یعنی مرسل ملایمی احتجاجه صالح حجت عد ایدیورلر . لکن مالکیلرله حنبیلرله قبول ایتدکلیر ایکنجی نوع مصلحت مرسله یی - که اصل مصلحت مرسله اودر - احتجاجه صالح عد ایتیهورلر . و بو نقطه ده اولردن آریلیورلر .

شوراسی ده عرض ایدیم که حنفیلر ، احتجاجه صالح عد ایتدکلیر «مرسل ملایم» بر قسمی قیاسه الحاق ایدیورلرده ، اوکا «قیاس» دییورلر . دیگر قسمته ده «رأی ایله ثابت علت شرعیه ایله تعلیل» دییورلر . شویله که شرع شریفده او مرسل ملایمک عینی و یا جنسی عین حکمده اعتبار ایدلمش ایسه بو قیاسدر . چونکه بو صورتده عین علت ، کندیسنده موجود و بناء علیه مقیس علیه اولایله جک بر اصل معین وار دیمکدر . یوقا کر او مرسل ملایمک عینی و یا جنسی جنس حکمده اعتبار ایدلمش ایسه بو قسم مرسل ملایم ایله احتجاج ، قیاس دکلدرد . بلکه رأی ایله ثابت علت شرعیه ایله تعلیل مجرددن عبارتدر . بو صورتده بو علت و مصلحت ، نص شرعی «تزله سنده اولور . و بناء علیه اوزرینه قیاس ایدیله جک بر اصل منصوصه ، بر مقیس علیه

احتیاج من ایتمز. مع هذا شمس الائمة نمرخی و فخر الاسلام بزدوی گبی بعض
ائمة اصول، بو قسم مرسل ملایم ایله احتجاجی ده قیاسه ارجاع ایدیورلر.
ویوقاریده بیان ایتدیکمز قیاس مطوی نوعندن عد ایله یورلر. [کذافی التحریر
ومسلم الثبوت]

نظریات اصولیه جه بو، بویه ایسه ده تطبیقاتده بویه دکدر. کتب فقهیه
تدقیق وتبیع اولوتورسه کورولورکه فقها، احکام فقهیه بی حادثات وواقعه
تطبیق خصوصنده مصلحت مرسله نک شو ذکر اولونان ایکی نوعی تفریق
ایتمه یورلر. بعضاً مالکیلرک عمل ایتدکاری ایکنجی نوع مصلحت مرسله بی ده
نظر اعتباره آلیورلر. کچن سنه کی درسلرده، (ادله) بختنده تفصیلاً ایضاح
ایتمشدک که فقهای حنفیه، بوکی مصلحتلرله احتجاجه (استحسان) اطلاق
ایدلر واستحسانی، [ترك القیاس والاخذ بما هو اوفق للناس = قیاسی ترك
ایله ناسه اوفق اولانی اختیار ایتدکدر.] دیه تعریف ایدیورلر. مالکیلرک
هجت عد ایتدکاری مصلحت مرسله، یعنی مرسل غریب ایله عمل ایسه، بعضاً
معاملات ناسه اوفق اولابیلیر. استحسانک ذکر اولونان تعریفی مطلق اولدینی
ایچون بوکاده شاملدر.

بونک ایچوندکرکه محقق قرافی، (تنقیح الفصول) نده [مصلحت مرسله
ایله عمل ایتمک، مذاهب مالکینک خصائصندن اولق اوزره اشتهار ایتش ایسه ده
بودوضرو دکدر. لدی التحقیق عموم مذاهب فقهیه ده بونکله عمل ایدلمکده در]
دیور. اعظم فقهای شافعیه دن امام «ابن دقیق العید» و محققین اصولیوندن
«زرکشی» ده، قرافی نک بو سوزینی تصدیق وتأیید ایدیورلر. مشار الیه
ابن دقیق، [بن اصل مصالح ایله عمل ایدن ذاتک علیهنده بولونمام. لکن
مصالح مرسله ایله عمل خصوصنده توسع وآنک حقیقتنی تحقیق، نظر سدیده
محتاجدر. اولابیلیرکه بعضاً مصلحتله عامل اولایم دیرکن، بتون بتون حدی
تجاوز ایدلمش، مسئله چیغرندن چیقارلمش اولور. شهادت کاذبه به وضع امضادن
منع ایتمک مصلحتنه مبنی بر بالانجی شاهدک پارمقارینی کسمک، جائز اولوب

اولمیه جفی حقه به بعض احکام بمله استشاره ایشدی . بوکی شیر دین اسلامده
منکرات عظیمه دندور . و مسلمینه اذاده واسترسال وتوسع قیحدور . [دیور .
[کذا فی ارشاد الفحول]

(جمع الجوام) ده بیان اولوندینی وجهله بر قسم علمای اصولده ، مصاحت
مرسله نك عباداتده احتجاجة صالح بر دلیل اولامیه جفی بالیان عباداتدن ماعدا
عقود و معاملاتده ، 'خلقك بر لرله مناسباتنده و عقوباتده مابه الاحتجاج بر
حجت شرعیه اولدیغنه قائل اولمشلردور . دیورلرکه « عبادات شارعك حقی در .
بونده مصاحت جهتی نظر اعتباره آلتاز . فقط معاملات و عقوبات اوله دکلدر
بونلرده مصاحت رعایت اولونمق لازمه دندور . چونکه بوکی احکام ، مصاحت
تابدور . محققین حنبلیه دن علامه نجم الدین طوفی بوفکره ذاهب اولاندردندور .

تأیید مقام و تدبیر دلائل

شو تفصیلات تأیید ایدیلنجه شو نتیجه حاصل اولورکه اعتبار و الفاسنه
بر دلیل شرعی دلالت ایتمین (مصاحت مرسله) نك قیاس کی ادله شرعیه دن
اولوب اولمادیغنه علمای اصول ، ایکی قسمه ایرلشلردور . بر قسمی ادله
شرعیه دن اولمادیغنه قائل اولمشلر ، دیگر قسمی ده بالعکس ادله شرعیه دن
اولدیغنه ذاهب اولمشلردور .

برنجی قسم اشعریلرله آنلرک فکرینه پیرو اولاندردور . بونلر ، اساساً
احکام شرعیه ده حکمت و مصاحتك علت و اثره اولدیغنی انکار ایتدکاری ایچون
یا لکن مصاحت مرسله نك دکل ، یوقاریده بیان اولونان مصالح احتیاجیه نك
یعنی « احتیاج ناس » قضیه سنك بیه احتجاجة صالح بر حجت اولدیغنی انکار
ایدیورلر ، دیورلرکه « بر شیتك شرعاً اثبات احکامده دلیل اولایلمه سی
ایچون شرع شریفك اوکا اعتبار ایتدیکنه دلالت ایدن بر دلیل شرعی بولونمه لیدور .
مصاحت مرسله نك نظر شارعده معتبر اولدیغنه دلالت ایده جك اوله بر دلیل

شرعی یوقدر . ذنناً بو، اونك ماهیتی اقتضاسندندر. چوانكه مصلحت مرسله، شرعاً اعتبار والغاسی معلوم اولمایان مصلحتدر . مکرکه بو نوع مصلحت ، ضرورت درجه سنه ارتقا ایتش اولسون . اولوقت احتیاجه صالح مصلح معتبردن اولور . زیرا شرع شریف ، تشریع احکامده ضرورته اعتبار ایتشددر .

مصلحت مرسله نك ادله شرعی دن معدود بر دلیل وبر اساس شرعی اولدیغنه قائل اولاندرد، بو ادعایینی اثبات ضمنتده دییورلرکه: « علی العموم ادیان وشرایع وبتخصیص شریعت اسلامیه تتبع واستقرا اولونورسه کورولورکه جناب شارع ، شریعتلری آنجاق مصلح عبادی تحصیل ایچون وضع ایتش ومجرد بو مقصدله پیغمبرلر کوندرمشدر . بناء علیه هر نه زمان بر مسئلهده بر مصلحت تحفق ایدرسه او مصلحتك مطلوب شارع اولدیغنه ظن غالب حاصل اولور . بر مجتهد وبر فقیهك احکام شرعیه استخراجنده استناد ایتدیکی دلیل ایسه هریرده آنجق بو ظن غالبدن عبارتدر . مجتهدك وظیفه سی ده بودر. یعنی احکام شرعیه یه ظن غالب حاصل ایتمکدر . زیرا اساساً اجتهاد ، هرهانکی بر مسئلهده حکم شرعی نك نه اولاییله جکمه غلبه ظن حصوله کتیرمکه چالشمقندن باشقه بر شی دکلدر .

صحابه کرام حضرت ائسك بو بابده کی طرز حرکتلری ده، مصلحت مرسله نك مابه العمل حجت اولدیغنی تأکید وتأییدایدن دلائلنددر. چونکه خلفاء راشدین کی اکابر اصحاب ، بر طاقم ایشلری مجرد مصلحته بناء ایفا ایتشلردر. یوقسه اونلرک شرعاً اعتبارینه شهادت ایدن بر شاهد اصلی ، بر دلیل معین شرعی بولوندیغندن طولایی دکل . مثلاً ارنحال نبویدن صوکره مصحف شریفك ترتیب وتحریر ایدلمه سی ، حضرت ابو بکرک جناب عمری ولی عهد تعیین ایتمه سی، حضرت عمرکده امر خلافتی (شوری) یه حواله ایللمه سی، حبس خانه آنخاذا ایتمه سی، حضرت عثمانك مسجد نبوی پی توسیع مقصدیله اطرافنده بولونان اوقفی هدم ایللمه سی وسکه ضرب ایدلمه سی کی بر چوق ایشلرکه حضرت پیغمبر

زماننده بونلرك نظیری تقدم ایتمه مش ایدی. [کذا فی تنقیح الفصول للقرافی]
 محققین حنبلیه دن ابن قیم جوزیه نك (اعلام الموقعین) نده تفصیلاً بیان
 اولوندینی اوزره حضرت عمر ك بو قیلل اجتهاد واجرا آنی پك چوقدر .
 از جمله جناب پیغمبر و ابو بكر زمانلرنده بر آغزیدن طلاق ثلاثه ایله تطلیق
 ایتك طلاق واحد عد اولوندینی حالده حضرت عمر ، کندی ایام خلافتنده
 خاقي بلا سبب صحیح زوجه لرینی تطلیقیدن منع و زجر مقصدیله بویه دفعه بر
 آغزیدن و طلاق ثلاثه قیدیه واقع اولان طلاقلری ، حقیقه طلاق ثلاثه برینه
 کجه جکفی اجتهاد و قضات وولاته او صورته امر و اراده ایتمش ایدی. کذا
 دور رسالته و عهد ابو بكرده (ام ولد) اولان جاریه لر آیینوب ساتیلیر
 ایکن جناب عمر ، کندی عهد خلافتنده ام ولدلرك بیع و شرافی منع ایدی .
 بالآخره بر چوق فقها ده بوا یکی مسئله ده مشارالیه ك اجتهادی وجهله فتوی ویردیلر .
 بعضیلری ده عهد رسالت و ابو بكرده جاری اولدینی کبی فتوی ویرمشلردر .
 کذا حضرت عمر ، (نصر بن حجاج) اسمنده فوق العاده حسن و جماله
 مالک اولان بر کنجی ، کندی طرفندن هیچ سبیت ویرلمش اولدینی حالده
 مجرد قادینلر آراسنده ایقاع فتنیه وسیله اولماسی مقصدیله باشی تراش ایده رك
 مدینه دن نفی و تبعید ایتمش ، میخانه انخا ذ اولونان بر دکانی و حتی اهالیسی
 شرب خمر ایله مألوف اولان بر کوبی کاملاً احراق ایله مش ایدی . حضرت
 امام علی ده ، فعل شیع لو اظه ی ارتکاب ایدن بر شخصی یوکسك بر تپه دن
 باش آشاغی آتدیرمش ایدی . ایشته بو و بو کبی اجرا آتک جمله سی ، مصلحت
 مرسله ایله عملدن باشقا بر شی دکلدر . هیچ برینك عهد رسالت پناهیده مقیدس
 عایه اولاجق مثل و نظیری سبق ایتمه مشدر . حضرت عثمانك دیگر مصاحف
 شریفه یی یا قدر ماسی ده بو قیلدندر .

بعضیلری ، بوکا جواب اولوق اوزره « بو کبی افعال واجرا آت ، ایجابات
 سیاسیه دندر ، دیه رك طرق حکمی شریعت و سیاست ناملریله ایکی به تقسیم
 ایتمشلر . سالف الذکر ابن قیم ، بونی اصلا قبول ایتمه یور . دیور که [بو

تقسیم ، بعضیاریزک دینی شریعت و حقیقت ناملریله ، دیگرلریزک دده کذا دینی عقل و نقل ناملریله ایکی به تفریق ایتمه لریته بکزره . حالبوکه بو تقسیماتک کافه سی باطلدر . حقیقتده ایسه سیاست ، حقیقت ، طریقت و عقل دینیلن شریلر ، صحیح و فاسد اولمق اوزره ایکی قسمه آریلیرلر . بناء علیه بونلرک صحیح اولان قسمی ، اقسام شریعتدن بر قسمدر . یوقسه شریعتک قسیمی یعنی مقابلی وضدی دکلدر . اونلرک فاسد اولان قسمیدرکه شریعتک وضدی و مقابیلدر . مشار الیه ابن قیم ، (سیاست) ی — اعظم فقهای حنبلیه دن « ابن عقیل » دن نقلاً — شو صورتله تعریف ایدیور : « سیاست ، اوله احکام و افعالدرکه آنکله خلق ، صلاحه دها زیاده تقرب و فساددن دها زیاده تباعد ایدر ولوکه شریعتده او احکام و افعال نشریع ایدلمش اولماسون » .

مشار الیه ، سیاستک شو تعریفنه دائر بعض ایضاحات ویردکن صوکره دییورکه [جناب حق ، آنجق انسانلرک عدل و حق ایله قائم اولملری ایچون پیغمبرلر ارسال و کتب سماویه انزال بیورمشدر . بناء علیه هر هانکی بر طریق ایله امارات حق ظاهر و ادله عدل قائم اولور ایسه ، شهسز او طریق ، جناب حقک دین و شریعتیدر و اصر و رضاسنک مقتضاسیدر . جناب شارع طرق و ادله عدلی بر نوع مخصوصه حصر ایله آندن اقوی و اظهر اولان دیگر طریقاری ابطال ایتمه مشدر . بلکه وضع و تشریع بیوردینی طریق ایله مقصود الهیدسنک عدل و حق اقامه دن و بناء علیه ناسک عدل ایله قیامندن عبارت اولدیفی تبیین بیورمشدر . آنکچون هر هانکی بر طریق ایله حق استخراج و معرفت عدالت استحصال اولونورسه ، آرتق او طریقک مقتضاسیله حکم ایتک واجب اولور . طرق احکام اسباب و وسائلدر ، لذاتها مقصود دکلدر . اصل مقصود اولان اونلرک غایه لریدرکه مقاصد شارعده آنجق او غایه لردر .]

[کذا فی اعلام الموقعین ، جلد ثانی ، صیفه ۳۱۲ و ۳۱۳]

حنبلیرک الک بیوک مدقفلرندن اولان نجم الدین طوفی ده ، بو یولده بیان مطالبه ایتدکن و بر جوق نصوص قرآنیه ایله استشهاد ایله دکن صوکره

دیور که [شو دلائل و مطالعات منقسم اولویور که عبادات خارجنده قالان عادات ، معاملات و عقوباتده مصلحتہ رعایت ، اجماعدن دها قوتلی بر دلیل شرعیدر . آنک ایچوندر که ظاهریہ و بعض معتزله کجی قیاس و اجماعک دلیل شرعی اوله سنی قبول ایتمین بر قسم علماء اسلام ، مصلحتک اثبات احکامده حجت شرعیہ اولدیغنی قبول ایتملردر . بوجهتله هر نه وقت مصلحت ایله اجماع و یا نص تعارض ایدرسه ، مصلحت تقدیم اولونور و بناءً علیه آرتق اجماع و یا نصک مقتضاسی ترک ایدیله رک مصلحت ایله عمل اولونمق لازم کلیر .

مقام اعتراضده دینیلیرسه که سزک بوبابده کی مذهبک سزک حاصلی ، ادله شرعی و از جمله نصوص شرعیہ بی تعطیلدر . جواباً دیرز که « هذا وهم واعتناء من تأم بعد الانباء » بو ، اریقوده بولونان بر ذاتک بعد الانباء وهم و اشتباهیدر . بزم بو خصوصده کی مذهبمیز ، بر دلیل شرعی به اوندن دها قوتلی اولان بر دلیلی تقدیمدن باشقه برشی دکلدرد . ناصل که سزده اجماعی نصه تقدیم ایدیور سکز . بوندن نصوصی تعطیل لازم کلیورده ، مصلحتی تقدیمدن نه دن لازم کلیور ؟ [مشار الیه دیمک ایسته یور که نصوص شرعیہ نک تخصیص و تأویل احتمالی وارد . قضیتی تحقق ایدن مصلحتده ایسه او یله بر احتمال یوقدر . بوجهتله مصلحتی نصوصه تقدیم ایتمک دیمک ، نصوصک عموم و شمولی تخصیص و مقتضاسی بطریق التأویل بیان ایتمک دیمکدر . بو ایسه تعطیل دکل ، تبییندر . نته کیم بوجهتی ، بک آوزون سورن مطالعاتی آراسنده تصریح ایدیور .

مشار الیه نجم الدین طوفی ، بو سوزلری سویله دکدن سوکرده شو یوله اداره کلام ایدیور : [جناب حق ، کندی مصالحمزی بیلمک ایچون بزه بر طریق مخصوص خاق و احسان بیور مشدر . بناءً علیه مصلحتہ طریق موصل اولوب اولمانه احتمالی بولونان بر امره مبهم ایچون ، بز او طریق معرفتی ترک ایتمیز] . [کذا فی رساله « المصالح المرسله »]

باق ، بر کره شو حریت کلامه ۱۱۱ . و برده زمانم زده کی جهل و تعصبه باق ۱۱۱ . مشار الیه فقهای حنبلیه نک ال بیوکلرنددر . بغداد ایدر . (طوفی)

بغداد کویلوندن برکویک اسمیدر . (۷۱۶) تاریخنده قدسده وفات ایتشدرد . علوم متنوعده واز جمله علم تفسیر و علم اصولده امامدر ، استاد گلدر . بر کتبجانه تشکیل ایده جک قدریک قیمتی آثار علمییه سی واردر . بعض اصولیون مشار الیه نجم الدین طوفی بی علم اصولده بر مذهب مخصوص صاحبی کبار ائمهدن عد ایتشدرد . اعظم اسلاف آراسنده یویله حریت افکاره و مطالعات حکیمانه یه یک چوق تصادف ایدلیدیکی حالده مع التأسف زمانمز علماسی آره سنده اصلا تصادف ایدیلهمیور . صانکه عصر مز علم عصری ، حکمت و معرفت عصری اولاجق . . . بوکون برکیمسه ، آثار اسلافدن استنهاد ایتکسزین صرف کندی مطالعات مدله سنه استناداً یویله بر فکر در میان ایده جک اولسه در حال شرعاً جائز دکلدر . « زمزمه سیله قیامت قویار ! حالبوکه اسلافک کندی زمانلرنده تجویز ایتدکلری برشی ، زمانمزده واجب اولق لازم کلیر . تا که محض حکمت و ضیای حقیقت اولان اسلامیت بغیر حق طعن و تشنیعدن ، اهل اسلامده صرف تعصب جاهلانه سبیله شریعت غرضاً حقنده تنفیردن قور تارلمش اولسون . هر نه ایسه بزینه صده کلم :

نجم الدین طوفی نک او سوزی ، یعنی (یعنی نص ایله مصلحت تعارض ایدرسه بطریق التخصیص مصلحت تقدیم اولونور . سوزی ، ائمه حنفیه دن امام ابو یوسف حضرت تلرینک (عرفه مبتنی اولان احکام ، عرفک تبدیلیه تبدل ایدر .) سوزینه بکنزه یور . وفقهای حنفیه [عرف ایله نص تعارض ایتدکده عرف نصی تخصیص ایدر .] دیور . الک معتبر کتب حنفیه دن (ذخیره برهانیه) کتاب الاجاره سنک سکزنجی فصانده [تعامل بر جتدر که آنکله قیاس ترک ایدیلیر ونص تخصیص اولونور کور مز میسک ؟ بز تعامله مبنی استصناعی تجویز ایتدک . حالبوکه استصناع ، بر انسانک نزدنده موجود اولمایان شیئی (معدومی) نیعدر که منهی عنهدر . تعامل سبیله استصناعی تجویز ایسه ، بر انسانک نزدنده موجود اولمایان شیئک منع ییمی حقنده وارد اولان [لاتبع مالیس عندک = نزدکده موجود اولمایانی صاتم .] نص شرعیسی تخصیصدر . یوقسه اصلا اونصی ترک

و تعطیل دکلدر . [دیه محردر] . [کذا فی نشر العرف لابن عابدین]
 بیان حاجت یوقدر که عرف و تعامل ، مصلحت جمله سنددر . شوقدر
 وار که مصلحت ، عرف و تعاملدن اعمدر . عرف و عاده شامل اولدینی کی
 عرفدن متولد اولمایان دیگر مصالحه دخی شامل در . بوصورتله حنفیلرک عرف
 و تعاملیله نجم الدین طوفی نک مصلحتی آراسنده فرق واردر ، مع هذامصلحت
 ناسک محتاج اولدینی مصالحدن ایسه اولوقت اومصلحت دخی ، حنفیلر غنبدنه
 انصی تخصیصه صالح بر دلیل اولور . چونکه فقهای حنفیه به کوره حاجت عمومی
 اولسون ، خصوصی اولسون ضرورت منزله سته تنزیل اولونور .
 ایشته بورایه حنفیلر ، مالکی و حنبیلرله برابر کیدیورلر . فقط بوندن
 صوکره اونلردن آیریورلر . شویله که ، حنفیلر ، مالکیلرله حنبیلرک قبول
 و عمل ابتدکاری مصلحت مرسله به باقیورلر ، اگر اومصلحت مرسله یوقاریده
 ایضاح اولونان مصالح معتبره به شیه و ملایم ایسه قبول ایدیورلر . ملایم دکل
 ایسه اولوقت قبول ایتیمورلر . و قبول ابتدکاری مصلحت مرسله ، احتیاج
 درجه سینه بالغ اولمادجه اونکله قیاسی ترک و نصی تخصیصه قیام ایتیمورلر .
 شافعیلر ککنجه ، بونلرک اشعریه فکرینه ذاهب اولمایان قسمی ده ، حنفیلر کی
 حرکت ایدیورلر . شوقدر وار که شافعیلر ، عرف و تعامله حنفیلر قدر اعتبار
 ایتملر ...

نتیجه — شونحقیقاتدن خلاصه الخلاصه اولمق اوزره شونتیجه چیقیور که
 علی الاطلاق مصلحت ، عمومی و قطعی اولدینی صورتده ، اشعریلرله اونلره
 یرو اولان بر قسم مستثنا اولمق اوزره مختلف مذاهب فقیهیه منسوب فقهانک
 همان جمله سی ، اومصلحت ره رعایت و اونی قیاسه ترجیح ایدیورلر . ظن غالب
 ایله مظنون اولان مصلحت ده « قطعی » دیمکدر . زیرا احکام فرعیده ظن
 غالب ، شرعاً علم قطعی مقامنه قائمدر . شاید بوجهله عمومی و قطعی اولان
 مصلحت ، نص ایله تعارض ایده چک اولور ایسه اولوقتده یرینه و درجه سینه
 کوره و علی الخصوص عادات و معاملاتده ، ناسک بر لرلیله اولان عقود و مناسباتنده

و اداره مملکت خصوصاً بینه مصلحت و رعایت جهتی ، تخصیص و بیان طریقیه
نصه تقدیم اولونور . و بوضوئله اونصک حکمی تخصیص و تأویل ایدلمش اولور .
ایشته کتب فقهیه ده [بو مسئله و یافلان حکم ، مصلحت عامه ملاحظه سنه
مبنی تجویز اولونمشدر .] طرزنده جابجا تصادف ایدیلن عبارتده کی (مصلحت
عامه) تعبیرندن مقصد ، بونوع مصلحتدر . « مصلحت عصر » تعبیرندن مقصود
اولان معنی ده بودر . مع هذا بر مصلحت عامه معتبر اولمق ایچون احتماله مستند
اولمایوب قطعی اولمسی شرط اولدنی کبی ، مفسدندن خالی و یا آکا راجح
بولونمسی ده شرطدر . بناءً علیه بر حکمده مصلحت ایله مفسدت اجتماع
و تعارض ایتدکه مصلحت جهتی ترجیح اولونه بیلیمک ایچون ، مفسدتندها
بیوک ودها عمومی اولمسی لازم کلیر . و بوضوئله مصلحتله عمل اولونور .
اما مفسدت ، مصلحتدن بیوک و آکا مساوی اولور ایسه اولوقت (دفع
مفاسد جلب منافعدن اولادر) قاعدۀ فقهیه سنه بناءً دفع مفسدت ایچون مصلحت
جهتی تری اولور . زیرا مفسدت ، شرعاً منهدر بناءً علیه مصلحت جهته
رعایتیه مانعدر ، شرع شریفک منیهاته اعتنائی مأموراته اعتنا سندن ریادهدر .
و مانع ایله مقتضی تعارض ایتدکه مانع تقدیم اولونور . فقهای حنفیه ، استقرا
طریقیه بتون نصوص شرعییه و موارد احکامی برر برر تدقیق و تتبع ایدهرک
نه کبی یرلرده مصلحت رعایت ایدلمسی لازم کله جکئی کوسترمک مقصیدیه شو
قاعده لری استخراج ایله مشلدر :

- ۱ — ضرورتلر ممنوع اولان شیلری مباح قیلار .
- ۲ — حاجت عمومی اولسون ، خصوصی اولسون ضرورت منزله سنه
تنزیل اولونور .
- ۳ — مشقت تیسیری جلب ایدر .
- ۴ — بر ایش ضیق اولدقده متسع اولور .
- ۵ — ضرر و مقابله بالضرر یوقدر .
- ۶ — ضرر ازاله اولونور .

- ۷ — دفع مفاسد جلب منافعدن اولادر
- ۸ — اهون شرین اختیار اولونور .
- ۹ — ضرر عامی دفع ایچون ضرر خاص اختیار اولونور .
- ۱۰ — عادت محکمدر .
- ۱۱ — ناسک استعمالی بر حجتدر که آنکله عمل واجب اولور .
- ۱۲ — رعیه اوزرینه تصرف مصلحت منوطدر .
- ۱۳ — معاملات ناسی فسادہ نسبتدن ایسه مهما ممکن صحتہ حمل ایتک اولادر .

ایشته الیوم محاکمه مابہ العمل اولان اصول محاکمات جزائیہ و حقوقہ قانونلری ایله جزا و تجارت قانونلری و بونلره مماثل غیر مماثل ملکی و عسکری قوانین و نظامات سارہ هپ بومصلحت اساسہ مبنی مشروعدر . و بوکون قانون مدنیز اولان « مجله احکام عدلیہ » نک برچوق برلرینی ، عین اساسہ بناءً تعدیل ایتک لازمه دندر . اکر وقیلہ مجله جمعیتی ، تعصب مذهبی پی ترک ایله مختلف مذاهب فقیه دن اقتباس احکام ایتک اولسهیدی ، شبهه سز بوکونکی مجله دن دها مکمل و صالح ناسه دها موافق بر قانون وجوده کتیرمش اولوردی ... آتیده کی ایکی مسئله . « مصلحت » اساسه متفرع و آنی تنویرہ خادم ایکی مهم قاعده در . آنلره عطفی دقت ایتک لازمه دندر .

*
**
— ۱ —

قاعده

تشریع احکامده مقصود اولاره حکمت و مصلحت منسلطه نظر اعتباره آیینیر ، فردلره نظر اعتباره آلتماز .

بر فعل اوزرینه بر حکمک ترتیب و تشریح صحیح و معتبر اولوق ایچون بو تشریع دن مقصود اولان حکمت و مصلحتک هر فرد حقتده حصول و تحقیق

شرط دکلدر . بر قسم افرادہ نظراً حصولی کافیدر . مثلاً جزادن مقصدشارع
انزجار واعتبار مصلحتیدر . یعنی مجرمک منزجر و متنبہ اولمہ سی ، دیگر لر بنک دہ
اوندن عبرت آلمہ سیدر . حالبوکہ بر چوق مجرملر ، ایقاع ایتدکلری جرئمدن
طولانی تجزیہ ایدلمکله منزجر اولدقلری کبی ، اونلرک تجزیہ ایدلدکلری کون
دیگر بر چوق اشخاص دہ اونلردن عبرت آلمہ یورلر . بونکله برابر ینہ افعال
جرمیہ دہ علی العموم مجرمینہ ترتیب و مجازات اولونور . چونکہ بر قسم افراد
منزجر و متنبہ اولماسدہ ، دیگر بر قسم افراد منزجر و متنبہ اولور . بوجہتله
مقصود اولان حکمت و مصلحت دہ از چوق حصوله کلش اولور .

مواد جزائیہ دہ بویله اولدینی کبی ، عبادات و معاملاتدہ و افعال سائرہ دہ دہ
بویله در . مثلاً شهر رمضانده حال سفرده بولونان اشخاص ایچون - صوکره
قضا ایتک اوزره - اوروج طوتمامق ، شرعاً جائدر . بوحکم جوازدن مقصود
اولان مصلحت دہ ، سفر دن متولد مشقت ضررینی دفع ایتمکدر . حالبوکہ مرفہا
سفر ایدن اشخاص سیاحت واقعه لرندن مشقت حس ایتک شویله دورسون ،
بالعکس ذوق آلبرلر و وجودجه پک چوق استفادہ ایدرلر . ینہ اویله ایکن
اونلرک دہ اوروج طوتماملری مشروعدر . بونک سببی شودرکه تشریع حکمدن
مقصود اولان حکمت و مصلحتک فردلرده وجودی امور خفیہ دندر ، وعین
زمانده غیر منضبطدر . اشخاص واحواله کورہ دکیشر . آنکچون حکم ، دائماً
ویا اکثریا حکمت و مصلحتله دوران ایدن ظاہر و منضبط بر فعل و وصفه نسبت
واضافت اولونیور . بر فعل و وصفک مقصود اولان حکمت ایله دوران ایتمہ سی
دیمک ، حکمک او فعل و وصف اوزرینہ ترتبی ، او حکمت مطلوبہ یی محصل
اولمہ سی دیمکدر . ایشتہ بومثالده « سفر » ظاہر و مضیط بر فعل و وصفدر .
سفری اولان بر شخصک اوروج بیمه سنک جوازی دہ بر حکم شرعیدر . مشقت
سفریہ دن متولد ضرر و المی دفع قضیہ سی ایستہ بوحکم مقصود اولان حکمت
و مصلحتدر ، علت غائیہ درہ حکم مذکور بوعلت غائیہ ، بو حکمت و مصلحتک
حصولی ایچون ترتیب و تشریع اولونمشدر .

لكن مشقت سفریه ، اشخاص واحواله كوره تبدیل ایدن امور حقیقه دن اولدینی ایچون ، اونك دلیل ظاهر یسی اولان سفر فعل ووصفی ، شرعاً مشقت مقامنه اقامه اولونمش و بناءً علیه ذكر اولونان حكم جواز، اونك اوزرینه ترتیب ایدلمشدر . بو جهتله « مادام كه سفر وصف وحالی موجوددر ، مشقتده موجود دیمكدر . دینیلیر . و آرتق حقیقه مشقت وارمیدر ، یوقیدر ؟ آرانماز بتون احكام شرعیه ترتیبده شارعك اتخاذ ایتدیكى اصول تشریع بودر . بوجهتله تضایای شرعیه هب کلی اولارق وضع اولونور . یعنی مسائل شرعیه ده حكمك کلی اولارق وضع ایدلدیكى كبی ، او حكمك وضع و تشریعندن مقصود اولان حكمت و مصلحتلرده کلی اولارق ملاحظه اولونور . بونكله برابر علت غائییه مؤدی اولان ظاهر و منضبط افعال و اوصافده ، او علت غائییه مقامنه اقامه ایدیلیر . علم اصول فقه اصطلاحنده او افعال و اوصاف « مظنه » اطلاق اولونور . مشقت مقامنه اقامه ایدیلن سفر و سفرلك فعل ووصفی كبی كه مشقتك مظنه سیدر . یعنی وجود مشقت ظنی تولید ایدن سیدر . چونكه اكثر یا آنكله مشقت حاصل اولور . [كذا فی التوضیح و مسلم الثبوت]

اصولون ، تشریع حكمندن مقصود اولان مصلحتی حصول وعدم حصول اعتباریه بوجه آتی بش قسمه تفریق ایدیورلر كه موضوع بحثمز اولان یوقاریكى مسئلهنی تفصیل وایضاح دیمكدر . شویله كه :

۱ — برنجیسی ، بر حكمك بر فعل اوزرینه ترتیبندن یقیناً و صورت قطعییه ده حاصل اولان مصلحتدر . بیع و شرادن مقصود اولان ملكیت مصلحتی كبی كه مشروعیت حكمك عقد بیع اوزرینه ترتیبندن یقیناً حاصل اولور . چونكه شرائطی جامع عقد بیع تحقق ایدنجه ، آندن مقصود شارع اولان ملكیت مصلحتی ده صورت قطعییه ده تحقق ایدر .

۲ — ایكنجیسی بوجه مشروح ترتیب حكمندن ظنی اولوق حصوله كن مصلحتدر . قصاصدن مقصود اولان اترجار و اعتبار مصلحتی كبی كه حصولی قطعی دكل ، مظنوندر ، ظنیدر . زیرا قصاص حكمك ترتیب و اجرا سندن منجر

و متنبه اولانلر ، اولمايانلردن فضله در . فقط عمومی دکلدر . متنبه اولمايان ، عبرت آلمانلرده وارد در . آنکچون افرادہ نظرأ مصاحت انزجارک حصولی ، اکثری و بناءً علیہ ظنیدر .

۳ — اوچنجیسی ، حصولی مشکوک اولان یعنی حصول وعدم حصولی مساوی بولان مصاحتدر . شرب خمر اوزرینه وجوب حد حکمتک ترتیدن مقصود اولان انزجار حکمتی کی که حصول وعدم حصولی یکدیگرینه مساویدر . چونکه حد شرب اجرا ایدلکه برابر ینہ شراب ایچنلر ، ایچمینلردن آزدکلدر . بلکہ آنلرک عدینہ مساوی درجه ددر .

۴ — دردنجیسی ، حصولی موهوم و مرجوح اولان مصاحتدر . آیسہ نک یعنی سن ایسہ وصولی حسیله « حیض » دن کسیان قادیئلہ عقد نکاحدن مطلوب اولان ثبوت نسل ، چوجق تولدی کی که حصولی موهومدر ، عدم حصولی حصوله راجحددر .

برنجی وایکنجی نوع مصاحتله تعلیلک ، یعنی آنلری حکمه علت انخاذ ایدرک آنلرله عمل ایتمک و حکمی آنلر اوزرینه بنا قیلیمک صحتندہ شهبه یوقدر . بعضیلری اوچنجی ایله دردنجی نوع مصاحتله تعلیلک صحتی انکار ایتملر سده ، اکثر علماء اصول آنلرله دخی تعلیل و عملک جواز و صحتنه قائل اولملر ددر . و بونلرده بالاده بیان وایضاح اولونان « مظنه » ین حکمت مقصوده مقامنه اقامه ایله ملر ددر اقلیتده قالانلر دیورلر که « اوچنجی نوع مصاحتک وجودی مشکوک ، دردنجیسی ده موهومدر که هرایکینسک ده حصولی مستبعددر . و بویله حصولی مستبعد اولان بر حکمت و مصاحتہ بناء حکم ایتمک ، حکیم اولان حضرت شارعه یا قشماز . چونکه بر حکمه فائده مطلوبه حصوله کلیه جک دیمکدر . زیرا حصولی مشکوک ویا موهومدر . ذکر اولونان مثاللرده دوغرو دکلدر . چونکه اوچنجی مثالده کی مصاحت مقصوده مشکوک دکل ، مظنوندر . دردنجی مثالده کی نکاح آیسہ دن مقصوده ، چوجق تولدینہ منحصر دکلدر . آنده مقاصد سائرده وارد در . »

اکثریت ده دییورگه و شریعتده بونلرک فظیرلری واردر . ازجهله شهر رمضانده فوق العاده سرفه بر مسورتده سفرده بولونان بر حکمدارک سفربلک سببيله اوروج طوتمه مسنک جوازی بوقیلدندره شبهه یوقدرکه بوصورتله سفرده ظاهر اولان ، مشقتک عدم وجودیدر . ینه اویله ایکن مظنه مشقت اولان سفر حسبيله مشقت موجود فرض ایدیلرک ، اوحکمدارک اوروج طوتمه مسی شرعاً تجویز ایدلمشدر . چونکه اوصورتله سفرده مشقت ، موهوم اولقله برابر موجود اولق احتمالی ده واردر . آنکچون بونده مصلحت مقصوده نك عدم وجودینه صورت قطعیده حکم اولوناماز .

۵ - بشنجیسی ، عدم وجودی صورت قطعیده معلوم اولان مصلحتدر . ایشه بونوع مصلحت ، قطعياً معدوم اولدیغندن بونی موجود فرض ایتک ممکن اولاماز ، حقیقه منافی دوشر . بناء علیه آراق بونوع مصلحتک وجودینی فرض وتقدير ایدرک آنکله تعلیل وعمل ایتک ، جمهور فقهایه کوره صحیح اولماز ، زیرا بویکیفیت ، بلا مصلحت تشریع حکم دیمکدرکه معاسز اولور . شارع حکیمدن بویله معاسز ، عبث بر حکم صادر اولماز . مثلاً مشرقده مقیم برذات ، مغربده اقامت ایدن برقادینی بروکیل واسطه سبيله تزوج ایتدکن سوکره ، آرالرنده اصلاً ملاقات واقع اولمقسزین اوقادیندن بر چوجق تولد ایتسه ، بو جوجنک نسبی اوزاته الحاق اولوناماز . چونکه تزوجدن مقصود اولان ثبوت نسب مصلحتی ، بومسئلهده قطعياً معدوم وعادة مستحیلدر . زیرا صورت مسئلهیه کوره زوج ایله زوجه بیتنده عدم ملاقات ، صورت قطعیده معلومدر . کرامت احتمالی ایسه بعیددر ، اعتباره شیان دکلدر .

بوجهت بویله اولقله برابر غریبدرکه امام اعظم حضرقلری ، مظنه مصلحت اولان عقد نکاحه بناء بو مسئلهده دخی جوجنک نسبی زوج مشرقییه الحاق ایدیور . لکن امام اعظمدن ماعدا جمهور فقهاء ، مشارالیهک بوفکرینی قبول ایتدیورلر . وه صورت قطعیده حکمت ومصلحتک منافی اولدینی یرده ، مظنهیه اعتبار یوقدر . دییورلر . حتی بووبو کی یرلرده [لا عبرة بالمظنه مع العلم بانتهاء

المثله ای الحکمه [سوزی، لسان فقهاده ضرب مثل اولشدر. امام ابویوسف
ایله امام محمد دخی، بو مسئلهده استدلی مشارایله امام اعظمدن آریلهرق
جمهورک فکرینه اشتراک ایله مشلردر. [کذافی التحریر]

(مسلم الثبوت) صاحبی، امام اعظم حضرتلرینی مدافعه دییورکه [مقاصد
شارع، یعنی تشریع احکامده حکمت و مصاحته، کالی اولارق ملاحظه
اولونور. بو جهته حکمت مقصوده، هر حالده حکمک جنسی اوزرینه
ترتب ایدر وایتمه سی لازمدر. فقط هر حالده حکمک هر فردی اوزرینه ترتب
ایتمه سی لازم دکلدرد. بعض فردلرده حکمتک بولونماسی جائزدر. آنک
ایچون بز « حکمتک متنی اولدینی یرده مظنه اعتبار یوقدر. » سوزینی
تسلیم ایتمه یز. اوت مظنه اعتبار ایدلز، فقط حکمتک جنس حکمده دخی
متنی اولدینی یرده. یوقسه حکمت جنس حکمده موجود اولدینی حالده،
بعض فردی حکملرده موجود اولمادیغندن طولانی مظنه حکمه اعتبار یوقدر
دینه من.]

فقط دقت ایدیلسه کورولورکه مقام مدافعهده درمیان اولونان بو سوز،
حد ثباتنده دوغرو اولقله برابر، مدافعهیه صالح دکلدرد. چونکه امام اعظم
حضرتلرینک تجویز ایتدیکی مسئلهده کی مصاحتهده، حکمده کلیدر. بناء علیه
او مثال، اساساً جنس حکمده موجود اولمایان مصاحته مثالدر. (مسلم الثبوت)
صاحبی ایله شارحی بوندن غفلت ایتشلردر. زیرا او مثالده بخصوصه بر شخص
معین ذکر ایدیلهرک مسئله صورت جزیهده تصویر ایدله یوو. « مشرقده مقیم
بر ذات ... الخ، دینیورکه او ذات، کیم اولورسه اولسون مطلقدر. تحتنده
بر جوق اشخاص مندرجدر، کایدرد. او حالده مصاحتهده، حکمده کلیدر.
بونک ایچوندرکه ابن همام کبی یک درین نفوذ نظره مالک وکرچکدن مدقق،
بیوک بر فقیه بیله، بو مسئلهده جمهوره قارشى اختیار سکوت ایدیور.

قاعده

بر غایبه مبنی مشروع قبلیناه بر حکم ، بالاخره او غایبک
ضربنی مستلزم اولورسه لغو اولونور .

یوقاریده « بر مصلحت معتبر اولق ایچون مفسدتن خالی ویا آکا راجح
اوله مسی شرطدر . بناء علیه بر حکمه مصلحت ایله مفسدت اجتماع ایدوب ده مفسدت ،
مصلحت راجح ویا مساوی اولورسه ، اولوقت دفع مفسدت ایچون مصلحت جهتی ترک
اولونور . و آرتق او مصلحتله عمل اولونماز . » دیمشدک . سبی ده ظامردر .
مانع ایله مقتضی تعارض ایدیور دیمکدر . شبهه سز مانع ترجیح و تقدیم اولونور .
چونکه بر علت ، تأثیرنی اجرا ایده بیلیمک ایچون موانعدن خالی اوله مسی
ضروریدر . بناء علیه بویله بر مفسدت راجحه ویا مساویه بی مستلزم اولان
مصلحت اوزرینه بنای حکم جائز اولماز .

بو جهت ، بین الفقها متفق علیه اولمقله برابر ، آرتق او مصلحتک بتون
بتون محو و منعدم اولوب اولمادیقنده اصولیون اختلاف ایتشلردر . بعضیلری
آنک کلیاً باطل و منعدم اولدیغنه قائل اولشلردر . بوکا اصطلاحده (انحرام)
دینیلیر که لغتده کسلیک ، شدائد دهر ایله هلاک اولمق معنالیینه کلیر . بوراده
مصلحت ، تأثیردن کسلدیکی ، شدت مفسدت آنی هلاک ایتدیکی ایچون مصلحتک
بوصورتله کلیاً عملدن ساقط اوله مسی کیفیتنه « انحرام » اطلاق اولونمشدر .
بعض علماء اصولده ذکر اولوتان مصلحتک بتون بتون منخرم اولدیغنی قبول
ایتیورلر . « اوینه وجود و باقیدر . شو قدر وادکه مانعک وجودینه مبنی
تأثیرنی اجرادن منقطعدر . مانع زائل اولورسه ینه تأثیرنی اجرا ایدر . دییورلر که
دوغروسیده بودر . برنجی فکره یعنی مصلحتک کایاً منعدم اولدیغنه ذاهب
اولانلرده « کندیسنه راجح ویا مساوی مفسدتک معارض اوله سپله او مصلحت

اورته دن قاتمیش دیمکدر . آرتق اونک وجودندن بحث ایتمهک معناسی قالماز . دیورلر .

بواختلاف ، نزاع لفظی قیلمدندر . نتیجه ده نمره : اختلاف یوقدر . هر ایکی طرفده اومصلحت بنا یدلمه سی لازم کان حکمک - مانع اولان مفسدتک وجودی حسیله انتفاسنده متحددر . بونده اختلاف یوقدر . مقصد اصلی ایسه بودر . آراده کی اختلاف و فرق ، انتفاء حکمک علتنده در . برنجی فکره ذاهب اولانلره کوره حکمک علت انتفاسی ، مقتضی نک یعنی مصلحتک انتفاسیدر . ایکنجی فکره قائل اولانلره کوره ایسه علت انتفاء مانعک وجودیدر . امامان اولان مفسدت ، بالآخره زائل اولور ایسه اولوقت ینه او مصلحت تأثیرینی اجرا ایدرمی ، ایتزمی ؟ بحثه کلنجه : اگر او مصلحت حالا اولانجه قوتیه موجود ایسه ، شبهه سزاو مصلحت تأثیرینی اجرا ایدر . و بناءً علیه اونک مقتضاسیه عمل اولونور . بو صورتده برنجی فکره ذاهب اولانلره کوره او مصلحت یکیدن عودت ایتیش ، مفسدندن خالی اولارق کسب وجود ایله مش دیمک اولور . آنکچون بز ، بواختلافک نمره سی یوقدر دیدک .

— مهمه —

بومسئله ، شویله جه سطحی بر نظرله مطالعه اولوندقده اهمیتی پک اوقدر نظر دقته جاریماز . حالبوکه بومسئله ، فقهده وازجه دولته تنظیم قوانین خصوصنده اوقدر اهمیتی حائر بر اساسدرکه کرک شریعت نامه بیان رأی ایدن ایدن فقیهله وکرک واضع قانونک بر آن نظر دتمندن دور طوتمه سی لازم کلیر . او قدر مهم ، اوقدر اساسیدر . چونکه هم حکمت تشریعک ، هم ده حکمت حکومتک ماهیتی اقتضاسیدر . ایضاحات آتیه ، بونک نه درجه ده مهم اولدیغنی کوستر . شویله که ، فقها بو اساسدن شو ایکی مهم قاعده فقهیه بی استخراج ایله مشلردر :

۱ — بر عات غایبه مبتنی اولان حکم ، اوعلتک انتفاسیه متنی اولور .

۳ — بر فائده مطلوبه نك، بر مقصد و مصلحتك استحصالي ايچون تشريع اولونان بر حكم، بالاخره اوفائده و او مقصدك ضدني استلزام ايدر ايسه ساقط اولور.

علم منطقده، بو ايكي قاعدهني تصديق ايدر. چونكه برنده علت مفقوده، ديكرنده مانع موجوددر. منطقاً علتك انتفاسي معلوك انتفاسي استلزام ايده جيكي كي، بر علت معلونده مؤثر اولاييلمك ايچونده اونك تأثيريني منع ايده جك بر مانع بولونماق اقتضا ايدر. ابن همام، (فتح القدير) نده برنجي قاعدهيه اعتراض ايدويور: «بر حكم، بر علت مبنی بر كره كسب وجود ايتدكدن صوكره، آرتق او علتك انتفاسيله منتفی اولمسي لازم كلز. چونكه بر حكم، وجود بولاييلمك ايچون بر علتك وجودينه محتاج اولور ايسه ده بقاسي ايچون او علتك بقاسنه محتاج اولماز. علت، بالاخره منتفی اولقله برابر حكمی باقي قالاييلير. احكام شرعيه مياننده بونك امثالي وارددر، دييور. وبراكي مثالده ايراد ايدويور. لكن بواعراض، مناط حكم اولان علت فاعليه حقنده دوعرو اولاييليرسه ده، آنك ده علتی اولان علت غاييه حقنده ده دوعرو ميدير؟ بوجهت محتاج تأملدر. چونكه علت فاعليه نك انتفاسي حالنده علت غاييه موجود و باقي قالير ايسه، اولوقت اوكا استناداً حكمده باقي قالاييلير. و بوضورتله بقاسنده علة العله اولان علت غاييه به استناد ايتديكي ايچون، آرتق او علت فاعليه نك وجودينه محتاج اولماز، آندن مستغنی اولور.

فقط علت غاييه ده منتفی اولور ايسه اولوقت حكم، بقاسي ايچون اورته ده طوتونه جق، استناد ايده جك بر علت بولاماز. واستنادسز بقاده تصور اولوناماز. حكم بقا خصوصنده هيچ بر علت محتاج دكلدر دينه من. چونكه بقا دينيلان شئيه برنوع وجوددر، ايكي ويا زياده زمانلرده وجود متكرردن عبارتدر. بونك ايچوندر كه مادی اولسون، معنوی اولسون هرشي، وجودنده بر علت به محتاج اولديني كي، بقاسنده ده بر علت محتاجدر.

شوقدر واركه وجودك علتی باشقه، بقا نك علتی باشقه اولاييلير.

اما هیچ بر علت بولونمقسنزین بقا اولاماز ؛ ناصل که قریباً (قدرت) بحشده
ایضاح اولونه جفی اوزره واجبات مالیه ده شرط اولان (قدرت میسره) علت
حکمنده اولدینی ایچون فقها ، « قدرت میسره ، زائل و متنی اولورایسه واجبات
ذمتده بقاسی ساقط و متنی اولور . زیرا علتک انتفاسیله معلولده متنی اولور .
دیورلر . ایشته بو حقیقت منطقیه بنسأ درک شیخ اکمل الدین حضرتلری ،
(هدایه) شرحی (عنایه) ده سالف الذکر اعتراضی درمیان ایتدکدن صوکره
[وفیه بحث قرئنا فی التقرير = بو اعراض حقنده بحث وارد . بز اونی
« تقرير » نام کتایمزده تقرير ایتدک [دهرک ، اعتراض مذکورک دوغرو
اولمادیغه اشارت ایدیور . مشارالیهک ذکر اولونان (تقرير) ی مطبوع
اولمادیفی کبی ، یازمه سی ده موجود اولمادیغدن اوراده نه صورتله تقرير ایتدیکنی
بیلمه یورز . بیلدی کمز برشی وارسه اوده ، شو یوقاریده منطقه استناداً درمیان
ایتدی کمز مطالعات ذاتیه دره اوده بوندن باشقه بر صورتله تقرير ایتیش
اولماسه کرکدر .

الحاصل ، برنجی قاعده حقنده او یولده بر اعتراض سرد ایدلش ایسه ده ،
ایکینجی قاعده حقنده هیچ بر اعتراض درمیان ایدلمه مشدر . بوایکینجی قاعده ،
غایت قوتلیدر . بتون فقها و اصولیون طرفندن حسن تلقی ایدلش ، متفق
علیه بر قاعده اساسیه دره . بونک پک کوزل و پک جانی بر مثاله خلفاء راشدین
زماننده تصادف ایدیورز شویله که :

۱ (مدخل) ده ، کچن سنه علم اصول فقهک تاریخنه متعلق درسلمزده [دور
اصحابده اصول فقه وارمیدر ، یوقیدر ؟] بحشده تفصیلاً ایضاح ایتشدک که
رسول اکرم صلی الله علیه وسلم افندمز حضرتلری ، (مؤلفه قلوب) نامیله معروف
اولان بعض صنایدق ریش ورؤسای عربیه ، اهل اسلام اوزرندن فتنه و فسادلری
دفع و ازاله ، قبللریخی اسلامیه تقریب و تألیف و بو صورتله دین اسلامی اهتزاز
مقصد و مصالحتیه اموال بیت المالدن تخصیصات و عائدات مخصوصه تعین بیورمشلر ،
آخر عمرلرینه قدرده تخصیصات مذکورده بی اعطا ایتمشلردی . ذاتاً بو کیفیت

[انما الصدقات للفقراء والمساكين والعاملین علیہا والمؤلفۃ قلوبہم الخ] آیت جلیلہ سبلہ منصوص بر حکم شرعی ایدی .

برنجی خلیفہ حضرت ابوبکر صدیق ایام خلافتندہ ذکر اولونان مؤلفۃ قلوبدن بعضیلری، ذات حضرت خلافتناهی به مراجعتله بر موجب نص جلیل تخصیصات مذکورہ لرینک عہد رسالتدہ اولدینی کبی کندیلرینه اعطاسنی استدعا و طرف خلافتناہیدن بوبایدہ براعطا امرنامہ سی استحصال ایتدیلر . اولوفت حضرت عمر فاروق، خلیفہ مشارالیک ہم قاضیسی، ہمده وزیر اعظمی متابعہ سندہ ایدی . حضرت ابوبکر، همان مرایشی اوکا حوالہ ایدردی . اوجہتلہ مؤلفۃ قلوب، آلدقاری امرنامہ بی حضرت عمرہ تقدیم ایتدیلر . مشار الیہ جناب عمر، امرنامہ بی او قودقدن سوکرہ یرتوب آندی . واولرک وقوع بولان طلبلرینک ذکر اولونان نصہ وفعل پیغمبری به مستند اولدینی، بیانلرینه قارشی [جناب پیغمبر، او تخصیصاتی سزی اسلامیته تقریب وتالیف ایله دینی اعزاز ایچون اعطا ایدیوردی . بوکون جناب حق، دینی اعزاز وشوکت اسلامی اعلا بیورمشدر . آرتق سزه وسزی تالیف کبی شیلره احتیاج قالماشدر . اسلامیته ثبات ایدرسه کز فہاء ایتزسه کز سزکله آرامزده قیلنجدن باشقه برشی یوقدر .] جوابی وپردی . تخصیصاتلریخی اعطا ایتدی .

بونک اوزرینہ مومی الہم ، برای شکایت حضور خلیفہ به کیدوب کیفیتی عرض ایتدیلر و «خلیفہ سزمیسکنز، یوقسه عمرمی؟» دیدیلر . خلیفہ عالیبتار حضرت صدیق اکبر (ر ، ض)، قلبندہ دنیایہ قارشی ذرہ قدر میل وطعم اولمایوب ، عندندہ خلیفہ اولمقلہ اولماق مساوی اولدینی و بو خصیصہ کندیسیله حضرت عمر آراسندہ هیچ بفرق بولونمادیغنی کوسترمک مقصدیلہ غایت مسکت و صمیمی بر جواب وپردی . «ایسترسه عمردر .» دیدی . وبلاآخرہ حضرت عمرک بالادہ کی مطالعہ سنی اوکرہ تجہ آنک رأی واجتہادینہ اشتراک ایتدی . علمای اصحابدن هیچ بری ده بوکا اعتراض ایتدی . بوصورتله بروجه معروض نص ایله ثابت اولان عائدات مذکورہ تک سقوطندہ اجماع اصحاب منعقد اولدی .

بعض علما و مفسرين ، ذكر اولونان تخصيصاتك بو وجهله سقوطك
(نسخ) ديمك ايسته يور واجماع ايله حكم شرعيناك جواز نسخنه ذاهب اولو.
يورلر. حالبوكه (اجماع) ك نص ايله ثابت بر حكم شرعي بي فاسخ اولاييله جكني ،
ائمه اصولدن و متقدمين مشايخ حنفيه دن يالكز « عيسى بن ابان » ايله آ كا
پرو اولان محدود بر قاج علما تجويز ايتمشدر . جمهور فقهايه و علماي اصوله
كوره اجماع نه فاسخ ، نه ده منسوخ اولاماز . نسخ آنجق زمان پيغمبري يه
و حضرت شاره مخصوص و منحصردر . بوكي مسائل فقهيه ده فقها دن محدود
اولمايان مفسرينك و ديكر علما نك سوزلرينه باقلاماز . چونكه مسائل فقهيه ده
معتمد و معتبر اولان اقوال فقها در ، اقوال مفسرين و محدثين دكلدر .

(كشف بزودي) و (تلويح) كي ك معتبر اصول كتابلرنده ،
هدايه شرحري (عنايه) ، (كفايه) و (فتح القدير) كي ك معتمد فقه كتابلرنده
« زكات » بحثنده بيان اولونديني اوزره بو مسئله ، نسخ مسئله سي دكلدر .
بلكه يوقا ريده ذكر اولونديني وجهله « علتك انتفاسيله معلوك ده منتفي اولاجني »
ويا خود « اوزرينه موضوع و مبتني بولونديني مقصد و مصلحتك بالاخره ضد
و نقيضني استلزام ايدن حكمتك سقوط ايدمجي » قاعده لرينه منفرع بر مسئله در .
نته كيم بوجهت ، حضرت عمر ك تخصيصات مذ كوره يي نچون ويرمديكنه دائر
صراحت بيان ايتديكي سبب و علت موجه دن تاويلي غير قابل بر صورتده منقهم
اولويور . آرتق بو بابده مشاراليهك هر درلو شبهه و ترده محل بر اقايله جق
صورتده واقع اولان بياناتني نظر اعتباره آلمايوبده ، « حضرت عمر ، باشقه .
لرينك مطلع اولمديني بر نص شرعي يه كسب و قوف ايتمش اولديني ايچون مؤلفه
قلوبه تخصيصاتلريني ويرمه مشدر . » كي ساده دلانه سوزلرله تاويله قيام ايتمك ،
بك كولونچ اولور . اويله اولسه يدي مشاراليه اونص ذ كر ايدر و اخلافه روايت
اولونورد . حالبوكه حضرت عمر ، اويله بر نص دن بحث ايتمه يور ، بالاده
نقل اولونان علت معقوله يي درميان ايد ييور .

بعض اصوليون ، بوني برنجي قاعده يه يعني « بر شيك علي مشي اولونجه

او شده منتهی اولور . « قاعده سنه تطبیق ایدیورلر . دییورلرکه « زمان رسالته اهل کفرک کثرت و غلبه سی حسیله دین اسلام ضعیف ایدی . دینی اعزاز و شوکت اسلامی اعلا ایچون هنوز اسلامه داخل اولماش ویا لایقوله ایصینامش اولان رؤسای عربی تلطیف ایله اسلامیته تقریبه لزوم واردی . ایشته بو مقصده مبنی اونلره بیت المالدن تخصیصات ویریلیوردی . فقط بالآخره جناب حق دینی اعزاز و شوکت اسلامی اعلا ایله اهل اسلامی آنلردن مستغنی قیلنجه مقصد حصوله کلدی ، علت نهایت بولدی . و آرتق تخصیصات اعطاسنه محل قالمادی . بناء علیه اولبابده کی حکم منصوص ده ، بوسورتله نهایت بولارق ساقط اولدی . »

(کفایه) ده بیان اولوندینی اوزره مشاهیر ائمه اصولدن امام بدرالدین کردری ، بو مسئله یی ایکنجی قاعده یه تطبیق ترجیح ایدیور . دییورلرکه « کل شیء یعود الی موضوعو بالنقض باطل = موضوعی نقض ایدن ، یعنی مقصدینه مقصدینه منافی دوشن هرشی ، باطلدر . شو حالده اکر بز ، مؤلفه قلوبه کافی . السابق تخصیصات اعطاسنک بقای جوازینه قائل اولورساق ، بواعطا موضوعی نقض ایتمش ، مقصده منافی دوشمش اولور . چونکه اونلره ویریلن بو تخصیصات ، آنجق اونلر طرفدن دینه ذل و حقارت وارد اولماق و بو صورتله (بیضه اسلام) حمایه ایدلمش اولمق مقصدینه مبنی اونلرک شرینی دفع ایچون ویریلیوردی . بالآخره دین اسلام کسب عزت ایدرک اونلرک شرندن امنیت حاصل اولونجه ، آرتق ینه اونلره تخصیصات اعطاسنه دوام ایتمک ، دین اسلام ایچون ذات و حقارت اولور . بناء علیه آرتق اونلره تخصیصات ویرلمز . « بیانه حاجت بوقدرکه بو سوزک معناسی شودر : دین اسلامک ضعفی زماننده مؤلفه قلوبه تخصیصات اعطاسی ، دینی اعزاز مقصدینه مبتنی ایدی . شوکت اسلامک اعتلاسی زماننده اونلره تخصیصات اعطاسنه دوام ایتمک ، آرتق اسلامیتی اعزاز دکل ، بالعکس اذلال اولور . بوسورتله مقصود اولان مصلحت ، کلیاً فوت اولوب آنک یرینه ضدی اولان مفسدت قائم اولمش اولور . یوکا محل بر اقامق ایچون حکم مذکور ، یعنی تخصیصات اعطاسنک جوازی ، ساقط اولمشدر . »

(کشف زدوی) صاحبی محقق شهر عبدالعزیز بخاری ده ، بو مسئله بی شو صورتله ایضاح ایدیور : [حضرت عمرک مؤلفه قلوبہ تخصیصاتلری ویرمه سی ، عهد سعادتده موجود اولان مقصد و مصلحتی - اولدینی کبی - تقریر و تثبیتدن باشقه برشی دکلدر . چونکه بوندن مقصد ، اعزاز دیندر . اوله اسلامک ضعیف بولوندینی بر زمانده بو مقصد ، آنجق اونلرک شرینی دفع ایچون تخصیصات اعطاسیله حاصل اولاییلردی . بالآخره حال تبدل ایدرهک دین اسلام کسب عزت ایدنجه ، عین مقصد تخصیصات مذکورہک قطعی ایجاب ایتدی . زیرا شوکت اسلامیہ اعتلا ایتدیکی بر زمانده دینی اعزاز ، اونلره تخصیصاتی منع ایتکه اولور . تخصیصات مذکورہی زمان پیغمبرده اعطایله دور احبابده منع ایتک کیفیتلریک هر ایکسی ده ، آلت و واسطه درلر . اصل مقصد ، اعزاز دیندر . بو ایسه تبدل ایتمه مشدر ، حالی اوزره باقیدره تبدل ایدن ، آنجق اونک آلتی اولان حکمدرکه اعطادن منه تبدل ایتمشدر . آنک ایچون بو صورتله تبدل حکم ، نسخ دکلدر . نسخ بویله اولماز .

بونک بر نظیری ده (عاقله) [۱] اوزرینه ایجاب دیت مسئله سیدر . شویله که ، دیت زمان پیغمبری ده قاتلک منسوب اولدینی عشیرت اوزرینه واجب ایدی . صوکره دور احبابده « اهل دیوان » [۲] اوزرینه واجب اولدی . چونکه یینلرنده نصرت و انتصار سببینه عاقله اوزرینه ایجاب دیت ، زمان نبوتده عشیرتده جاری ایدی . بالآخره اهل دیوانده جاری اولدی . بو صورتله جناب پیغمبردن صوکره اهل دیوان اوزرینه ایجاب دیت خصوصتی ، نسخ دکلدر . بلکه عاقله اوزرینه دیتک وجوبی ایجاب ایدن سبب و علتی ، کافی السابق تقریردر . او سببده قاتل ایله عاقله سی آراسنده کی انتصاردر . « تخصیصات

[۱] عاقله دیه قاتلک عصبه دن اولان اقرباسی مجموعه دینرکه بونلر ، قاتل طرفندن مقتولک دیتی ادایه شرعاً مجبور طوتلشلدر .

[۲] خلفای راشدین زماننده هرکس علی مراتبهم بیت المالدن تخصیصات سنویه آلیردی . حضرت عمر ، ایام خلافتنده هرکس تخصیصاتی ثبت دفتر ایتدی . ایشته او دفترله (دیوان) واونلرده اسملری مذکور اولان اشخاصده (اهل دیوان) دینلیر .

مذکورہ نك اعطا وعدم اعطاسی ، مسئلہ سیدہ ، طبقی بویله در . اوده ، بوده
 نسخ دکلدر . شیخ اکمل الدین ، بو سوزلری (عنايه) ده عیناً نقل ایتدکن
 صوکره [بو سوز ، کوزل بر سوزدر .] دیرک تقدیر و تحسین ایدیور ...
 یوقاریده (مصلحت مرسله) بحثده اسمی وفکری کچن محققین حنبلیه دن
 امام نجم الدین طوفی ورفقاسنک [مصلحت ایله نص تعارض ایتدکده مصلحت
 تقدیم اولونور .] سوزندن قصد ایتدکاری معنی ده بودر . « نصک موضوعی
 بولونان مقصد و مصلحت ، نهی ایجاب ایدیورسه اونکله عمل اولونور . شو
 حالده بویله بر تعارض وقوع بولدینی زمان او نصک مبتنی بولوندینی مقصد
 شارع باقیلیر . اگر او مقصد ، - بالآخره احوالک تبدلی حسیله - حکم
 منصوصک لغوی ایجاب ایدیورسه الفا ، تبدلی اقتضا ایدیورسه تبدیل
 اولونور . وبو صورتده ینه او نص ایله عمل ایدلمش دیمک اولور . چونکه بو
 صورتله نصک روحی و شارعک مقصدی محافظه ایدلمش اولور . بو کیفیت ،
 نصی نسخ و تعطیل دکلدر . بلکه اونک ظاهراً افاده ایتدیکی عمومی و بتون
 ازمانه شمولی تخصیص و حکمی بیاندر . نص ینه او نصدر و تأثیر و اقتضای
 باقیدر . او دکشمه مشدر . دکیشن اونک حکمیدر . بو جهتله دکیشن مقتضی
 دکل ، مقتضادر . یعنی نص و اقتضای دکشمه یور ، او حالی اوزره باقیدر .
 یالکیز اونک مقتضای اولان حکم دکیشور . اولکی حکم یرینه حسب الزمان
 یاشقه حکم قائم اولویور . هر ایکی حکم ده ، ینه او نصک مقتضاسیدر . چونکه
 مقصد ، عین مقصددر . نصک مبتنی اولدینی مضایحتدر . حکملر ، مقصد
 و مصلحت موصل اولان آلات و وسائلدن عبارتدر ، مقصود بالذات دکلدر .
 « اعلیه مقاصد شارعی محافظه شرطیله حکملرک دکشمه لرنده بر محظور شرعی
 یوقدر . نسخ دکلدرکه او یله بر مخطور بولونسون . » دیمک ایسته یورلر .
 حکمت تشریعک مقتضای ده بودکلیدر یا ؟ بر کره وضع شریعتده حکمت
 تشریعه و مقاصد شارعک وجودینه قائل اولدقدن صوکره ، بو نتیجه یی قبول
 ایتک ضروریدر . بونی قبول ایتمه مک ، حکمت تشریعی انکار ایتک دیمکدر .

نته کیم یوقاریده کوردک که علمای اسلام آراسنده حکمت تشرینی انکار ایدنلرده واردر . فقط ینه کوردک که جمهور فقها ، متفقاً حکمت تشریمک وجودینه قائلدرلر . او حالدده جمهور فقهانک بو نتیجه پی قبول ایتملری ضروریدر . نته کیم تحقیقات سالفه دن قبول ایتدکری آکلاشیلیور .

آنحوق مصلحتک درجه تأثیرینی تبیینده ، ونص ایله تعارض ایتدیکی زمان مصلحتک تقدیمی لزومنده آرائماسی لازم کان شرائطک تعینده خصوصنده اختلاف ایتمشلردر . غنالی و بیضاوی کبی بعض اشعریلر ، بو شرائطی پک دار طوتمشلر و بناء علیه مصلحت ، ضرورت درجه سنه بالغ اولمادقیجه آنک مقتضاسیله عمل ایتهمشلر . مالکیلرله بر قسم حنبلیلرده ، اونلرک تماماً عکسنه اولارق شرائط مذکورہ پی ، جذری بر فکر ایله واسع مقیاسده توسیع ایتمشلر . فقهای حنفیه ایله بر قسم فقهای شافعیده ، بونلرک آراسنه کیره رک یکدیگرینه ضد بو ایکی فکرک اورته سنی اختیار ایله مشلر و بناء علیه مصلحت ، احتیاج درجه سنه بالغ اولورسه حد ضرورته بالغ اولمش دیمکدر ، آرتق آنکله عمل اولونور و بر مصلحتہ مبتنی اولان حکم منصوص ، مؤخرأ او مصلحتک ضدی و آکا مساوی بر مفسدتی مستلزم اولور ایسه ترک اولونور دیمشلردر . چونکه بر علت غاییه مبتنی اولان هر هانکی بر حکم ، بالآخره اجراسیله او علتک ضدینی استلزام ایدرسه ساقط اولور . بو نقطه لرده حنفیلرله مالکیلر و حنبلیلر آراسنده فرق یوقدر . فرق آنحوق علی الاطلاق (مصلحت مرسله) نک مابه الاحتیاج بر دلیل شرعی اولوب اولمادیغنده در . تفصیلاتی یوقاریده مرور ایتمشدر . . .

مبحث قدرت

تکلیفک صحنه قدرنک دهروری شرطدر

یوقاریده (تکلیف مالایطاق) بحثده بیان ایتشدک که تکلیف . کافلی برایشی بر کیمسه به الزامدر . احکام شرعیه ، انسانلرک حرکاتی تقید ایتدیکندن

انسان ایچون اونلره رعایت ، حد ذاتنده کلفتلی بر ایشیدر . آنک ایچون انسانلری احکام شرعیه ایله مکلف طوتمق ، آنلره کلفتلی بر ایشی تحمیل ایتک دیمک اولدیغندن ، بوکا انسان شرعده (تکلیف) اطلاق اولونمشدر .

ینه او بحثده تفصیلاً ایضاح ایتشدک که انسانی ، قدرتی خارجنده بر ایش ایله مکلف طوتمق ، جائز دکلدر . معتزله ایله ماتریدییه کوره عقلاده ، شرعاده جائز دکلدر . اشعریلر ، عقلاً جائز ایسه شرعاده جائز دکلدر دییورلر . شو حالده علی العموم علمای اسلام عننده تکلیف ، شرعاً جائز و صحیح اولمق ایچون مکلف مکلف بهی ، تعبیر دیکرله مأمورک مأمور بهی ایضایه مقتدر بولونمیه لازمدر . مقتدر اولمایان بر شخصه تکلیف توجه ایتمز . بناءً علیه تکلیفک صحتده قدرتک وجودی شرطدر .

بو مقامده ، قدرت ، دن مقصد ، سلامت اسباب و آلات معناسنه اولان قدرتدرکه ، مکلف آنکله اکثر احوالده بلا مشقت مکلف بهی ایضایه مقتدر اولور .

بونی براز ایضاح ایتک اقتضاییدیور . یوقاریده (اراده) بحثنده قدرتی تعریف و ایضاح ایتشدک . شمدی اوبخنه موافقاً ارجاع نظر ایدلم . اوراده دیمشدک که قدرت ، بر فعلی ایشله یوب ایشله مه مک خصوصاً شرعیه انسانی متمکن قیلان قوتدر . بو معناه قدرته ، فاعلدن فعل و ترکک صحت صدوری دیمکدر . آنک ایچون دها بسیط بر تعریف اولمق اورده قدرتی ، (فعل و ترکک تمکن) دیه تعریف ایده بیلیرز . بو قدرته فاعلده بر ایشی ، عین زمانده ایشله یوب ایشله مه مک جهتلرینه تمکن حاصل اولور . وبناءً علیه بر ایش حقنده فاعلدن فعل ترکک صدوری صحیح اولور .

قدرت ، ایکی قسمه آریلیر . بری قدرت کلیه ، دیکری قدرت جزئیهدر . قدرت کلیه ، انسانده بالقوه موجود اولان تمکن و مکتدر ، قدرت صفتیدر . بوقدرت ، اسباب و آلاتک ، جوارح و اعضای بدنیه نک سلامت و صحتیه حاصل اولور . وانسان بونکله بر ایشک طرفته ، یعنی ایشله یوب ایشله مه مک جهتلرینه متمکن اولور .

قدرت جزئیہ ، قدرت کلیہ نك بر فعل معینہ تعلق ایدن بر قسمیدر که قدرت کلیہ نك فرد متعیندر . و فعل بوقدرت جزئیہ ایله حاصل اولور . اصل قدرت حقیقیہ ، ایسته فعله مقارن اولان بو قدرت جزئیہ در . چونکه قوه دن فعله چیقمشدر . آنك ایچون فعل ایله برابر بولونور . آندن اول ویاصوکره بولونماز . قدرت کلیہ ایسه فعلدن اولده ، صوکره ده بولونور . متکلمین ، قدرت جزئیہ « استطاعت فعلیه » دیرلر .

قدرت جزئیہ ، بر فعلك وجودنده اجرای تأثیر ایدن قدرت مؤثره در . زیرا فعل ، آنکه حصوله کلیور ، (اراده) بحثنده کچمشدی که اشعریلر ، طولایسیله جبره قائل اولدقلرتدن اولنلر ، بوقدرتك تأثیرینی انکار ایدیورلر . آنلرك نظریه سنه کوره بو قدرت ، حقیقته موجود اولمایوب موهوم برشیدره . ماتریدیه عندنده ایسه قدرت مذکوره ، موهوم اولمایوب بالعکس قدرت حقیقیه ومؤثره در . و فعلك علت تامه سیدر . معلول علتدن انفکاک ایدمه بجهکشدن ، فعل آنکه حاصل و آندن انفکاک کی غیر قابلدر .

بوراده مقصود اولان ، یعنی صحت تکلیفك شرطی اولان قدرت بوقدرت حقیقیه جزئیه دکلدرد . بلکه دمین سویله دیکمز کی سلامت اسباب و آلات معناسنه اولان قدرندرد . بوده مکلفی و مأموری اکثر احوالده بلامشقت مکلف بهی ایفایه متمکن قیلان قوت و مکتدن عبارتدر که قدرت کلیه دن باشقه برشی دکلدرد ، بو تعریفده کی (اکثر احوالده بلامشقت) قیدلری ، قیود احترازیه در . زاد و راحله سز حج ایتك کی مشقتلی شیلری اخراج ایچون ابراد اولونمشدر . چونکه زاد و راحله اولقسزین بلامشقت حج ایتك ممکن ایسه ده پك قادردر . و هرکسه کوره دکلدرد . یالکسز راحله سز بلامشقت حج ایتك ده ، چوق کره واقع اولاییلیرسه ده ، اکثر احوالده واقع اولاما . اکثر احوالده مشقتسز واقع اولان حج ایسه ، زاد و راحله ایله وقوع بولان حجدرد . باب تکلیفده مأمور و مکلف ایچون آریلان قدرت ، واجب اولان فعل مأمور بهی اکثریا وغالب احوالده مشقتسزجه ایفایه اقدار و تمکین ایدن قدرندرد . مأمور بویله بر قدرته مالک اولمازسه امر و تکلیف صحیح اولماز .

سلامت اسباب و آلات معاسنه اولان قدرت ، وجوب ادا نك شرطيدر .
 نفس ادا نك شرطی دكلدر . چونكه نفس ادا ، بو معناه قدر بولونمادی
 زمانده دخی حاصل اولاییلر . نفس وجوبكده شرطی دكلدر . زیرا نفس
 وجوب جبریدر ، قدرته توقف ایتمز . سبب مخصوص و اهلیت ایله ثابت اولور .

ایضاح

بوراده اوج شی وار : نفس وجوب ، وجوب ادا نفس ادا . بونلر باشقه
 باشقه شیلردر . بونلری بر برینه قاریشدیر ماملیدر .

نفس وجوب ، ذمتده بر حقك ثبوتیدر . وجوب ادا ، ذمتی اوحقندن
 تفریغك وجوبیدر . نفس ادا ایسه ، اوحقی مستحقنه تسلیم و تأدیه در . مثلاً
 عقد بیع ایله مشتری نك ذمتده ثمن میبع ثابت و لازم اولور . ایشته بولزوم ،
 نفس وجوبدر كه سبی اولان عقد بیع ایله جبری بر صورتده ثابت اولور .
 بونده قدرت آرانماز . طریق نك رضاسیله عقد بیع واقع اولور اولماز ، در حال
 او عقد سییله مشتری نك ذمتده ثمن میبع ثابت اولور . ایستر مشتری نك
 اونی ادایه قدرتی اولسون ، ایستر اولماسون مساویدر .

فقط مؤخرأ بایعك ثمن میبعی طلب ایتمه سی اوزرینه اول تمنی بایعه تسلیم
 و تأدیه ایتمك ، مشتری اوزرینه واجب اولور . ایشته بو وجوبده ، وجوب
 ادا در . بو مطالبه ایله ثابت اولور و بونده قدرت آرانیر . یعنی وجوب ادا نك
 ثبوت و تحقیقنده هم مطالبه و هم قدرت شرطدر . نفس وجوب اصل
 و متبوعدر . وجوب ادا فرغ و آکا تابمدر . نفس ادایه كلنجه ، بوده ثمنی بایعه
 تسلیم و تأدیه فعلندن عبارتدر .

شو مثالده ثمن میبع ، مشتری نك ذمتده سبی اولان عقد بیع ایله و برده
 مشتری نك عقد بیعه اهلیتی ایله ثابت و واجب اولویور . بونده مشتری نك اونمی
 ادایه اقتداری شرط دكلدر . فقط بالآخره بایعك مطالبه سیله اونمی بایعه ادا ،

مشتري اوزرينه واجب اولمق ايچون مشتريڭ ادايه مقتدر اولمى شرطدر .
مقتدر دكل ايسه سعه حاله انتظار اولونور . نته كيم بيع مؤجلده نمن مبيع ،
عقد سييله مشتريڭ ذمتده فى الحال ثابت ونفس وجوب ايله واجب اولديغى
حاله ، نمنك وجوب اداسى ، وعدهك حولى وبامك اولوقت وقوع بولان
مطالبهسى ايله ثابت اولور .

ايشته « وجوب ادا » نك شرطى اولان قدرت ، بروجه مشروح سلامت
اسباب و آلات معناسنه اولان قدرندر . يوقسه قدرت تامه حقيقه دكلدر .
چونكه قدرت حقيقه ، فعل ايله برابر حاصل وتكليفدن صوكره واقع اولور .
صحت تكليفك شرطى اولان قدرت ايسه تكليفدن اول موجود اولمليدركه تكليف
صحح اولسون زيرا شرطك وجودى مشروطك وجودندن مقدم اولور .
قدرت حقيقه ايسه بعد التاكليف مكلف ، مكلف بهك اداسنى اراده ايتديكى
زمان تحصيل ايدر . وفعلدن انفاك ايدمهز . سلامت اسباب و آلات معناسنه
اولان قدرت بويله دكلدر . بو قدرت ، فعلدن مقدم ده ، فعل ايله برابر ده ،
فعلدن صوكره ده موجود اولور .

خلاصه قدرت جزئيه دن عبارت اولان قدرت حقيقه ، حقيقت ادا نك
يعنى مأمور بهى نفس ادا نك شرطيدر . نفس وجوبه كنجه : بو ذمه تعلق
ايتديكى جهته بونده قدرت آرا نماز . بو جبريدر . سبب شرعىسى ايله ثابت
اولور . بونده يالكنز اهليت آرانير .

۱ - قدرت ممكنه

۲ - قدرت ميسره

وجوب ادا نك شرطى اولان قدرت ، ايكي نوعدر . برى قدرت ممكنه
ديكرى قدرت ميسره در . قدرت ممكنه . مأمور بهى بلا مشقت ادايه مأمورى
تمكين واقدار ايله ين وفضله بر سهولت تأمين ايتمين قدرندر . قدرت ميسره ،
مأمور بهى ادايه تمكين واقدار ايله برابر فضله بر سهولت تأمين ايدن قدرندر .
قدرت ممكنه ايسرتمالى اولسون ، ايسر بدن اولسون على العموم وجوب ادا نك
شرطيدر . قدرت ميسره ايسه واجبات مالمده شرط قيلنمشر .

ایضاح

وجوب اداك شرطی اولان وسلامت اسباب و آلات معناسه بولونان
 قدرت ، ایکی قسمه تقسیم اولونور . بری ادنی مرتبه سی وحد اصغریسیدرکه
 « قدرت ممکنه » تسمیه اولونور . (ممکنه) لفظی تمکیندن اسم فاعلدر . تمکین
 ایدیجی و متمکن قیلیجی دیمکدر . دیکری اقصى مرتبه سی وحد اعظمیدر .
 بوکاده « قدرت میسره » اطلاق اولونور . (میسره) کلمه سی ده تیسیردن اسم
 قولایلایدیجی دیمکدر .

قدرت ممکنه ایله مأمور بهی ادایه اقتدار و تمکن حاصل اولور . و مأمور
 اکثر احوالده مأمور بهی خرج و مشقته دوچار اولمقسزین ادا ایدر . واقعا
 قدرت ممکنه موجود اولماسه ده مأمور بهی ادا قابل اولور ، لکن قالب احوالده
 مأمور مشقته گرفتار اولور . ایشته مأموری مشقته دوچار ایتهمک ایچون
 قدرت ممکنه شرط قیلنمشدر . فقط بوندن فضله یسر و سهولت جهتی التزام
 اولونمامشدر .

قدرت میسره ، بویله دکلدر . سهولت بخش ایتیم اعتباریله قدرت ممکنه نیک
 فوقنده در . اسمندن ده آ کلاشیله جنی وجهله قدرت میسره ، قدرت ممکنه دن
 زیاده قولایلایدیجی بر قدرتردر . مأمور بهی ادایه مأموری تمکین و اقتدار ایتیمکله
 برابر فضله بر سهولت تأمین ایدر . ایستر واجبات بدنیهدن اولسون ، ایستر
 واجبات مالیه دن بولونسون علی العموم واجباتده قدرت ممکنه ، وجوب اداك
 شرطیدر . قدرت میسره ایسه اکثر واجبات مالیه ده وجوب ادا ایچون شرط
 قیلنمشدر .

واجبات بدنیه ، بدنأ ایفا ایدیلن واجباتدر . صلات ، صوم کبی . واجبات
 مالیه ، مالا ایفا ایدیلن واجباتدر . زکات ، عشر ، صدقه فطر کبی . بعض
 واجباتده واردرکه هم بدنأ ، هم ده مالا ایفا اولونور و بناء علیه واجبات بدنیه
 ایله واجبات مالیه دن مرکب اولور . حج کبی . واجبات بدنیه ده نیابت جاری

اولماز . بوجهته باشقه سنك يرينه بالوكاله نماز قيلمق ويا اوروج طوئق جائز
اولماز . واجبات مالیه ده ایسه نیابت جاری اولور . بناء علیه اداء زکاتده دیکرینی
توکیل صحیح اولور .

الحاصل مأموره ، واجب هر هانکی قسمندن اولور ایسه اولسون علی .
الاطلاق هر واجب وجوب اداسی ، قدرت ممکنه ایله مشروطدر . قدرت ممکنه
موجود اولماز سه هیچ بر مأمور بهک اداسی واجب اولماز . چونکه قدرت
ممکنه تکلیفک شرطی اولان قدرتک ادنی مرتبه سیدر . ابنای بشر ایچون واجبات
مالیه یی ایفا ، پاره صرفه توقف ایتمین واجبات بدنییه یی ادادن دها کوچ
اولدیغندن اکثر واجبات مالیه ده قدرت میسره شرط قیلنمشدر .

قدرت ممکنه ، شرط محضدر . قدرت میسره ، علت حکمنده اولان شرطدر .
مشروطک بقاسی شرط محضک بقاسی استلزام ایتیه جکندن واجبک ذمتده
بقاسی ایچون قدرت ممکنه ک بقاسی شرط دکدر . فقط قدرت میسره ، بونک
خلافه در . یعنی واجبک ذمتده بقاسی ایچون قدرت میسره ک بقاسی شرطدر .
بناء علیه قدرت میسره زائل اولور سه واجب وجوبی زائل وساقط اولور .
زیرا قدرت میسره علت حکمنده در . علتک انتفاسیه معلولک انتفاسی لازم .
کلیر . معلول علتندن انفکاک ایده من . آنک ایچوندر که قدرت میسره ، زائل
اولدینی صورتده دخی واجب ذمتده باقی قالاجق اولسه ، معلولک علتندن
انفکاک لازم کلیر وبوصورته صفت یسیرک عسره متقاب اوله سی اقتضا ایدر که
بطلانی ظاهر در .

بوسیبه مبنی قدرت میسره ایله ، یعنی نما شرطی ایله واجب اولان زکات
وعشردده مال نامینک هلاکله آنلرک وجوب اداسی ساقط اولور . فقط حج
ایله صدقه فطر ، قدرت ممکنه ایله واجب اولوب بونلرک وجوب اداسنده قدرت
میسره شرط اولما دیغندن تلف مال ایله آنلرک وجوبی ساقط اولماز .

ایضاح

یوقاریده (شرط) بخشیده مرور ایتشدی که شرط محض، کندیسنده اصلا
تأثیر وافضا بولونمایان شرطدر که اصل شرط، بوکا دینیر. بوجهله شرط محض،
برشیثك وجود وتحققنده حائر تأثیر اولادینی کی، آنده اصلا دخلی ده یوقدر.
یالکز اوشیثك موقوف علیهمیدر. علت حکمنده اولان شرط ایسه بویه دکلدر.
اوه برشیثك موقوف علیهی اولمله برابر آنك وجود وتحققنده فی الجمله حائر
تأثیردر. شرط محضده علت وسببده اولدینی کی حکم، کندیسنه مضاف اولمق
ویا حکمه موصل بولونمق ملاحظه اولونماز. یالکز حکم ویاخود علت حکم،
کندیسنه توقف ایدر. علت حکمنده اولان شرطده ایسه، حکم اوکا نسبت
واضافت اولونور. چونکه بونوع شرطده، حکمه مضاف الیه اولمغه صالح بر
علت کندیسنه معارض اولماز. آنکچون حکم، بالضروره اوشرطه اضافت
اولونور. تفصیلاتی ومثالیری علت وشرط بحثلرنده مرور ایتدیکی ایچون او
اوبخترله مراجعت اولونه.

قدرت ممکنه، وجوب ادانك شرط محضیدر، علت حکمنده اولان شرطی
دکلدر. چونکه قدرت ممکنه، مأمور به اولان فعلی ادایه تمکنك شرطی اولدینی
ایچون کندیسنده معنای علیت موجود دکلدر. آنکچون شرط محضدر.
بوندن طولاییدر که واجبك ذمتده بقای ایچون قدرت ممکنهك بقای شرط
قیلنماشدر. زیرا قدرت مذکوره، واجبك وجودینك شرطیدر، بقاسنك
شرطی دکلدر. وجود ایله بقا ایسه یکدیگرینك عینی دکلدر. باشقه باشقا
شیلدر. برشیثك وجودی ایچون شرط اولان بقای ایچونده شرط اولمق
لازم گلز. نته کیم شهود، نکاحك شرطی اولدینی حالد، بقاسنك شرطی
دکلدر. بوکا بناءدر که شهودك وفايله نکاح باطل اولمایور.

قدرت میسره بویه دکلدر. بونده علیت معنایی واردر. زیرا قدرت
میسره، واجبك صفتی کوچلکدن قولایلمغه تغییر ایدیور. یعنی مأمور به اولان

فعلك ایفاسنی قولایلاشدیریور، وبوصورتله آنده اجرای تأثیر ایده‌رک، آنک صفت یسر ایله واجب اولمەسنی ایجاب ایدیور دیمکدر . ایشته قدرت میسر، بوصورتله منای علیتی تضمن ایتدیکندن بومعنایه نظراً واجبک ذمته بقاسی ایچون آنکده بقاسی شرط قیلنمشدر . چونکه قدرت میسر، کنیدیسی موجود اولقسزین حکمک بقاسی قابل اولمایان علتلر جمله‌سنددر . زیرا قدرت میسرەنک فقدانی حائده واجبه صفت یسر تصور اولوناماز . یعنی قدرت مذکوره مرتفع اولورسه مکلف به اولان فعل ، قولایلقله ایفا اولوناماز . قولایلانی کوچلکه منقلب اولور .

شو مطالعاته بناءً واجبک بقاسی ایچون قدرت میسرەنک بقاسی شرط قیلنمشدر، قدرت ممکنه‌نک بقاسی شرط قیلنماشدر . حالبوکه ظاهره نظراً امر برعکس اولقی لازم کلیر . چونکه برایش ، بلا تمکن تصور اولوناماز ، اما بلا سهولت تصور اولونه‌بیلیر . بونک حکمیتی شودرکه اساساً قدرت ممکنه‌نک حقیقته مقتدر اولان حقیقت ادا ، نفس ادا در . وجوب بمحتنده ادایه تمکن واقفدار ایشه قدرت ممکنه‌نک بقاسندن مستغنیدر . زیرا وجوبک بقاسنده قدرتک امکان وجودی وتوهمی کافیدر . [کذافی المرأة]

ایشته قدرت میسرە ایله قدرت ممکنه‌نک ماهیتلرینه نظراً حاصل اولان شوفرقه بناءً مال نامینک هلاکیله زکات وعشرك وجوبی ساقط اولور، ذمته باقی قالماز . چونکه بونلرک ایکسی‌ده قدرت میسرە ایله واجب اولدقلرندن ، قدرت مذکوره‌نک انتفاسیله آنلرک وجوبی‌ده مشتی اولور .

ذکات که مالک قرقده برینجی فقرایه ویرمکدر ، بونده نصاب ایله نما شرط قیلنمشدر . نصاب خواجه اصلیه‌دن ماعدا ایکی یوز درهم کموش قیمتند مالیه اطلاق اولونور . نما ، تحقیقی و تقدیری اولقی اوزره ایکی‌یه تقسیم اولونور . برنجیسی حقیقه نما ، ایکنجیسی حکماً نما دیمک اولور . نما تحقیقی ، یاخود حقیقه نما ، حیواناتده توالد وتناسل ایله ، اموال سائرده تجارت ایله حاصل اولان نما حقیقیدر . نما تقدیری ، یاخود حکماً نما ، کیمسه‌نک اموالی کنیدی

یدنده و یا نائینک یعنی آنک مقامه قائم اولان مرهانی بر شخصک یدنده بولونمق صورتیه استنما واستراحه نمکندن عبارتدر. بوراده نما تعیری اعمدر. شو هرا یکی نوع نمایه شاملدر. نمآنک تحقق ایچون بر سنهک مروری تقدیر ایدلمشدر. یعنی «نما» حقیقاً و یا حکماً تحقق ایتشدر، آرق زکات و یرمک واجبدر. «دینه ییلمک ایچون مال، صاحبک یدینه کچدیکی تاریندن اعتباراً بر سنه مرور ایتک شرطدر. بوکا لسان فقهده (حولان حول) اطلاق اولونور. زکاتده قدرت میسره، نما ایله تحقق ایدر. چونکه اداء زکاتده قولایلق، تحقق ایدن نما وربجدن و یرمکه حاصل اولور. نصاب، قدرت میسره دن معدود دکلدر. زیرا نصاب، واجبک صفتی کوجلکدن قولایلقه تبدیل ایتمز. چونکه مالک ایکی یوزده بشنی و یرمکه قرقد برینی و یرمک، قولایلق خصوصنده مساویدر. زیرا ایکی یوزده بشده، قرقد بر دیمکدر. شو حالده ایکی یوز درهم کغوش قیمتده فضله مالی اولان بر ذاته اونک بشده برینی و یرمک نه درجهده قولای کلیسه، فرق درهم قیمتده مالی اولان بر شخصده آنک بر درهم قیمتده کی قسمی و یرمک، او نسبتده قولای کلیر.

بو جهتله نصاب، قدرت میسره دن عد ایدلیوب عقل و بلوغ کی شرائط اهلیت جمله سندن عد ایدلمشدر. بناء علیه نصابه مالک اولمایان، اداء زکاته اهل اولماز. و بناء علیه زکات و یرمک، اوکا فرض اولماز. چونکه اداء زکات، فقیری اغنا مقصدینه منفی فرض قیلنمشدر. اساساً زنکین اولمایان بر کیمسه ایسه دیکرینی اغنایه اهل دکلدر. اغنا، حسن شرعی ایله متصف اولایلمک ایچون مقتینک زنکین اوله سی لازم کلیر. غنا، یعنی زنکینک امور اضافیه دن اولدینی جهتله بر حد معینی یوقدر. آنک ایچون نصاب، غناه شرعی به اساس اتخاذا اولونمشدر.

خلاصه، زکاتک وجوب اداسی، نما ایله مشروط اولدیندن حولان حولدن اول، یعنی سنه تمام اولمازدن مقدم مال نامی تلف و یا ضایع اولسه زکاتک وجوبی ساقط اولور. لکن قصد استهلاك ایدیلیرسه ساقط اولماز.

زیرا بو تعدیدر ، فقیرك حقنی اتلافدر . شرع شریف ، زكات نامیه ثروتمند فقرايه بر حصه ، بر حق تفریق و تخصیص ایتشد . بو ، اونلرك حقیدر . بونی اتلاف ایتك ، اونلرك حقنه تجاوز دیمكدر . بنسأ علیه ضمان لازم کلیر ، یعنی قصدأ استهلاك ايله زكات ساقط اولماز . [قال الله عزوجل : وفي اموالهم حق معلوم للسائل والمحروم] .

اخطار — بروجہ معروض زكاتك وجوبنده نصاب و نمانك مشروطیتی ، مذهب حنفی به واكثر فقهای كوره در . بوجهته فقه حنفیجه زكات ، بر كره هر نوع مالده جاری اولمایوب یالكز اوج نوع مالده جاری اولور . برنجیسی نقود یعنی آلتون و كموش ، ایكنجیسی عروض یعنی تجارت ایچون اعداد او- لونان اموال منقوله ، اوجنجیسی ده حیوانات سائمه یعنی دول ایچون قیرلرده ، حر مالرده طاوار صورتنده بسله بن و سورو حالنده اوتلاتیلان حیواناتدر . بوج اوج نوع اموال خارجنده قالان ماللرده زكات جاری اولماز . بناء علیه مذهب حنفی به كوره عقاراتده ، اشیای یتیه والبسه ذاتیه ده ، بینك و آراه حیوانلری كبی ایش ایچون قوللانیلان حیواناتده ، چفت وصنعت آلات و ادواتنده و بونلره نمائل اموالده ، زكات واجب اولماز .

فقط مذهب مالکی به كوره بویه دكدر . یعنی فقه مالکیجه زكاتك وجوبنده نصابده ، نماده شرط دكدر . بوجهته فقهای مالکیه عنندده حوایج اصلیه دن فضله اولسون ، اولماسون و تجارت و نما قصدی بولونسون ، بولونماسون ، علی العموم منقول و غیر منقول اموالده زكات جاری اولور . آنك ایچون مذهب مالکی به كوره عقاراتده ، حتی مسكننده و اشیای یتیه و ذاتیه ده ، مراكب بحریه ده ، آلات و ادوات صنایعیه ده و بینك ، یوك حیوانلری ده داخل اولمق شرطیله بتون حیواناتده ، خلاصه (مال) اطلاق اولونه بیلن باجمله اموال و اشیاده زكات واجبدر . بو مقامده (واجب) دن مقصد ، فرضدر . بحث مخصوصنده سویه شدك كه اصولیون فرضده واجب اطلاق ایدرلر . [كذا فی البدایع] كورولیور كه مذهب مالکی زمانزده کی (قومونیزم) مسلكنه دهاقربدر ...

عشر ، اراضی عشریه حاصلاتندن اونده بری ادا ایتمکدر . بوده ذکات
خو غنددر . ولونک کبی واجبدر . اراضی عشریه ، حین فتحده غنیمته توزیع
اولونان ویا رضایله اسلامی قبول ایدن اسکی متصرفلری عهده سنده ابقا
ایدیلن ویا خود اراضی موادن احیا قلنان یرلردر . حین فتحده اسلامی قبول
ایتمه بن غیر مسلملرینده کافی السابق ابقا اولونان یرلرده اراضی خراجیه دیندر .
تفصیلاتی اراضی قانوننده وشرح لرنده مذکوردر .

عشرده قدرت میسره ایله واجبدر . چونکه شارع وجوب عشری ، تمام
ارضه یعنی ارضک حاصلاته تخصص ایتمش وجو غندن آزیی واجب قیلمشدر .
بواسطه محض سهولتدر . بناء علیه اراضی ، زراعتیه صالح اولما قله ویا محصولات
وجود بولما قله عشر واجب اولمایه جفی کبی ، اسباب سبویه دن ناشی حاصلات ،
تلف و ضایع اولما قله وجوب عشر ساقط اولور .

حج ایله صدقه فطره کلنجه . بونلر قدرت ممکنه ایله واجب اولدقلرندن
بونلرک دوام وبقاء وجوبلری ایچون قدرت مذکورده مک بقاسی مشروط قیلمامشدر .
بناءً علیه حج وجوب اداسنک شرطی اولان زاد ورا حله به مالک اولمق
حسبیه اوزرینه حج فرض اولان بر ذاتک . مؤخرأ مالی تلف ویا ضایع
اولسه وجوب حج ساقط اولماز . زیرا حجک شرطی اولان زاد ورا حله
قدرت میسرده دن معدود دکل ، بلکه قدرت ممکنه جمله سینددر . چونکه غالب
احوالده بلا مشقت مکلفی حجه تمکین واقدار ایدن . زاد ورا حله نک مجموعیدر .
مالکنز بریسی دکلددر . زیرا بلا زاد حج ایتمک حقیقتده ممکن ایسه ده پاک
نادردر . ورا حله سز حجه کیتمک ایسه هر نه قدرز نادر دکاسه ده اغلب واکثرده
دکلددر . اغلب اولادق زاد ورا حله ایله حج ایتمکدر . بوسبیلله زاد ورا حله
مجموعی قدرت ممکنه جمله سندن عد ایدلمشدر .

صدقه فطرده بویله در . بوده قدرت ممکنه ایله واجب اولمشدر . بوجهته
اوزرینه صدقه فطر واجب اولان بر کیسه نک اموالی ، بالآخره تلف اولسه
صدقه فطرک وجوبی ساقط اولماز . چونکه بونک وجوبنه شرط اولان نصاب ،

آنی اداده قولایلق اولقی ایچون دکلدر . بلكه اغنايه اهنيك ثبوتی ایچون در .
 زیرا صدقه فطر ، [اغنومهم عن المسئلة في مثل هذا اليوم = بو مثلی بایرام
 کونلرنده شو زوالی اصحاب فقر و احتیاجی ذل سؤالدن مستغنی قیلیکمز . I
 امر پیغمبریسيله واجب اولمشدر . اغنا ، غناء شرعی به مالک اولانلر اوزرینه
 واجب اولاجقندن صدقه فطرده نصاب ، اهلیت اغنانک ثبوتی ایچون شرط
 قیلنمشدر . بوکا بناء درکه بایرام کیجه سی نصابه مالک اولانلر اوزرینه ده صدقه
 فطر واجب اولور ...

